

अथ दशमं मण्डलम् ।

प्रथमोऽनुवाकः

। सू० १-१६ ।

(१) प्रथमं सूक्तम्

(१-७) सप्तर्चस्यास्य सूक्तस्याप्तचस्त्रित ऋषिः । अग्निर्देवता । त्रिष्टुप् छन्दः
अग्ने बृहन्नुषसांमूर्ध्वो अस्थान्निर्जगन्वान् तमसो ज्योतिषागात् ।
अग्निर्भानुना रुशता स्वङ्ग आ जातो विश्वा सद्धान्यप्राः १
स जातो गर्भो असि रोदस्योरग्ने चारुर्विभृत ओषधीषु ।
चित्रः शिशुः परि तमास्यक्तून् प्र मातृभ्यो अधि कर्निक्रदद्गाः २
विष्णुरित्था परमस्य विद्वाञ्जातो बृहन्नभि पाति तृतीयम् ।
आसा यदस्य पयो अक्रतु स्वं सचेतसो अभ्यर्चन्त्यत्र ३
अत उ त्वा पितुभृतो जनित्रीरन्नावृधं प्रति चरन्त्यत्रैः ।
ता ई प्रत्येषि पुनरन्यरूपा असि त्वं विक्षु मानुषीषु होता ४
होतारं चित्ररथमध्वरस्य यज्ञस्ययज्ञस्य केतुं रुशन्तम् ।
प्रत्यर्धि देवस्यदेवस्य मुह्ना श्रिया त्वश्मिमतिथिं जनानाम् ५
स तु वस्त्राण्यध पेशनानि वसानो अग्निर्नाभा पृथिव्याः ।
अरुषो जातः पुद इळायाः पुरोहितो राजन् यक्षीह देवान् ६
आ हि द्यावापृथिवी अग्ने उभे सदा पुत्रो न मातरा ततन्थ ।
प्र याह्यच्छौशतो यविष्ठाऽथा वह सहस्येह देवान् ७

(२) द्वितीयं सूक्तम्

(१-७) सप्तर्चस्यास्य सूक्तस्याप्तचस्त्रित ऋषिः । अग्निर्देवता । त्रिष्टुप् छन्दः
पिप्रीहि देवाँ उशतो यविष्ठ विद्वाँ ऋतूँर्भृतुपते यजेह ।
ये दैव्या ऋत्विजस्तेभिरग्ने त्वं होतृचफदृणामस्यार्यजिष्ठः १
वेषि होत्रमुत पोत्रं जनानां मन्धातासि द्रविणोदा ऋतावा ।
स्वाहा वयं कृणवामा हवींषि देवो देवान् यजत्वग्निरहन् २
आ देवानामपि पन्थामगन्म यच्छक्नवाम् तदनु प्रवौळहुम् ।
अग्निर्विद्वाँ त्स यजात् सेदु होता सो अध्वरान् त्स ऋतून् कल्पयाति ३
यद्वौ वयं प्रमिनाम व्रतानि विदुषां देवा अविदुष्टरासः ।

अग्निष्टद्विश्चमा पृणाति विद्वान् येभिर्देवाँ ऋतुभिः कल्पयाति ४
 यत् पाकत्रा मनसा दीनदक्षा न यज्ञस्य मन्वते मर्त्यासः ।
 अग्निष्टद्धोता क्रतुविद्विजानन् यजिष्ठो देवाँ ऋतुशो यजाति ५
 विश्वेषां ह्यध्वराणामनीकं चित्रं केतुं जनिता त्वा जुजान ।
 स आ यजस्व नृवतीरनु क्षाः स्पार्हा इषः क्षुमतीर्विश्वजन्याः ६
 यं त्वा द्यावापृथिवी यं त्वापस्त्वष्टा यं त्वा सुजनिमा जुजान ।
 पन्थामनु प्रविद्वान् पितृयानं द्युमदग्ने समिधानो वि भाहि ७

(३) तृतीयं सूक्तम्

(१-७) सप्तर्चस्यास्य सूक्तस्याप्तचस्त्रित ऋषिः । अग्निर्देवता । त्रिष्टुप् छन्दः
 इनो राजन्नरतिः समिद्धो रौद्रो दक्षाय सुषुमाँ अदर्शि ।
 चिकिद्धि भाति भासा बृहता ऽसिक्नीमेति रुशतीमपाजन् १
 कृष्णां यदेनीमभि वर्षसा भूजनयन् योषा बृहतः पितुर्जाम् ।
 ऊर्ध्वं भानुं सूर्यस्य स्तभायन् दिवो वसुभिररतिर्वि भाति २
 भद्रो भद्रया सचमान आगात् स्वसारं जारो अभ्येति पश्चात् ।
 सुप्रकेतैर्द्युभिरग्निर्वितिष्ठन् रुशद्भिर्वर्गैरभि राममस्थात् ३
 अस्य यामासो बृहतो न वृग्ननिन्धाना अग्नेः सख्युः शिवस्य ।
 ईड्यस्य वृष्णो बृहतः स्वासो भामासो यामन्नक्तवश्चिकित्रे ४
 स्वना न यस्य भामासः पवन्ते रोचमानस्य बृहतः सुदिवः ।
 ज्येष्ठैभिर्यस्तेजिष्ठैः क्रीळमद्भिर्वर्षिष्ठेभिर्भानुभिर्नक्षति द्याम् ५
 अस्य शुष्मासो ददृशानपवेर्जेहमानस्य स्वनयन् नियुद्धिः ।
 प्रत्नेभिर्यो रुशद्भिर्देवतमो वि रेभद्भिररतिर्भाति विभ्वा ६
 स आ वक्षि महि न आ च सत्सि दिवस्पृथिव्योररतिर्युवत्योः ।
 अग्निः सुतुकः सुतुकैभिरश्चै रभस्वद्धी रभस्वाँ एह गम्याः ७

(४) चतुर्थं सूक्तम्

(१-७) सप्तर्चस्यास्य सूक्तस्याप्तचस्त्रित ऋषिः । अग्निर्देवता । त्रिष्टुप् छन्दः
 प्र ते यक्षि प्र ते इयर्मि मन्म भुवो यथा वन्द्यो नो हवेषु ।
 धन्वन्निव प्रपा असि त्वमग्न इयक्षवे पूरवे प्रत्न राजन् १
 यं त्वा जनासो अभि संचरन्ति गाव उष्णमिव वृजं यविष्ठ ।

दूतो देवानामसि मर्त्यानामन्तर्महाँश्चरसि रोचनेन २
 शिशं न त्वा जेन्यं वर्धयन्ती माता बिभर्ति सचनस्यमाना ।
 धनोरधिं प्रवता यासि हर्यञ्जिगीषसे पशुरिवावसृष्टः ३
 मूरा अमूर न वयं चिकित्वो महित्वमग्ने त्वमङ्ग वित्से ।
 शयै वृत्रिश्चरति जिहयादन् रैरिह्यते युवतिं विश्पतिः सन् ४
 कूचिञ्जायते सनयासु नव्यो वने तस्थौ पलितो धूमकैतुः ।
 अस्त्रातापो वृषभो न प्र वैति सचेतसो यं प्रणयन्त मर्ताः ५
 तनूत्यजेव तस्करा वनर्गू रशनाभिर्दशभिरभ्यधीताम् ।
 इयं ते अग्ने नव्यसी मनीषा युद्धवा रथं न शचयद्भिरङ्गैः ६
 ब्रह्म च ते जातवेदो नमश्चेयं च गीः सदमिद्वर्धनी भूत् ।
 रक्षा णो अग्ने तनयानि तोका रक्षोत नस्तन्वोऽप्रयुच्छन् ७

(५) पञ्चमं सूक्तम्

(१-७) सप्तर्चस्यास्य सूक्तस्याप्तचस्त्रित ऋषिः । अग्निर्देवता । त्रिष्टुप् छन्दः
 एकः समुद्रो धरुणौ रयीणामस्मद्धदो भूरिजन्मा वि चष्टे ।
 सिषक्त्यूधनिर्णयोरुपस्थ उत्सस्य मध्ये निहितं पदं वेः १
 समानं नीळं वृषणो वसानाः सं जग्मिरे महिषा अर्वतीभिः ।
 ऋतस्य पदं कवयो नि पान्ति गुहा नामानि दधिरे पराणि २
 ऋतायिनी मायिनी सं दधाते मित्वा शिशुं जज्ञतुर्वर्धयन्ती ।
 विश्वस्य नाभिं चरतो ध्रुवस्य कवेश्चित् तन्तुं मनसा वियन्तः ३
 ऋतस्य हि वर्तनयः सुजातमिषो वाजाय प्रदिवः सचन्ते ।
 अधीवासं रोदसी वावसाने घृतैरन्नैर्वावृधाते मधूनाम् ४
 सप्त स्वसूरुषीर्वावशानो विद्वान् मध्व उज्जभारा दृशे कम् ।
 अन्तर्येमे अन्तरिक्षे पुराजा इच्छन् वृत्रिमविदत् पूषणस्य ५
 सप्त मर्यादाः कवयस्ततक्षुस्तासामेकामिदभ्यहरो गात् ।
 आयोर्हं स्कम्भ उपमस्य नीळे पथां विसर्गे धरुणेषु तस्थौ ६
 असञ्च सञ्च परमे व्योमन् दक्षस्य जन्मन्नदितेरुपस्थे ।
 अग्निर्ह नः प्रथमजा ऋतस्य पूर्वं आयुनि वृषभश्च धेनुः ७

षष्ठोऽध्यायः

। व० १-२८ ।

(६) षष्ठं सूक्तम्

(१-७) सप्तर्चस्यास्य सूक्तस्याप्तयस्त्रित ऋषिः । अग्निर्देवता । त्रिष्टुप् छन्दः
 अयं स यस्य शर्मन्नवोभिरग्नेरेधते जरिताभिष्टौ ।
 ज्येष्ठैभिर्यो भानुभिर्ऋषूणां पर्येति परिवीतो विभावा १
 यो भानुभिर्विभावा विभात्यग्निर्देवेभिर्ऋतावाजस्रः ।
 आ यो विवायं सख्या सखिभ्यो ऽपरिहृतो अत्यो न सप्तिः २
 ईशे यो विश्वस्या देववीतेरीशे विश्वायुरुषसो व्युष्टौ ।
 आ यस्मिन् मना हवीष्यग्रावरिष्टरथः स्कभ्नाति शूषैः ३
 शूषेभिर्वृधो जुषाणो अकैर्देवाँ अच्छा रघुपत्वा जिगाति ।
 मन्द्रो होता स जुहाइ यजिष्ठः संमिश्रो अग्निरा जिघर्ति देवान् ४
 तमुस्त्रामिन्द्रं न रेजमानमग्निं गीर्भिर्नमोभिरा कृणुध्वम् ।
 आ यं विप्रासो मतिभिर्गृणन्ति जातवेदसं जुह्वं सहानाम् ५
 सं यस्मिन् विश्वा वसूनि जग्मुर्वाजे नाश्वाः सप्तीवन्त एवैः ।
 अस्मे ऊतीरिन्द्रवाततमा अर्वाचीना अग्ने आ कृणुष्व ६
 अधा ह्यग्ने म्हा निषद्या सद्यो जज्ञानो हव्यो बभूथ ।
 तं ते देवासो अनु केतमायन्नधावर्धन्त प्रथमास ऊमाः ७

(७) सप्तमं सूक्तम्

(१-७) सप्तर्चस्यास्य सूक्तस्याप्तयस्त्रित ऋषिः । अग्निर्देवता । त्रिष्टुप् छन्दः
 स्वस्ति नो दिवो अग्ने पृथिव्या विश्वायुर्धेहि यजथाय देव ।
 सचैमहि तव दस्म प्रकैतैरुरुष्या गं उरुभिर्देव शंसैः १
 इमा अग्ने मतयस्तुभ्यं जाता गोभिरश्वैरभि गृणन्ति राधः ।
 यदा ते मतो अनु भोगमानुड्वसो दधानो मतिभिः सुजात २
 अग्निं मन्ये पितरमग्निमापिमग्निं भ्रातरं सदमित् सखायम् ।
 अग्नेरनीकं बृहतः सपर्य दिवि शक्रं यजतं सूर्यस्य ३
 सिद्धा अग्ने धियो अस्मे सनुत्रीर्यं त्रायसे दम् आ नित्यहोता ।
 ऋतावा स रोहिदश्वः पुरुक्षुर्द्युभिरस्मा अर्हभिर्वाममस्तु ४
 द्युभिर्हितं मित्रमिव प्रयोगं प्रब्रमृत्वजमध्वरस्य जारम् ।
 बाहुभ्यामग्निमायवोऽजनन्त विक्षु होतां न्यसादयन्त ५
 स्वयं यजस्व दिवि देव देवान् किं ते पाकः कृणवदप्रचेताः ।

यथायज ऋतुभिर्देव देवानेवा यजस्व तन्वं सुजात ६
भवा नो अग्नेऽवितोत गोपा भवा वयस्कृदुत नो वयोधाः ।
रास्वा च नः सुमहो हव्यदातिं त्रास्वोत नस्तन्वोऽप्रयुच्छन् ७

(८) अष्टमं सूक्तम्

(१-६) नवर्चस्यास्य सूक्तस्य त्वाष्ट्रस्त्रिशिरा ऋषिः । (१-६)

प्रथमादितृचद्वयस्याग्निः, (७-६) सप्तम्यादितृचस्य चेन्द्रो देवते । त्रिष्टुप् छन्दः
प्र केतुना बृहता यात्यग्निरा रोदसी वृषभो रौरवीति ।
दिवश्चिदन्ताँ उपमाँ उदानळपामुपस्थै महिषो ववर्ध १
मुमोद् गर्भो वृषभः ककुघानस्त्रेमा वत्सः शिमीवाँ अरावीत् ।
स देवतात्युद्यतानि कृणवन् त्वेषु क्षयेषु प्रथमो जिगाति २
आ यो मूर्धानं पित्रोररब्ध न्यध्वरे दधिरे सूरौ अर्णः ।
अस्य पत्नन्नरुषीरश्वबुधा ऋतस्य योनौ तन्वौ जुषन्त ३
उषउषो हि वसो अग्रमेषि त्वं यमयौरभवो विभावा ।
ऋतार्य सप्त दधिषे पदानि जनयन् मित्रं तन्वेऽस्वायै ४
भुवश्चक्षुर्मह ऋतस्य गोपा भुवो वरुणो यदृतायु वेषि ।
भुवो अपां नपाजातवेदो भुवो दूतो यस्य हव्यं जुजौषः ५
भुवो यज्ञस्य रजसश्च नेता यत्रा नियुद्धिः सचसे शिवाभिः ।
दिवि मूर्धानं दधिषे स्वर्षा जिह्वामग्ने चकृषे हव्यवाहम् ६
अस्य त्रितः क्रतुना ववे अन्तरिच्छन् धीतिं पितुरेवैः परस्य ।
सचस्यमानः पित्रोरुपस्थै जामि ब्रुवाण आयुधानि वेति ७
स पित्र्याणयायुधनि विद्वानिन्द्रैषित आप्तयो अभ्ययुध्यत् ।
त्रिशीर्षाणं सप्तर्शिमं जघन्वान् त्वाष्ट्रस्य चिन्निः संसृजे त्रितो गाः ८
भूरीदिन्द्र उदिनक्षन्तमोजो ऽवाभिनत् सत्पतिर्मन्यमानम् ।
त्वाष्ट्रस्य चिद्विश्वरूपस्य गोनामाचक्राणस्त्रीणि शीर्षा परा वर्क ९

(९) नवमं सूक्तम्

(१-६) नवर्चस्यास्य सूक्तस्याम्बरीषः सिन्धुद्वीपस्त्वाष्ट्रस्त्रिशिरा वा ऋषिः । आपो
देवताः । (१-४, ६) प्रथमादिचतुर्ऋचां षष्ठ्याश्च गायत्री, (५) पञ्चम्या वर्धमाना
गायत्री, (७) सप्तम्याः प्रतिष्ठा गायत्री, (८-९) अष्टमीनवम्योश्चानुष्टुप् छन्दांसि

आपो हि ष्ठा मयोभुवस्ता न ऊर्जे दधातन । महे रणाय चक्षसे १
 यो वः शिवतमो रसस्तस्य भाजयतेह नः । उशतीरिव मातरः २
 तस्मा अरं गमाम वो यस्य क्षयाय जिन्वथ । आपो जनयथा च नः ३
 शं नो देवीरभिष्टय आपो भवन्तु पीतये । शं योरभि स्रवन्तु नः ४
 ईशाना वार्याणां क्षयन्तीश्चर्षणीनाम् । अपो याचामि भेषजम् ५
 अप्सु मे सोमो अब्रवीदन्तर्विश्वानि भेषजा । अग्निं च विश्वशंभुवम् ६
 आपः पृणीत भेषजं वरूथं तन्वेरे मर्म । ज्योक् च सूर्यं दृशे ७
 इदमापः प्र वहत यत् किं च दुरितं मयि ।
 यद्वाहमभिदुद्रोह यद्वा शेष उतानृतम् ८
 आपो अद्यान्वचारिषुं रसेन समगस्महि ।
 पर्यस्वानग्ना आ गहि तं मा सं सृज वर्चसा ९

(१०) दशमं सूक्तम्

(१-१४) चतुर्दशर्चस्यास्य सूक्तस्य (१, ३, ५-७, ११, १३) प्रथमातृतीययोर्ऋचोः
 पञ्चम्यादितृचस्यैकादशीत्रयोदशयोश्च वैवस्वती यमी ऋषिका, (२, ४, ८-१०, १२,
 १४) द्वितीयाचतुर्थ्योरष्टम्यादितृचस्य द्वादशीचतुर्दशयोश्च वैवस्वतो यम ऋषिः ।
 (१, ३, ५-७, ११, १३) प्रथमातृतीययोः पञ्चम्यादितृचस्यैकादशीत्रयोदशयोश्च यमः,
 (२, ४, ८-१०, १२, १४) द्वितीयाचतुर्थ्योरष्टम्यादितृचस्य द्वादशीचतुर्दशयोश्च यमी
 देवते । (१-१२, १४) प्रथमादिद्वादशर्चा चतुर्दश्याश्च त्रिष्टुप्, (१३) त्रयोदश्याश्च
 विराट्स्थाना छन्दसी

ओ चित् सखायं सख्या ववृत्यां तिरः पुरु चिदर्शवं जगन्वान् ।
 पितुर्नपातमा दधीत वेधा अधि क्षमिं प्रतरं दीर्घ्यानः १
 न ते सखा सख्यं वष्टयेतत् सलक्ष्मा यद्विषुरूपा भवति ।
 महस्पुत्रासो असुरस्य वीरा दिवो धर्तारि उर्विया परि ख्यन् २
 उशन्ति घा ते अमृतास एतदेकस्य चित् त्यजसं मर्त्यस्य ।
 नि ते मनो मनसि धाय्यस्मे जन्युः पतिस्तन्वश्मा विविश्याः ३
 न यत् पुरा चकृमा कद्ध नूनमा वदन्तो अनृतं रपेम ।
 गन्धर्वो अप्स्वप्या च योषा सा नो नाभिः परमं जामि तन्नौ ४
 गर्भे नु नौ जनिता दंपती कर्देवस्त्वष्टा सविता विश्वरूपः ।
 नकिरस्य प्र मिनन्ति वृतानि वेदं नावस्य पृथिवी उत द्यौः ५

को अस्य वेद प्रथमस्याहः क ई ददर्श क इह प्र वौचत् ।
 बृहन्मित्रस्य वरुणस्य धाम् कर्तु ब्रव आहनो वीच्या नृन् ६
 यमस्य मा यम्यंशं काम् आगन् त्समाने योनौ सहशेय्याय ।
 जायेव पत्यै तन्वे रिरिच्यां वि चिद्वहेव रथ्यैव चक्रा ७
 न तिष्ठन्ति न नि मिषन्त्येते देवानां स्पर्श इह ये चरन्ति ।
 अन्येन मदाहनो याहि तूयं तेन वि वृह रथ्यैव चक्रा ८
 रात्रीभिरस्मा अहभिर्दशस्येत् सूर्यस्य चक्षुर्मुहुरुन्मिमीयात् ।
 दिवा पृथिव्या मिथुना सबन्धू यमीर्यमस्य बिभृयादजामि ९
 आ घा ता गच्छानुत्तेरा युगानि यत्र जामयः कृणवन्नजामि ।
 उप बर्बृहि वृषभार्य ब्राह्मन्यमिच्छस्व सुभगे पतिं मत् १०
 किं भ्रातासद्यदेनाथं भवति किमु स्वसा यन्निर्ऋतिर्निगच्छात् ।
 काममूता ब्रह्मेतद्रपामि तन्वा मे तन्वंशं सं पिपृग्धि ११
 न वा उ ते तन्वा तन्वंशं सं पृच्यां पापमाहुर्यः स्वसारं निगच्छात् ।
 अन्येन मत् प्रमुदः कल्पयस्व न ते भ्राता सुभगे वष्टयेतत् १२
 ब्रतो ब्रतासि यम् नैव ते मनो हृदयं चाविदाम ।
 अन्या किल त्वां कक्ष्यैव युक्तं परि ष्वजाते लिबुजेव वृक्षम् १३
 अन्यमू षु त्वं यम्यन्य उ त्वां परि ष्वजाते लिबुजेव वृक्षम् ।
 तस्य वा त्वं मन इच्छा स वा तवाऽधा कृणुष्व संविदं सुभद्राम् १४

(११) एकादशं सूक्तम्

(१-६) नवर्चस्यास्य सूक्तस्याङ्गिर्हविर्धान ऋषिः । अग्निर्देवता । (१-६)

प्रथमादितृचद्वयस्य जगती, (७-६) सप्तम्यादितृचस्य च त्रिष्टुप् छन्दसी
 वृषा वृष्णो दुदुहे दोहसा दिवः पर्यासि यद्बो अदितेरदाभ्यः ।
 विश्वं स वेद वरुणो यथा धिया स यज्ञियौ यजतु यज्ञियाँ ऋतून् १
 रपद्रन्धर्वीरघ्यां च योषणा नदस्य नादे परि पातु मे मनः ।
 इष्टस्य मध्ये अदितिर्नि धातु नो भ्राता नो ज्येष्ठः प्रथमो वि वौचति २
 सो चिन्नु भद्रा क्षुमती यशस्वत्युषा उवास मनवे स्वर्वती ।
 यदीमुशन्तमुशतामनु क्रतुमग्निं होतारं विदथाय जीर्जनन् ३
 अध त्यं द्रुप्सं विर्भ्वं विचक्षणं विराभरदिषितः श्येनो अध्वरे ।
 यदी विशो वृणते दस्ममार्या अग्निं होतारमध धीरजायत ४

सदासि रणवो यवसेव पुष्यते होत्राभिरग्ने मनुषः स्वध्वरः ।
 विप्रस्य वा यच्छशमान उक्थ्यं वाजं सस्वाँ उपयासि भूरिभिः ५
 उदीरय पितरां जार आ भगमिर्यन्नति हर्यतो हत्त इष्यति ।
 विवक्ति वह्निः स्वपस्यते मुखस्तविष्यते असुरो वेपते मृती ६
 यस्ते अग्ने सुमतिं मर्तो अन्नत् सहसः सूनो अति स प्र शृणवे ।
 इषं दधानो वहमानो अश्वैरा स द्युमाँ अमवान् भूषति द्यून् ७
 यदग्र एषा समितिर्भवाति देवी देवेषु यजता यजत्र ।
 रत्नां च यद्विभजासि स्वधावो भागं नो अत्र वसुमन्तं वीतात् ८
 श्रुधी नो अग्ने सदने सधस्थे युद्ध्वा रथममृतस्य द्रवितुम् ।
 आ नो वह रोदसी देवपुत्रे माकिर्देवानामपे भूरिह स्याः ९

(१२) द्वादशं सूक्तम्

(१-९) नवर्चस्यास्य सूक्तस्याङ्गिर्हविर्धान ऋषिः । अग्निर्देवता । त्रिष्टुप् छन्दः
 द्यावा ह क्षामा प्रथमे ऋतेनाऽभिश्चावे भवतः सत्यवाचा ।
 देवो यन्मर्तान् यजथाय कृणवन् त्सीदुद्धोता प्रत्यङ् स्वमसुं यन् १
 देवो देवान् परिभूऋतेन वहा नो हव्यं प्रथमश्चिकित्वान् ।
 धूमकैतुः समिधा भाऋजीको मन्द्रो होता नित्यो वाचा यजीयान् २
 स्वावृग्देवस्यामृतं यदी गोरतो जातासौ धारयन्त उर्वी ।
 विश्वे देवा अनु तत् ते यजुर्गुर्दुहे यदेनी दिव्यं घृतं वाः ३
 अर्चामि वां वर्धायापो घृतसू द्यावाभूमी शृणुतं रोदसी मे ।
 अहा यद् द्यावोऽसुनीतिमयन् मध्वा नो अत्र पितरां शिशीताम् ४
 किं स्वन्नो राजा जगृहे कदस्याऽति वृतं चक्रमा को वि वैद ।
 मित्रश्चिद्धि ष्मा जुहुराणो देवाञ्छलोको न यातामपि वाजो अस्ति ५
 दुर्मन्त्वत्रामृतस्य नाम सलक्ष्मा यद्विषुरुपा भवाति ।
 यमस्य यो मनवते सुमन्त्वग्ने तमृष्व पाह्यप्रयुच्छन् ६
 यस्मिन् देवा विदर्थे मादयन्ते विवस्वतः सदने धारयन्ते ।
 सूर्ये ज्योतिरदधुर्मास्यश्क्तून् परि द्योतनिं चरतो अजस्रा ७
 यस्मिन् देवा मन्मनि संचरन्त्यपीच्येऽ न वयमस्य विद्य ।
 मित्रो नो अत्रादितिरनागान् त्सविता देवो वरुणाय वोचत् ८
 श्रुधी नो अग्ने सदने सधस्थे युद्ध्वा रथममृतस्य द्रवितुम् ।

आ नो वह रोदसी देवपुत्रे माकिर्देवानामपे भूरिह स्याः ६

(१३) त्रयोदशं सूक्तम्

(१-५) पञ्चर्चस्यास्य सूक्तस्यादित्यो विवस्वानाङ्गिर्हविर्धानो वा ऋषिः । हविर्धाने शकटे देवते । (१-४) प्रथमादिचतुर्भृचां त्रिष्टुप्, (५) पञ्चम्याश्च जगती छन्दसी युजे वा ब्रह्म पूर्व्यं नमोभिर्वि श्लोकं एतु पथ्यैव सुरैः । शृण्वन्तु विश्वे अमृतस्य पुत्रा आ ये धामानि दिव्यानि तस्थुः १ यमे इव यतमाने यदैतं प्र वा भरन् मानुषा देवयन्तः । आ सीदतं स्वमु लोकं विदाने स्वासस्थे भवतमिन्दवे नः २ पञ्च पदानि रूपो अन्वरोहं चतुष्पदीमन्वैमि ब्रूतेन । अक्षरैण प्रति मिम एतामृतस्य नाभावधि सं पुनामि ३ देवेभ्यः कर्मवृणीत मृत्युं प्रजायै कर्ममृतं नावृणीत । बृहस्पतिं यज्ञमकृणवत ऋषिं इंप्रयां यमस्तन्वंशं प्रारिरेचीत् ४ सप्त क्षरन्ति शिशवे मरुत्वते पित्रे पुत्रासो अप्येवीवतनृतम् । उभे इदस्योभयस्य राजत उभे यतेते उभयस्य पुष्यतः ५

(१४) चतुर्दशं सूक्तम्

(१-१६) षोडशर्चस्यास्य सूक्तस्य वैवस्वतो यम ऋषिः । (१-५, १३-१६) प्रथमादिपञ्चर्चां त्रयोदश्यादिचतसृणाञ्च यमः, (६) षष्ठ्या अङ्गिरःपित्रथर्वभृगवः, (७-९) सप्तम्यादितृचस्य लिङ्गोक्ताः पितरो वा, (१०-१२) दशम्यादितृचस्य च सारमेयौ श्वानौ देवताः । (१-१२) प्रथमादिद्वादशर्चां त्रिष्टुप्, (१३-१४, १६) त्रयोदशीचतुर्दशीषोडशीनामनुष्टुप्, (१५) पञ्चदश्याश्च बृहती छन्दांसि परेयिवांसं प्रवतौ महीरनु बृहभ्यः पन्थामनुपस्पशानम् । वैवस्वतं संगमनं जनानां यमं राजानं हविषा दुवस्य १ यमो नो गातुं प्रथमो विवेद नैषा गव्यूतिरपभर्त्वा उ । यत्रा नः पूर्वे पितरः परेयुरेना जज्ञानाः पथ्याइ अनु स्वाः २ मातली क्वैर्यमो अङ्गिरोभिर्बृहस्पतिर्भृक्वभिर्वावृधानः । याँश्च देवा वावृधुर्ये च देवान् त्स्वाहान्ये स्वधयान्ये मदन्ति ३ इमं यम प्रस्तरमा हि सीदाऽङ्गिरोभिः पितृभिः संविदानः । आ त्वा मन्त्राः कविशस्ता वहन्त्वेना राजन् हविषा मादयस्व ४

अङ्गिरोभिरा गंहि यज्ञियैभिर्यमं वैरूपैरिह मादयस्व ।
 विवस्वन्तं हुवे यः पिता ते ऽस्मिन् यज्ञे बर्हिष्या निषद्य ५
 अङ्गिरसो नः पितरो नवग्वा अर्थवाणो भृगवः सोम्यासः ।
 तेषां वयं सुमतौ यज्ञियानामपि भद्रे सौमनसे स्याम ६
 प्रेहि प्रेहि पृथिभिः पूर्वैर्भिर्यत्रा नः पूर्वं पितरः परेयुः ।
 उभा राजाना स्वधया मदन्ता यमं पश्यासि वरुणं च देवम् ७
 सं गच्छस्व पितृभिः सं यमेनेष्टापूर्येन परमे व्योमन् ।
 हित्वायावद्यं पुनरस्तमेहि सं गच्छस्व तन्वा सुवर्चाः ८
 अपेत वीत वि च सर्पतातो ऽस्मा एतं पितरो लोकमक्रन् ।
 अहोभिरद्भिरक्तुभिव्यक्तं यमो ददात्यवसानमस्मै ९
 अति द्रव सारमेयौ श्वानौ चतुरक्षौ शबलौ साधुना पथा ।
 अथा पितृन् त्सुविदत्राँ उपैहि यमेन ये संधमादं मदन्ति १०
 यौ ते श्वानौ यम रक्षितारौ चतुरक्षौ पथिरक्षी नृचक्षसौ ।
 ताभ्यामेनं परि देहि राजन् त्स्वस्ति चास्मा अनमीवं च धेहि ११
 उरूणासावसुतृपा उदुम्बलौ यमस्य दूतौ चरतो जनाँ अन्तु ।
 तावस्मभ्यं दृशये सूर्याय पुनर्दातामसुमद्येह भद्रम् १२
 यमाय सोर्म सुनुत यमाय जुहता हविः ।
 यमं ह यज्ञो गच्छत्यग्निदूतो अरकृतः १३
 यमाय घृतवद्धविर्जुहोत प्र च तिष्ठत ।
 स नो देवेष्वा यमद् दीर्घमायुः प्र जीवसे १४
 यमाय मधुमत्तमं राज्ञे हव्यं जुहोतन ।
 इदं नम ऋषिभ्यः पूर्वजेभ्यः पूर्वैभ्यः पथिकृद्भिः १५
 त्रिकद्रुकेभिः पतति षळ्वीरिक्मिद्वहत् ।
 त्रिष्टुब्गायत्री छन्दासि सर्वा ता यम आहिता १६

(१५) पञ्चदशं सूक्तम्

(१-१४) चतुर्दशर्चस्यास्य सूक्तस्य यामायनः शङ्ख ऋषिः । पितरो देवताः । (१-१०, १२-१४) प्रथमादिदशर्चा द्वादश्यादितृचस्य च त्रिष्टुप्, (११) एकादश्याश्च जगती छन्दसी

उदीरतामवर उत् परास उन्मध्यमाः पितरः सोम्यासः ।

असुं य ईयुरवृका ऋतज्ञास्ते नोऽवन्तु पितरो हवेषु १
 इदं पितृभ्यो नमो अस्त्वद्य ये पूर्वासो य उपरास ईयुः ।
 ये पार्थिवे रजस्या निषत्ता ये वा नूनं सुवृजनासु विद्म २
 आहं पितृन् त्सुविदत्राँ अवित्सि नपातं च विक्रमणं च विष्णोः ।
 बर्हिषदो ये स्वधया सुतस्य भजन्त पित्वस्त इहागमिष्ठाः ३
 बर्हिषदः पितर ऊत्यर्वागिमा वो हव्या चक्रमा जुषध्वम् ।
 त आ गतावसा शतमेनाऽथा नः शं योरपो दधात ४
 उपहृताः पितरः सोम्यासो बर्हिष्येषु निधिषु प्रियेषु ।
 त आ गमन्तु त इह श्रुवन्त्वधि ब्रुवन्तु तेऽवन्त्वस्मान् ५
 आच्या जानु दक्षिणतो निषद्येयं यज्ञमभि गृणीत विश्वे ।
 मा हिंसिष्ट पितरः केन चिन्नो यद्वा आगः पुरुषता कराम ६
 आसीनासो अरुणीनामुपस्थे रयिं धत्त दाशुषे मर्त्याय ।
 पुत्रेभ्यः पितरस्तस्य वस्वः प्र यच्छत त इहोर्ज दधात ७
 ये नः पूर्वे पितरः सोम्यासोऽनूहिरे सोमपीथं वसिष्ठाः ।
 तेभिर्यमः सरराणो हवीष्युशन्नुशब्दिः प्रतिकाममत्तु ८
 ये तातृषुदेवत्रा जेहमाना होत्राविदः स्तोमं तष्टासो अकैः ।
 आग्ने याहि सुविदत्रैभिरवाङ् सत्यैः कव्यैः पितृभिर्घर्मसब्दिः ९
 ये सत्यासो हविरदौ हविष्पा इन्द्रेण देवैः सरथं दधानाः ।
 आग्ने याहि सहस्रं देववन्दैः परैः पूर्वैः पितृभिर्घर्मसब्दिः १०
 अग्निष्वात्ताः पितर एह गच्छत सदःसदः सदत सुप्रणीतयः ।
 अत्ता हवीषि प्रयतानि बर्हिष्यथा रयिं सर्ववीरं दधातन ११
 त्वमग्न ईळितो जातवेदोऽवाङ्हुव्यानि सुरभीणि कृत्वी ।
 प्रादाः पितृभ्यः स्वधया ते अन्नन्नद्धि त्वं देव प्रयता हवीषि १२
 ये चेह पितरो ये च नेह याँश्च विद्य याँ उँ च न प्रविद्य ।
 त्वं वैत्थ यति ते जातवेदः स्वधाभिर्यज्ञं सुकृतं जुषस्व १३
 ये अग्निदग्धा ये अनग्निदग्धा मध्ये दिवः स्वधया मादयन्ते ।
 तेभिः स्वराळसुनीतिमेतां यथावशं तन्व कल्पयस्व १४

(१६) षोडशं सूक्तम्

(१-१४) चतुर्दशर्चस्यास्य सूक्तस्य यामायनो दमन ऋषिः । अग्निर्देवता । (१-

१०) प्रथमादिदशर्चा त्रिष्टुप्, (११-१४) एकादश्यादिचतसृणाञ्चानुष्टुप् छन्दसी
मैर्नमग्ने वि दहो माभि शौचो मास्य त्वचं चिक्षिपो मा शरीरम् ।
यदा शृतं कृणवौ जातवेदो ऽथैमेनं प्र हिणुतात् पितृभ्यः १
शृतं यदा करसि जातवेदो ऽथैमेनं परि दत्तात् पितृभ्यः ।
यदा गच्छत्यसुनीतिमेतामथा देवानां वशनीर्भवाति २
सूर्यं चक्षुर्गच्छतु वातमात्मा द्यां च गच्छ पृथिवीं च धर्मणा ।
अपो वा गच्छ यदि तत्र ते हितमोषधीषु प्रति तिष्ठा शरीरैः ३
अजो भागस्तपसा तं तपस्व तं तै शोचिस्तपतु तं तै अर्चिः ।
यास्तै शिवास्तन्वौ जातवेदस्ताभिर्वहेनं सुकृतामु लोकम् ४
अव सृज पुनरग्ने पितृभ्यो यस्त आहुतश्चरति स्वधाभिः ।
आयुर्वसान् उप वेतु शेषः सं गच्छतां तन्वा जातवेदः ५
यत् तै कृष्णः शकुन आतुतोद पिपीलः सर्प उत वा श्वापदः ।
अग्निष्टद्विश्वादगदं कृणोतु सोमश्च यो ब्राह्मणाँ आविवेश ६
अग्नेर्वम् परि गोभिर्व्ययस्व सं प्रोर्णुष्व पीवसा मेदसा च ।
नेत् त्वा धृष्णुर्हरसा जर्हषाणो दधृग्विधद्यन् पर्यङ्ख्याते ७
इममग्ने चमसं मा वि जिह्वरः प्रियो देवानामुत सोम्यानाम् ।
एष यश्चमसो देवपानस्तस्मिन् देवा अमृता मादयन्ते ८
क्रव्यादमग्निं प्र हिणोमि दूरं यमराज्ञो गच्छतु रिप्रवाहः ।
इहैवायमितरो जातवेदा देवेभ्यो हव्यं वहतु प्रजानन् ९
यो अग्निः क्रव्यात् प्रविवेश वो गृहमिमं पश्यन्नितरं जातवेदसम् ।
तं हरामि पितृयज्ञाय देवं स घर्ममिन्वात् परमे सधस्थे १०
यो अग्निः क्रव्यवाहनः पितृन् यक्षदृतावृधः ।
प्रेदु हव्यानि वोचति देवेभ्यश्च पितृभ्य आ ११
उशन्तस्त्वा नि धीमह्युशन्तः समिधीमहि ।
उशन्तुशत आ वह पितृन् हविषे अत्तवे १२
यं त्वमग्ने समदहस्तमु निर्वापया पुनः ।
क्रियाम्बवत्र रोहतु पाकदूर्वा व्यल्कशा १३
शीतिके शीतिकावति ह्यादिके ह्यादिकावति ।
मण्डूक्याइ सु सं गम इमं स्वश्निं हर्षय १४

द्वितीयोऽनुवाकः

। सू० १७-२६ ।

(१७) सप्तदशं सूक्तम्

(१-१४) चतुर्दशर्चस्यास्य सूक्तस्य यामायनो देवश्रवा ऋषिः । (१-२) प्रथमाद्वितीययोर्ऋचोः सरण्यूः, (३-६) तृतीयादिचतसृणां पूषा, (७-९) सप्तम्यादितृचस्य सरस्वती, (१०, १४) दशमीचतुर्दशयोरापः, (११-१३) एकादश्यादितृचस्य च आपः सोमो वा देवताः । (१-१२) प्रथमादिद्वादशर्चा त्रिष्टुप्, (१३) त्रयोदश्या अनुष्टुप्पुरस्ताद्बृहती वा, (१४) चतुर्दश्याश्चानुष्टुप् छन्दांसि त्वष्टा दुहित्रे वंहतुं कृणोतीतीदं विश्वं भुवन्नं समैति ।

यमस्य माता पर्युह्यमाना महो जाया विवस्वतो ननाश १
अपागूहन्नमृतां मर्त्येभ्यः कृत्वी सर्वर्णामददुर्विवस्वते ।
उताश्विनावभरद्यत् तदासीदजहादु द्वा मिथुना सरण्यूः २
पूषा त्वेतश्चर्यावयतु प्र विद्वाननष्टपशर्भुवनस्य गोपाः ।
स त्वैतेभ्यः परि ददत् पितृभ्यो ऽग्निर्देवेभ्यः सुविदत्रियेभ्यः ३
आर्युर्विश्वायुः परि पासति त्वा पूषा त्वा पातु प्रपथे पुरस्तात् ।
यत्रासते सुकृतो यत्र ते ययुस्तत्र त्वा देवः सविता दधातु ४
पूषेमा आशा अनु वेद सर्वाः सो अस्माँ अभयतमेन नेषत् ।
स्वस्तिदा आघृणिः सर्ववीरो ऽप्रयुच्छन् पुर एतु प्रजानन् ५
प्रपथे पथामजनिष्ट पूषा प्रपथे दिवः प्रपथे पृथिव्याः ।
उभे अभि प्रियतमे सधस्थे आ च परा च चरति प्रजानन् ६
सरस्वतीं देवयन्तो हवन्ते सरस्वतीमध्वरे तायमाने ।
सरस्वतीं सुकृतो अह्वयन्त सरस्वती दाशुषे वार्यं दात् ७
सरस्वति या सरथं ययार्थं स्वधाभिर्देवि पितृभिर्मदन्ती ।
आसद्यास्मिन् बर्हिषि मादयस्वाऽनमीवा इष आ धेह्यस्मे ८
सरस्वतीं यां पितरो हवन्ते दक्षिणा यज्ञमभिनक्षमाणाः ।
सहस्रार्घमिळो अत्र भागं रायस्पोषं यजमानेषु धेहि ९
आपो अस्मान् मातरः शुन्धयन्तु घृतेन नो घृतर्ष्वः पुनन्तु ।
विश्वं हि रिप्रं प्रवहन्ति देवीरुदिदाभ्यः शुचिरा पूत एमि १०
द्रप्सश्चस्कन्द प्रथमाँ अनु द्यूनिमं च योनिमनु यश्च पूर्वः ।
समानं योनिमनु संचरन्तं द्रप्सं जुहोम्यनु सप्त होत्राः ११

यस्ते द्रुप्सः स्कन्दति यस्ते अंशुर्बाहुच्युतो धिषणाया उपस्थात् ।
 अध्वर्योर्वा परि वा यः पवित्रात् तं तै जुहोमि मनसा वर्षत्कृतम् १२
 यस्ते द्रुप्सः स्कन्नो यस्ते अंशुरवश्च यः परः सुचा ।
 अयं देवो बृहस्पतिः सं तं सिञ्चतु राधसे १३
 पर्यस्वतीरोषधयः पर्यस्वन्मामकं वचः ।
 अपां पर्यस्वदित् पयस्तेन मा सह शुन्धत १४

(१८) अष्टादशं सूक्तम्

(१-१४) चतुर्दशर्चस्यास्य सूक्तस्य यामायनः संकुसुक ऋषिः । (१-४)
 प्रथमादिचतुर्भृचां मृत्युः, (५) पञ्चम्या धाता, (६) षष्ठ्यास्त्वष्टा, (७-१३)
 सप्तम्यादिसप्तानां पितृमेधः, (१४) चतुर्दश्याश्च पितृमेधः प्रजापतिर्वा देवताः ।
 (१-१०, १२) प्रथमादिदशर्चा द्वादश्याश्च त्रिष्टुप्, । (११) एकादश्याः
 प्रस्तारपङ्क्तिः, (१३) त्रयोदश्या जगती, (१४) चतुर्दश्याश्चानुष्टुप् छन्दांसि
 परं मृत्यो अनु परैहि पन्थां यस्ते स्व इतरो देवयानात् ।
 चक्षुष्मते श्रवते तै ब्रवीमि मा नः प्रजां रीरिषो मोत वीरान् १
 मृत्योः पुदं योपर्यन्तो यदैतु द्राघीयु आयुः प्रतरं दधानाः ।
 आप्यार्यमानाः प्रजया धनेन शद्धाः पूता भवत यज्ञियासः २
 इमे जीवा वि मृतैराववृत्रन्नभूद्द्रा देवहृतिर्नो अद्य ।
 प्राञ्चौ अगाम नृतये हसायु द्राघीयु आयुः प्रतरं दधानाः ३
 इमं जीवेभ्यः परिधिं दधामि मैषां नु गादपरो अर्थमेतम् ।
 शतं जीवन्तु शरदः पुरूचीरन्तमृत्युं दधतां पर्वतेन ४
 यथाहान्यनुपूर्वं भवन्ति यथं अतव अतुभिर्यन्ति साधु ।
 यथा न पूर्वमपरो जहात्येवा धातरायूषि कल्पयैषाम् ५
 आ रोहतायुर्जरसं वृणाना अनुपूर्वं यतमाना यति ष्ट ।
 इह त्वष्टा सुजनिमा सजोषा दीर्घमायुः करति जीवसे वः ६
 इमा नारीरविधवाः सुपत्नीराञ्जनेन सर्पिषा सं विशन्तु ।
 अनश्रवोऽनमीवाः सुरत्वा आ रोहन्तु जनयो योनिमग्रे ७
 उदीर्ष्व नार्यभि जीवलोकं गतासुमेतमुप शेष एहि ।
 हस्तग्राभस्य दिधिषोस्तवेदं पत्युर्जनित्वमभि सं बभूथ ८
 धनुर्हस्तादादानो मृतस्याऽस्मे क्षत्राय वर्चसे बलाय ।

अत्रैव त्वमिह वयं सुवीरा विश्वाः स्पृधौ अभिमातीर्जयेम ९
उप सर्प मातरं भूमिमेतामुरुव्यचसं पृथिवीं सुशेवाम् ।
ऊर्णम्रदा युवतिर्दक्षिणावत एषा त्वा पातु निर्वृतेरुपस्थात् १०
उच्छ्वञ्चस्व पृथिवि मा नि बाधथाः सूपायनास्मै भव सूपवञ्चना ।
माता पुत्रं यथा सिचा ऽभ्येनं भूम ऊर्णहि ११
उच्छ्वञ्चमाना पृथिवी सु तिष्ठतु सहस्रं मितु उप हि श्रयन्ताम् ।
ते गृहासौ घृतश्रुतौ भवन्तु विश्वाहास्मै शरणाः सन्त्वत्र १२
उत् ते स्तभामि पृथिवीं त्वत् परीमं लोगं निदधन्मो अहं रिषम् ।
एतां स्थूणां इंपतरौ धारयन्तु तेऽत्रा यमः सादना ते मिनोतु १३
प्रतीचीने मामहनीष्वाः पर्णमिवा दधुः ।
प्रतीचीं जग्रभा वाचमर्श्व रशनया यथा १४

सप्तमोऽध्यायः

। व० १-३० ।

(१६) एकोनविंशं सूक्तम्

(१-८) अष्टर्चस्यास्य सूक्तस्य यामायनो मथितो वारुणिर्भृगुर्वा भार्गवश्चयवनो वा
ऋषिः । (१, २-८) प्रथमर्चः पूर्वार्धस्य द्वितीयादिसप्तानाञ्चापो गावो वा, (१)
प्रथमाया उत्तरार्धस्य चाग्नीषोमौ देवताः । (१-५, ७-८) प्रथमादिपञ्चर्चा
सप्तम्यष्टम्योश्चानुष्टुप्, (६) षष्ठ्याश्च गायत्री छन्दसी

नि वर्तध्वं मानु गाताऽस्मान् त्सिषक्त रेवतीः ।
अग्नीषोमा पुनर्वसू अस्मे धारयतं रयिम् १
पुनरेना नि वर्तय पुनरेना न्या कुरु ।
इन्द्र एणा नि यच्छत्वग्निरेना उपाजतु २
पुनरेता नि वर्तन्तामस्मिन् पुष्यन्तु गोपतौ ।
इहैवाग्ने नि धारयेह तिष्ठतु या रयिः ३
यन्नियानं न्ययनं संज्ञानं यत् परायणम् ।
आवर्तनं निवर्तनं यो गोपा अपि तं हवे ४
य उदानद् व्ययनं य उदानद् परायणम् ।
आवर्तनं निवर्तनमपि गोपा नि वर्तताम् ५
आ निवर्तु नि वर्तय पुनर्न इन्द्र गा देहि । जीवाभिर्भुनजामहै ६

परि वो विश्वतो दध ऊर्जा घृतेन पर्यसा ।
 ये देवाः के च यज्ञियास्ते रय्या सं सृजन्तु नः ७
 आ निवर्तन वर्तय नि निवर्तन वर्तय ।
 भूम्याश्चतस्रः प्रदिशस्ताभ्य एना नि वर्तय ८

(२०) विंशं सूक्तम्

(१-२०) दशर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा ऋषिः । अग्निर्देवता । (१) प्रथमर्च एकपदा विराट्, (२) द्वितीयाया अनुष्टुप्, (३-८) तृतीयादितृचद्वयस्य गायत्री, (९) नवम्या विराट्, (१०) दशम्याश्च त्रिष्टुप् छन्दः

भद्रं नो अपि वातय मनः १
 अग्निमीळे भुजां यविष्ठं शासा मित्रं दुर्धरीतुम् २
 यस्य धर्मन् त्वशरेनीः सपर्यन्ति मातुरूधः २
 यमासा कृपनीळं भासाकेतुं वर्धयन्ति । भ्राजते श्रेणिदन् ३
 अर्यो विशां गातुरेति प्र यदानड् दिवो अन्तान् । कविरभ्रं दीद्यानः ४
 जुषद्धव्या मानुषस्योर्ध्वस्तस्थावृभ्वा युजे । मिन्वन् त्सद्यं पुर एति ५
 स हि क्षेमो हविर्यज्ञः श्रुष्टीदस्य गातुरेति । अग्निं देवा वाशीमन्तम् ६
 यज्ञासाहं दुर्व इषे ऽग्निं पूर्वस्य शेवस्य । अद्रैः सूनुमायुमाहुः ७
 नरो ये के चास्मदा विश्वेत् ते वाम आ स्युः ।
 अग्निं हविषा वर्धन्तः कृष्णः श्वेतोऽरुषो यामौ अस्य ब्रध्न ऋज उत शोणो
 यशस्वान् ।
 हिरण्यरूपं जनिता जजान ९
 एवा तै अग्ने विमदो मनीषामूर्जो नपादमृतेभिः सजोषाः ।
 गिर आ वक्षत् सुमतीरियान इषमूर्जं सुक्षितिं विश्वमाभाः १०

(२१) एकविंशं सूक्तम्

(१-८) अष्टर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा ऋषिः । अग्निर्देवता । आस्तारपङ्क्तिश्छन्दः

आग्निं न स्ववृक्तिभिर्होतारं त्वा वृणीमहे ।
 यज्ञाय स्तीर्णबर्हिषे वि वो मदै शीरं पावकशौचिषं विवक्षसे १

त्वामु ते स्वाभुवः शम्भन्त्यश्वराधसः ।
वेति त्वामुपसेचनी वि वो मद् ऋजीतिरग्ना आहुतिर्विवक्षसे २
त्वे धर्माण आसते जुहूभिः सिञ्चतीरिव ।
कृष्णा रूपाण्यर्जुना वि वो मदे विश्वा अधि श्रियो धिषे विवक्षसे ३
यमग्ने मन्यसे रयिं सहसावन्नमर्त्य ।
तमा नो वार्जसातये वि वो मदे यज्ञेषु चित्रमा भरा विवक्षसे ४
अग्निर्जातो अथर्वणा विदद्विश्वा नि काव्या ।
भुवद्भूतो विवस्वतो वि वो मदे प्रियो यमस्य काम्यो विवक्षसे ५
त्वां यज्ञेष्वीळते ऽग्ने प्रयत्यध्वरे ।
त्वं वसूनि काम्या वि वो मदे विश्वा दधासि दाशुषे विवक्षसे ६
त्वां यज्ञेष्वृत्विजं चारुमग्ने नि पैदिरे ।
घृतप्रतीकं मनुषो वि वो मदे शक्रं चेतिष्ठमक्षभिर्विवक्षसे ७
अग्ने शक्रेण शोचिषोरु प्रथयसे बृहत् ।
अभिक्रन्दन् वृषायसे वि वो मदे गर्भं दधासि जामिषु विवक्षसे ८

(२२) द्वाविंशं सूक्तम्

(१-१५) पञ्चदशर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा
ऋषिः । इन्द्रो देवता । (१-४, ६, ८, १०-१४) प्रथमादिचतुर्ऋचां
षष्ठ्यष्टम्योर्दशम्यादिपञ्चानाञ्च पुरस्ताद्बृहती, (५, ७, ९)

पञ्चमीसप्तमीनवमीनामनुष्टुप्, (१५) पञ्चदश्याश्च त्रिष्टुप् छन्दांसि

कुहं श्रुत इन्द्रः कस्मिन्नद्य जनै मित्रो न श्रूयते ।
ऋषीणां वा यः क्षये गुहा वा चर्कृषे गिरा १
इह श्रुत इन्द्रो अस्मे अद्य स्तवै वृज्यृचीषमः ।
मित्रो न यो जनेष्वा यशश्चक्रे असाम्या २
महो यस्पतिः शर्वसो असाम्या महो नृम्णस्य तूतुजिः ।
भर्ता वज्रस्य धृष्णोः पिता पुत्रमिव प्रियम् ३
युजानो अश्वा वार्तस्य धुनी देवो देवस्य वज्रिवः ।
स्यन्ता पथा विरुक्मता सृजानः स्तोष्यध्वनः ४
त्वं त्या चिद्वातस्याश्वागा ऋजा त्मना वहध्यै ।
ययौदेवो न मर्त्यो युन्ता नकिर्विदाय्यः ५

अध् गन्तोशनां पृच्छते वां कर्दथा न आ गृहम् ।
 आ जग्मथुः पराकाद् दिवश्च ग्मश्च मर्त्यम् ६
 आ न इन्द्र पृक्षसे ऽस्माकं ब्रह्मोद्यतम् ।
 तत् त्वा याचामहेऽवुः शुष्णां यद्धन्नमानुषम् ७
 अकर्मा दस्युरभि नो अमन्तुरन्यव्रतो अमानुषः ।
 त्वं तस्यामित्रहन् वर्धर्दासस्य दम्भय ८
 त्वं न इन्द्र शूर शूरैरुत त्वोतासो बर्हणा ।
 पुरुत्रा ते वि पूर्तयो नवन्त क्षोणयो यथा ९
 त्वं तान् वृत्रहत्ये चोदयो नृन् कार्पाणे शूर वज्रिवः ।
 गुहा यदी कवीनां विशां नक्षत्रशवसाम् १०
 मुक्षू ता त इन्द्र दानाप्रस आक्षणे शूर वज्रिवः ।
 यद्ध शुष्णास्य दम्भयो जातं विश्वं सयार्वभिः ११
 माकुध्र्येगिन्द्र शूर वस्वीरस्मे भूवन्नभिष्टयः ।
 वयं वयं त आसां सुप्ते स्याम वज्रिवः १२
 अस्मे ता त इन्द्र सन्तु सत्या ऽहिंसन्तीरुपस्पृशः ।
 विद्याम् यासां भुजो धेनूनां न वज्रिवः १३
 अहस्ता यदपदी वर्धत क्षाः शर्चीभिर्वेद्यानाम् ।
 शुष्णां परि प्रदक्षिणिद् विश्वायवे नि शिंशनथः १४
 पिबापिबेदिन्द्र शूर सोमं मा रिषणयो वसवान् वसुः सन् ।
 उत त्रायस्व गृणतो मघोनो महश्च रायो रेवतस्कृधी नः १५

(२३) त्रयोविंशं सूक्तम्

(१-७) सप्तर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा ऋषिः

। इन्द्रो देवता । (१, ७) प्रथमासप्तम्योर्ऋचोस्त्रिष्टुप्, (२-४, ६)

द्वितीयादितृचस्य षष्ठ्याश्च जगती, (५) पञ्चम्याश्चाभिसारिणी छन्दांसि

यजामह इन्द्रं वज्रदक्षिणं हरीणां रथ्यं विव्रतानाम् ।

प्र श्मश्रु दोधुवदूर्ध्वथा भूद् वि सेनाभिर्दयमानो वि राधसा १

हरी न्वस्य या वने विदे वस्विन्द्रो मघैर्मघवा वृत्रहा भुवत् ।

ऋभुर्वाज ऋभुक्षाः पत्यते शवो ऽव क्षणौमि दासस्य नाम चित् २

यदा वज्रं हिरण्यमिदथा रथं हरी यमस्य वहतो वि सूरिभिः ।
 आ तिष्ठति मघवा सनश्चतु इन्द्रो वाजस्य दीर्घश्रवस्स्पतिः ३
 सो चिन्नु वृष्टिर्युध्याइ स्वा सचाँ इन्द्रः श्मश्रूणि हरिताभि प्रुष्णुते ।
 अर्व वेति सुक्षयं सुते मधूदिद्धनोति वातो यथा वनम् ४
 यो वाचा विवाचो मृध्रवाचः पुरू सहस्त्राशिवा जघान ।
 तत्तदिदस्य पौंस्यं गृणीमसि पितेव यस्तविषीं वावृधे शवः ५
 स्तोमं त इन्द्र विमदा अजीजनन्नपूर्व्यं पुरुतमं सुदानवे ।
 विद्या ह्यस्य भोजनमिनस्य यदा पशं न गोपाः करामहे ६
 मार्किर्न एना सख्या वि यौषुस्तव चैन्द्र विमदस्य च ऋषैः ।
 विद्या हि ते प्रमतिं देव जामिवदस्मे तै सन्तु सख्या शिवानि ७

(२४) चतुर्विंशं सूक्तम्

(१-६) षडृचस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा ऋषिः ।

(१-३) प्रथमतृचस्येन्द्रः, (४-६) द्वितीयतृचस्य चाश्विनौ देवताः । (१-३)

प्रथमतृचस्यास्तारपङ्क्तिः, (४-६) द्वितीयतृचस्य चानुष्टुप् छन्दसी

इन्द्र सोममिमं पिब मधुमन्तं चमू सुतम् ।

अस्मे रयिं नि धारय वि वो मदे सहस्त्रिणं पुरूवसो विवक्षसे १
 त्वां युज्ञेभिरुक्थैरुप हव्येभिरीमहे ।

शचीपते शचीनां वि वो मदे श्रेष्ठं नो धेहि वार्यं विवक्षसे २
 यस्पतिर्वार्याणामसि रध्रस्य चोदिता ।

इन्द्रं स्तोतृणामविता वि वो मदे द्विषो नः पाह्यंहसो विवक्षसे ३
 युवं शक्रा मायाविना समीची निरमन्थतम् ।

विमदेन यदीळिता नासत्या निरमन्थतम् ४
 विश्वे देवा अकृपन्त समीच्योर्निष्पतन्त्योः ।

नासत्यावब्रुवन् देवाः पुनरा वहतादिति ५
 मधुमन्मे परार्यणं मधुमत् पुनरायनम् ।

ता नो देवा देवतया युवं मधुमतस्कृतम् ६

(२५) पञ्चविंशं सूक्तम्

(१-११) एकादशर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा

ऋषिः । सोमो देवता । आस्तारपङ्क्तिश्छन्दः
 भद्रं नो अपि वातय मनो दक्षमुत क्रतुम् ।
 अधा ते सख्ये अन्धसो वि वो मदे रणन् गावो न यवसे विवक्षसे १
 हृदिस्पृशस्त आसते विश्वेषु सोम धामसु ।
 अधा कामा इमे मम वि वो मदे वि तिष्ठन्ते वसूयवो विवक्षसे २
 उत वृतानि सोम ते प्राहं मिनामि पाक्या ।
 अधा पितेव सूनवे वि वो मदे मृळा नो अभि चिद्बुधाद्विवक्षसे ३
 समु प्र यन्ति धीतयः सर्गासोऽवृताँ इव ।
 क्रतु नः सोम जीवसे वि वो मदे धारया चमसाँ इव विवक्षसे ४
 तव त्वे सोम शक्तिभिर्निकामासो व्यृशिवरे ।
 गृत्सस्य धीरास्तवसो वि वो मदे वृजं गोमन्तमश्विनं विवक्षसे ५
 पशुं नः सोम रक्षसि पुरुत्रा विष्टितं जगत् ।
 समाकृणोषि जीवसे वि वो मदे विश्वा संपश्यन् भुवना विवक्षसे ६
 त्वं नः सोम विश्वतो गोपा अदाभ्यो भव ।
 सेधं राजन्नप स्त्रिधो वि वो मदे मा नो दुःशंस ईशता विवक्षसे ७
 त्वं नः सोम सुक्रतुर्वयोधेयाय जागृहि ।
 क्षेत्रवित्तरो मनुषो वि वो मदे द्रुहो नः पाह्यंहसो विवक्षसे ८
 त्वं नो वृत्रहन्तमेन्द्रस्येन्दो शिवः सखा ।
 यत् सीं हवन्ते समिथे वि वो मदे युध्यमानास्तोकसातौ विवक्षसे ९
 अयं घ स तुरो मद इन्द्रस्य वर्धत प्रियः ।
 अयं कक्षीर्वतो महो वि वो मदे मतिं विप्रस्य वर्धयद्विवक्षसे १०
 अयं विप्राय दाशुषे वाजाँ इयति गोमतः ।
 अयं सप्तभ्य आ वरं वि वो मदे प्रान्धं श्रोणं च तारिषद्विवक्षसे ११

(२६) षड्विंशं सूक्तम्

(१-६) नवर्चस्यास्य सूक्तस्यैन्द्रः प्राजापत्यो वा विमदः, वासुक्रो वसुकृद्वा ऋषिः ।

पूषा देवता । (१, ४) प्रथमाचतुर्थ्योर्ऋचोरुष्णिक, (२-३, ५-६)

द्वितीयातृतीययोः पञ्चम्यादिपञ्चानाञ्चानुष्टुप् छन्दसी

प्र ह्यच्छा मनीषाः स्पार्हा यन्ति नियुतः ।

प्र दस्त्रा नियुद्रथः पूषा अविष्टु माहिनः १

यस्य त्यन्महित्वं वाताप्यमयं जनः ।
 विप्र आ वसद्धीतिभिश्चिकेत सुष्टुतीनाम् २
 स वैद सुष्टुतीनामिन्दुर्न पूषा वृषा ।
 अभि प्सुरः प्रुषायति वृजं न आ प्रुषायति ३
 मंसीमहि त्वा वयमस्माकं देव पूषन् ।
 मतीनां च साधनं विप्राणां चाध्वम् ४
 प्रत्यर्धिर्यज्ञानामश्वहयो रथानाम् ।
 ऋषिः स यो मनुर्हितो विप्रस्य यावयत्सखः ५
 आधीषमाणायाः पतिः शचायाश्च शचस्य च ।
 वासोवायोऽवीनामा वासांसि मर्मृजत् ६
 इनो वाजानां पतिरिनः पुष्टीनां सखा ।
 प्र श्मश्रु हर्यतो दूधोद् वि वृथा यो अदाभ्यः ७
 आ ते रथस्य पूषन्नजा धुरं ववृत्युः ।
 विश्वस्यार्थिनः सखा सनोजा अनपच्युतः ८
 अस्माकमूर्जा रथं पूषा अविष्ट माहिनः ।
 भुवद्वाजानां वृध इमं नः शृण्वद्धवम् ९

(२७) सप्तविंशं सूक्तम्

(१-२४) चतुर्विंशत्यृचस्यास्य सूक्तस्यैन्द्रो वसुक्र ऋषिः । इन्द्रो देवता ।

त्रिष्टुप् छन्दः

असत् सु मै जरितुः साभिवेगो यत् सुन्वते यजमानायु शिक्तम् ।
 अनाशीर्दामहमस्मि प्रहन्ता सत्यध्वृतं वृजिनायन्तमाभुम् १
 यदीदहं युधये संनयान्यदैवयून् तन्वाइ शूशुजानान् ।
 अमा ते तुप्रं वृषभं पंचानि तीव्रं सुतं पञ्चदशं नि षिञ्चम् २
 नाहं तं वैद य इति ब्रवीत्यदैवयून् त्समरणे जघन्वान् ।
 यदावाख्यत् समरणमृधावृदादिद्धं मे वृषभा प्र ब्रुवन्ति ३
 यदज्ञातेषु वृजनेष्वासं विश्वे सतो मघवानो म आसन् ।
 जिनामि वेत् क्षेम आ सन्तमाभुं प्र तं क्षिणां पर्वते पादगृह्य ४
 न वा उ मां वृजनै वारयन्ते न पर्वतासो यदहं मनस्ये ।
 मम स्वनात् कृधुकर्णो भयात् एवेदनु द्यून् किरणः समैजात् ५

दर्शन्वत्र शृतपाँ अग्निन्द्रान् बाहुक्षदः शरवे पत्यमानान् ।
घृषु वा ये निन्दुः सखायमध्यु न्वेषु पवयो ववृत्युः ६
अभूर्वोक्षीर्व्युश् आयुरानड् दर्षन्तु पूर्वा अपरो नु दर्षत् ।
द्वे पवस्तेपरि तं न भूतो यो अस्य पारे रजसो विवेष ७
गावो यवं प्रयुता अर्यो अक्षन् ता अपश्यं सहगौपाश्चरन्तीः ।
हवा इदुर्यो अभितः समायन् कियदासु स्वपतिश्छन्दयाते ८
सं यद्वयं यवसादो जनानामहं यवाद उर्वजै अन्तः ।
अत्रा युक्तौ ऽवसातारमिच्छादथो अयुक्तं युनजद्ववन्वान् ९
अत्रेदु मे मंससे सत्यमुक्तं द्विपाञ्च यच्चतुष्पात् संसृजानि ।
स्त्रीभिर्यो अत्र वृषणं पृतन्यादयुद्धो अस्य वि भजानि वेदः १०
यस्यानक्षा दुहिता जात्वास कस्तां विद्वाँ अभि मन्याते अन्धाम् ।
कतरो मेनिं प्रति तं मुचाते य ई वहाते य ई वा वरेयात् ११
कियती योषा मर्यतो वधूयोः परिप्रीता पन्यसा वार्येण ।
भद्रा वधूर्भवति यत् सुपेशाः स्वयं सा मित्रं वनुते जनै चित् १२
पत्तो जगार प्रत्यञ्जमत्ति शीष्णा शिरः प्रति दधौ वरूथम् ।
आसीन ऊर्ध्वामुपसिं क्षिणाति न्यङ्ङुत्तानामन्वेति भूमिम् १३
बृहन्नच्छायो अपलाशो अर्वा तस्थौ माता विषितो अत्ति गर्भः ।
अन्यस्या वत्सं रिहती मिमाय कया भुवा नि दधे धेनुरूधः १४
सप्त वीरासो अधरादुदायन्नष्टोत्तरात्तात् समजगिमरन्ते ।
नवं पश्चातात् स्थविमन्त आयन् दश प्राक् सानु वि तिरन्त्यशनः १५
दशानामेकं कपिलं समानं तं हिन्वन्ति क्रतवे पार्याय ।
गर्भं माता सुधितं वक्षणास्ववैनन्तं तुषयन्ती बिभर्ति १६
पीवानं मेषमपचन्त वीरा न्युप्ता अक्षा अनु दीव आसन् ।
द्वा धनु बृहतीमुप्स्वश्न्तः पवित्रवन्ता चरतः पुनन्ता १७
वि क्रौशनासो विष्वेञ्च आयन् पर्चाति नेमो नहि पक्षदुर्धः ।
अयं मे देवः सविता तदाह द्रवन्न इद्वनवत् सर्पिरन्नः १८
अपश्यं ग्रामं वहमानमारादचक्रया स्वधया वर्तमानम् ।
सिषक्त्यर्थः प्र युगा जनानां सद्यः शिश्ना प्रमिनानो नवीयान् १९
एतौ मे गावौ प्रमरस्य युक्तौ मो षु प्र सैधीर्मुहुरिन्ममन्धि ।
आपश्चिदस्य वि नशन्त्यर्थं सूरश्च मर्क उपरो बभूवान् २०

अयं यो वज्रः पुरुधा विवृत्तो ऽवः सूर्यस्य बृहतः पुरीषात् ।
 श्रव इदेना पुरो अन्यदस्ति तदव्यथी जरिमाणस्तरन्ति २१
 वृक्षेवृक्षे निर्यता मीमयद्गौस्ततौ वयः प्र पतान् पूरुषादः ।
 अथेदं विश्वं भुवनं भयात् इन्द्राय सुन्वदृषये च शिक्तत् २२
 देवानां माने प्रथमा अतिष्ठन् कृन्तत्रादिषामुपरा उदायन् ।
 त्रयस्तपन्ति पृथिवीमनूपा द्वा बृबूकं वहतः पुरीषम् २३
 सा ते जीवातुरुत तस्य विद्धि मा स्मैतादृगप गूहः समर्ये ।
 आविः स्वः कृणुते गूहते बुसं स पादुरस्य निर्णिजो न मुच्यते २४

(२८) अष्टाविंशं सूक्तम्

(१-१२) द्वादशर्चस्यास्य सूक्तस्य (१) प्रथमर्च इन्द्रस्रुषा वसुक्रपत्नी ऋषिका,
 (२, ६, ८, १०, १२) द्वितीयाषष्ठ्यष्टमीदशमीद्वादशीनामिन्द्रः, (३-५, ७, ९, ११)
 तृतीयादितृचस्य सप्तमीनवम्येकादशीनाञ्चन्द्रो वसुक्र ऋषिः । (१, ३-५, ७, ९,
 ११) प्रथमर्चस्तृतीयादितृचस्य सप्तमीनवम्येकादशीनाञ्चन्द्रः, (२, ६, ८, १०, १२)

द्वितीयाषष्ठ्यष्टमीदशमीद्वादशीनाञ्चन्द्रो वसुक्रो देवते । त्रिष्टुप् छन्दः

विश्वो ह्यश्न्यो अरिराजगाम् ममेदह श्वशुरो ना जगाम ।
 जज्ञीयाद्धाना उत सोमं पपीयात् स्वाशितः पुनरस्तं जगायात् १
 स रोरुवद्वृषभस्तिग्मशृङ्गो वर्षन् तस्थौ वरिमुन्ना पृथिव्याः ।
 विश्वेष्वेनं वृजनैषु पामि यो मे कुक्षी सुतसौमः पृणति २
 अद्रिणा ते मन्दिन इन्द्र तूयान् त्सुन्वन्ति सोमान् पिबसि त्वमेषाम् ।
 पचन्ति ते वृषभाँ अत्सि तेषां पृक्षेण यन्मघवन् हूयमानः ३
 इदं सु मे जरितरा चिकिद्धि प्रतीपं शार्पं नद्यौ वहन्ति ।
 लोपाशः सिंहं प्रत्यञ्चमत्साः क्रोष्टा वराहं निरतक्त कक्षात् ४
 कथा ते एतदहमा चिकेतं गृत्सस्य पाकस्तवसौ मनीषाम् ।
 त्वं नो विद्वाँ ऋतुथा वि वौचो यमर्धं ते मघवन् क्षेम्या धूः ५
 एवा हि मां तवसं वर्धयन्ति दिवश्चिन्मे बृहत उत्तरा धूः ।
 पुरू सहस्रा नि शिशामि साकर्मशत्रुं हि मा जनिता जजान ६
 एवा हि मां तवसं जज्ञुरुग्रं कर्मन्कर्मन् वृषणमिन्द्र देवाः ।
 वर्धी वृत्रं वज्रेण मन्दसानो ऽप वृजं महिना दाशुषे वम् ७
 देवास आयन् परशूरैबिभ्रन् वना वृश्चन्तौ अभि विडिभरायन् ।

नि सुद्रवंशं दधतो वृक्षणासु यत्रा कृपीटमनु तद्दहन्ति ८
 शशः क्षुरं प्रत्यञ्चं जगाराऽद्रिं लोगेन व्यभेदमारात् ।
 बृहन्तं चिद्दहते रन्धयानि वयद्वत्सो वृषभं शूशुवानः ९
 सुपर्ण इत्था नखमा सिषायारुद्धः परिपदं न सिंहः ।
 निरुद्धश्चिन्महिषस्तर्ष्यावान् गोधा तस्मा अयथं कर्षदेतत् १०
 तेभ्यो गोधा अयथं कर्षदेतद्ये ब्रह्मणः प्रतिपीयन्त्यन्नैः ।
 सिम उच्छणोऽवसृष्टां अदन्ति स्वयं बलानि तन्वः शृणानाः ११
 एते शमीभिः सुशमी अभूवन् ये हिन्विरे तन्वः सोम उक्थैः ।
 नृवद्ददन्नप नो माहि वाजान् दिवि श्रवो दधिषे नाम वीरः १२

(२६) एकोनत्रिंशं सूक्तम्

(१-८) अष्टर्चस्यास्य सूक्तस्यैन्द्रो वसुक्र ऋषिः । इन्द्रो देवता । त्रिष्टुप् छन्दः
 वने न वा यो न्यधायि चाकञ्छुचिर्वा स्तोमो भुरणावजीगः ।
 यस्येदिन्द्रः पुरुदिनेषु होता नृणां नर्यो नृतमः क्षपावान् १
 प्र ते अस्या उषसः प्रापरस्या नृतौ स्याम् नृतमस्य नृणाम् ।
 अनु त्रिशोकः शतमार्वहन्न कुत्सेन रथो यो असत् ससवान् २
 कस्ते मद इन्द्र रन्त्यो भूदुरो गिरौ अभ्युग्रो वि धाव ।
 कद्राहो अर्वागुप मा मनीषा आ त्वा शक्यामुपमं राधो अन्नैः ३
 कदु द्युमिन्द्र त्वावतो नृन् कया धिया करसे कन्न आगन् ।
 मित्रो न सत्य उरुगाय भृत्या अन्नै समस्य यदसन् मनीषाः ४
 प्रेरय सूरु अर्थं न पारं ये अस्य कामं जनिधा इव गमन् ।
 गिरश्च ये ते तुविजात पूर्वीर्नर इन्द्र प्रतिशिञ्जन्त्यन्नैः ५
 मात्रे नु ते सुमिते इन्द्र पूर्वी द्यौर्मज्मना पृथिवी काव्येन ।
 वराय ते घृतवन्तः सुतासः स्वाघ्नं भवन्तु पीतये मधूनि ६
 आ मध्वो अस्मा असिचन्नमत्रमिन्द्राय पूर्णं स हि सत्यराधाः ।
 स वावृधे वरिमन्ना पृथिव्या अभि क्रत्वा नर्यः पौंस्यैश्च ७
 व्यानळिन्द्रः पृतनाः स्वोजा आस्मै यतन्ते सख्याय पूर्वीः ।
 आ स्मा रथं न पृतनासु तिष्ठ यं भद्रया सुमत्या चोदयासे ८
 तृतीयोऽनुवाकः

। सू० ३०-४२ ।

(३०) त्रिंशं सूक्तम्

(१-१५) पञ्चदशर्चस्यास्य सूक्तस्यैलूषः कवष ऋषिः । आपोऽपां नपाद्वा देवता ।

त्रिष्टुप् छन्दः

प्र देवत्रा ब्रह्मणे गातुरेत्वपो अच्छा मनसो न प्रयुक्ति ।
महीं मित्रस्य वरुणस्य धासिं पृथुजयसे रीरधा सुवृक्तिम् १
अध्वर्यवो हविष्मन्तो हि भूताऽच्छाप इतोशतीरुशन्तः ।
अव याश्चष्टे अरुणः सुपर्णस्तमास्यध्वमूर्मिमद्या सुहस्ताः २
अध्वर्यवोऽप इता समुद्रमपां नपातं हविषा यजध्वम् ।
स वो दददूर्मिमद्या सुपूतं तस्मै सोमं मधुमन्तं सुनोत ३
यो अनिध्मो दीदयदप्स्वशन्तर्यं विप्रसि ईळते अध्वरेषु ।
अपां नपान्मधुमतीरपो दा याभिरिन्द्रो वावृधे वीर्याय ४
याभिः सोमो मोदते हर्षते च कल्याणीभिर्युवतिभिर्न मर्यः ।
ता अध्वर्यो अपो अच्छा परेहि यदासिञ्चा ओषधीभिः पुनीतात् ५
एवेदूनै युवतयो नमन्त यदीमुशन्नुशतीरेत्यच्छ ।
सं जानते मनसा सं चिकित्ते ऽध्वर्यवो धिषणापश्च देवीः ६
यो वो वृताभ्यो अकृणोदु लोकं यो वो मद्या अभिशस्तेरमुञ्चत् ।
तस्मा इन्द्राय मधुमन्तमूर्मिं देवमार्दनं प्र हिणोतनापः ७
प्रास्मै हिनोत मधुमन्तमूर्मिं गर्भो यो वः सिन्धवो मध्व उत्सः ।
घृतपृष्ठमीडयमध्वरेष्वाऽऽपौ रेवतीः शृणुता हव मे ८
तं सिन्धवो मत्सरमिन्द्रपानमूर्मिं प्र हैत य उभे इर्यति ।
मदच्युतमौशानं नभोजां परि त्रितन्तुं विचरन्तमुत्सम् ९
आवर्वततीरध नु द्विधारां गोषुयुधो न नियवं चरन्तीः ।
ऋषे जनित्रीर्भुवनस्य पत्नीरपो वन्दस्व सवृधः सयौनीः १०
हिनोता नो अध्वरं देवयज्या हिनोत ब्रह्म सनये धनानाम् ।
ऋतस्य योगे वि ष्यध्वमूधः श्रुष्टीवरीर्भूतनास्मभ्यमापः ११
आपो रेवतीः क्षयथा हि वस्वः क्रतुं च भद्र इंबभृथामृतं च ।
रायश्च स्थ स्वपत्यस्य पत्नीः सरस्वती तद्गृणते वयो धात् १२
प्रति यदापो अदृश्रमायतीर्घृतं पर्यासि बिभ्रतीर्मधूनि ।
अध्वर्युभिर्मनसा संविदाना इन्द्राय सोमं सुषुतं भरन्तीः १३

एमा अगमन् रेवतीर्जीवधन्या अध्वर्यवः सादयता सखायः ।
 नि बर्हिषि धत्तन सोम्यासो ऽपां नज्रां संविदानास एनाः १४
 आगमन्नाप उशतीर्बर्हिरेदं न्यध्वरे असदन् देवयन्तीः ।
 अध्वर्यवः सुनुतेन्द्राय सोममभूदु वः सुशका देवयज्या १५

(३१) एकत्रिंशं सूक्तम्

(१-११) एकादशर्चस्यास्य सूक्तस्यैलूषः कवष ऋषिः । विश्वे देवा देवताः ।

त्रिष्टुप् छन्दः

आ नो देवानामुप वेतु शंसो विश्वेभिस्तुरैरवसे यजत्रः ।
 तेभिर्वयं सुषखायो भवेम तरन्तो विश्वा दुरिता स्याम १
 परि चिन्मर्तो द्रविणं ममन्यादृतस्य पथा नमसा विवासेत् ।
 उत स्वेन क्रतुना सं वदेत् श्रेयांसं दक्षं मनसा जगृभ्यात् २
 अधायि धीतिरससृग्रमंशास्तीर्थे न दुस्ममुप यन्त्युमाः ।
 अभ्यानश्म सुवितस्य शूषं नवैदसो अमृतानामभूम ३
 नित्यश्चाकन्यात् स्वपतिर्दमूना यस्मा उ देवः संविता जजान ।
 भगौ वा गोभिरयमेमनज्यात् सो अस्मै चारुश्छदयदुत स्यात् ४
 इयं सा भूया उषसामिव द्वा यद्ध क्षुमन्तः शवसा समार्यन् ।
 अस्य स्तुतिं जरितुर्भिक्ष्माणा आ नः शग्मास उप यन्तु वाजाः ५
 अस्येदेषा सुमतिः पप्रथाना ऽभवत् पूव्या भूमना गौः ।
 अस्य सनीळा असुरस्य योनौ समान आ भरणे बिभ्रमाणाः ६
 किं स्वद्वनं क उ स वृक्ष आस यतो द्यावापृथिवी निष्टतक्षुः ।
 संतस्थाने अजरै इतऊती अहानि पूर्वीरुषसौ जरन्त ७
 नैतावदेना परो अन्यदस्त्युक्षा स द्यावापृथिवी बिभर्ति ।
 त्वचं पवित्रं कृणुत स्वधावान् यदीं सूर्यं न हरितो वहन्ति ८
 स्तेगो न क्षामत्येति पृथ्वीं मिहं न वातो वि ह वाति भूम ।
 मित्रो यत्र वरुणो अज्यमानो ऽग्निर्वने न व्यसृष्ट शोकम् ९
 स्तरीर्यत् सूतं सद्यो अज्यमाना व्यथिरव्यथीः कृणुत स्वगौपा ।
 पुत्रो यत् पूर्वः पित्रोर्जनिष्ट शम्यां गौर्जगार यद्ध पृच्छान् १०
 उत कर्षं नृषदः पुत्रमाहुरुत श्यावो धनमादत्त वाजी ।
 प्र कृष्णाय रुशदपिन्वतोर्धर्तमत्र नकिरस्मा अपीपेत् ११

(३२) द्वात्रिंशं सूक्तम्

(१-६) नवर्चस्यास्य सूक्तस्यैलूषः कवष ऋषिः । इन्द्रो देवता । (१-५)

प्रथमादिपञ्चर्चा जगती, (६-६) षष्ठ्यादिचतसृणाञ्च त्रिष्टुप् छन्दसी

प्र सु ग्मन्ता धियसानस्य सक्षणि वरेभिर्वराँ अभि षु प्रसीदतः ।
अस्माकमिन्द्र उभय जुजोषति यत् सोम्यस्यान्धसो बुबोधति १
वीन्द्र यासि दिव्यानि रोचना वि पार्थिवानि रजसा पुरुष्टुत ।
ये त्वा वहन्ति मुहुरध्वराँ उप ते सु वन्वन्तु वग्वनाँ अराधसः २
तदिन्मे छन्त्सद्रपुषो वपुष्टरं पुत्रो यज्जानं पित्रोरधीयति ।
जाया पतिं वहति वग्नुना सुमत् पुंस इन्द्रो वहतुः परिष्कृतः ३
तदित् सधस्थमभि चारु दीधय गावो यच्छासन् वहतुं न धेनवः ।
माता यन्मन्तुर्धस्य पूर्व्याऽभि वाणस्य सप्तधातुरिज्जनः ४
प्र वोऽच्छा रिरिचे देवयुष्पदमेकौ रुद्रेभिर्याति तुर्वणिः ।
जरा वा येष्वमृतैषु दावने परि व ऊमैभ्यः सिञ्चता मधु ५
निधीयमानमपगूळहमप्सु प्र मै देवानाँ व्रतपा उवाच ।
इन्द्रो विद्वाँ अनु हि त्वा चचक्ष तेनाहमग्ने अनुशिष्ट आगाम् ६
अक्षेत्रवित् क्षेत्रविदं ह्यप्राट् स प्रैति क्षेत्रविदानुशिष्टः ।
एतद्वै भद्रमनुशासनस्योत स्तुतिं विन्दत्यञ्जुसीनाम् ७
अद्येदु प्राणीदममन्निमाहा ऽपीवृतो अधयन्मातुरूधः ।
एमैनमाप जरिमा युवानमहेळन् वसुः सुमना बभूव ८
एतानि भद्रा कलश क्रियाम् कुरुश्रवण ददतो मघानि ।
दान इद्वौ मघवानुः सो अस्त्वयं च सोमो हृदि यं बिभर्मि ९
अष्टमोऽध्यायः

। व० १-२६ ।

(३३) त्रयस्त्रिंशं सूक्तम्

(१-६) नवर्चस्यास्य सूक्तस्यैलूषः कवष ऋषिः । (१) प्रथमर्चो विश्वे देवाः,
(२-३) द्वितीयातृतीययोरिन्द्रः, (४-५) चतुर्थीपञ्चम्योस्त्रासदस्यवस्य कुरुश्रवणस्य
दानस्तुतिः, (६-६) षष्ठ्यादिचतसृणाञ्च मैत्रातिथिरुपमश्रवा देवताः । (१)
प्रथमर्चस्त्रिष्टुप्, (२-३) द्वितीयातृतीययोः प्रगाथः (द्वितीयाया बृहती, तृतीयायाः

सतोबृहती), (४-६) चतुर्थ्यादितृचद्वयस्य च गायत्री छन्दांसि
 प्र मा युयुञ्जे प्रयुजो जनानां वहामि स्म पूषणमन्त्रिण ।
 विश्वे देवासो अध मामरक्षन् दुःशासुरागादिति घोष आसीत् १
 सं मा तपन्त्यभितः सपत्नीरिव पर्शवः ।
 नि बाधते अमतिर्नग्रता जसुर्वेर्न वैवीयते मतिः २
 मूषो न शिश्ना व्यदन्ति माध्यः स्तोतारं ते शतक्रतो ।
 सकृत् सु नो मघवन्निन्द्र मृळ्याऽधा पितेर्व नो भव ३
 कुरुश्रवणमावृणि राजानं त्रासदस्यवम् । मंहिष्ठं वाघतामृषिः ४
 यस्य मा हरितो रथे तिस्रो वहन्ति साधुया । स्तवै सहस्रदक्षिणे ५
 यस्य प्रस्वादसो गिर उपमश्रवसः पितुः । क्षेत्रं न रणवमूचुषे ६
 अधि पुत्रोपमश्रवो नपान्मित्रातिथेरिहि । पितुष्टे अस्मि वन्दिता ७
 यदीशीयामृतानामुत वा मत्यानाम् । जीवेदिन्मघवा मम ८
 न देवानामति वृतं शतात्मा चन जीवति । तथा युजा वि वावृते ९

(३४) चतुस्त्रिंशं सूक्तम्

१-१४) चतुर्दशर्चस्यास्य सूक्तस्यैलूषः कवषो मौजवानक्षो वा ऋषिः । (१, ७, ९,
 १२) प्रथमासप्तमीनवमीद्वादशीनामृचामक्षाः, (२-६, ८, १०-११, १४)
 द्वितीयादिपञ्चानामष्टमीदशम्येकादशीचतुर्दशीनाञ्चाक्षकितवनिन्दा, (१३)
 त्रयोदश्याश्च कृषिर्देवताः । (१-६, ८-१४) प्रथमादिषडृचामष्टम्यादिसप्तानाञ्च
 त्रिष्टुप्, (७) सप्तम्याश्च जगती छन्दसी
 प्रावेपा मा बृहतो मादयन्ति प्रवातेजा इरिणे वर्वृतानाः ।
 सोमस्येव मौजवतस्य भक्षो विभीदको जागृविर्मह्यमच्छान् १
 न मा मिमेथ न जिहीळ एषा शिवा सखिभ्य उत मह्यमासीत् ।
 अक्षस्याहमैकपरस्य हेतोरनुवतामप जायामरोधम् २
 द्वेष्टि श्वश्रूरप जाया रुणद्धि न नाथितो विन्दते मर्दितारम् ।
 अश्वस्येव जरतो वस्त्रयस्य नाहं विन्दामि कितवस्य भोगम् ३
 अन्ये जायां परि मृशन्त्यस्य यस्यार्गृधद्वेदने वाज्यर्क्षः ।
 पिता माता भ्रातर एनमाहुर्न जानीमो नयता बद्धमेतम् ४
 यदादीध्ये न देविषाण्येभिः परायद्धोऽव हीये सखिभ्यः ।
 न्युप्ताश्च बभ्रवो वाचमक्रतुं एमीदेषां निष्कृतं जारिणीव ५

सभामैति कितवः पृच्छमानो जेष्यामीति तन्वाइ शूशुजानः ।
 अक्षासो अस्य वि तिरन्ति कामं प्रतिदीव्ने दधत् आ कृतानि ६
 अक्षास इदङ्कुशिनो नितोदिनो निकृत्वानुस्तपनास्तापयिष्णवः ।
 कुमारदैष्णा जयतः पुनर्हणो मध्वा संपृक्ताः कितवस्य बर्हणा ७
 त्रिपञ्चाशः क्रीळति व्रात एषां देव इव सविता सत्यधर्मा ।
 उग्रस्य चिन्मन्यवे ना नमन्ते राजा चिदेभ्यो नम इत् कृणोति ८
 नीचा वर्तन्त उपरि स्फुरन्त्यहस्तासो हस्तवन्तं सहन्ते ।
 दिव्या अङ्गारा इरिणे न्युप्ताः शीताः सन्तो हृदयं निर्दहन्ति ९
 जाया तप्यते कितवस्य हीना माता पुत्रस्य चरतः क्व स्वित् ।
 अणावा बिभ्यद्धनमिच्छमानो ऽन्येषामस्तमुप नक्तमेति १०
 स्त्रियं दृष्ट्वाय कितवं ततापान्येषां जायां सुकृतं च योनिम् ।
 पूर्वाह्ने अश्वान् युयुजे हि बभून् त्सो अग्रेरन्तै वृषलः पपाद ११
 यो वः सेनानीर्महतो गणस्य राजा व्रातस्य प्रथमो बभूव ।
 तस्मै कृणोमि न धना रुणध्मि दशाहं प्राचीस्तदृतं वदामि १२
 अक्षैर्मा दीव्यः कृषिमित् कृषस्व वित्ते रमस्व बहु मन्यमानः ।
 तत्र गावः कितव तत्र जाया तन्मे वि चष्टे सवितायमर्यः १३
 मित्रं कृणुध्वं खलु मृळता नो मा नो घोरेण चरताभि धृष्णु ।
 नि वो नु मन्युर्विशतामरातिरन्यो बभूणां प्रसितौ न्वस्तु १४

(३५) पञ्चत्रिंशं सूक्तम्

(१-१४) चतुर्दशर्चस्यास्य सूक्तस्य धानाको लुश ऋषिः । विश्वे देवा देवताः ।
 (१-१२) प्रथमादिद्वादशर्चा जगती, (१३-१४) त्रयोदशीचतुर्दश्योश्च त्रिष्टुप् छन्दसी
 अबुध्रमु त्य इन्द्रवन्तो अग्रयो ज्योतिर्भरन्त उषसो व्युष्टिषु ।
 मही द्यावापृथिवी चैततामपो ऽद्या देवानामव आ वृणीमहे १
 दिवस्पृथिव्योरव आ वृणीमहे मातृन् त्सिन्धून् पर्वताञ्छर्यणावतः ।
 अनागास्त्वं सूर्यमुषासमीमहे भद्रं सोमः सुवानो अद्या कृणोतु नः २
 द्यावा नो अद्य पृथिवी अनागसो मही त्रायेतां सुविताय मातरा ।
 उषा उच्छन्त्यप बाधतामघं स्वस्त्यश्मिं समिधानमीमहे ३
 इयं न उस्त्रा प्रथमा सुदेव्य रेवत् सनिभ्यो रेवती व्युच्छतु ।
 आरे मन्युं दुर्विदत्रस्य धीमहि स्वस्त्यश्मिं समिधानमीमहे ४

प्र याः सिस्त्रते सूर्यस्य रश्मिभिर्ज्योतिर्भरन्तीरुषसो व्युष्टिषु ।
 भद्रा नो अद्य श्रवसे व्युच्छत स्वस्त्यश्ग्निं समिधानमीमहे ५
 अनमीवा उषस आ चरन्तु न उद्ग्रयो जिहतां ज्योतिषा बृहत् ।
 आयुक्षातामश्विना तूतुजिं रथं स्वस्त्यश्ग्निं समिधानमीमहे ६
 श्रेष्ठं नो अद्य सवितर्वरेण्यं भागमा सुव स हि रत्नधा असि ।
 रायो जनित्रीं धिषणामुप ब्रुवे स्वस्त्यश्ग्निं समिधानमीमहे ७
 पिपर्तु मा तदृतस्य प्रवाचनं देवानां यन्मनुष्या इ अमन्महि ।
 विश्वा इदुस्त्राः स्पळुदैति सूर्यः स्वस्त्यश्ग्निं समिधानमीमहे ८
 अद्वेषो अद्य बर्हिषः स्तरीमणि ग्राव्णां योगे मन्मनः साध ईमहे ।
 आदित्यानां शर्मणि स्था भुरण्यसि स्वस्त्यश्ग्निं समिधानमीमहे ९
 आ नो बर्हिः संधमादे बृहद्वि देवा ईळे सादया सप्त होतृन् ।
 इन्द्रं मित्रं वरुणं सातये भर्गं स्वस्त्यश्ग्निं समिधानमीमहे १०
 त आदित्या आ गता सर्वतातये वृधे नो यज्ञमवता सजोषसः ।
 बृहस्पतिं पूषणमश्विना भर्गं स्वस्त्यश्ग्निं समिधानमीमहे ११
 तन्नो देवा यच्छत सुप्रवाचनं छुर्दिरोदित्याः सुभरं नृपाय्यम् ।
 पश्वे तोकाय तनयाय जीवसे स्वस्त्यश्ग्निं समिधानमीमहे १२
 विश्वे अद्य मरुतो विश्वं ऊती विश्वे भवन्त्वग्रयः समिद्धाः ।
 विश्वे नो देवा अवसा गमन्तु विश्वमस्तु द्रविणं वाजो अस्मे १३
 यं देवासोऽर्वथ वाजसातौ यं त्रायध्वे यं पिपृथात्यंहः ।
 यो वौ गोपीथे न भयस्य वेद् ते स्याम देववीतये तुरासः १४

(३६) षट्त्रिंशं सूक्तम्

(१-१४) चतुर्दशर्चस्यास्य सूक्तस्य धानाको लुश ऋषिः । विश्वे देवा देवताः ।
 (१-१२) प्रथमादिद्वादशर्चा जगती, (१३-१४) त्रयोदशीचतुर्दशयोश्च त्रिष्टुप् छन्दसी
 उषासानक्ता बृहती सुपेशसा द्यावाक्षामा वरुणो मित्रो अर्यमा ।
 इन्द्रं हुवे मरुतः पर्वता अप आदित्यान् द्यावापृथिवी अपः स्वः १
 द्यौश्च नः पृथिवी च प्रचेतस ऋतावरी रक्षतामंहसो रिषः ।
 मा दुर्विदत्रा निर्ऋतिर्न ईशत तद्देवानामवो अद्या वृणीमहे २
 विश्वस्मान्नो अदितिः पात्वंहसो माता मित्रस्य वरुणस्य रेवतः ।
 स्वर्वज्रयोतिरवृकं नशीमहि तद्देवानामवो अद्या वृणीमहे ३

ग्रावा वदन्नप रक्षांसि सेधतु दुष्वप्रच्यं निऋतिं विश्वमत्रिणम् ।
 आदित्यं शर्म मरुतामशीमहि तद्देवानामवो अद्या वृणीमहे ४
 एन्द्रो बर्हिः सीदतु पिन्वतामिळा बृहस्पतिः सामभिर्ऋक्वो अर्चतु ।
 सुप्रकेतं जीवसे मन्म धीमहि तद्देवानामवो अद्या वृणीमहे ५
 दिविस्पृशं यज्ञमस्माकमश्विना जीराध्वरं कृणुतं सुममिष्टये ।
 प्राचीनरश्मिमाहुतं घृतेन तद्देवानामवो अद्या वृणीमहे ६
 उप ह्वये सुहवं मारुतं गुणं पावकमृष्वं सख्याय शंभुवम् ।
 रायस्पोषं सौश्रवसाय धीमहि तद्देवानामवो अद्या वृणीमहे ७
 अपां पेरुं जीवधन्यं भरामहे देवाव्यं सुहवमध्वरश्रियम् ।
 सुरश्मिं सोममिन्द्रियं यमीमहि तद्देवानामवो अद्या वृणीमहे ८
 सनेम् तत् सुसनितां सनित्वभिर्वयं जीवा जीवपुत्रा अनागसः ।
 ब्रह्मद्विषो विष्वगेनो भरेरत् तद्देवानामवो अद्या वृणीमहे ९
 ये स्था मनोर्यज्ञियास्ते शृणोतन् यद्वो देवा ईमहे तद्दातन ।
 जैत्रं क्रतुं रयिमद्वीरवद्यशस्तद्देवानामवो अद्या वृणीमहे १०
 महदद्य महतामा वृणीमहे ऽवो देवानां बृहतामनुर्वणाम् ।
 यथा वसुं वीरजातं नशामहे तद्देवानामवो अद्या वृणीमहे ११
 महो अग्नेः समिधानस्य शर्मणयनागा मित्रे वरुणे स्वस्तये ।
 श्रेष्ठे स्याम सवितुः सर्वीमनि तद्देवानामवो अद्या वृणीमहे १२
 ये सवितुः सत्यसवस्य विश्वे मित्रस्य वृते वरुणस्य देवाः ।
 ते सौभगं वीरवद्भोमदप्रो दधातन् द्रविणं चित्रमस्मे १३
 सविता पश्चातात् सविता पुरस्तात् सवितोत्तरात्तात् सविताधरात्तात् ।
 सविता नः सुवतु सर्वतातिं सविता नो रासतां दीर्घमायुः १४

(३७) सप्तत्रिंशं सूक्तम्

(१-१२) द्वादशर्चस्यास्य सूक्तस्य सौर्योऽभितपा ऋषिः । सूर्यो देवता । (१-६,

११-१२) प्रथमादिनवर्चामिकादशीद्वादशयोश्च जगती,

(१०) दशम्याश्च त्रिष्टुप् छन्दसी

नमो मित्रस्य वरुणस्य चक्षसे महो देवाय तदृतं संपर्यत ।

दूरेदृशे देवजाताय केतवे दिवस्पुत्राय सूर्याय शंसत १

सा मां सत्योक्तिः परि पातु विश्वतो द्यावां च यत्र ततनुन्नहानि च ।

विश्वमन्यन्नि विशते यदेजति विश्वाहापो विश्वाहोदैति सूर्यः २
 न ते अदेवः प्रदिवो नि वासते यदैतशेभिः पतरै रथर्यसि ।
 प्राचीनमन्यदनु वर्तते रज उदन्येन ज्योतिषा यासि सूर्य ३
 येन सूर्य ज्योतिषा बाधसे तमो जगच्च विश्वमुदियर्षि भानुना ।
 तेनास्मद्विश्वामनिरामनाहुतिमपामीवामप दुष्वप्रयं सुव ४
 विश्वस्य हि प्रेषितो रक्षसि व्रतमहेळयन्नुच्चरसि स्वधा अनु ।
 यदद्य त्वा सूर्योपब्रवामहे तं नो देवा अनु मंसीरत क्रतुम् ५
 तं नो द्यावापृथिवी तन्न आप इन्द्रः शृणवन्तु मरुतो हवं वचः ।
 मा शूनै भूम सूर्यस्य सदृशि भद्रं जीवन्तो जरणामशीमहि ६
 विश्वाहा त्वा सुमनसः सुचक्षसः प्रजावन्तो अनमीवा अनागसः ।
 उघन्तं त्वा मित्रमहो दिवेदिवे ज्योग्जीवाः प्रति पश्येम सूर्य ७
 महि ज्योतिर्बिभ्रतं त्वा विचक्षण भास्वन्तं चक्षुषे चक्षुषे मयः ।
 आरोहन्तं बृहतः पाजसस्परि वयं जीवाः प्रति पश्येम सूर्य ८
 यस्य ते विश्वा भुवनानि केतुना प्र चेरते नि च विशन्तं अक्तुभिः ।
 अनागास्त्वेन हरिकेश सूर्याऽह्नाहा नो वस्यसावस्यसोदिहि ९
 शं नो भव चक्षसा शं नो अहा शं भानुना शं हिमा शं घृणेन ।
 यथा शमध्वञ्छमसद् दुरोणे तत् सूर्य द्रविणं धेहि चित्रम् १०
 अस्माकं देवा उभयाय जन्मने शर्म यच्छत द्विपदे चतुष्पदे ।
 अदत् पिबदूर्जयमानमाशितं तदस्मे शं योररपो दधातन ११
 यद्वी देवाश्चकृम जिह्वया गुरु मनसो वा प्रयुती देवहेळनम् ।
 अरावा यो नो अभि दुच्छुनायते तस्मिन् तदेनो वसवो नि धैतन १२

(३८) अष्टात्रिंशं सूक्तम्

(१-५) पञ्चर्चस्यास्य सूक्तस्य मुष्कवानिन्द्र ऋषिः । इन्द्रो देवता । जगती छन्दः
 अस्मिन् न इन्द्र पृत्सुतौ यशस्वति शिमीवति क्रन्दसि प्रावं सातयै ।
 यत्र गोषाता धृषितेषु खादिषु विष्वक् पतन्ति दिघवो नृषाह्यै १
 स नः क्षुमन्तं सदेने व्यूर्णहि गोअर्णसं रयिमिन्द्र श्रवार्यम् ।
 स्याम ते जयतः शक्र मेदिनो यथा वयमुश्मसि तद्वसो कृधि २
 यो नो दास आर्यो वा पुरुष्टताऽदेव इन्द्र युधये चिकेतति ।
 अस्माभिष्टे सुषहाः सन्तु शत्रवस्त्वया वयं तान् वनुयाम संगुमे ३

यो द॒भ्रेभि॒र्हव्यो॑ यश्च॒ भूरि॑भि॒र्यो॑ अ॒भीके॑ वरि॒वोवि॑वृषाह्यै ।
तं वि॒खादे॑ सस्त्रि॒मद्य॑ श्रु॒तं नर॑म॒र्वाञ्चमिन्द्र॑म॒र्वसे॑ करा॒महे ४
स्व॒वृजं॑ हि त्वा॒म॒हमिन्द्र॑ श॒श्रवा॑ना॒नुदं॑ वृष॒भ र॒ध्रचो॑र्दनम् ।
प्र मुञ्च॑स्व॒ परि॒ कुत्सा॑दि॒हा ग॑हि॒ किमु॑ त्वावा॒न् मुष्क॑र्यो॒र्बद्ध॑ आ॒सते ५

(३६) एकोनचत्वारिंशं सूक्तम्

(१-१४) चतुर्दशर्चस्यास्य सूक्तस्य काक्षीवती घोषा ऋषिका । अश्विनौ देवते ।

(१-१३) प्रथमादित्रयोदशर्चा जगती, (१४) चतुर्दश्याश्च त्रिष्टुप् छन्दसी
यो वां परि॒ज्मा सु॒वृद॑श्चि॒ना रथो॑ दोषा॒मुषा॑सो ह॒व्यो ह॒विष्म॑ता ।
श॒श्वत्त॑मा॒सस्त॑मु॒ वामि॑दं व॒यं पि॒तुर्न॑ नाम॒ सुह॑र्वं ह॒वामहे १
चो॒दय॑तं सू॒नृताः॑ पि॒न्वतं॑ धि॒य उ॒त् पु॒र॑धी॒रीर॑यतं तदु॒श्मसि॑ ।
य॒शसं॑ भा॒गं कृ॑णुतं नो अ॒श्विना॑ सोमं न चा॒रुं म॒घर्व॑त्सु नस्कृतम् २
अ॒मा॒जुर॑श्चि॒द्भव॑थो यु॒वं भगो॑ ऽना॒शोश्चि॑द॒वितारा॑प॒मस्य॑ चित् ।
अ॒न्धस्य॑ चि॒न्नास॑त्या कृ॒शस्य॑ चि॒द्युवा॑मिदा॒हर्भि॑षजा॒ रुत॑स्य चित् ३
यु॒वं च्य॑वानं स॒नय॑ं यथा॒ रथं॑ पु॒नर्यु॑वानं च॒रथा॑य तद्भ॒थुः ।
निष्टौ॑र॒चमू॑ह॒थुर॑द्भ्यस्परि॒ विश्वे॑त् ता वां स॒र्वने॑षु प्र॒वाच्या ४
पु॒राणा॑ वां वी॒र्या॑र्इ प्र॒ ब्रवा॑ जने ऽथो॑ हा॒सथु॑र्भिषजा॒ मयो॑भुवा ।
ता वां नु॑ न॒व्याव॑र्वसे करा॒महे ऽयं॑ ना॒सत्या॑ श्र॒दरि॑र्यथा॒ दध॑त् ५
इ॒यं वा॑म॒ह्ने शृ॑णुतं मे॒ अश्वि॑ना पु॒त्रायै॑व पि॒तरा॑ म॒ह्यं शि॑क्षतम् ।
अ॒ना॒पि॒रजा॑ अस॒जात्या॑म॒तिः पु॒रा तस्या॑ अ॒भिशा॑स्ते॒रवं॑ स्पृ॒तम् ६
यु॒वं रथे॑न वि॒मदा॑य॒ शन्ध्यु॑वं न्यू॒हथुः॑ पु॒रुमि॑त्रस्य॒ योष॑णाम् ।
यु॒वं ह॑र्वं व॒ध्रिम॑त्या अ॒गच्छ॑तं यु॒वं सु॑षु॒तिं च॑क्रथुः पु॒र॑धये ७
यु॒वं वि॑प्रस्य॒ जर॑णामु॒पेयु॑षः पु॒नः क॒लेर॑कृणुतं यु॒वद्व॑यः ।
यु॒वं व॑न्द॒नमृ॑यदादु॒दू॒पथु॑र्यु॒वं स॒द्यो वि॑श॒पला॑मे॒तवे॑ कृथः ८
यु॒वं ह॑ रे॒भं वृ॑षणा॒ गुहा॑ हि॒तमु॑दैरयतं म॒मृवा॑स॒मश्वि॑ना ।
यु॒वमृ॑बी॒समु॑त् त॒प्तम॑त्रय॒ ओम॑न्वन्तं च॒क्रथुः॑ स॒प्तव॑ध्रये ९
यु॒वं श्वे॑तं पे॒दवै॑ऽश्वि॒नाश्च॑ न॒वभि॑र्वा॒जैर्न॑वती च॒ वा॒जिन॑म् ।
च॒कृत्य॑ ददथु॒र्द्राव॑त्स॒खं भ॑गं न नृ॒भ्यो ह॒व्यं म॑यो॒भुर्वम् १०
न तं रा॑जाना॒वदि॑ते कु॒र्तश्च॑न ना॒हो अ॑श्नोति॒ दुरि॑तं नकि॒र्भय॑म् ।
यम॑श्वि॒ना सु॑ह॒वा रु॒द्रव॑र्तनी पु॒रोर॑थं कृ॒णुथः॑ प॒त्न्या॑ सह ११

आ तेन यातुं मनसो जवीयसा रथं यं वामृभवश्चक्रुरश्विना ।
 यस्य योगे दुहिता जायते दिव उभे अहनी सुदिने विवस्वतः १२
 ता वर्तिर्यातं जयुषा वि पर्वतमपिन्वतं शयवे धेनुमश्विना ।
 वृकस्य चिद्वर्तिकामन्तरास्याद्युवं शचीभिर्गसिताममुञ्चतम् १३
 एतं वां स्तोममश्विनावकर्मात्क्षाम भृगवो न रथम् ।
 न्यमृक्षाम योषणां न मर्ये नित्यं न सूनुं तनयं दधानाः १४

(४०) चत्वारिंशं सूक्तम्

(१-१४) चतुर्दशर्चस्यास्य सूक्तस्य काक्षीवती घोषा ऋषिका । अश्विनौ देवते ।

जगती छन्दः

रथं यान्तं कुह को ह वां नरा प्रति द्युमन्तं सुविताय भूषति ।
 प्रातर्यावाणं विभ्वं विशेविशे वस्तोर्वस्तोर्वहमानं धिया शर्मि १
 कुहं स्विद् दोषा कुह वस्तोरश्विना कुहाभिपित्वं करतः कुहौषतुः ।
 को वां शयुत्रा विधवेव देवरं मर्यं न योषां कृणुते सधस्थ आ २
 प्रातर्जरेथे जरणेव कार्पया वस्तोर्वस्तोर्यजता गच्छथो गृहम् ।
 कस्य ध्वस्त्रा भवथः कस्य वा नरा राजपुत्रेव सवनाव गच्छथः ३
 युवां मृगेव वारणा मृगयवो दोषा वस्तोर्हविषा नि ह्वयामहे ।
 युवं होत्रामृतुथा जुहते नरेषु जनाय वहथः शुभस्पती ४
 युवां ह घोषा पर्यश्विना युती राज ऊचे दुहिता पृच्छे वां नरा ।
 भूतं मे अहं उत भूतमक्तवे ऽश्वावते रथिने शक्तमवते ५
 युवं कवी ष्टः पर्यश्विना रथं विशो न कुत्सो जरितुर्नशायथः ।
 युवोर्ह मक्षा पर्यश्विना मध्वासा भरत निष्कृतं न योषणा ६
 युवं ह भुज्युं युवमश्विना वशं युवं शिञ्जारमुशनामुपारथुः ।
 युवो ररावा परि सख्यमासते युवोरहमवसा सुम्रमा चके ७
 युवं ह कृशं युवमश्विना शयुं युवं विधन्तं विधवामुरुष्यथः ।
 युवं सनिभ्यः स्तनयन्तमश्विना ऽप वृजमूर्णुथः सप्तास्यम् ८
 जनिष्ट योषा पतयत् कनीनको वि चारुहन् वीरुधो दंसना अनु ।
 आस्मै रीयन्ते निवनेव सिन्धवो ऽस्मा अहं भवति तत् पतित्वनम् ९
 जीवं रुदन्ति वि मयन्ते अध्वरे दीर्घामनु प्रसितिं दीधियुर्नरः ।
 वामं पितृभ्यो य इदं संमेरिरे मयः पतिभ्यो जनयः परिष्वजे १०

न तस्य विद्म तदु षु प्र वोचत् युवां ह यद्युवत्याः क्षेति योनिषु ।
 प्रियोस्त्रियस्य वृषभस्य रेतिनौ गृहं गमेमाश्विना तदुश्मसि ११
 आ वामगन् त्सुमतिर्वाजिनीवसू न्यश्विना हत्सु कामा अयंसत ।
 अभूतं गोपा मिथुना शुभस्पती प्रिया अर्यम्णो दुर्या अशीमहि १२
 ता मन्दसाना मनुषो दुरोण आ धत्तं रयिं सहवीरं वचस्यवे ।
 कृतं तीर्थं सुप्रपाणं शुभस्पती स्थाणुं पथेष्ठामपं दुर्मतिं हतम् १३
 क्वं स्विदद्य कतमास्वश्विना विद्म दस्त्रा मादयेते शभस्पती ।
 क ईं नि येमे कतमस्य जग्मतुर्विप्रस्य वा यजमानस्य वा गृहम् १४

(४१) एकचत्वारिंशं सूक्तम्

(१-३) तृचस्यास्य सूक्तस्य घौषेयः सुहस्त्य ऋषिः । अश्विनौ देवते ।
 जगती छन्दः

समानमु त्यं पुरुहूतमुक्थ्यं रथं त्रिचक्रं सर्वना गनिगमतम् ।
 परिज्मानं विदुथ्यं सुवृक्तिभिर्वयं व्युष्टा उषसौ हवामहे १
 प्रातर्युजं नासत्याधि तिष्ठथः प्रातर्यावाणं मधुवाहनं रथम् ।
 विशो येन गच्छथो यज्वरीररा कीरेश्चिद्यज्ञं होतृमन्तमश्विना २
 अध्वर्युं वा मधुपाणिं सुहस्त्यमग्निधं वा धृतदंज्ञं दमूनसम् ।
 विप्रस्य वा यत् सर्वनानि गच्छथो ऽत् आ यातं मधुपेयमश्विना ३

(४२) द्विचत्वारिंशं सूक्तम्

(१-११) एकादशर्चस्यास्य सूक्तस्याङ्गिरसः कृष्ण ऋषिः । इन्द्रो देवता ।
 त्रिष्टुप् छन्दः

अस्तैव सु प्रतरं लायमस्यन् भूषन्निव प्र भरा स्तोममस्मै ।
 वाचा विप्रास्तरत् वाचमर्यो नि रामय जरितः सोम इन्द्रम् १
 दोहैन गामुपं शिक्ता सखायं प्र बोधय जरितर्जारमिन्द्रम् ।
 कोशं न पूर्णं वसुना न्यृष्टमा च्यावय मघदेयाय शूरम् २
 किमङ्ग त्वा मघवन् भोजमाहुः शिशीहि मां शिशयं त्वा शृणोमि ।
 अप्रस्वती मम धीरस्तु शक्र वसुविदं भर्गमिन्द्रा भरा नः ३
 त्वां जना ममसत्येष्विन्द्र संतस्थाना वि ह्वयन्ते समीके ।
 अत्रा युजं कृणुते यो हविष्मान् नासुन्वता सख्यं वष्टि शूरः ४

धनं न स्पन्द्रं बहुलं यो अस्यै तीव्रान् त्सोमाँ आसुनोति प्रयस्वान् ।
 तस्मै शत्रून् त्सुतुकान् प्रातरहो नि स्वष्ट्रान् युवति हन्ति वृत्रम् ५
 यस्मिन् वयं देधिमा शंसमिन्द्रे यः शिश्राय मघवा काममस्मे ।
 आराञ्चित् सन् भयतामस्य शत्रुन्यस्मै द्युम्ना जन्या नमन्ताम् ६
 आराच्छत्रुमपे बाधस्व दूरमुग्रो यः शम्बेः पुरुहूत तेन ।
 अस्मे धेहि यवमद्गोमदिन्द्र कृधी धियं जरित्रे वाजरत्नाम् ७
 प्र यमन्तवृषसवासो अग्मन् तीव्राः सोमाँ बहुलान्तास इन्द्रम् ।
 नाहं दामानं मघवा नि यसन्नि सुन्वते वहति भूरि वामम् ८
 उत प्रहामतिदीव्या जयाति कृतं यच्छवघ्नी विचिनोति काले ।
 यो देवकामो न धना रुणद्धि समित् तं राया सृजति स्वधावान् ९
 गोभिष्टरेमामतिं दुरेवां यवेन क्षुधं पुरुहूत विश्वाम् ।
 वयं राजभिः प्रथमा धनान्यस्माकैर्न वृजनेना जयेम १०
 बृहस्पतिर्नः परि पातु पश्चादुतोत्तरस्मादधरादघायोः ।
 इन्द्रः पुरस्तादुत मध्यतो नः सखा सखिभ्यो वरिवः कृणोतु ११

चतुर्थोऽनुवाकः

। सू० ४३-६० ।

(४३) त्रिचत्वारिंशं सूक्तम्

(१-११) एकादशर्चास्यास्य सूक्तस्याङ्गिरसः कृष्ण ऋषिः । इन्द्रो देवता । (१-६)
 प्रथमादिनवर्चा जगती, (१०-११) दशम्येकादशयोश्च त्रिष्टुप् छन्दसी
 अच्छा म् इन्द्रं मृतयः स्वर्विदः सध्रीचीर्विश्वा उशतीरनूषत ।
 परिष्वजन्ते जनयो यथा पतिं मर्यं न शुन्ध्युं मघवानमृतये १
 न घा त्वद्रिगपे वेति मे मनस्त्वे इत् कामं पुरुहूत शिश्रय ।
 राजैव दस्म नि षदोऽधि बर्हिष्यस्मिन् त्सु सोमैऽवपानमस्तु ते २
 विषूवदिन्द्रो अमतेरुत क्षुधः स इद्रायो मघवा वस्व ईशते ।
 तस्येदिमे प्रवणे सप्त सिन्धवो वयो वर्धन्ति वृषभस्य शष्मिणः ३
 वयो न वृक्षं सुपलाशमासदन् त्सोमाँस इन्द्रं मन्दिनेश्चमूषदः ।
 प्रैषामनीकं शर्वसा दविद्युतद्विदत् स्वर्श्मनवे ज्योतिरार्यम् ४
 कृतं न श्वघ्नी वि चिनोति देवने संवर्गं यन्मघवा सूर्यं जयत् ।
 न तत् तै अन्यो अनु वीर्यं शकन्न पुराणो मघवन् नोत नूतनः ५

विशंविशं म॒घवा॒ पर्य॑शायत् ज॒नानां॑ धे॒ना अ॒व॒चाक॑शदू॒षा ।
यस्याहं॑ श॒क्रः स॒र्वेषु॑ र॒गय॑ति स ती॒व्रैः सोमैः॑ स॒हते॑ पृत॒न्यतः॑ ६
आपो॑ न सि॒न्धुम॑भि यत् स॒मक्ष॑रन् त्सोमा॑स इन्द्रं॑ कु॒ल्या इ॒व ह॒दम् ।
वर्ध॑न्ति वि॒प्रा महौ॑ अस्य॒ साद॑ने॒ यवं॑ न वृष्टि॑र्दिव्ये॒न दानु॑ना ७
वृषा॑ न क्रुद्धः प॑तय॒द्रजः॑स्वा यो अ॒र्यप॑त्नी॒रकृ॑णोदि॒मा अपः॑ ।
स सु॑न्वते म॒घवा॑ जी॒रदानु॑वे ऽवि॒न्द्रज॑चोति॒र्मन॑वे ह॒विष्म॑ते ८
उ॒जाय॑तां प॒रशु॑र्ज्योति॒षा सह॑ भू॒या ऋ॒तस्य॑ सु॒दुघा॑ पुरा॒णव॑त् ।
वि रौ॑चताम॒रुषो॑ भानु॒ना शु॒चिः स्व॑र्णं श॒क्रं श॑शुची॒त् सत्प॑तिः ९
गोभि॑ष्ट्रे॒माम॑तिं दु॒रेवां॑ यवै॒न क्षु॑धं पुरु॒हूत् विश्वा॑म् ।
व॒यं राज॑भिः प्रथ॒मा धना॑न्यस्माकै॒न वृ॒जने॑ना जयेम १०
बृ॒हस्प॑तिर्नुः परि॑ पातु प॒श्चादु॑तोत्तर॒स्माद॑ध॒राद॑घा॒योः ।
इन्द्रः॑ पुर॒स्तादु॑त म॒ध्यतो॑ नः सखा॒ सखि॑भ्यो वरि॒वः कृ॑णोतु ११

(४४) चतुश्चत्वारिंशं सूक्तम्

(१-११) एकादशर्चस्यास्य सूक्तस्याङ्गिरसः कृष्ण ऋषिः । इन्द्रो देवता । (१-३,
१०-११) प्रथमादितृचस्य दशम्येकादशयोर्ऋचोश्च त्रिष्टुप्, (४-६)

चतुर्थ्यादितृचद्वयस्य च जगती छन्दसी

आ या॒त्विन्द्रः॑ स्व॒पति॑र्मदा॒यु यो ध॑र्मणा॒ तूतु॑जा॒नस्तु॑विष्मान् ।
प्र॒त्वक्ष्णा॑णो अ॒ति विश्वा॑ सहा॒स्यपा॑रेण॒ मह॑ता वृ॒षयै॑न १
सु॒ष्ठामा॑ रथः सु॒यमा॑ हरी॒ ते मि॒म्यक्ष॑ व॒ज्रौ नृ॑पते॒ गभ॑स्तौ ।
शी॒र्भं राज॑न् त्सु॒पथा॑ या॒ह्यर्वा॑ङ् व॒र्धाम॑ ते प॒पुषो॑ वृ॒षया॑नि २
ए॒न्द्रवा॑हो नृ॒पतिं॑ व॒ज्रबा॑हु॒मुग्र॑मु॒ग्रास॑स्तवि॒षास॑ ए॒नम् ।
प्र॒त्वक्ष॑सं वृ॒षभं॑ स॒त्यशु॑ष्ममे॒र्मस्म॑त्रा स॒धमा॑दौ वह॒न्तु ३
ए॒वा पति॑ं द्रो॒णसा॑चं स॒चैत॑समूर्जः॒ स्कम्भं॑ ध॒रुण॑ आ वृ॒षाय॑से ।
ओ॒र्जः कृ॑ष्व॒ सं गृ॑भाय॒ त्वे अ॒प्यसो॑ यथा॒ केनि॑पाना॒मिनो॑ वृ॒धे ४
ग॒र्मन्न॑स्मे वसू॒न्या हि शं॑सिषं॒ स्वाशि॑षं॒ भर॑मा या॒हि सो॑मिनेः ।
त्वमी॑शिषे सास्मिन्ना स॒त्सि ब॑र्हिष्य॒नाधृ॑ष्या तव॒ पात्रा॑णि ध॒र्मणा॑ ५
पृथ॑क् प्रा॒र्यन् प्र॑थ॒मा दे॒वहू॑तयो ऽकृ॒णव॑त श्रव॒स्यानि॑ दुष्ट॒रा ।
न ये शे॑कुर्य॒ज्ञियां॑ नाव॒मारु॑ह॒मीमै॑व ते न्य॒विश॑न्त॒ केप॑यः ६
ए॒वैवापा॑गपरे सन्तु दू॒ढयो॑ ऽश्वा॒ येषां॑ दु॒र्युज॑ आयु॒युजे॑ ।

इत्था ये प्रागुपे सन्ति दावने पुरुणि यत्र वयुनानि भोजना ७
 गिरीरञ्जान् रेजमानां अधारयद् द्यौः क्रन्ददन्तरिक्षाणि कोपयत् ।
 समीचीने धिषणे वि ष्कभायति वृष्णाः पीत्वा मद उक्थानि शंसति ८
 इमं बिभर्मि सुकृतं ते अङ्कुशं येनारुजासि मघवञ्छफारुजः ।
 अस्मिन् त्सु ते सर्वने अस्त्वोक्यं सुत इष्टौ मघवन् बोध्याभगः ९
 गोभिष्टरेमामतिं दुरेवां यवेन चूर्धं पुरुहूत विश्वाम् ।
 वयं राजभिः प्रथमा धनान्यस्माकैः वृजनैना जयेम १०
 बृहस्पतिर्नः परि पातु पश्चादुतोत्तरस्मादधरादघायोः ।
 इन्द्रः पुरस्तादुत मध्यतो नः सखा सखिभ्यो वरिवः कृणोतु ११

(४५) पञ्चचत्वारिंशं सूक्तम्

(१-१२) द्वादशर्चस्यास्य सूक्तस्य भालन्दनो वत्सप्रिर्ऋषिः । अग्निर्देवता ।

त्रिष्टुप् छन्दः

दिवस्परि प्रथमं जज्ञे अग्निरस्मद् द्वितीयं परि जातवेदाः ।
 तृतीयम्प्सु नृमणा अजस्रमिन्धान एनं जरते स्वाधीः १
 विद्या ते अग्ने त्रेधा त्रयाणि विद्या ते धाम् विभृता पुरुत्रा ।
 विद्या ते नाम परमं गुहा यद्विद्या तमुत्सं यत आजगन्थ २
 समुद्रे त्वा नृमणा अप्स्वश्न्तर्नृचक्षा ईधे दिवो अग्र ऊर्धन् ।
 तृतीयं त्वा रजसि तस्थिवांसमपामुपस्थे महिषा अवर्धन् ३
 अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन् ।
 सद्यो जज्ञानो वि हीमिद्धो अख्यदा रोदसी भानुना भात्यन्तः ४
 श्रीणामुदारो धरुणो रयीणां मनीषाणां प्रार्पणः सोमगोपाः ।
 वसुः सूनुः सहसो अप्सु राजा वि भात्यग्र उषसामिधानः ५
 विश्वस्य केतुर्भुवनस्य गर्भ आ रोदसी अपृणाज्जायमानः ।
 वीळं चिदद्रिमभिनत् परायञ्जना यदग्निमयजन्त पञ्च ६
 उशिक् पावको अरतिः सुमेधा मतेष्वग्निरमृतो नि धायि ।
 इयति धूममरुषं भरिभ्रदुच्छुकेण शोचिषा द्यामिनक्षन् ७
 दृशानो रुक्म उर्विया व्यद्यौद् दुर्मर्षमारुः श्रिये रुचानः ।
 अग्निरमृतो अभवद्वयोभिर्यदेनं द्यौर्जनयत् सुरेताः ८
 यस्तै अद्य कृणवद्भद्रशोचे ऽपूपं देव घृतवन्तमग्ने ।

प्र तं नय प्रतरं वस्यो अच्छाऽभि सुम्रं देवभक्तं यविष्ठ ६
 आ तं भज सौश्रवसेष्वग्र उक्थउक्थ आ भज शस्यमाने ।
 प्रियः सूर्ये प्रियो अग्रा भवात्युजातेन भिनददुज्जनित्वैः १०
 त्वामग्ने यजमाना अनु द्यून् विश्वा वसुं दधिरे वार्याणि ।
 त्वया सह द्रविणमिच्छमाना वृजं गोमन्तमुशिजो वि ववुः ११
 अस्ताव्यग्निर्नरां सुशेवो वैश्वानर ऋषिभिः सोमगोपाः ।
 अद्देषे द्यावापृथिवी हुवेम देवा धत्त रयिमस्मे सुवीरम् १२
 अथाष्टमोऽष्टकः
 प्रथमोऽध्यायः
 । व० १-३० ।

(४६) षट्चत्वारिंशं सूक्तम्

(१-१०) दशर्चस्यास्य सूक्तस्य भालन्दनो वत्सप्रिर्ऋषिः । अग्निर्देवता ।

त्रिष्टुप् छन्दः

प्र होता जातो महान् नभोविन्नृषद्वा सीददपामुपस्थै ।
 दधिर्यो धायि स ते वर्यासि यन्ता वसूनि विधते तनूपाः १
 इमं विधन्तो अपां सधस्थै पशुं न नष्टं पदैरनु ग्मन् ।
 गुहा चतन्तमुशिजो नमोभिरिच्छन्तो धीरा भृगवोऽविन्दन् २
 इमं त्रितो भूर्यविन्ददिच्छन् वैभूवसो मूर्धन्यघ्नयायाः ।
 स शेवृधो जात आ हर्म्येषु नाभिर्युवा भवति रोचनस्य ३
 मन्द्रं होतारमुशिजो नमोभिः प्राञ्च यज्ञं नेतारमध्वराणाम् ।
 विशामकृणवन्नरतिं पावकं हव्यवाहं दधतो मानुषेषु ४
 प्र भूर्जयन्तं महां विपोधां मूरा अमूरं पुरां दर्माणम् ।
 नर्यन्तो गर्भं वनां धिर्य धुर्हिरिश्मश्रुं नार्याणं धनर्चम् ५
 नि पस्त्यासु त्रितः स्तभूयन् परिवीतो योनौ सीददन्तः ।
 अतः संगृभ्या विशां दमूना विधर्मणायन्त्रैरीयते नृन् ६
 अस्याजरासो द्रमामरित्रा अर्चद्द्रमासो अग्रयः पावकाः ।
 श्वितीचर्यः श्वात्रासौ भुरणयवो वनर्षदो वायवो न सोमाः ७
 प्र जिह्वया भरते वेपो अग्निः प्र वयुनानि चेतसा पृथिव्याः ।
 तमायवः श्चयन्तं पावकं मन्द्रं होतारं दधिरे यजिष्ठम् ८

द्यावा यमग्निं पृथिवी जनिष्टामापस्त्वष्टा भृगवो यं सहोभिः ।
 ईळैन्यं प्रथमं मातरिश्वा देवास्ततक्षुर्मनवे यजत्रम् ६
 यं त्वा देवा दधिरे हव्यवाहं पुरुस्पृहो मानुषासो यजत्रम् ।
 स यामन्नग्रे स्तुवते वयो धाः प्र देवयन् यशसः सं हि पूर्वीः १०

(४७) सप्तचत्वारिंशं सूक्तम्

(१-८) अष्टर्चस्यास्य सूक्तस्याङ्गिरसः सप्तगुर्ऋषिः । वैकुण्ठ इन्द्रो देवता ।

त्रिष्टुप् छन्दः

जगृभ्मा ते दक्षिणमिन्द्र हस्तं वसूयवो वसुपते वसूनाम् ।
 विद्या हि त्वा गोपतिं शूर गोनामस्मभ्यं चित्रं वृषणं रयिं दाः १
 स्वायुधं स्वर्वसं सुनीथं चतुःसमुद्रं धरुणं रयीणाम् ।
 चर्कृत्यं शंस्यं भूरिवारमस्मभ्यं चित्रं वृषणं रयिं दाः २
 सुब्रह्माणं देववन्तं बृहन्तंमुरुं गभीरं पृथुबुधमिन्द्र ।
 श्रुतऋषिमुग्रमभिमातिषाहमस्मभ्यं चित्रं वृषणं रयिं दाः ३
 सनद्वाजं विप्रवीरं तरुत्रं धनस्पृतं शूशवांसं सुदक्षम् ।
 दस्युहनं पूर्भिदमिन्द्र सत्य-मस्मभ्यं चित्रं वृषणं रयिं दाः ४
 अश्वोवन्तं रथिनं वीरवन्तं सहस्त्रिणं शतिनं वार्जमिन्द्र ।
 भद्रवातं विप्रवीरं स्वर्षा-मस्मभ्यं चित्रं वृषणं रयिं दाः ५
 प्र सप्तगुमृत्धीतिं सुमेधां बृहस्पतिं मतिरच्छा जिगाति ।
 य आङ्गिरसो नमसोपसद्यो ऽस्मभ्यं चित्रं वृषणं रयिं दाः ६
 वनीवानो मम दूतास इन्द्रं स्तोमाश्चरन्ति सुमतीरियानाः ।
 हृदिस्पृशो मनसा वच्यमाना अस्मभ्यं चित्रं वृषणं रयिं दाः ७
 यत् त्वा यामिं दद्धि तन्न इन्द्र बृहन्तं क्षयमसमं जनानाम् ।
 अभि तद् द्यावापृथिवी गृणीता-मस्मभ्यं चित्रं वृषणं रयिं दाः ८

(४८) अष्टचत्वारिंशं सूक्तम्

(१-११) एकादशर्चस्यास्य सूक्तस्य वैकुण्ठ इन्द्र ऋषिः । वैकुण्ठ इन्द्रो देवता ।

(१-६, ८-९) प्रथमादितृचद्वयस्याष्टमीनवम्योर्ऋचोश्च जगती, (७, १०-११)

सप्तमीदशम्येकादशीनाञ्च त्रिष्टुप् छन्दसी

अहं भुवं वसुनः पूर्व्यस्पतिरहं धनानि सं जयामि शश्वतः ।

मां हवन्ते पितरं न जन्तवो ऽहं दाशुषे वि भजामि भोजनम् १
अहमिन्द्रो रोधो वक्षो अथर्वणस्त्रिताय गा अजनयमहेरधि ।
अहं दस्युभ्यः परि नृम्णमा ददे गोत्रा शिक्तान् दधीचे मातरिश्चने २
मह्यं त्वष्टा वज्रमतक्षदायसं मयि देवासोऽवृजन्नपि क्रतुम् ।
ममानीकं सूर्यस्येव दुष्टरं मामार्यन्ति कृतेन कर्त्वेन च ३
अहमेतं गव्ययमश्वयं पशुं पुरीषिणं सायकेना हिरण्ययम् ।
पुरू सहस्रा नि शिशामि दाशुषे यन्मा सोमास उक्थिनो अमन्दिषुः ४
अहमिन्द्रो न परा जिग्य इद्धनं न मृत्यवेऽव तस्थे कदा चन ।
सोममिन्मा सुन्वन्तो याचता वसु न मै पूरवः सख्ये रिषाथन ५
अहमेताञ्छाश्वसतो द्वाद्वेन्द्रं ये वज्रं युधयेऽकृणवत ।
आह्वयमानां अव हन्मनाहनं दृळहा वदन्नमस्युर्नमस्विनः ६
अभीर्दमेकमेको अस्मि निष्पाळभी द्वा किमु त्रयः करन्ति ।
खले न पर्षान् प्रति हन्मि भूरि किं मा निन्दन्ति शत्रवोऽनिन्द्राः ७
अहं गुङ्गुभ्यो अतिथिग्वमिष्करमिषं न वृत्रतुरं विक्षु धारयम् ।
यत् पर्णयुघ्न उत वा करञ्जहे प्राहं महे वृत्रहत्ये अशुश्रवि ८
प्र मे नमी साप्य इषे भुजे भूद्रवामेषे सख्या कृणुत द्विता ।
दिद्यु यदस्य समिथेषु मंहयमादिदेनं शंस्यमुक्थ्यं करम् ९
प्र नेमस्मिन् ददृशे सोमो अन्तर्गोपा नेममाविरस्था कृणोति ।
स तिग्मशृङ्गं वृषभं युयुत्सन् द्रुहस्तस्थौ बहुले बद्धो अन्तः १०
आदित्यानां वसूनां रुद्रियाणां देवो देवानां न मिनामि धाम ।
ते मा भद्राय शर्वसे ततन्नुरपराजितमस्तृतमषाळहम् ११

(४६) एकोनपञ्चाशं सूक्तम्

(१-११) एकादशर्चस्यास्य सूक्तस्य वैकुण्ठ इन्द्र ऋषिः । वैकुण्ठ इन्द्रो देवता ।

(१, ३-१०) प्रथमर्चस्तृतीयाद्यष्टानाञ्च जगती,

(२, ११) द्वितीयैकादशयोश्च त्रिष्टुप् छन्दसी

अहं दां गृणते पूर्व्यं वस्वहं ब्रह्म कृणवं मह्यं वर्धनम् ।

अहं भुवं यजमानस्य चोदिताऽयज्वनः साक्षि विश्वस्मिन् भरै १

मां धुरिन्द्रं नाम देवता दिवश्च गमश्चापां च जन्तवः ।

अहं हरी वृषणा विव्रता रघू अहं वज्रं शर्वसे धृषवा ददे २

अहमत्कं कवये शिशनथं हथैरहं कुत्समावमाभिरूतिभिः ।
 अहं शुष्णास्य शनथिता वर्धयमं न यो रर आर्यं नाम् दस्यवे ३
 अहं पितेर्व वेतसूरभिष्टये तुग्रं कुत्सायु स्मदिभं च रन्धयम् ।
 अहं भुवं यजमानस्य राजनि प्र यद्धरे तुजये न प्रियाधृषे ४
 अहं रन्धयं मृगयं श्रुतवर्णे यन्माजिहीत वयुना चनानुषक् ।
 अहं वेशं नम्रमायवेऽकरमहं सव्यायु पङ्गुभिमरन्धयम् ५
 अहं स यो नववास्त्वं बृहद्रथं सं वृत्रेव दासं वृत्रहारुजम् ।
 यद्वर्धयन्तं प्रथयन्तमानुषगदूरे पारे रजसो रोचनाकरम् ६
 अहं सूर्यस्य परि याम्याशुभिः प्रैतशेभिर्वहमान् ओजसा ।
 यन्मा सावो मनुष आहं निर्णिज ऋधक् कृषे दासं कृत्वयं हथैः ७
 अहं सप्तहा नहुषो नहुष्टरः प्राश्रावयं शर्वसा तुर्वशं यदुम् ।
 अहं न्यश्न्यं सहसा सहस्करं नव ब्राधतो नवतिं च वक्षयम् ८
 अहं सप्त स्रवतौ धारयं वृषा द्रवित्वः पृथिव्यां सीरा अर्धि ।
 अहमर्णासि वि तिरामि सुक्रतुर्युधा विदं मनवे गातुमिष्टये ९
 अहं तदासु धारयं यदासु न देवश्चन त्वष्टाधारयद्दुशत् ।
 स्पार्हं गवामूधःसु वक्षणास्वा मधोर्मधु श्वात्रयं सोममाशिरम् १०
 एवा देवाँ इन्द्रो विव्ये नृन् प्र च्यौत्नेन मघवा सत्यराधाः ।
 विश्वेत् ता तै हरिवः शचीवो ऽभि तुरासः स्वयशो गृणन्ति ११

(५०) पञ्चाशं सूक्तम्

(१-७) सप्तर्चस्यास्य सूक्तस्य वैकुराठ इन्द्र ऋषिः । वैकुराठ इन्द्रो देवता । (१-
 २, ६-७) प्रथमाद्वितीययोर्ऋचोः षष्ठीसप्तम्योश्च जगती, (३-४)
 तृतीयाचतुर्थ्योरभिसारिणी, (५) पञ्चम्याश्च त्रिष्टुप् छन्दांसि
 प्र वौ महे मन्दमानायान्धसो ऽर्चा विश्वानराय विश्वाभुवे ।
 इन्द्रस्य यस्य सुमखं सहो महि श्रवो नृम्णां च रोदसी सपर्यतः १
 सो चिन्नु सख्या नर्य इनः स्तुतश्चर्कृत्य इन्द्रो मावते नरे ।
 विश्वासु धूर्षु वाजकृत्येषु सत्पते वृत्रे वाप्स्वर्षि शूर मन्दसे २
 के ते नर इन्द्र ये त इषे ये तै सुम्रं सधन्यश्मियक्षान् ।
 के ते वाजायासुर्याय हिन्विरे के अप्सु स्वासूर्वरासु पौस्यै ३
 भुवस्त्वमिन्द्र ब्रह्मणा महान् भुवो विश्वेषु सर्वनेषु यज्ञियः ।

भुवो नृश्चयौतो विश्वस्मिन् भरे ज्येष्ठश्च मन्त्रौ विश्वचर्षणे ४
 अवा नु कं ज्यायान् यज्ञर्वनसो महीं त ओमात्रां कृष्टयौ विदुः ।
 असो नु कमजरो वर्धाश्च विश्वेदेता सर्वना तूतुमा कृषे ५
 एता विश्वा सर्वना तूतुमा कृषे स्वयं सूनो सहस्रो यानि दधिषे ।
 वराय ते पात्रं धर्मणे तना यज्ञो मन्त्रो ब्रह्मोद्यतं वचः ६
 ये तै विप्र ब्रह्मकृतः सुते सचा वसूनां च वसुनश्च दावने ।
 प्र ते सुमस्य मनसा पथा भुवन् मदै सुतस्य सोम्यस्यान्धसः ७

(५१) एकपञ्चाशं सूक्तम्

(१-६) नवर्चस्यास्य सूक्तस्य (१, ३, ५, ७, ९)

प्रथमातृतीयापञ्चमीसप्तमीनवमीनामृचां देवाः, (२, ४, ६, ८)

द्वितीयाचतुर्थीषष्ठ्यष्टमीनाञ्च सौचीकोऽग्निर्ऋषयः । (१, ३, ५, ७, ९)

प्रथमातृतीयापञ्चमीसप्तमीनवमीनामृचामग्निः, (२, ४, ६, ८)

द्वितीयाचतुर्थीषष्ठ्यष्टमीनाञ्च देवा देवताः । त्रिष्टुप् छन्दः

महत् दुल्बं स्थविरं तदासीद्येनाविष्टितः प्रविवेशिथापः ।
 विश्वा अपश्यद्बहुधा तै अग्ने जातवेदस्तन्वो देव एकः १
 को मा ददर्श कतमः स देवो यो मै तन्वो बहुधा पर्यपश्यत् ।
 क्वाह मित्रावरुणा क्षियन्त्यग्नेर्विश्वाः समिधो देवयानीः २
 ऐच्छाम त्वा बहुधा जातवेदः प्रविष्टमग्ने अप्सवोषधीषु ।
 तं त्वा यमो अचिकेच्चित्रभानो दशान्तरुष्यादतिरोचमानम् ३
 होत्राद्दहं वरुण बिभ्यदायं नेदेव मा युनजन्नत्र देवाः ।
 तस्य मे तन्वो बहुधा निविष्टा एतमर्थं न चिकेताहमग्निः ४
 एहि मनुर्देवयुर्यज्ञकामो ऽरंकृत्या तमसि क्षेप्यग्ने ।
 सुगान् पथः कृणुहि देवयानान् वह हव्यानि सुमनस्यमानः ५
 अग्नेः पूर्वे भ्रातरो अर्थमेतं रथीवाध्वानमन्वावरीवुः ।
 तस्माद्भिया वरुण दूरमायं गौरो न क्षेप्रोरविजे ज्यायाः ६
 कुर्मस्त आयुरजरं यदग्ने यथा युक्तो जातवेदो न रिष्याः ।
 अथा वहासि सुमनस्यमानो भागं देवेभ्यो हविषः सुजात ७
 प्रयाजान् मै अनुयाजांश्च केवलानूर्जस्वन्तं हविषो दत्त भागम् ।
 घृतं चापां पुरुषं चौषधीनामग्नेश्च दीर्घमायुरस्तु देवाः ८

तव प्रयाजा अनुयाजाश्च केवल ऊर्जस्वन्तो हविषः सन्तु भागाः ।
तवाग्ने यज्ञोऽयमस्तु सर्वस्तुभ्यं नमन्तां प्रदिशश्चतस्रः ६

(५२) द्विपञ्चाशं सूक्तम्

(१-६) षडृचस्यास्य सूक्तस्य सौचीकोऽग्निर्ऋषिः । विश्वे देवा देवताः ।

त्रिष्टुप् छन्दः

विश्वे देवाः शास्तन मा यथेह होता वृतो मनवै यन्निषद्य ।
प्र मै ब्रूत भागधेयं यथा वो येन पथा हव्यमा वो वहानि १
अहं होता न्यसीदं यजीयान् विश्वे देवा मरुतो मा जुनन्ति ।
अहरहरश्चिनाध्वर्यवं वां ब्रह्मा समिद्धवति साहुतिर्वाम् २
अयं यो होता किरु स यमस्य कमप्यूहे यत् समञ्जन्ति देवाः ।
अहरहर्जायते मासिमास्यथा देवा दधिरे हव्यवाहम् ३
मां देवा दधिरे हव्यवाहमपम्लुक्तं बहु कृच्छ्रा चरन्तम् ।
अग्निर्विद्वान् यज्ञं नः कल्पयाति पञ्चयामं त्रिवृतं सप्ततन्तुम् ४
आ वो यक्ष्यमृतत्वं सुवीरं यथा वो देवा वरिवः कराणि ।
आ बाहोर्वज्रमिन्द्रस्य धेयामथेमा विश्वाः पृतना जयाति ५
त्रीणि शता त्री सहस्राण्यग्निं त्रिंशच्च देवा नव चासपर्यन् ।
औक्षन् घृतैरस्तृणन् बर्हिरस्मा आदिद्धोतारं न्यसादयन्त ६

(५३) त्रिपञ्चाशं सूक्तम्

(१-११) एकादशर्चस्यास्य सूक्तस्य (१-३, ६-११) प्रथमादितृचस्य
षष्ठ्यादितृचद्वयस्य च देवाः, (४-५) चतुर्थीपञ्चम्योर्ऋचोश्च सौवीकोऽग्निर्ऋषयः ।

(१-३, ६-११) प्रथमादितृचस्य षष्ठ्यादितृचद्वयस्य चाग्निः, (४-५)
चतुर्थीपञ्चम्योर्ऋचोश्च देवा देवताः । (१-५, ८) प्रथमादिपञ्चार्चामष्टम्याश्च त्रिष्टुप्

(६-७, ९-११) षष्ठीसप्तम्योर्नवम्यादितृचस्य च जगती छन्दसी

यमैच्छाम मनसा सोऽयमागाद्यज्ञस्य विद्वान् परुषश्चिकित्वान् ।
स नो यक्षद् देवताता यजीयान् नि हि षत्सदन्तरः पूर्वा अस्मत् १
अराधि होता निषदा यजीयान्भि प्रयासि सुधितानि हि ख्यत् ।
यजामहै यज्ञियान् हन्त देवा ईळामहा ईड्याँ आज्येन २
साध्वीमकर्देववीतिं नो अद्य यज्ञस्य जिह्वामविदाम् गुह्याम् ।

स आयुरागात् सुरभिर्वसानो भद्रामर्कदेवहृतिं नो अद्य ३
तदद्य वाचः प्रथमं मसीय येनासुराँ अभि देवा असाम ।
ऊर्जाद उत यज्ञियासः पञ्च जना मर्म होत्रं जुषध्वम् ४
पञ्च जना मर्म होत्रं जुषन्तां गोजाता उत ये यज्ञियासः ।
पृथिवी नः पार्थिवात् पात्वंहसो ऽन्तरिक्षं दिव्यात्पात्वस्मान् ५
तन्तुं तन्वन् रजसो भानुमन्विहि ज्योतिष्मतः पथो रक्ष धिया कृतान् ।
अनुल्बणं वयत् जोगुवामपो मनुर्भव जनया दैव्यं जनम् ६
अज्ञानहो नह्यतनोत सौम्या इष्कृणुध्वं रशना ओत पिशत ।
अष्टार्वन्धुरं वहताभितो रथं येन देवासो अनयन्नभि प्रियम् ७
अश्मन्वती रीयते सं रभध्वमुत्तिष्ठत् प्र तरता सखायः ।
अत्रा जहाम् ये असन्नशैवाः शिवान् वयमुत्तरेमाभि वाजान् ८
त्वष्टा माया वैदपसामपस्तमो बिभ्रत् पात्रा देवपानानि शतमा ।
शिशीते नूनं परशुं स्वायसं येन वृश्वादेतशो ब्रह्मणस्पतिः ९
सतो नूनं केवयः सं शिशीत् वाशीभिर्याभिरमृताय तक्षथ ।
विद्वांसैः पदा गुह्यानि कर्तन् येन देवासो अमृतत्वमानुशुः १०
गर्भे योषामदधुर्वत्समासन्यपीच्येन मनसोत जिह्वया ।
स विश्वाहा सुमना योग्या अभि सिंषासनिर्वनते कार इज्जितिम् ११

(५४) चतुष्पञ्चाशं सूक्तम्

(१-६) षड्चस्यास्य सूक्तस्य वामदेव्यो बृहदुक्थ ऋषिः । इन्द्रो देवता ।

त्रिष्टुप् छन्दः

तां सु ते कीर्तिं मघवन् महित्वा यत् त्वा भीते रोदसी अह्वयेताम् ।
प्रावो देवाँ आतिरो दासमोजः प्रजायै त्वस्यै यदशिक्ष इन्द्र १
यदचरस्तन्वा वावृधानो बलानीन्द्र प्रब्रुवाणो जनैषु ।
मायेत् सा ते यानि युद्धान्याहर्नाद्य शत्रुं ननु पुरा विवित्से २
क उ नु ते महिमनः समस्याऽस्मत् पूर्व ऋषयोऽन्तमापुः ।
यन्मातरं च पितरं च साकमजनयथास्तन्वर्षः स्वायाः ३
चत्वारिं ते असुर्याणि नामाऽदाभ्यानि महिषस्य सन्ति ।
त्वमङ्ग तानि विश्वानि वित्से येभिः कर्माणि मघवञ्चकर्थ ४
त्वं विश्वा दधिषे केवलानि यान्याविर्या च गुहा वसूनि ।

काममिन्मे मघवन् मा वि तारीस्त्वमाज्ञाता त्वमिन्द्रासि दाता ५
यो अर्दधाञ्जयोतिषि ज्योतिरन्तर्यो असृजन्मधुना सं मधूनि ।
अर्धं प्रियं शूषमिन्द्राय मन्म ब्रह्मकृतौ बृहदुक्थादवाचि ६

(५५) पञ्चपञ्चाशं सूक्तम्

(१-८) अष्टर्चस्यास्य सूक्तस्य वामदेव्यो बृहदुक्थ ऋषिः । इन्द्रो देवता ।

त्रिष्टुप् छन्दः

दूरे तन्नाम गुह्यं पराचैर्यत्त्वा भीते अर्हयेतां वयोधे ।
उदस्तभ्नाः पृथिवीं द्यामभीके भ्रातुः पुत्रान् मघवन् तित्विषाणः १
महत् तन्नाम गुह्यं पुरुस्पृग् येन भूतं जनयो येन भव्यम् ।
प्रत्नं जातं ज्योतिर्यदस्य प्रियं प्रियाः समविशन्त पञ्च २
आ रोदसी अपृणादोत मध्यं पञ्च देवाँ ऋतुशः सप्तसप्त ।
चतुस्त्रिंशता पुरुधा वि चष्टे सरूपेण ज्योतिषा विव्रतेन ३
यदुषु औच्छः प्रथमा विभानामर्जनयो येन पुष्टस्य पुष्टम् ।
यत् ते जामित्वमवरं परस्या महन्महत्या असुरत्वमेकम् ४
विधुं दद्राणं समने बहूनां युवानुं सन्तं पलितो जगार ।
देवस्य पश्य काव्यं महित्वा ऽद्या ममार स ह्यः समान ५
शाक्मना शाको अरुणः सुपर्ण आ यो महः शूरः सनादनीळः ।
यच्चिकेत सत्यमित् तन्न मोघं वसुं स्पार्हमुत जेतोत दाता ६
ऐभिर्ददे वृष्या पौस्यानि येभिरौक्षद्वृत्रहत्याय वृज्जी ।
ये कर्मणः क्रियमाणस्य मह ऋतेकर्ममुदजायन्त देवाः ७
युजा कर्माणि जनयन् विश्वौजा अशस्तिहा विश्वर्मनास्तराषाट् ।
पीत्वी सोमस्य दिव आ वृधानः शूरो निर्युधाधमद्वस्यन् ८

(५६) षट्पञ्चाशं सूक्तम्

(१-७) सप्तर्चस्यास्य सूक्तस्य वामदेव्यो बृहदुक्थ ऋषिः । विश्वे देवा देवताः ।

(१-३, ७) प्रथमादितृचस्य सप्तम्या ऋचश्च त्रिष्टुप्, (४-६) चतुर्थ्यादितृचस्य च
जगती छन्दसी

इदं त एकं पुर ऊं त एकं तृतीयैन् ज्योतिषा सं विशस्व ।
संवेशने तन्वश्चाररेधि प्रियो देवानां परमे जनित्रे १

त॒नू॒ष्टै वाजिन् त॒न्वं॑श् न॒यन्ती॑ वा॒मम॒स्मभ्यं॑ धातु शर्म॑ तुभ्यम् ।
 अ॒हुतो॑ म॒हो ध॒रुणाय॑ देवान् दि॒वीव॑ ज्योतिः स्व॒मा मि॑मीयाः २
 वा॒ज्यसि॑ वाजिनेना सुवे॒नीः सु॒वितः॑ स्तोमं सु॒वितो॑ दि॒वं गाः ।
 सु॒वितो॑ धर्मं प्रथ॒मानु॑ स॒त्या सु॒वितो॑ देवान् त्सु॒वितोऽनु॑ प॒त्न ३
 म॒हिम्न॑ एषां पि॒तरश्च॑नेशिरे दे॒वा दे॒वेष्व॑दधुरपि क्र॒तुम् ।
 स॒म॒वि॒व्यच॑रुत यान्य॒त्विषु॑रैषां त॒नूषु॑ नि वि॒विशुः॑ पुनः ४
 स॒हो॒भिर्वि॑श्वं परि॒ चक्र॑मू र॒जः पूर्वा॑ धामा॒न्यमि॑ता मि॒मा॒नाः ।
 त॒नूषु॑ विश्वा भुव॑ना नि ये॒मिरे॑ प्रासा॒रय॑न्त पुरु॒ध प्र॒जा अनु॑ ५
 द्वि॒धा सून॑वोऽसुरं स्व॒र्विद॑मास्थापयन्त तृ॒तीयै॑न॒ कर्म॑णा ।
 स्वां प्र॒जां पि॒तरः॑ पि॒त्र्यं सह॑ आ॒वरे॑ष्वदधुस्तन्तुमा॒र्त॒तम् ६
 ना॒वा न चो॑दः प्र॒दिशः॑ पृथि॒व्याः स्व॒स्तिभि॑रति॒ दुर्गा॑णि विश्वा ।
 स्वां प्र॒जां बृ॒हदु॑क्थो म॒हित्वा ऽऽव॑रेष्वदधा॒दा परेषु॑ ७

(५७) सप्तपञ्चाशं सूक्तम्

(१-६) षड्चस्यास्य सूक्तस्य बन्धुः श्रुतबन्धुर्विप्रबन्धुर्गोपायना ऋषयः । विश्वे देवा
 देवताः । गायत्री छन्दः

मा प्र गा॑म प॒थो व॒यं मा य॒ज्ञादि॑न्द्र सो॒मिनः॑ । मान्तः स्थु॒र्नो अ॑रा॒तयः॑ १
 यो य॒ज्ञस्य॑ प्र॒साध॑नस्तन्तु॒र्दे॒वेष्व॑र्ततः । तमाहु॑तं नशीमहि २
 मनो॑ न्वा हु॒वामहे॑ नाराशंसे॒न सो॒मै॒न । पि॒तृणां॑ च म॒न्म॑भिः ३
 आ त॑ एतु म॒नः पु॒नः क्र॒त्वे द॒क्षाय॑ जी॒वसे॑ । ज्योक् च॒ सूर्यं॑ दृ॒शे ४
 पु॒नर्नः॑ पि॒तरो॑ मनो॒ ददा॑तु दै॒व्यो ज॑नः । जी॒वं व्रा॑तं स॒चेमहि॑ ५
 व॒यं सो॑म वृ॒ते तव॑ म॒नस्त॒नूषु॑ बिभ्र॑तः । प्र॒जाव॑न्तः स॒चेमहि॑ ६

(५८) अष्टपञ्चाशं सूक्तम्

(१-१२) द्वादशर्चस्यास्य सूक्तस्य बन्धुः श्रुतबन्धुर्विप्रबन्धुर्गोपायना ऋषयः ।
 आवर्तमानं मनो देवता । अनुष्टुप् छन्दः

यत् ते॑ य॒मं वै॒वस्व॑तं मनो॒ ज॒गाम॑ दूर॒कम् । तत् त॒ आ॒ वर्त॑यामसी॒ह क्ष॑याय
 जी॒वसे॑ १
 यत् ते॑ दि॒वं यत् पृ॑थि॒वीं मनो॒ ज॒गाम॑ दूर॒कम् । तत् त॒ आ॒ वर्त॑यामसी॒ह
 क्ष॑याय जी॒वसे॑ २

यत् ते भूमिं चतुर्भृष्टिं मनो जगाम दूरकम् । तत् त आ वर्तयामसीह क्षयाय
 जीवसे ३
 यत् ते चतस्रः प्रदिशो मनो जगाम दूरकम् । तत् त आ वर्तयामसीह क्षयाय
 जीवसे ४
 यत् ते समुद्रमर्णवं मनो जगाम दूरकम् । तत् त आ वर्तयामसीह क्षयाय
 जीवसे ५
 यत् ते मरीचीः प्रवतो मनो जगाम दूरकम् । तत् आ वर्तयामसीह क्षयाय
 जीवसे ६
 यत् ते अपो यदोषधीर्मनो जगाम दूरकम् । तत् आ वर्तयामसीह क्षयाय
 जीवसे ७
 यत् ते सूर्यं यदुषसं मनो जगाम दूरकम् । तत् आ वर्तयामसीह क्षयाय
 जीवसे ८
 यत् ते पर्वतान् बृहतो मनो जगाम दूरकम् । तत् आ वर्तयामसीह क्षयाय
 जीवसे ९
 यत् ते विश्वमिदं जगन्मनो जगाम दूरकम् । तत् आ वर्तयामसीह क्षयाय
 जीवसे १०
 यत् ते पराः परावतो मनो जगाम दूरकम् । तत् आ वर्तयामसीह क्षयाय
 जीवसे ११
 यत् ते भूतं च भव्यं च मनो जगाम दूरकम् । तत् आ वर्तयामसीह क्षयाय
 जीवसे १२

(५६) एकोनषष्टितमं सूक्तम्

(१-१०) दशर्चस्यास्य सूक्तस्य बन्धुः श्रुतबन्धुर्विप्रबन्धुर्गोपायना ऋषयः । (१-३)
 प्रथमादितृचस्य निर्ऋतिः, (४) चतुर्थ्या ऋचो निर्ऋतिः सोमश्च, (५-६)
 पञ्चमीषष्ठ्योरसुनीतिः, (७) सप्तम्याः पृथिवीद्युरन्तरिक्षसोमपूषपथ्यास्वस्तयः,
 (८-९, १०) अष्टमीनवम्योर्दशम्या उत्तरार्धस्य च द्यावापृथिव्यौ, (१०) दशम्याः
 पूर्वार्धस्य चेन्द्रो देवताः । (१-७) प्रथमादिसप्तर्चा त्रिष्टुप्, (८) अष्टम्याः पङ्क्तिः,
 (९) नवम्या महापङ्क्तिः, (१०) दशम्याश्च पङ्क्त्युत्तरा छन्दांसि
 प्र तार्यायुः प्रतरं नवीयुः स्थातरिव क्रतुमता रथस्य ।
 अध च्यवान् उत् तवीत्यर्थं परातरं सु निर्ऋतिर्जिहीताम् १

सामन् नु राये निधिमन्वन्नं करांमहे सु पुरुध श्रवांसि ।
ता नो विश्वानि जरिता ममत्तु परातरं सु निऋतिर्जिहीताम् २
अभी ष्वश्यः पौस्यैर्भवेम् द्यौरन भूमिं गिरयो नाजान् ।
ता नो विश्वानि जरिता चिकेत परातरं सु निऋतिर्जिहीताम् ३
मो षु णः सोम मृत्यवे परा दाः पश्येम नु सूर्यमुच्चरन्तम् ।
द्युभिर्हितो जरिमा सू नो अस्तु परातरं सु निऋतिर्जिहीताम् ४
असुनीते मनो अस्मासु धारय जीवातवे सु प्र तिरा न आयुः ।
रारन्धि नः सूर्यस्य सदृशि घृतेन त्वं तन्वं वर्धयस्व ५
असुनीते पुनरस्मासु चक्षुः पुनः प्राणमिह नो धेहि भोगम् ।
ज्योक् पश्येम सूर्यमुच्चरन्तमनुमते मृळया नः स्वस्ति ६
पुनर्नो असु पृथिवी ददातु पुनर्द्यौर्देवी पुनरन्तरिक्षम् ।
पुनर्नः सोमस्तन्वं ददातु पुनः पूषा पृथ्यां इ या स्वस्तिः ७
शं रोदसी सुबन्धवे यही अतस्य मातरा ।
भरतामप यद्रपो द्यौः पृथिवि क्षमा रपो मो षु ते किं चनाममत् ८
अवं द्वके अवं त्रिका दिवश्चरन्ति भेषजा ।
क्षमा चरिष्यवैककं भरतामप यद्रपो द्यौः पृथिवि क्षमा रपो मो षु ते किं
चनाममत् ९
समिन्द्रेरय गामन्ड्वाहं य आवहदुशीनराण्या अनः ।
भरतामप यद्रपो द्यौः पृथिवि क्षमा रपो मो षु ते किं चनाममत् १०

(६०) षष्ठितमं सूक्तम्

(१-१२) द्वादशर्चस्यास्य सूक्तस्य (१-५, ७-१२) प्रथमादिपञ्चर्चा
सप्तम्यादितृचद्वयस्य च बन्धुः श्रुतबन्धुर्विप्रबन्धुर्गौपायना ऋषयः, (६) षष्ठ्याश्चैषां
मातागस्त्यस्वसा ऋषिका । (१-४, ६) प्रथमादिचतुर्भूचां षष्ठ्याश्चासमातिः,
(५) पञ्चम्या इन्द्रः, (७-११) सप्तम्यादिपञ्चानां सुबन्धोर्जीवः, (१२) द्वादश्याश्च
बन्ध्वादीनां हस्ता देवताः । (१-५) प्रथमादिपञ्चर्चा गायत्री, (६-७, १०-१२)
षष्ठीसप्तम्योर्दशम्यादितृचस्य चानुष्टुप्, (८-९) अष्टमीनवम्योश्च पङ्क्तिश्छन्दांसि
आ जनं त्वेषसदृशं माहीनानामुपस्तुतम् । अगन्म बिभ्रतो नमः १
असमातिं नितोशनं त्वेषं निययिनं रथम् । भजेरथस्य सत्पतिम् २
यो जनान् महिषां इवाऽतितस्थौ पवीरवान् । उतापवीरवान् युधा ३

यस्यैद्वाकुरुपं वृते रेवान् मराय्येधते । दिवीव पञ्च कृष्टयः ४
 इन्द्रं क्षत्रासमातिषु रथप्रोष्ठेषु धारय । दिवीव सूर्यं दृशे ५
 अगस्त्यस्य नद्यः सप्ती युनद्धि रोहिता ।
 पुणीन् न्यक्रमीरभि विश्वान् राजन्नराधसः ६
 अयं मातायं पिता ऽयं जीवातुरागमत् ।
 इदं तव प्रसर्पणं सुबन्धवेहि निरिहि ७
 यथा युगं वरत्रया नह्यन्ति धरुणाय कम् ।
 एवा दाधार ते मनो जीवातवे न मृत्यवे ऽथो अरिष्टतातये ८
 यथेयं पृथिवी मही दाधारेमान् वनस्पतीन् ।
 एवा दाधार ते मनो जीवातवे न मृत्यवे ऽथो अरिष्टतातये ९
 यमाद्दहं वैवस्वतात् सुबन्धोर्मन् आभरम् । जीवातवे न मृत्यवे ऽथो
 अरिष्टतातये १०
 न्यग्वातोऽव वाति न्यक् तपति सूर्यः । नीचीनमघ्न्या दुहे न्यग्भवतु ते रपः
 ११
 अयं मे हस्तो भगवानयं मे भगवत्तरः । अयं मे विश्वभेषजो ऽयं
 शिवाभिर्मर्शनः १२

पञ्चमोऽनुवाकः

। सू० ६१-६८ ।

(६१) एकषष्टितमं सूक्तम्

(१-२७) सप्तविंशत्यृचस्यास्य सूक्तस्य मानवो नाभानेदिष्ठ ऋषिः । विश्वे देवा
देवताः । त्रिष्टुप् छन्दः

इदमित्था रौद्रं गूर्तवचा ब्रह्म क्रत्वा शच्यामन्तराजौ ।
 क्राणा यदस्य पितरा मंहनेष्ठाः पर्षत् पक्थे अहन्ना सप्त होतृन् १
 स इहानाय दभ्याय वन्वञ्चयवान्ः सूदैरमिमीत् वेदिम् ।
 तूर्वयाणो गूर्तवचस्तमः क्षोदो न रेत इतऊति सिञ्चत् २
 मनो न येषु हवनेषु तिग्मं विपः शच्या वनुथो द्रवन्ता ।
 आ यः शर्याभिस्तुविनृम्णो अस्याऽश्रीणीतादिशं गभस्तौ ३
 कृष्णा यद्गोष्वरुणीषु सीदद् दिवो नपाताश्विना हुवे वाम् ।
 वीतं मे यज्ञमा गतं मे अन्नं ववन्वासा नेषमस्मृतधू ४

प्रथिष्टु यस्य वीरकर्ममिष्णदनुष्ठितं नु नर्यो अपौहत् ।
 पुनस्तदा वृहति यत् कनाया दुहितुरा अनुभृतमनुर्वा ५
 मध्या यत् कर्त्वमभवदभीके कामं कृणवाने पितरि युवत्याम् ।
 मुनानग्रेतो जहतुर्वियन्ता सानौ निषिक्तं सुकृतस्य योनौ ६
 पिता यत् स्वां दुहितरमधिष्कन् क्षमया रेतः संजग्मानो नि षिञ्चत् ।
 स्वाध्योऽजनयन् ब्रह्म देवा वास्तोष्पतिं व्रतुपां निरतक्षन् ७
 स ईं वृषा न फेनमस्यदाजौ स्मदा परैदपं दध्रचेताः ।
 सरत् पदा न दक्षिणा परावृङ् न ता नु मे पृश्न्यो जगृध्रे ८
 मक्षू न वह्निः प्रजाया उपब्दिरग्निं न नग्न उप सीदूधः ।
 सनितेध्मं सनितोत वाजं स धर्ता जज्ञे सहसा यवीयुत् ९
 मक्षू कनायाः सख्यं नवग्वा ऋतं वदेन्त ऋतयुक्तिमग्मन् ।
 द्विबर्हसो य उप गोपमागुरदक्षिणासो अच्युता दुदुक्षन् १०
 मक्षू कनायाः सख्यं नवीयो राधो न रेत ऋतमित् तुरणयन् ।
 शुचि यत् ते रेक्णा आयजन्त सबर्दुघायाः पर्य उस्त्रियायाः ११
 पश्वा यत् पश्वा वियुता बुधन्तेति ब्रवीति वक्तरी रराणः ।
 वसोर्वसुत्वा कारवोऽनेहा विश्वं विवेष्टि द्रविणमुप क्षु १२
 तदिन्वस्य परिषद्दानो अगमन् पुरू सदन्तो नार्षदं बिभित्सन् ।
 वि शुष्णास्य संग्रथितमनुर्वा विदत् पुरुप्रजातस्य गुहा यत् १३
 भर्गो ह नामोत यस्य देवाः स्वर्णं ये त्रिषधस्थे निषेदुः ।
 अग्निर्ह नामोत जातवेदाः श्रुधी नो होतर्ऋतस्य होताधुक् १४
 उत त्या मे रौद्रावर्चिमन्ता नासत्याविन्द्र गूर्तये यजध्वै ।
 मनुष्वद्वक्तर्बर्हिषे रराणा मन्दू हितप्रयसा विक्षु यज्यू १५
 अयं स्तुतो राजा वन्दि वेधा अपश्च विप्रस्तरति स्वसैतुः ।
 स कक्षीवन्तं रेजयत् सो अग्निं नेमिं न चक्रमर्वतो रघुद्रु १६
 स द्विबन्धुर्वैतरणो यष्टा सबर्धु धेनुमस्व दुहध्वै ।
 सं यन्मित्रावरुणा वृञ्ज उक्थैर्ज्यैष्ठैभिर्यमणं वरूथैः १७
 तद्वन्धुः सूरिर्दिवि ते धियंध्रा नाभानेदिष्ठो रपति प्र वेनन् ।
 सा नो नाभिः परमास्य वां घाऽहं तत् पश्वा कतिथश्चिदास १८
 इयं मे नाभिरिह मे सधस्थमिमे मे देवा अयमस्मि सर्वः ।
 द्विजा अहं प्रथमजा ऋतस्येदं धेनुरदुहजायमाना १९

अधासु मन्द्रो अरतिर्विभावा ऽव स्यति द्विवर्तनिर्वनेषाट् ।
 ऊर्ध्वा यच्छ्रेणिर्न शिशुर्दन् मच्चू स्थिरं शैवृधं सूत माता २०
 अधा गाव उपमातिं कनाया अनु श्वान्तस्य कस्य चित् परैयुः ।
 श्रुधि त्वं सुद्रविणो नस्त्वं याळाश्वघ्नस्य वावृधे सूनृताभिः २१
 अध त्वमिन्द्र विद्धयश्स्मान् महो राये नृपते वज्रबाहुः ।
 रक्षा च नो मघोनः पाहि सूरीननेहसंस्ते हरिवो अभिष्टौ २२
 अध यद्राजाना गविष्टौ सरत् सरगयुः कारवै जरगयुः ।
 विप्रः प्रेषुः स ह्येषां बभूव परा च वक्षदुत पर्षदेनान् २३
 अधा न्वस्य जेन्यस्य पुष्टौ वृथा रेभन्त ईमहे तदू नु ।
 सरगयुरस्य सूनुरश्चो विप्रश्चासि श्रवसश्च सातौ २४
 युवोर्यदि सख्यायास्मे शर्धाय स्तोमं जुजुषे नमस्वान् ।
 विश्वत्र यस्मिन्ना गिरः समीचीः पूर्वीव गातुर्दाशत् सूनृतायै २५
 स गृणानो अब्दिर्देववानिति सुबन्धुर्ममसा सूक्तैः ।
 वर्धदुक्थैर्वचोभिरा हि नूनं व्यध्वैति पर्यस उस्त्रियायाः २६
 त ऊ षु णौ महो यजत्रा भूत देवास ऊतयै सजोषाः ।
 ये वाजाँ अनयता वियन्तो ये स्था निचेतारो अमूराः २७

द्वितीयोऽध्यायः

। व० १-२४ ।

(६२) द्विषष्टितमं सूक्तम्

(१-११) एकादशर्चस्यास्य सूक्तस्य मानवो नाभानेदिष्ठ ऋषिः । (१-६)
 प्रथमादिषडृचां विश्वे देवा अङ्गिरसो वा, (७) सप्तम्या विश्वे देवाः, (८-११)
 अष्टम्यादिचतसृणाञ्च सावर्णेर्दानस्तुतिर्देवताः । (१-४) प्रथमादिचतुर्भृचां जगती,
 (५, ८, ९) पञ्चम्यष्टमीनवमीनामनुष्टुप्, (६-७) षष्ठीसप्तम्योः प्रगाथः (षष्ठ्या
 बृहती, सप्तम्याः सतोबृहती), (१०) दशम्या गायत्री,

(११) एकादश्याश्च त्रिष्टुप् छन्दांसि

ये यज्ञेन दक्षिणया समक्ता इन्द्रस्य सख्यममृतत्वमानुश ।
 तेभ्यो भद्रमङ्गिरसो वो अस्तु प्रति गृभ्णीत मानवं सुमेधसः १
 य उदारजन् पितरौ गोमयं वस्वृतेनाभिन्दन् परिवत्सरे वलम् ।
 दीर्घायुत्वमङ्गिरसो वो अस्तु प्रति गृभ्णीत मानवं सुमेधसः २

य ऋतेन सूर्यमारौहयन् दिव्यप्रथयन् पृथिवीं मातरं वि ।
 सुप्रजास्त्वमङ्गिरसो वो अस्तु प्रति गृभ्णीत मानवं सुमेधसः ३
 अयं नाभा वदति वल्गु वौ गृहे देवपुत्रा ऋषयस्तच्छृणोतन ।
 सुब्रह्मण्यमङ्गिरसो वो अस्तु प्रति गृभ्णीत मानवं सुमेधसः ४
 विरूपास इदृषयस्त इद्रम्भीरवैपसः ।
 ते अङ्गिरसः सूनवस्ते अग्नेः परि जज्ञिरे ५
 ये अग्नेः परि जज्ञिरे विरूपासो दिवस्परि ।
 नवग्वो नु दशग्वो अङ्गिरस्तमः सर्वा देवेषु मंहते ६
 इन्द्रेण युजा निः सृजन्त वाघतो वृजं गोमन्तमश्विनम् ।
 सहस्रं मे ददतो अष्टकर्यशः श्रवो देवेष्वक्रत ७
 प्र नूनं जायतामयं मनुस्तोक्मैव रोहतु ।
 यः सहस्रं शताश्वं सद्यो दानाय मंहते ८
 न तमश्नोति कश्चन दिव इव सान्वारभम् ।
 सावर्ण्यस्य दक्षिणा वि सिन्धुरिव पप्रथे ९
 उत दासा परिविषे स्मद्दिष्टी गोपरीणसा । यदुस्तुर्वशं मामहे १०
 सहस्रदा ग्रामणीर्मा रिषन्मनुः सूर्येणास्य यतमानैतु दक्षिणा ।
 सार्वर्णेर्देवाः प्र तिरन्त्वायुर्यस्मिन्नश्रान्ता असनाम् वाजम् ११

(६३) त्रिषष्टितमं सूक्तम्

(१-१७) सप्तदशर्चस्यास्य सूक्तस्य प्लातो गय ऋषिः । (१-१४, १७)
 प्रथमादिचतुर्दशर्चा सप्तदश्याश्च विश्वे देवाः, (१५-१६) पञ्चदशीषोडश्योश्च
 पथ्यास्वस्तिर्देवताः । (१-१४) प्रथमादिचतुर्दशर्चा जगती, (१५) पञ्चदश्या
 त्रिष्टुब्जगती वा, (१६-१७) षोडशीसप्तदश्योश्च त्रिष्टुप् छन्दांसि
 प्रावतो ये दिधिषन्त आप्यं मनुप्रीतासो जनिमा विवस्वतः ।
 ययातेर्ये नहुष्यस्य बर्हिषि देवा आसते ते अधि ब्रुवन्तु नः १
 विश्वा हि वौ नमस्यानि वन्द्या नामानि देवा उत यज्ञियानि वः ।
 ये स्थ जाता अदितेरद्भस्परि ये पृथिव्यास्ते म इह श्रुता हवम् २
 येभ्यो माता मधुमत् पिन्वते पर्यः पीयूषं द्यौरदितिरद्रिबर्हाः ।
 उक्थशुष्मान् वृषभरान् त्वप्रसस्ताँ आदित्याँ अनु मदा स्वस्तये ३
 नृचक्षसो अर्निमिषन्तो अर्हणा बृहदेवासो अमृतत्वमानशुः ।

ज्योतीरथा अहिमाया अनागसो दिवो वर्ष्माणं वसते स्वस्तये ४
 सम्राजो ये सुवृधौ यज्ञमाययुरपरिहता दधिरे दिवि क्षयम् ।
 तां आ विवासु नमसा सुवृक्तिभिर्महो आदित्याँ अदितिं स्वस्तये ५
 को वः स्तोमं राधति यं जुजोषथ विश्वे देवासो मनुषो यति छन ।
 को वोऽध्वरं तुविजाता अरं करद् यो नः पर्षदत्यंहः स्वस्तये ६
 येभ्यो होत्रा प्रथमामायेजे मनुः समिद्धाग्निर्मनसा सप्त होतृभिः ।
 त आदित्या अभयं शर्म यच्छत सुगा नः कर्त सुपथा स्वस्तये ७
 य ईशिरि भुवनस्य प्रचैतसो विश्वस्य स्थातुर्जगतश्च मन्तवः ।
 ते नः कृतादकृतादेनसस्पर्यद्या देवासः पिपृता स्वस्तये ८
 भरेष्विन्द्रं सुहव हवामहेऽहोमुचं सुकृतं दैव्यं जनम् ।
 अग्निं मित्रं वरुणं सातये भगं द्यारवापृथिवी मरुतः स्वस्तये ९
 सुत्रामाणंपृथिवीं द्यामनेहसं सुशर्माणमदितिं सुप्रणीतिम् ।
 दैवीं नारवं स्वरित्रामनागसमस्त्रवन्तीमा रुहेमा स्वस्तये १०
 विश्वे यजत्रा अधि वोचतोतये त्रायध्वं नो दुरेवाया अभिहुतः ।
 सत्यया वो देवहृत्या हुवेम शृणवतो देवा अर्वसे स्वस्तये ११
 अपामीवामप विश्वामनाहतिमपारातिं दुर्विदत्रामघायतः ।
 आरे देवा द्वेषो अस्मद्युयोतनोरु णः शर्म यच्छता स्वस्तये १२
 अरिष्टः स मर्तो विश्वं एधते प्र प्रजाभिर्जायते धर्मणस्परि ।
 यमादित्यासो नयथा सुनीतिभिरति विश्वानि दुरिता स्वस्तये १३
 यं देवासोऽवथ वाजसातौ यं शूरसाता मरुतो हिते धने ।
 प्रातर्यावाणं रथमिन्द्र सानसिमरिष्यन्तमा रुहेमा स्वस्तये १४
 स्वस्ति नः पृथ्यासु धन्वसु स्वस्त्यश्प्सु वृजने स्वर्वति ।
 स्वस्ति नः पुत्रकृथेषु योनिषु स्वस्ति राये मरुतो दधातन १५
 स्वस्तिरिद्धि प्रपथे श्रेष्ठा रेक्णास्वत्यभि या वाममेति ।
 सा नो अमा सो अरणे नि पातु स्वावेशा भवतु देवगोपा १६
 एवा प्लतेः सूनुरवीवृधद्वो विश्वं आदित्या अदिते मनीषी ।
 ईशानासो नरो अमर्त्येनाऽस्तावि जनो दिव्यो गयेन १७

(६४) चतुःषष्टितमं सूक्तम्

(१-१७) सप्तदशर्चस्यास्य सूक्तस्य प्लातो गय ऋषिः । विश्वे देवा देवताः ।

(१-११, १३-१५) प्रथमाद्येकादशर्चा त्रयोदश्यादितृचस्य च जगती, (१२, १६-
१७) द्वादशीषोडशीसप्तदशीनाञ्च त्रिष्टुप् छन्दसी
कथा देवानां कतमस्य यामनि सुमन्तु नाम शृण्वतां मनामहे ।
को मृळाति कतमो नो मयस्करत् कतम ऊती अभ्या ववर्तति १
क्रतूयन्ति क्रतवो हत्सु धीतयो वेनन्ति वेनाः पतयन्त्या दिशः ।
न मर्दिता विद्यते अन्य एभ्यो देवेषु मे अधि कामा अयंसत २
नरा वा शंसं पूषणमगौह्यमग्निं देवेद्धमभ्यर्चसे गिरा ।
सूर्यामासा चन्द्रमसा यमं दिवि त्रितं वार्तमुषसंक्तुमश्विनां ३
कथा कविस्तुवीरवान् कया गिरा बृहस्पतिर्वावृधते सुवृक्तिभिः ।
अज एकपात् सुहवैभिर्त्रृक्वभिरहिः शृणोतु बुध्योर्हर्वामनि ४
दक्षस्य वादिते जन्मनि वृते राजाना मित्रावरुणा विवाससि ।
अतूर्तपन्थाः पुरुरथौ अर्यमा सप्तहोता विषुरूपेषु जन्मसु ५
ते नो अर्वन्तो हवनश्रुतो हवं विश्वे शृणवन्तु वाजिनो मितद्रवः ।
सहस्रसा मेधसाताविव त्मना महो ये धनं समिथेषु जधिरे ६
प्र वो वायुं रथयुजं पुरंधिं स्तोमैः कृणुध्वं सख्याय पूषणम् ।
ते हि देवस्य सवितुः सर्वामनि क्रतुं सचन्ते सचितुः सचेतसः ७
त्रिः सप्त सस्त्रा नद्यो महीरपो वनस्पतीन् पर्वतां अग्निमूतयै ।
कृशानुमस्तृन् तिष्यं सधस्थ आ रुद्रं रुद्रेषु रुद्रियं हवामहे ८
सरस्वती सरयुः सिन्धुरूर्मिभिर्महो महीरवसा यन्तु वक्षणीः ।
देवीरापो मातरः सूदयित्वो घृतवत् पयो मधुमन्नो अर्चत ९
उत माता बृहद्दिवा शृणोतु नस्त्वष्टा देवेभिर्जनिभिः पिता वचः ।
ऋभुक्षा वाजो रथस्पतिर्भगो रणवः शंसः शशमानस्य पातु नः १०
रणवः संदृष्टौ पितुमाँ इव क्षयो भद्रा रुद्राणां मरुतामुपस्तुतिः ।
गोभिः प्याम यशसो जनेष्वा सदा देवास इळ्या सचेमहि ११
यां मे धियं मरुत् इन्द्र देवा अर्ददात वरुण मित्र यूयम् ।
तां पीपयत् पर्यसेव धेनुं कुविद्भिरो अधि रथे वर्हाथ १२
कुविद्भिर् प्रति यथा चिदस्य नः सजात्यस्य मरुतो बुबोधथ ।
नाभा यत्र प्रथमं संनसामहे तत्र जामित्वमर्दितिर्दधातु नः १३
ते हि द्यावापृथिवी मातरा मही देवी देवाञ्जन्मना यज्ञिये इतः ।
उभे बिभृत उभयं भरीमभिः पुरू रतांसि पितृभिश्च सिञ्चतः १४

वि षा होत्रा विश्वमश्नोति वार्यं बृहस्पतिररमतिः पनीयसी ।
 ग्रावा यत्र मधुषुदुच्यते बृहदवीवशन्त मतिभिर्मनीषिणः १५
 एवा क्विस्तुवीरवाँ ऋतज्ञा द्रविणस्युर्द्रविणसश्चकानः ।
 उक्थेभिरत्र मतिभिश्च विप्रो ऽपीपयद्रयौ दिव्यानि जन्म १६
 एवा प्लतेः सूनुरवीवृधद्वो विश्व आदित्या अदिते मनीषी ।
 ईशानासो नरो अमर्त्येनाऽस्तावि जनो दिव्यो गयेन १७

(६५) पञ्चषष्टितमं सूक्तम्

(१-१५) पञ्चदशर्चस्यास्य सूक्तस्य वासुक्रो वसुकर्ण ऋषिः । विश्वे देवा देवताः ।

(१-१४) प्रथमादिचतुर्दशर्चा जगती, (१५) पञ्चदश्याश्च त्रिष्टुप् छन्दसी
 अग्निरिन्द्रो वरुणो मित्रो अर्यमा वायुः पूषा सरस्वती सजोषसः ।
 आदित्या विष्णुर्मरुतः स्वर्बृहत् सोमो रुद्रो अदितिर्ब्रह्मणस्पतिः १
 इन्द्राग्नी वृत्रहत्येषु सत्पती मिथो हिन्वाना तन्वाइ समौकसा ।
 अन्तरिक्षं मह्या पप्रुजसा सोमो घृतश्रीर्महिमानमीरयन् २
 तेषां हि मुह्या महतामनर्वणां स्तोमाँ इयर्मृतज्ञा ऋतावृधाम् ।
 ये अप्सवमर्णवं चित्रार्धसस्ते नो रासन्तां महये सुमित्र्याः ३
 स्वर्णरमन्तरिक्षाणि रोचना द्यावाभूमी पृथिवीं स्कम्भुरोजसा ।
 पृक्षा इव महयन्तः सुरातयो देवाः स्तवन्ते मनुषाय सूरयः ४
 मित्राय शिञ्ज वरुणाय दाशुषे या सम्राजा मनसा न प्रयुच्छतः ।
 ययोर्धाम धर्मणा रोचते बृहद् ययोरुभे रोदसी नाधसी वृताँ ५
 या गौर्वर्तनिं पर्येति निष्कृतं पयो दुहाना व्रतनीरवारतः ।
 सा प्रब्रुवाणा वरुणाय दाशुषे देवेभ्यो दाशद्भविषा विवस्वते ६
 दिवक्षसो अग्निजिह्वा ऋतावृध ऋतस्य योनिं विमृशन्त आसते ।
 द्यां स्कभित्व्यश्प आ चक्रुरोजसा यज्ञं जनित्वी तन्वीइ नि मामृजुः ७
 परिक्षिता पितरो पूर्वजावरी ऋतस्य योना क्षयतः समौकसा ।
 द्यावापृथिवी वरुणाय सव्रते घृतवत् पयो महिषाय पिन्वतः ८
 पर्जन्यावाता वृषभा पुरीषिणैन्द्रवायू वरुणो मित्रो अर्यमा ।
 देवाँ आदित्याँ अदितिं हवामहे ये पार्थिवासो दिव्यासो अप्सु ये ९
 त्वष्टारं वायुमृभवो य ओहते दैव्या होतारा उषसं स्वस्तये ।
 बृहस्पतिं वृत्रखादं सुमेधसमिन्द्रियं सोमं धनुसा उँ इमहे १०

ब्रह्म गामश्च ज्ञनयन्त ओषधीर्वनस्पतीन् पृथिवीं पर्वताँ अपः ।
सूर्यं दिवि रोहयन्तः सुदानव आर्या व्रता विसृजन्तो अधि क्षमि ११
भुज्युमंहसः पिपृथो निरश्विना श्याव पुत्रं वधिमत्या अजिन्वतम् ।
कमद्युर्व विमदायोहथुर्युवं विष्णाप्वं विश्वकायाव सृजथः १२
पावीरवी तन्यतुरेकपादजो दिवो धर्ता सिन्धुरापः समुद्रियः ।
विश्वे देवासः शृणवन् वचांसि मे सरस्वती सह धीभिः पुरंध्या १३
विश्वे देवाः सह धीभिः पुरंध्या मनोर्यजत्रा अमृता ऋतज्ञाः ।
रातिषाचो अभिषाचः स्वर्विदः स्वर्गिरो ब्रह्म सूक्तं जुषेरत १४
देवान् वसिष्ठो अमृतान् ववन्दे ये विश्वा भुवनाभि प्रतस्थुः ।
ते नो रासन्तामुरुगायमद्य यूयं पात स्वस्तिभिः सदा नः १५

(६६) षट्षष्टितमं सूक्तम्

(१-१५) पञ्चदशर्चस्यास्य सूक्तस्य वासुक्रो वसुकर्ण ऋषिः । विश्वे देवा देवताः ।

(१-१४) प्रथमादिचतुर्दशर्चा जगती, (१५) पञ्चदश्याश्च त्रिष्टुप् छन्दसी
देवान् हुवे बृहच्छ्रवसः स्वस्तये ज्योतिष्कृतौ अध्वरस्य प्रचेतसः ।
ये वावृधुः प्रतरं विश्ववेदस इन्द्रज्येष्ठासो अमृता ऋतावृधः १
इन्द्रप्रसूता वरुणप्रशिष्टा ये सूर्यस्य ज्योतिषो भागमानुशुः ।
मरुद्गणे वृजने मन्म धीमहि माघोने यज्ञं जनयन्त सूरयः २
इन्द्रो वसुभिः परि पातु नो गर्यमादित्यैर्नो अदितिः शर्म यच्छतु ।
रुद्रो रुद्रेभिर्देवो मृळयाति नस्त्वष्टा नो ग्राभिः सुविताय जिन्वतु ३
अदितिर्द्यावापृथिवी ऋतं महदिन्द्राविष्णू मरुतः स्वर्बृहत् ।
देवाँ आदित्याँ अवंसे हवामहे वसून् रुद्रान् त्सवितार सुदंससम् ४
सरस्वान् धीभिर्वरुणो धृतव्रतः पूषा विष्णुर्महिमा वायुरश्विना ।
ब्रह्मकृतौ अमृता विश्ववेदसः शर्म नो यंसन् त्रिवरूथमंहसः ५
वृषा यज्ञो वृषणः सन्तु यज्ञिया वृषणो देवा वृषणो हविष्कृतः ।
वृषणा द्यावापृथिवी ऋतावरी वृषा पर्जन्यो वृषणो वृषस्तुभः ६
अग्नीषोमा वृषणा वाजसातये पुरुप्रशस्ता वृषणा उप ब्रुवे ।
यावीजिरे वृषणो देवयज्यया ता नः शर्म त्रिवरूथं वि यंसतः ७
धृतव्रताः क्षत्रिया यज्ञनिष्कृतौ बृहद्विवा अध्वराणामभिश्चियः ।
अग्निहोतार ऋतसापो अद्भुहो ऽपो असृजन्ननु वृत्रतूर्ये ८

द्यावापृथिवी जनयन्नभि वृता ऽऽप ओषधीर्विनानि यज्ञिया ।
 अन्तरिक्षं स्वशरा पप्रुतये वशं देवासस्तन्वीरु नि मामृजुः ६
 धर्तारौ दिव ऋभवं सुहस्ता वातापर्जन्या महिषस्य तन्यतोः ।
 आप ओषधीः प्र तिरन्तु नो गिरो भगौ रातिर्वाजिनो यन्तु मे हवम् १०
 समुद्रः सिन्धु रजौ अन्तरिक्षमज एकपात् तनयित्पुरणवः ।
 अहिर्बुध्न्यः शृणवद्वचासि मे विश्वे देवास उत सूरयो मम ११
 स्याम वो मनवो देववीतये प्राञ्च नो यज्ञं प्र शयत साधुया ।
 आदित्या रुद्रा वसवः सुदानव इमा ब्रह्म शस्यमानानि जिन्वत १२
 दैव्या होतारा प्रथमा पुरोहित ऋतस्य पन्थामन्वेमि साधुया ।
 क्षेत्रस्य पतिं प्रतिवेशमीमहे विश्वान् देवाँ अमृताँ अप्रयुच्छतः १३
 वसिष्ठासः पितृवद्वाचमक्रत देवाँ ईळाना ऋषिवत् स्वस्तये ।
 प्रीता इव ज्ञातयः काममेत्याऽस्मे देवासोऽव धूनुता वसु १४
 देवान् वसिष्ठो अमृतान् ववन्दे ये विश्वा भुवनाभि प्रतस्थुः ।
 ते नो रासन्तामुरुगायमद्य यूयं पात स्वस्तिभिः सदा नः १५

(६७) सप्तषष्टितमं सूक्तम्

(१-१२) द्वादशर्चस्यास्य सूक्तस्याङ्गिरसोऽयास्य ऋषिः । बृहस्पतिर्देवता ।

त्रिष्टुप् छन्दः

इमां धियं सप्तशीर्ष्णीं पिता न ऋतप्रजातां बृहतीमविन्दत् ।
 तुरीयं स्विञ्जनयद्विश्वजन्यो ऽयास्य उक्थमिन्द्राय शंसन् १
 ऋतं शंसन्त ऋजु दीध्याना दिवस्पुत्रासो असुरस्य वीराः ।
 विप्रं पदमङ्गिरसो दधाना यज्ञस्य धामं प्रथमं मनन्त २
 हंसैरिव सखिभिर्वावदद्विरश्मन्मयानि नहना व्यस्यन् ।
 बृहस्पतिरभिकनिक्रद्द्वा उत प्रास्तौदुञ्च विद्वाँ अगायत् ३
 अवो द्वाभ्यां पर एकया गा गुहा तिष्ठन्तीरनृतस्य सेतौ ।
 बृहस्पतिस्तमसि ज्योतिरिच्छन्नुदुस्त्रा आकर्वि हि तिस्र आवः ४
 विभिद्या पुरं शयथेमपाचीं निस्त्रीणि साकमुदधेरकृन्तत् ।
 बृहस्पतिरुषसं सूर्यं गामर्कं विवेद स्तनयन्निव द्यौः ५
 इन्द्रो वलं रक्षितारं दुर्धानां करेणैव वि चकर्ता रवेण ।
 स्वेदाञ्जिभिराशिरमिच्छमानो ऽरौदयत् पणिमा गा अमुष्णात् ६

स ई सत्येभिः सखिभिः शचद्भिर्गोर्धायसं वि धनसैरददः ।
 ब्रह्मणस्पतिर्वृषभिर्वराहैर्घर्मस्वैदेभिर्द्रविणं व्यानत् ७
 ते सत्येन मनसा गोपतिं गा इयानासं इषणयन्त धीभिः ।
 बृहस्पतिर्मिथोअवद्यपेभिरुदुस्त्रिया असृजत स्वयुग्भिः ८
 तं वर्धयन्तो मतिभिः शिवाभिः सिंहमिव नानदतं सधस्थै ।
 बृहस्पतिं वृषणं शूरसातौ भरैभरे अनु मदेम जिष्णुम् ९
 यदा वाजमसनद्विश्वरूपमा द्यामरुद्भदुत्तराणि सद्य ।
 बृहस्पतिं वृषणं वर्धयन्तो नाना सन्तो बिभ्रतो ज्योतिरासा १०
 सत्यामाशिषं कृणुता वयोधै कीरिं चिद्धयवथ स्वेभिरेवैः ।
 पश्चा मृधो अप भवन्तु विश्वास्तद्रौदसी शृणुतं विश्वमिन्वे ११
 इन्द्रो म्हा महतो अर्णवस्य वि मूर्धानमभिनदर्बुदस्य ।
 अहन्नहिमरिणात् सप्त सिन्धून् देवैर्द्यावापृथिवी प्रावतं नः १२

(६८) अष्टषष्टितमं सूक्तम्

(१-१२) द्वादशर्चस्यास्य सूक्तस्याङ्गिरसोऽयास्य ऋषिः । बृहस्पतिर्देवता ।

त्रिष्टुप् छन्दः

उदप्रुतो न वयो रक्षमाणा वावदतो अभ्रियस्येव घोषाः ।
 गिरिभ्रजो नोर्मयो मदन्तो बृहस्पतिमभ्यर्का अनावन् १
 सं गोभिराङ्गिरसो नक्षमाणो भग इवेदर्यमणं निनाय ।
 जनै मित्रो न दंपती अनक्ति बृहस्पते वाजयाशूरिवाजौ २
 साध्वर्या अतिथिनीरिषिराः स्पार्हाः सुवर्णा अनवद्यरूपाः ।
 बृहस्पतिः पर्वतेभ्यो वितूर्या निर्गा ऊपे यवमिव स्थिविभ्यः ३
 आप्रुषायन् मधुन ऋतस्य योनिमवक्षिपन्नर्क उल्कामिव द्योः ।
 बृहस्पतिरुद्धरन्नश्मनो गा भूम्या उदनेव वि त्वचं बिभेद ४
 अप ज्योतिषा तमो अन्तरिक्षादुदनः शीपालमिव वार्त आजत् ।
 बृहस्पतिरनुमृश्या वलस्याऽभ्रमिव वात आ चक्र आ गाः ५
 यदा वलस्य पीयतो जसुं भेद् बृहस्पतिरग्निपौभिरकैः ।
 द्भिर्न जिह्वा परिविष्टमाददाविर्निर्धीरैकृणोदुस्त्रियाणाम् ६
 बृहस्पतिरमत हि त्यदासां नाम स्वरीणां सदेने गुहा यत् ।
 आणडेव भित्त्वा शकुनस्य गर्भमुदुस्त्रियाः पर्वतस्य त्मनाजत् ७

अश्नापिनद्धं मधु पर्यपश्यन्मत्स्यं न दीन उदनिं क्षियन्तम् ।
 निष्टज्जभार चमसं न वृक्षाद् बृहस्पतिर्विरवेणा विकृत्य ८
 सोषामविन्दत् स स्वशः सो अग्निं सो अर्केण वि बबाधे तमांसि ।
 बृहस्पतिर्गोवपुषो वलस्य निर्मज्जानं न पर्वणो जभार ९
 हिमेव पर्णा मुषिता वनानि बृहस्पतिनाकृपयद्ब्रूलो गाः ।
 अनानुकृत्यमपुनश्चकार यात् सूर्यामासा मिथ उच्चरातः १०
 अभि श्यावं न कृशनेभिरश्वं नक्षत्रेभिः पितरो द्यामपिंशन् ।
 रात्र्यां तमो अर्दधुर्ज्योतिरहन् बृहस्पतिर्भिनदद्रिं विदद्वाः ११
 इदमकर्म नमो अभ्रियाय यः पूर्वीरन्वानोनवीति ।
 बृहस्पतिः स हि गोभिः सो अश्वैः स वीरेभिः स नृभिर्नो वयो धात् १२
 षष्ठोऽनुवाकः
 । सू० ६६-८४ ।

(६६) एकोनसप्ततितमं सूक्तम्

(१-१२) द्वादशर्चस्यास्य सूक्तस्य वाध्यश्वः सुमित्र ऋषिः । अग्निर्देवता । (१-२)
 प्रथमाद्वितीययोर्ऋचोर्जगती, (३-१२) तृतीयादिदशानाञ्च त्रिष्टुप् छन्दसी
 भद्रा अग्नेर्वध्र्यश्वस्य संदृशौ वामी प्रणीतिः सुरणा उपैतयः ।
 यदीं सुमित्रा विशो अग्र इन्धते घृतेनाहुतो जरते दर्विद्युतत् १
 घृतमग्नेर्वध्र्यश्वस्य वर्धनं घृतमन्नं घृतम्वस्य मेदनम् ।
 घृतेनाहुत उर्विया वि पप्रथे सूर्य इव रोचते सर्पिरासुतिः २
 यत् ते मनुयदनीकं सुमित्रः समीधे अग्ने तदिदं नवीयः ।
 स रेवच्छौच स गिरौ जुषस्व स वाजं दर्षि स इह श्रवौ धाः ३
 यं त्वा पूर्वमीळितो वर्ध्र्यश्वः समीधे अग्ने स इदं जुषस्व ।
 स नः स्तिपा उत भवा तनूपा दात्रं रक्षस्व यदिदं तै अस्मे ४
 भवा द्युम्नी वाध्र्यश्वोत गोपा मा त्वा तारीदभिर्मातिर्जनानाम् ।
 शूर इव धृष्णाश्चर्वनः सुमित्रः प्र नु वोचं वाध्र्यश्वस्य नाम ५
 समज्ज्यां पर्वत्याइ वसूनि दासा वृत्राणयार्या जिगेथ ।
 शूर इव धृष्णाश्चर्वनो जनानां त्वमग्ने पृतनायूरभि ष्याः ६
 दीर्घतन्तुर्बृहदुक्तायमग्निः सहस्रस्तरीः शतनीथ ऋभवा ।
 द्युमान् द्युमत्सु नृभिर्मृज्यमानः सुमित्रेषु दीदयो देवयत्सु ७

त्वे धेनुः सुदुघां जातवेदो ऽसश्चतैव समना संबर्धुक् ।
 त्वं नृभिर्दक्षिणावद्विरग्रे सुमित्रेभिरिध्यसे देवयद्विः ८
 देवाश्चित् ते अमृतां जातवेदो महिमानं वाध्वयश्च प्र वौचन् ।
 यत् संपृच्छं मानुषीर्विश आयन् त्वं नृभिरजयस्त्वावृधेभिः ९
 पितेर्व पुत्रमबिभरुपस्थे त्वामग्रे वध्वयश्चः संपर्यन् ।
 जुषाणो अस्य समिधं यविष्टोत पूर्वां अवनोर्वाधतश्चित् १०
 शश्वद्ग्निर्वध्वयश्चस्य शत्रून् नृभिर्जिगाय सुतसोमवद्विः ।
 समनं चिददहश्चित्रभानो ऽव् ब्राधन्तमभिनद्वधश्चित् ११
 अयमग्निर्वध्वयश्चस्य वृत्रहा संनकात् प्रेद्धो नर्मसोपवाक्यः ।
 स नो अजामीरुत वा विजामीनभि तिष्ठ शर्धतो वाध्वयश्च १२

(७०) सप्ततितमं सूक्तम्

(१-११) एकादशर्चस्यास्य सूक्तस्य वाध्वयश्चः सुमित्र ऋषिः । (१) प्रथमर्च इध्मः
 समिद्धो वाग्निः, (२) द्वितीयाया नराशंसः, (३) तृतीयाया इळः, (४) चतुर्थ्या
 बर्हिः, (५) पञ्चम्या देवीद्वारः, (६) षष्ठ्या उषासानक्ता, (७) सप्तम्या दैव्यौ
 होतारौ प्रचेतसौ, (८) अष्टम्यास्तिस्रो देव्यः सरस्वतीळाभारत्यः, (९)
 नवम्यास्त्वष्टा, (१०) दशम्या वनस्पतिः, (११) एकादश्याश्च स्वाहाकृतयो
 देवताः । त्रिष्टुप् छन्दः

इमां मे अग्रे समिधं जुषस्वेळस्पदे प्रति हर्या घृताचीम् ।
 वर्ष्मन् पृथिव्याः सुदिनत्वे अहामूर्ध्वो भव सुक्रतो देवयुज्या १
 आ देवानामग्र्यावेह यातु नराशंसो विश्वरूपेभिरश्वैः ।
 ऋतस्य पथा नर्मसा मियेधो देवेभ्यो देवतमः सुषूदत् २
 शश्वत्तममीळते दूत्याय हविष्मन्तो मनुष्यासो अग्निम् ।
 वहिष्ठैरश्वैः सुवृता रथेना ऽऽ देवान् वद्वि नि षदेह होता ३
 वि प्रथतां देवजुष्टं तिरश्चा दीर्घं द्राघ्मा सुरभि भूत्वस्मे ।
 अहैळता मनसा देव बर्हिरिन्द्रज्येष्ठां उशतो यद्वि देवान् ४
 दिवो वा सानुं स्पृशता वरीयः पृथिव्या वा मात्रया वि श्रयध्वम् ।
 उशतीद्वारो महिना महद्विर्देवं रथं रथयुर्धारयध्वम् ५
 देवी दिवो दुहितरा सुशिल्पे उषासानक्ता सदतां नि योनौ ।
 आ वा देवास उशती उशन्त उरौ सीदन्तु सुभगे उपस्थे ६

ऊर्ध्वो ग्रावा बृहदग्निः समिद्धः प्रिया धामान्यदितेरूपस्थे ।
 पुरोहितावृत्विजा यज्ञे अस्मिन् विदुष्टरा द्रविणमा यजेथाम् ७
 तिस्रो देवीर्बर्हिरिदं वरीय आ सीदत चकृमा वः स्योनम् ।
 मनुष्वद्यज्ञं सुधिता हवींषीळा देवी घृतपदी जुषन्त ८
 देवे त्वष्टर्यद्ध चारुत्वमानड्यदङ्गिरसामभवः सचाभूः ।
 स देवानां पाथ उप प्र विद्वानुशन् यच्चि द्रविणोदः सुरतः ९
 वनस्पते रशनया न्नीयूया देवानां पाथ उप वच्चि विद्वान् ।
 स्वदाति देवः कृणवद्धवीष्यवतां द्यावापृथिवी हव मे १०
 आग्ने वह वरुणमिष्टये न इन्द्र दिवो मरुतो अन्तरिक्षात् ।
 सीदन्तु बर्हिर्विश्व आ यजत्राः स्वाहा देवा अमृता मादयन्ताम् ११

(७१) एकसप्ततितमं सूक्तम्

(१-११) एकादशर्चस्यास्य सूक्तस्याङ्गिरसो बृहस्पतिर्ऋषिः । ज्ञानं देवता । (१-
 ८, १०-११) प्रथमाद्यष्टर्चा दशम्येकादशयोश्च त्रिष्टुप्, (९) नवम्याश्च जगती छन्दसी
 बृहस्पते प्रथमं वाचो अग्रं यत् प्रैरत नामधेयं दधानाः ।
 यदेषां श्रेष्ठं यदरिप्रमासीत् प्रेणा तदेषां निहितं गुहाविः १
 सक्तुमिव तितउना पुनन्तो यत्र धीरा मनसा वाचमक्रत ।
 अत्रा सखायः सख्यानि जानते भद्रैषां लक्ष्मीर्निहिताधि वाचि २
 यज्ञेन वाचः पदवीयमायन् तामन्वविन्दन्नृषिषु प्रविष्टाम् ।
 तामाभृत्या व्यदधुः पुरुत्रा तां सप्त रेभा अभि सं नवन्ते ३
 उत त्वः पश्यन् न ददर्श वाचमुत त्वः शृणवन् न शृणोत्येनाम् ।
 उतो त्वस्मै तन्वंशं वि संस्त्रे जायेव पत्य उशती सुवासाः ४
 उत त्वं सख्ये स्थिरपीतमाहुर्नैनं हिन्वन्त्यपि वाजिनेषु ।
 अधेन्वा चरति माय्येष वाचै शुश्रुवाँ अफलामपुष्पाम् ५
 यस्तित्याजं सचिविदं सखायं न तस्य वाच्यर्पि भागो अस्ति ।
 यदीं शृणोत्यलकं शृणोति नहि प्रवेदं सुकृतस्य पन्थाम् ६
 अक्षरवन्तः कर्णवन्तः सखायो मनोज्वेष्वसमा बभूवुः ।
 आद्घ्नास उपकक्षास उ त्वे हदा इव स्नात्वा उ त्वे ददृशे ७
 हदा तष्टेषु मनसो ज्वेषु यद्ब्राह्मणाः संयजन्ते सखायः ।
 अत्राह त्वं वि जहूर्वेद्याभिरोहब्रह्मणो वि चरन्त्यु त्वे ८

इमे ये नार्वाङ्गन पुरश्चरन्ति न ब्राह्मणासो न सुतेकरासः ।
त एते वाचमभिपद्य पापया सिरीस्तन्त्रं तन्वते अप्रजज्ञयः ६
सर्वे नन्दन्ति यशसागतेन सभासाहेन सख्या सखायः ।
क्विल्विषस्पृत् पितुषणिह्येषामरं हितो भवति वाजिनाय १०
ऋचां त्वः पोषमास्ते पुपुष्वान् गायत्रं त्वो गायति शक्वरीषु ।
ब्रह्मा त्वो वदति जातविद्यां यज्ञस्य मात्रां वि मिमीत उ त्वः ११
तृतीयोऽध्यायः
। व० १-२८ ।

(७२) द्विसप्ततितमं सूक्तम्

(१-६) नवर्चस्यास्य सूक्तस्य लौक्य आङ्गिरसो वा बृहस्पतिर्ऋषिर्दक्षायणी अदि-
तिर्वा ऋषिका । देवा देवताः । अनुष्टुप् छन्दः

देवानां नु वयं जाना प्र वौचाम विपुन्यया ।
उक्थेषु शस्यमानेषु यः पश्यादुत्तरे युगे १
ब्रह्मणस्पतिरेता सं कर्मारं इवाधमत् ।
देवानां पूर्व्ये युगे ऽसतः सदजायत २
देवानां युगे प्रथमे ऽसतः सदजायत ।
तदाशा अन्वजायन्त तदुत्तानपदस्परि ३
भूर्जज्ञ उत्तानपदो भुव आशा अजायन्त ।
अदितेर्दक्षो अजायत दक्षाददितिः परि ४
अदितिर्ह्यर्जनिष्ट दक्ष या दुहिता तव ।
तां देवा अन्वजायन्त भद्रा अमृतबन्धवः ५
यद्देवा अदः सलिले सुसंरब्धा अतिष्ठत ।
अत्रा वो नृत्यतामिव तीव्रो रेणुरपायत ६
यद्देवा यतयो यथा भुवनान्यपिन्वत ।
अत्रा समुद्र आ गूळहमा सूर्यमजभर्तन ७
अष्टौ पुत्रासो अदितेर्ये जातास्तन्वशस्परि ।
देवाँ उप प्रैत् सप्तभिः परा मार्तारिडमास्यत् ८
सप्तभिः पुत्रैरदितिरुप प्रैत् पूर्व्य युगम् ।
प्रजायै मृत्यवै त्वत् पुनर्मार्तारिडमाभरत् ९

(७३) त्रिसप्ततितमं सूक्तम्

(१-११) एकादशर्चस्यास्य सूक्तस्य शाक्त्यो गौरिवीतिर्ऋषिः । इन्द्रो देवता ।

त्रिष्टुप् छन्दः

जनिष्ठा उग्रः सहसे तुराय मन्द्र ओजिष्ठो बहुलाभिमानः ।
 अर्धनिन्द्रं मरुतश्चिदत्रं माता यद्वीरं दधनद्धनिष्ठा १
 द्रुहो निषत्ता पृशनी चिदेवैः पुरु शंसैन वावृधुष्ट इन्द्रम् ।
 अभीवृतेव ता महापदेन ध्वान्तात् प्रपित्वादुदरन्त गर्भाः २
 ऋष्वा ते पादा प्र यज्जिगास्यवर्धन् वाजा उत ये चिदत्र ।
 त्वमिन्द्र सालावृकान् त्सहस्रमासन् दधिषे अश्विना ववृत्याः ३
 समना तूर्णिरुप यासि यज्ञमा नासत्या सख्याय वक्षि ।
 वसाव्यामिन्द्र धारयः सहस्रा ऽश्विना शूर ददतुर्मृधानि ४
 मन्दमान ऋतादधि प्रजायै सखिभिरिन्द्र इषिरेभिरथम् ।
 आभिर्हि माया उप दस्युमागान्मिहः प्र त्प्रा अवपत् तमासि ५
 सनामाना चिद्ध्वसयो न्यस्मा अवाहन्निन्द्र उषसो यथानः ।
 ऋष्वैरगच्छः सखिभिर्निकामैः साकं प्रतिष्ठा हृद्या जघन्थ ६
 त्वं जघन्थ नमुचिं मखस्युं दासं कृण्वान ऋषये विमायम् ।
 त्वं चकथ मनवे स्योनान् पथो देवत्राञ्जसेव यानान् ७
 त्वमेतानि पप्रिषे वि नामेशान इन्द्र दधिषे गर्भस्तौ ।
 अनु त्वा देवाः शर्वसा मदन्त्युपरिबुधान् वनिनश्चकथ ८
 चक्रं यदस्याप्स्वा निषत्तमुतो तदस्मै मध्वच्चच्छद्यात् ।
 पृथिव्यामतिषितं यदूधः पयो गोष्वदधा ओषधीषु ९
 अश्वादियायेति यद्वदन्त्योजसो जातमुत मन्य एनम् ।
 मन्योरियाय हर्म्येषु तस्थौ यतः प्रज्ज इन्द्रो अस्य वेद १०
 वयः सुपर्णा उप सेदुरिन्द्रं प्रियमैधा ऋषयो नाधमानाः ।
 अप ध्वान्तमूर्णुहि पूर्धि चक्षुर्मुग्ध्यस्मान् निधयेव ब्रह्मान् ११

(७४) चतुःसप्ततितमं सूक्तम्

(१-६) षडचस्यास्य सूक्तस्य शाक्त्यो गौरिवीतिर्ऋषिः । इन्द्रो देवता ।

त्रिष्टुप् छन्दः

वसूनां वा चर्कष इयन्नन् धिया वा यज्ञैर्वा रोदस्योः ।
 अर्वन्तो वा ये रयिमन्तः सातौ वनुं वा ये सुश्रुणं सुश्रुतो धुः १
 हव एषामसुरो नक्षत द्यां श्रवस्यता मनसा निसत क्षाम् ।
 चक्षाणा यत्र सुविताय देवा द्यौरन वारैभिः कृणवन्त स्वैः २
 इयमेषाममृतांनां गीः सर्वताता ये कृपणन्त रत्नम् ।
 धियं च यज्ञं च साधन्तस्ते नो धान्तु वसव्यश्मसामि ३
 आ तत् त इन्द्रायवः पनन्ताऽभि य ऊर्वं गोर्मन्तं तितृत्सान् ।
 सकृत्स्वंशं ये पुरुपुत्रां महीं सहस्रधारां बृहतीं दुदुन्नन् ४
 शचीव इन्द्रमवसे कृणुध्वमनानतं दमयन्तं पृतन्यून ।
 ऋभुक्ष्णं मघवानं सुवृक्तिं भर्ता यो वज्रं नयं पुरुक्षुः ५
 यद्वावानं पुरुतमं पुराषाळा वृत्रहेन्द्रो नामान्यप्राः ।
 अचैति प्रासहस्पतिस्तुविष्मान् यदीमुश्मसि कर्तवे करत् तत् ६

(७५) पञ्चसप्ततितमं सूक्तम्

(१-६) नवर्चस्यास्य सूक्तस्य प्रैयमेधः सिन्धुक्षिदृषिः । नद्यो देवताः ।

जगती छन्दः

प्र सु व आपो महिमानमुत्तमं कारुर्वोचाति सदेने विवस्वतः ।
 प्र सप्तसप्त त्रेधा हि चक्रमुः प्र सृत्वरीणामति सिन्धुरोजसा १
 प्र तैऽरदद्वरुणो यातवे पथः सिन्धो यद्वाजां अभ्यद्रवस्त्वम् ।
 भूम्या अधि प्रवता यासि सानुना यदेषामग्रं जगतामिरज्यसि २
 दिवि स्वनो यतते भूम्योपर्यनन्तं शुष्ममुदियति भानुना ।
 अभ्रादिव प्र स्तनयन्ति वृष्टयः सिन्धुर्यदेति वृषभो न रोरुवत् ३
 अभि त्वां सिन्धो शिशमिन्न मातरौ वाश्रा अर्षन्ति पर्यसेव धेनवः ।
 राजैव युध्वा नयसि त्वमित् सिचौ यदासामग्रं प्रवतामिनक्षसि ४
 इमं मे गङ्गे यमुने सरस्वति शतुद्रि स्तोमं सचता परुष्या ।
 असिक्या मरुद्वधे वितस्तया ऽऽर्जीकीये शृणुह्या सुषोमया ५
 तृष्टामया प्रथमं यातवे सजूः सुसत्वा रसया श्वेत्या त्या ।
 त्वं सिन्धो कुभया गोमतीं क्रुर्मु मेहत्वा सरथं याभिरीर्यसे ६
 ऋजीत्येनी रुशती महित्वा परि जयासि भरते रजासि ।
 अदब्धा सिन्धुरपसामपस्तमा ऽश्वा न चित्रा वपुषीव दर्शता ७

स्वश्चा सिन्धुः सुरथा सुवासा हिरण्ययी सुकृता वाजिनीवती ।
ऊर्णावती युवतिः सीलमावत्युताधि वस्ते सुभगा मधुवृधम् ८
सुखं रथं युयुजे सिन्धुरश्विनं तेन वाजं सनिषदस्मिन्नाजौ ।
महान् ह्यस्य महिमा पनस्यते ऽदब्धस्य स्वयंशसो विरप्शिनः ९

(७६) षट्सप्ततितमं सूक्तम्

(१-८) अष्टर्चस्यास्य सूक्तस्य सार्प ऐरावतो जरत्कर्ण ऋषिः । ग्रावाणो देवताः ।

जगती छन्दः

आ व ऋञ्जस ऊर्जा व्युष्टिष्विन्द्रं मरुतो रोदसी अनक्तन ।
उभे यथा नो अहनी सचाभुवा सदःसदो वरिवस्यात उद्भिदा १
तदु श्रेष्ठं सर्वनं सुनोतनाऽत्यो न हस्तयतो अद्रिः सोतरि ।
विदद्धयर्शो अभिभूति पौस्यं महो राये चित् तरुते यदर्वतः २
तदिद्धयस्य सर्वनं विवेरपो यथा पुरा मनवे गातुमश्रेत् ।
गोअर्णसि त्वाष्ट्रे अश्वनिर्णिजि प्रेमध्वरेष्वध्वरां अशिश्युः ३
अप हत रक्षसौ भङ्गुरावतः स्कभायत निर्ऋतिं सेधतामतिम् ।
आ नो रयिं सर्ववीरं सुनोतन देवाव्यं भरतु श्लोकमद्रयः ४
दिवश्चिदा वोऽमवत्तरेभ्यो विभ्वना चिदाश्वपस्तरेभ्यः ।
वायोश्चिदा सोमरभस्तरेभ्यो ऽग्नेश्चिदर्च पितुकृत्तरेभ्यः ५
भुरन्तु नो यशसः सोत्वन्धसो ग्रावाणो वाचा दिविता दिवित्मता ।
नरो यत्र दुहते काम्यं मध्वाघोषयन्तो अभितौ मिथस्तुरः ६
सुन्वन्ति सोमं रथिरासो अद्रयो निरस्य रसं गविषो दुहन्ति ते ।
दुहन्त्यूर्धरुपसेचनाय कं नरो हव्या न मर्जयन्त आसभिः ७
एते नरः स्वपसो अभूतन य इन्द्राय सुनुथ सोममद्रयः ।
वामं वामं वो दिव्याय धाम्ने वसुवसु वः पार्थिवाय सुन्वते ८

(७७) सप्तसप्ततितमं सूक्तम्

(१-८) अष्टर्चस्यास्य सूक्तस्य भार्गवः स्यूमरश्मिर्ऋषिः । मरुतो देवताः । (१-

४, ६-८) प्रथमादिचतुर्ऋचां षष्ठ्यादितृचस्य च त्रिष्टुप्,

(५) पञ्चम्याश्च जगती छन्दसी

अभ्रप्रुषो न वाचा प्रुषा वसु हविष्मन्तो न यज्ञा विजानुषः ।

सुमारुतं न ब्रह्माणमर्हसे गणमस्तोष्येषां न शोभसे १
 श्रिये मर्यासो अञ्जिरैकृणवत सुमारुतं न पूर्विरति क्षपः ।
 दिवस्पुत्रास एता न येतिर आदित्यासस्ते अक्रा न वावृधुः २
 प्र ये दिवः पृथिव्या न बर्हणा त्मना रिरिचे अभ्रान्न सूर्यः ।
 पाजस्वन्तो न वीराः पनस्यवौ रिशादसो न मर्या अभिद्यवः ३
 युष्माकं बुधे अपां न यामनि विथुर्यति न मही श्रथर्यति ।
 विश्वप्सुर्यज्ञो अर्वागयं सु वः प्रयस्वन्तो न सत्राच आ गत ४
 यूयं धूर्षु प्रयुजो न रश्मिभिर्ज्योतिष्मन्तो न भासा व्युष्टिषु ।
 श्येनासो न स्वयशसो रिशादसः प्रवासो न प्रसितासः परिप्रुषः ५
 प्र यद्वहध्वे मरुतः पराकाद् यूयं महः संवरणस्य वस्वः ।
 विदानासौ वसवो राध्यस्याऽऽराच्चिद् द्वेषः सनुतर्युयोत ६
 य उदृचि यज्ञे अध्वरेष्ठा मरुद्भ्यो न मानुषो ददाशित् ।
 रेवत् स वर्यो दधते सुवीरं स देवानामपि गोपीथे अस्तु ७
 ते हि यज्ञेषु यज्ञियास ऊमा आदित्येन नाम्ना शंभविष्ठाः ।
 ते नोऽवन्तु रथतूर्मनीषां महश्च यामन्नध्वरे चकानाः ८

(७८) अष्टसप्ततितमं सूक्तम्

(१-८) अष्टर्चस्यास्य सूक्तस्य भार्गवः स्यूमरश्मिर्ऋषिः । मरुतो देवताः । (१,
 ३-४, ८) प्रथमातृतीयाचतुर्थ्यष्टमीनामृचां त्रिष्टुप्, (२, ५-७) द्वितीयायाः

पञ्चम्यादितृचस्य च जगती छन्दसी

विप्रासो न मन्मभिः स्वाध्यो देवाव्योर् न यज्ञैः स्वप्रसः ।
 राजानो न चित्राः सुसंदृशः क्षितीनां न मर्या अरेपसः १
 अग्निर्न ये भ्राजसा रुक्मवक्षसो वातासो न स्वयुजः सद्यऊतयः ।
 प्रज्ञातारो न ज्येष्ठाः सुनीतयः सुशर्माणो न सोमा ऋतं यते २
 वातासो न ये धुनयो जिगत्तवोऽग्नीनां न जिह्वा विरोकिणः ।
 वर्मणवन्तो न योधाः शिमीवन्तः पितृणां न शंसाः सुरातयः ३
 रथानां न येर् राः सनाभयो जिगीवांसो न शूरा अभिद्यवः ।
 वरेयवो न मर्या घृतप्रुषोऽभिस्वर्तारो अर्कं न सुष्टभः ४
 अश्वांसो न ये ज्येष्ठास आशवो दिधिषवो न रथ्यः सुदानवः ।
 आपो न निमैरुदभिर्जिगत्तवो विश्वरूपा अङ्गिरसो न सामभिः ५

ग्रावाणो न सूरयः सिन्धुमातर आदर्दिरासो अद्रयो न विश्वहा ।
 शिशूला न क्रीळयः सुमातरौ महाग्रामो न यामनुत त्विषा ६
 उषसां न केतवोऽध्वरश्रियः शुभ्यवो नाञ्जिभिव्यश्चितन् ।
 सिन्धवो न ययियो भ्राजदृष्टयः परावतो न योजनानि ममिरे ७
 सुभागात्रौ देवाः कृणुता सुरत्नानस्मान् तस्तोतृन् मरुतो वावृधानाः ।
 अधि स्तोत्रस्य सख्यस्य गात सनाद्धि वो रत्नधेयानि सन्ति ८

(७६) एकोनाशीतितमं सूक्तम्

(१-७) सप्तर्चस्यास्य सूक्तस्य सौचीको वैश्वानरो वाग्निर्वाजम्भरः सप्तिर्वा ऋषिः ।

अग्निर्देवता । त्रिष्टुप् छन्दः

अपश्यमस्य महतो महित्वममर्त्यस्य मर्त्यासु विक्षु ।
 नाना हनू विभृते सं भरेते असिन्वती बप्सती भूर्यत्तः १
 गुहा शिरो निहितमृधगृही असिन्वन्नत्ति जिह्वया वनानि ।
 अत्रायस्यै पृड्भिः सं भरन्त्युत्तानहस्ता नमसाधि विक्षु २
 प्र मातुः प्रतरं गुह्यमिच्छन् कुमारो न वीरुधः सर्पदुर्वीः ।
 ससं न पक्वमविदच्छुचन्तं रिरिह्वांसं रिप उपस्थे अन्तः ३
 तद्वामृतं रोदसी प्र ब्रवीमि जायमानो मातरा गर्भो अत्ति ।
 नाहं देवस्य मर्त्यश्चिकेताऽग्निरङ्ग विचैताः स प्रचैताः ४
 यो अस्मा अन्नं तृष्वाइदधात्याज्यैर्घृतैर्जुहोति पुष्यति ।
 तस्मै सहस्रमक्षभिर्वि चक्षे ऽग्ने विश्वतः प्रत्यङ्ङसि त्वम् ५
 किं देवेषु त्यज एनश्चकर्थाऽग्ने पृच्छामि नु त्वामविद्वान् ।
 अक्रीळन् क्रीळन् हरिरत्तवेऽदन् वि पर्वशश्चकर्त गामिवासिः ६
 विषूचो अश्वान् युयुजे वनेजा ऋजीतिभी रशनाभिर्गृभीतान् ।
 चक्षदे मित्रो वसुभिः सुजातः समानधे पर्वभिर्वावृधानः ७

(८०) अशीतितमं सूक्तम्

(१-७) सप्तर्चस्यास्य सूक्तस्य सौचीको वैश्वानरो वाग्निर्वाजम्भरः सप्तिर्वा ऋषिः ।

अग्निर्देवता । त्रिष्टुप् छन्दः

अग्निः सप्तिं वाजम्भरं ददात्यग्निर्वीरं श्रुत्यं कर्मनिष्ठाम् ।
 अग्नी रोदसी वि चरत् समञ्जन्नग्निर्नारी वीरकुक्षिं पुरंधिम् १

अग्नेरप्रसः समिदस्तु भद्रा ऽग्निर्मही रोदसी आ विवेश ।
 अग्निरेकं चोदयत् समत्स्वग्निर्वृत्राणि दयते पुरुणि २
 अग्निर्हृ त्यं जरतः कर्णमावाऽग्निर्द्धो निरदहृज्ररूथम् ।
 अग्निरत्रिं घर्म उरुष्यदन्तरग्निर्नृमेधं प्रजयासृजत्सम् ३
 अग्निर्दाद् द्रविणं वीरपैशा अग्निर्ऋषिं यः सहस्त्रां सनोति ।
 अग्निर्दिवि हव्यमा ततानाऽग्नेर्धामानि विभृता पुरुत्रा ४
 अग्निमुक्थैर्ऋषयो वि ह्वयन्ते ऽग्निं नरो यामनि बाधितासः ।
 अग्निं वयो अन्तरिक्षे पतन्तो ऽग्निः सहस्त्रा परि याति गोनाम् ५
 अग्निं विश ईळते मानुषीर्या अग्निं मनुषो नहुषो वि जाताः ।
 अग्निर्गान्धर्वी पथ्यामृतस्याऽग्नेर्गव्यूतिर्धृत आ निषत्ता ६
 अग्रये ब्रह्म ऋभवंस्ततक्षुरग्निं महामवोचामा सुवृक्तिम् ।
 अग्ने प्राव जरितारं यविष्ठा ऽग्ने महि द्रविणमा यजस्व ७

(८१) एकाशीतितमं सूक्तम्

(१-७) सप्तर्चस्यास्य सूक्तस्य भौवनो विश्वकर्मा ऋषिः । विश्वकर्मा देवता ।

(१, ३-७) प्रथमर्चस्तृतीयादिपञ्चानाञ्च त्रिष्टुप्, (२) द्वितीयायाञ्च विराड्रूपा
 त्रिष्टुप् छन्दसी

य इमा विश्वा भुवनानि जुहदृषिर्होता न्यसीदत् पिता नः ।
 स आशिषा द्रविणमिच्छमानः प्रथमच्छदवराँ आ विवेश १
 किं स्विदासीदधिष्ठानमारम्भणं कतमत् स्वित् कथासीत् ।
 यतो भूमिं जनयन् श्विकर्मा वि द्यामौणोन्महिना विश्वचक्षाः २
 विश्वतश्चक्षुरत् विश्वतोमुखो विश्वतोबाहुरत् विश्वतस्पात् ।
 सं बाहुभ्यां धमति सं पतत्रैर्द्यावाभूमीं जनयन् देव एकः ३
 किं स्विद्वनं क उ स वृक्ष आस यतो द्यावापृथिवी निष्टतक्षुः ।
 मनीषिणो मनसा पृच्छतेदु तद् यदध्यतिष्ठद्भुवनानि धारयन् ४
 या ते धामानि परमाणि यावमा या मध्यमा विश्वकर्मनुतेमा ।
 शिक्षा सखिभ्यो हविषिं स्वधावः स्वयं यजस्व तन्वं वृधानः ५
 विश्वकर्मन् हविषा वावृधानः स्वयं यजस्व पृथिवीमुत द्याम् ।
 मुह्यन्त्वन्ये अभितो जनास इहास्माकं मघवाँ सूरिरस्तु ६
 वाचस्पतिं विश्वकर्माणामूतर्ये मनोजुवं वाजैँ अद्या हुवेम ।

स नो विश्वानि हव्नानि जोषद् विश्वशम्भूरवसे साधुकर्मा ७

(८२) द्व्यशीतितमं सूक्तम्

(१-७) सप्तर्चस्यास्य सूक्तस्य भौवनो विश्वकर्मा ऋषिः । विश्वकर्मा देवता ।

त्रिष्टुप् छन्दः

चक्षुषः पिता मनसा हि धीरो घृतमैने अजनन्नप्रमाने ।
यदेदन्ता अददृहन्त पूर्व आदिद्यावापृथिवी अप्रथेताम् १
विश्वकर्मा विमना आद्विहाया धाता विधाता परमोत सदृक् ।
तेषामिष्टानि समिषा मन्दन्ति यत्रा सप्तऋषीन् पर एकमाहुः २
यो नः पिता जनिता यो विधाता धामानि वेद भुवनानि विश्वा ।
यो देवानां नामधा एक एव तं संप्रश्नं भुवना यन्त्यन्या ३
त आयेजन्त द्रविणं समस्मा ऋषयः पूर्वे जरितारो न भूना ।
असूर्ते सूर्ते रजसि निषत्ते ये भूतानि समकृणवन्निमानि ४
पुरो दिवा पर एना पृथिव्या पुरो देवेभिरसुरैर्यदस्ति ।
कं स्वद्भ्रं प्रथमं दध्न आपो यत्र देवाः समपश्यन्त विश्वे ५
तमिद्भ्रं प्रथमं दध्न आपो यत्र देवाः समगच्छन्त विश्वे ।
अजस्य नाभावध्येकमर्पितं यस्मिन् विश्वानि भुवनानि तस्थुः ६
न तं विदाथ य इमा जजानाऽन्यद्युष्माकमन्तरं बभूव ।
नीहारेण प्रावृता जल्प्या चाऽसुतृर्प उक्थशासश्चरन्ति ७

(८३) त्र्यशीतितमं सूक्तम्

(१-७) सप्तर्चस्यास्य सूक्तस्य तापसो मन्युर्ऋषिः । मन्युर्देवता । (१) प्रथमर्चो

जगती, (२-७) द्वितीयादिषण्णाञ्च त्रिष्टुप् छन्दसी

यस्ते मन्योऽविधद्वज्र सायक सह ओजः पुष्यति विश्वमानुषक ।
साह्याम दासमार्यं त्वया युजा सहस्कृतेन सहसा सहस्वता १
मन्युरिन्द्रो मन्युरेवास देवो मन्युर्होता वरुणो जातवेदाः ।
मन्युं विश ईळते मानुषीर्याः पाहि नो मन्यो तपसा सजोषाः २
अभीहि मन्यो तवसस्तवीयान् तपसा युजा वि जहि शत्रून् ।
अमित्रहा वृत्रहा दस्युहा च विश्वा वसून्या भरा त्वं नः ३
त्वं हि मन्यो अभिभूत्योजाः स्वयंभूर्भामौ अभिमातिषाहः ।

विश्वचर्षणिः सहृरिः सहावानस्मास्वोजः पृतनासु धेहि ४
अभागः सन्नप परेतो अस्मि तव क्रत्वा तविषस्य प्रचेतः ।
तं त्वा मन्यो अक्रतुर्जिहीष्वाहं स्वा तनूबलदेया मेहि ५
अयं तै अस्म्युप मेह्यर्वाङ् प्रतीचीनः सहरे विश्वधायः ।
मन्यो वज्रिभि मामा ववृत्स्व हनाव दस्यूरुत बोध्यापेः ६
अभि प्रेहि दक्षिणतो भवा मे ऽधा वृत्राणि जङ्घनाव भूरि ।
जुहोमि ते धरुणं मध्वो अग्रमुभा उपांशु प्रथमा पिबाव ७

(८४) चतुरशीतितमं सूक्तम्

(१-७) सप्तचर्षस्यास्य सूक्तस्य तापसो मन्युर्ऋषिः । मन्युर्देवता । (१-३)

प्रथमादितृचस्य त्रिष्टुप्, (४-७) चतुर्थ्यादिचतसृणाञ्च जगती छन्दसी
त्वया मन्यो सरथमारुजन्तो हर्षमाणासो धृषिता मरुत्वः ।
तिग्मेषव आयुधा संशिशाना अभि प्र यन्तु नरो अग्निरूपाः १
अग्निरिव मन्यो त्विषितः सहस्व सेनानीर्नः सहरे हूत एधि ।
हत्वाय शत्रून् वि भजस्व वेद ओजो मिमानो वि मृधौ नुदस्व २
सहस्व मन्यो अभिमातिमस्मे रुजन् मृणन् प्रमृणन् प्रेहि शत्रून् ।
उग्रं ते पाजो न्वा रुरुध्रे वशी वशं नयस एकज त्वम् ३
एको बहूनामसि मन्यवीळितो विशविशं युधये सं शिशाधि ।
अकृत्तुरुक् त्वया युजा वयं द्युमन्तं घोषं विजयाय कृणमहे ४
विजेषुकदिन्द्र इवानवब्रवोर्ऽस्माकं मन्यो अधिपा भवेह ।
प्रियं ते नाम सहरे गृणीमसि विद्या तमुत्सं यत आबभूथ ५
आभूत्या सहजा वज्र सायक सहौ बिभर्ष्यभिभूत उत्तरम् ।
क्रत्वा नो मन्यो सह मेद्यैधि महाधनस्य पुरुहूत संसृजि ६
संसृष्टं धनमुभयं समाकृतमस्मभ्यं दत्तां वरुणश्च मन्युः ।
भियं दधाना हृदयेषु शत्रवः पराजितासो अपु नि लयन्ताम् ७

सप्तमोऽनुवाकः

। सू० ८५-९० ।

(८५) पञ्चाशीतितमं सूक्तम्

(१-४७) सप्तचत्वारिंशदृचस्यास्य सूक्तस्य सावित्री सूर्या ऋषिका । (१-५)

प्रथमादिपञ्चर्चा सोमः, (६-१६) षष्ठ्याद्येकादशानां सूर्याविवाहः, (१७)
 सप्तदश्या देवाः, (१८) अष्टादश्याः सोमर्कौ, (१९) एकोनविंश्याश्चन्द्रमाः,
 (२०-२८) विंश्यादिनवानां नृणामाशीः प्राया विवाहमन्त्राः, (२९-३०)
 एकोनत्रिंशीत्रिंशयोर्विवाहे वधूवासःस्पर्शनिन्दा, (३१) एकत्रिंश्या
 दम्पत्योर्यक्ष्मनाशनम्, (३२-४७) द्वात्रिंश्यादिषोडशानाञ्च सावित्री सूर्या देवताः ।
 (१-१३, १५-१७, २२, २५, २८-३३, ३५, ३८-४२, ४५-४७)
 प्रथमादित्रयोदशर्चा पञ्चदश्यादितृचस्य द्वाविंशीपञ्चविंशोरष्टाविंश्यादितृचद्वयस्य
 पञ्चत्रिंश्या अष्टात्रिंश्यादिपञ्चानां पञ्चचत्वारिंश्यादितृचस्य चानुष्टुप्, (१४, १९-२१,
 २३-२४, २६, ३६-३७, ४४) चतुर्दश्या एकोनविंश्यादितृचस्य
 त्रयोविंशीचतुर्विंशयोः षड्विंश्याः षट्त्रिंशीसप्तत्रिंशीचतुश्चत्वारिंशीनाञ्च त्रिष्टुप्, (१८,
 २७, ४३) अष्टादशीसप्तविंशीत्रिचत्वारिंशीनां जगती, (३४) चतुस्त्रिंश्याश्च
 उरोबृहती छन्दांसि

सत्येनोत्तभिता भूमिः सूर्येणोत्तभिता द्यौः ।
 ऋतेनादित्यास्तिष्ठन्ति दिवि सोमो अधि श्रितः १
 सोमैनादित्या बलिनः सोमैन पृथिवी मही ।
 अथो नक्षत्राणामेषामुपस्थे सोम आर्हितः २
 सोमं मन्यते पपिवान् यत् संपिषन्त्योषधिम् ।
 सोमं यं ब्रह्माणौ विदुर्न तस्याश्नाति कश्चन ३
 आच्छद्विधानैर्गुपितो बार्हतैः सोम रक्षितः ।
 ग्राव्णामिच्छृण्वन् तिष्ठसि न तै अश्नाति पार्थिवः ४
 यत् त्वा देव प्रपिबन्ति तत् आ प्यायसे पुनः ।
 वायुः सोमस्य रक्षिता समानां मास आकृतिः ५
 रैभ्यासीदनुदेयी नाराशंसी न्योचनी ।
 सूर्याया भद्रमिद्वासो गार्थयैति परिष्कृतम् ६
 चित्तिरा उपबर्हणं चक्षुरा अभ्यञ्जनम् ।
 द्यौर्भूमिः कोश आसीद् यदयात् सूर्या पतिम् ७
 स्तोमा आसन् प्रतिधयः कुरीरं छन्द ओपुशः ।
 सूर्याया अश्विना वरा ऽग्निरासीत् पुरोगवः ८
 सोमो वधूयुरभवदश्विनास्तामुभा वरा ।
 सूर्या यत् पत्ये शंसन्तीं मनसा सविताददात् ९
 मनो अस्या अन आसीद् द्यौरासीदुत च्छदिः ।

शुक्रावन्ड्वाहावास्तां यदयात् सूर्या गृहम् १०
 ऋक्सामाभ्याम्भिहितौ गावौ ते सामनावितः ।
 श्रोत्रं ते चक्रे आस्तां दिवि पन्थाश्चराचरः ११
 शुचीं ते चक्रे यात्या व्यानो अक्ष आहतः ।
 अनो मनस्मर्यं सूर्या ऽऽरोहत् प्रयती पतिम् १२
 सूर्याया वहतुः प्रागात् सविता यमवासृजत् ।
 अघासु हन्यन्ते गावो ऽर्जुन्योः पर्युह्यते १३
 यदश्विना पृच्छमानावयातं त्रिचक्रेण वहतुं सूर्यायाः ।
 विश्वे देवा अनु तद्दामजानन् पुत्रः पितराववृणीत पूषा १४
 यदयातं शुभस्पती वरेयं सूर्यामुप ।
 क्वैकं चक्रं वामासीत् क्व देष्टाय तस्थथुः १५
 द्वे ते चक्रे सूर्ये ब्रह्माणं ऋतुथा विदुः ।
 अथैकं चक्रं यद्गुहा तदद्घातय इद्विदुः १६
 सूर्यायै देवेभ्यो मित्राय वरुणाय च ।
 ये भूतस्य प्रचेतस इदं तेभ्यो ऽकरं नमः १७
 पूर्वापरं चरतो माययैतौ शिशू क्रीळन्तौ परि यातो अध्वरम् ।
 विश्वान्यन्यो भुवनाभिचष्ट ऋतूरन्यो विदधञ्जायते पुनः १८
 नवौनवो भवति जायमानो ऽह्ना केतुरुषसामेत्यग्रम् ।
 भागं देवेभ्यो वि दधात्यायन् प्र चन्द्रमास्तिरते दीर्घमायुः १९
 सुक्लिंशुकं शल्मलिं विश्वरूपं हिरण्यवर्णं सुवृत्तं सुचक्रम् ।
 आ रोह सूर्ये अमृतस्य लोकं स्योनं पत्यै वहतुं कृणुष्व २०
 उदीर्ष्वीतुः पतिवती ह्येऽेषा विश्वावसुं नमसा गीर्भिरीळे ।
 अन्यामिच्छ पितृषदं व्यक्तां स ते भागो जनुषा तस्य विद्धि २१
 उदीर्ष्वीतौ विश्वावसो नमसेळामहे त्वा ।
 अन्यामिच्छ प्रफर्व्यं सं जायां पत्यां सृज २२
 अनृक्षरा ऋजर्वः सन्तु पन्था येभिः सखायो यन्ति नो वरेयम् ।
 समर्यमा सं भगौ नो निनीयात् सं जास्पत्यं सुयर्ममस्तु देवाः २३
 प्र त्वा मुञ्चामि वरुणस्य पाशाद् येन त्वाबध्नात् सविता सुशेर्वः ।
 ऋतस्य योनौ सुकृतस्य लोके ऽरिष्टां त्वा सह पत्या दधामि २४
 प्रेतो मुञ्चामि नामुतः सुब्रह्मामुतस्करम् ।

यथेयमिन्द्र मीढ्वः सुपुत्रा सुभगासति २५
 पूषा त्वेतो नयतु हस्तगृह्याऽश्विना त्वा प्र वहतां रथेन ।
 गृहान् गच्छ गृहपत्नी यथासौ वशिनी त्वं विदथमा वदासि २६
 इह प्रियं प्रजया ते समृध्यतामस्मिन् गृहे गार्हपत्याय जागृहि ।
 एना पत्या तन्वंशं सं सृजस्वाऽधा जिर्वी विदथमा वदाथः २७
 नीललोहितं भवति कृत्यासक्तिर्व्यज्यते ।
 एधन्ते अस्या ज्ञातयः पतिर्बन्धेषु बध्यते २८
 परा देहि शामुल्यं ब्रह्मभ्यो वि भजा वसु ।
 कृत्यैषा पद्वती भूत्या जाया विशते पतिम् २९
 अश्रीरा तनूभवति रुशती पापयामुया ।
 पतिर्यद्वध्वोऽं वाससा स्वमङ्गमभिधित्सते ३०
 ये वर्ध्वश्चन्द्रं वहतुं यद्मा यन्ति जनादनु ।
 पुनस्तान् यज्ञिया देवा नयन्तु यत् आर्गताः ३१
 मा विदन् परिपन्थिनो य आसीदन्ति दंपती ।
 सुगेभिर्दुर्गमतीतामप द्रान्त्वरतयः ३२
 सुमङ्गलीरियं वधूरिमां समेत पश्यत ।
 सौभाग्यमस्यै दत्त्वायाऽथास्तं वि परेतन ३३
 तृष्टमेतत् कटुकमेतदपाष्ठवद्विषवन्नैतदत्तवे ।
 सूर्या यो ब्रह्मा विद्यात् स इद्वाधूयमर्हति ३४
 आशसनं विशसनमथौ अधिविकर्तनम् ।
 सूर्यायाः पश्य रूपाणि तानि ब्रह्मा तु शुन्धति ३५
 गृभ्णामि ते सौभगत्वाय हस्तं मया पत्या जरदष्टिर्यथासः ।
 भगौ अर्यमा संविता पुरंधिर्मह्यं त्वादुर्गार्हपत्याय देवाः ३६
 तां पूषञ्छिवतमामेरयस्व यस्यां बीजं मनुष्याऽं वपन्ति ।
 या न ऊरू उंशती विश्रयाति यस्यामुशन्तः प्रहराम् शेपम् ३७
 तुभ्यमग्रे पर्यवहन् त्सूर्यां वहतुना सह ।
 पुनः पतिभ्यो जायां दा अग्रे प्रजया सह ३८
 पुनः पत्नीमग्निरदादायुषा सह वर्चसा ।
 दीर्घायुरस्या यः पतिर्जीवाति शरदः शतम् ३९
 सोमः प्रथमो विविदे गन्धर्वो विविद् उत्तरः ।

तृतीयो अग्निष्टे पतिस्तुरीयस्ते मनुष्यजाः ४०
 सोमो ददद्गन्धर्वाय गन्धर्वो ददद्ग्रयै ।
 रयिं च पुत्रांश्चादादग्निर्मह्यमथौ इमाम् ४१
 इहैव स्तं मा वि यौष्टं विश्वमायुर्व्यश्नुतम् ।
 क्रीळन्तौ पुत्रैर्नमभिर्मोदमानौ स्वे गृहे ४२
 आ नः प्रजां र्जनयतु प्रजापतिराजरसाय समनक्त्वयमा ।
 अर्दुर्मङ्गलीः पतिलोकमा विश् शं नो भव द्विपदे शं चतुष्पदे ४३
 अर्धोरचक्षुरपतिघ्नयेधि शिवा पशुभ्यः सुमनाः सुवर्चाः ।
 वीरसूर्देवकामा स्योना शं नो भव द्विपदे शं चतुष्पदे ४४
 इमां त्वमिन्द्र मीद्वः सुपुत्रां सुभगां कृणु ।
 दशास्यां पुत्राना धेहि पतिमेकादशं कृधि ४५
 सम्राज्ञी श्वशरे भव सम्राज्ञी श्वश्रवां भव ।
 ननान्दरि सम्राज्ञी भव सम्राज्ञी अधि देवृषु ४६
 समञ्जन्तु विश्वे देवाः समापो हृदयानि नौ ।
 सं मातरिश्वा सं धाता समु देष्ट्री दधातु नौ ४७
 चतुर्थोऽध्यायः
 । व० १-३१ ।

(८६) षडशीतितमं सूक्तम्

(१-२३) त्रयोविंशत्यृचस्यास्य सूक्तस्य (१, ८, ११-१२, १४, १६-२२)
 प्रथमाष्टम्येकादशीद्वादशीचतुर्दशीनामृचामेकोनविंश्यादिचतसृणाञ्चेन्द्र ऋषिः, (२-
 ६, ९-१०, १५-१८) द्वितीयादिपञ्चानां नवमीदशम्योः पञ्चदश्यादिचतसृणाञ्चेन्द्राणी
 ऋषिका, (७, १३, २३) सप्तमीत्रयोदशीत्रयोविंशीनाञ्चेन्द्रो वृषाकपिर्ऋषिः । इन्द्रो
 देवता । पङ्क्तिश्छन्दः

वि हि सोतोरसृक्षत नेन्द्रं देवममंसत ।
 यत्रामदवृषाकपिर्यः पुष्टेषु मत्सखा विश्वस्मादिन्द्र उत्तरः १
 परा हीन्द्र धार्वसि वृषाकपेरति व्यथिः ।
 नो अह प्र विन्दस्यन्यत्र सोमपीतये विश्वस्मादिन्द्र उत्तरः २
 किमयं त्वां वृषाकपिश्चकार हरितो मृगः ।
 यस्मा इरस्यसीदु न्वर्यो वा पुष्टिमद्वसु विश्वस्मादिन्द्र उत्तरः ३

यमिमं त्वं वृषाकपिं प्रियमिन्द्राभिरक्षसि ।
 श्वा न्वस्य जम्भिषदपि कर्णे वराहयुर्विश्वस्मादिन्द्र उत्तरः ४
 प्रिया तृष्टानि मे कपिर्व्यक्ता व्यदूदुषत् ।
 शिरो न्वस्य राविषं न सुगं दुष्कृतै भुवं विश्वस्मादिन्द्र उत्तरः ५
 न मत् स्त्री सुभसत्तरा न सुयाशुतरा भुवत् ।
 न मत् प्रतिच्यवीयसी न सक्थ्युद्यमीयसी विश्वस्मादिन्द्र उत्तरः ६
 उवे अम्ब सुलाभिके यथैवाङ्ग भविष्यति ।
 भसन्मै अम्ब सक्थि मे शिरो मे वीव हृष्यति विश्वस्मादिन्द्र उत्तरः ७
 किं सुबाहो स्वङ्गुरे पृथुष्टो पृथुजाघने ।
 किं शूरपत्नि नस्त्वमभ्यमीषि वृषाकपिं विश्वस्मादिन्द्र उत्तरः ८
 अवीरामिव मामयं शरारुरभि मन्यते ।
 उताहमस्मि वीरिणीन्द्रपत्नी मरुत्सखा विश्वस्मादिन्द्र उत्तरः ९
 संहोत्रं स्म पुरा नारी समनं वाव गच्छति ।
 वेधा ऋतस्ये वीरिणीन्द्रपत्नी महीयते विश्वस्मादिन्द्र उत्तरः १०
 इन्द्राणीमासु नारिषु सुभगामहमश्रवम् ।
 नह्यस्या अपरं चन जरसा मरते पतिर्विश्वस्मादिन्द्र उत्तरः ११
 नाहमिन्द्राणि रारण सख्युर्वृषाकपेऋते ।
 यस्येदमप्यं हविः प्रियं देवेषु गच्छति विश्वस्मादिन्द्र उत्तरः १२
 वृषाकपायि रेवति सुपुत्र आदु सुस्रुषे ।
 घसत् त इन्द्र उक्षणः प्रियं कोचित्करं हविर्विश्वस्मादिन्द्र उत्तरः १३
 उक्षणो हि मे पञ्चदश साकं पचन्ति विंशतिम् ।
 उताहमग्नि पीव इदुभा कुक्षी पृणन्ति मे विश्वस्मादिन्द्र उत्तरः १४
 वृषभो न तिग्मशृङ्गो ऽन्तर्यथेषु रोरुवत् ।
 मन्थस्त इन्द्र शं हृदे यं ते सुनोति भावयुर्विश्वस्मादिन्द्र उत्तरः १५
 न सेशे यस्य रम्बते ऽन्तरा सक्थ्याः कपृत् ।
 सेदीशे यस्य रोमशं निषेदुषौ विजृम्भते विश्वस्मादिन्द्र उत्तरः १६
 न सेशे यस्य रोमशं निषेदुषौ विजृम्भते ।
 सेदीशे यस्य रम्बते ऽन्तरा सक्थ्याः कपृद् विश्वस्मादिन्द्र उत्तरः १७
 अयमिन्द्र वृषाकपिः परस्वन्तं हृतं विदत् ।
 असिं सूनां नवं चरुमादेधस्यान आचितं विश्वस्मादिन्द्र उत्तरः १८

अयमेमि विचाकशद् विचिन्वन् दासमार्यम् ।
 पिबामि पाकसुत्वन्नो ऽभि धीरमचाकशं विश्वस्मादिन्द्र उत्तरः १९
 धन्व च यत् कृन्तत्र च कति स्वित् ता वि योजना ।
 नेदीयसो वृषाकपे ऽस्तमेहि गृहाँ उपु विश्वस्मादिन्द्र उत्तरः २०
 पुनरेहि वृषाकपे सुविता कल्पयावहे ।
 य एष स्वप्नंशनो ऽस्तमेषि पृथा पुनर्विश्वस्मादिन्द्र उत्तरः २१
 यदुदञ्चो वृषाकपे गृहमिन्द्रार्जगन्तन ।
 क्वश् स्य पुल्वघो मृगः कर्मगञ्जनयोपनो विश्वस्मादिन्द्र उत्तरः २२
 पर्शुर्ह नाम मानवी साकं संसूव विंशतिम् ।
 भद्रं भल त्यस्या अभूद् यस्या उदरमामयद् विश्वस्मादिन्द्र उत्तरः २३

(८७) सप्ताशीतितमं सूक्तम्

(१-२५) पञ्चविंशत्यृचस्यास्य सूक्तस्य भारद्वाजः पायुर्ऋषिः । रक्षोहाग्निर्देवता ।

(१-२१) प्रथमाद्येकविंशत्यृचां त्रिष्टुप्,

(२२-२५) द्वाविंश्यादिचतसृणाञ्चानुष्टुप् छन्दसी

रक्षोहर्णं वाजिनमा जिघर्मि मित्रं प्रथिष्ठमुप यामि शर्म ।
 शिशानो अग्निः क्रतुभिः समिद्धः स नो दिवा स रिषः पातु नक्तम् १
 अयोदंष्ट्रो अर्चिषा यातुधानानुप स्पृश जातवेदः समिद्धः ।
 आ जिह्या मूरदेवान् रभस्व क्रव्यादो वृक्त्व्यपि धत्स्वासन् २
 उभोभयाविनुप धेहि दंष्ट्रा हिंस्रः शिशानोऽवरं परं च ।
 उतान्तरिन्ने परि याहि राजञ्जम्भैः सं धैह्यभि यातुधानान् ३
 यज्ञैरिषूः संनममानो अग्ने वाचा शल्याँ अशनिभिर्दिहानः ।
 ताभिर्विध्य हृदये यातुधानान् प्रतीचो ब्राहून् प्रति भङ्ध्येषाम् ४
 अग्ने त्वर्चं यातुधानस्य भिन्धि हिंस्त्राशनिर्हरसा हन्त्वेनम् ।
 प्र पर्वाणि जातवेदः शृणीहि क्रव्यात् क्रविष्णुर्वि चिनोतु वृक्णम् ५
 यत्रेदानीं पश्यसि जातवेदस्तिष्ठन्तमग्र उत वा चरन्तम् ।
 यद्भ्रान्तरिन्ने पृथिभिः पतन्तं तमस्ता विध्य शर्वा शिशानः ६
 उतालब्धं स्पृणुहि जातवेद आलेभानादृष्टिभिर्यातुधानात् ।
 अग्ने पूर्वो नि जहि शोशुचान आमादः द्विवङ्कास्तमदन्त्वेनीः ७
 इह प्र ब्रूहि यतमः सो अग्ने यो यातुधानो य इदं कृणोति ।

तमा रभस्व समिधा यविष्ठ नृचक्षसश्चक्षुषे रन्धयेनम् ८
 तीक्ष्णेनाग्ने चक्षुषा रक्ष यज्ञं प्राञ्चं वसुभ्यः प्र गाय प्रचेतः ।
 हिंस्रं रक्षास्यभि शोशुचानं मा त्वा दभन् यातुधानां नृचक्षः ९
 नृचक्षा रक्षः परि पश्य विक्षु तस्य त्रीणि प्रति शृणीह्यग्रां ।
 तस्याग्ने पृष्ठीर्हरसा शृणीहि त्रेधा मूलं यातुधानस्य वृश्च १०
 त्रिर्यातुधानः प्रसितिं त एत्वृतं यो अग्ने अनृतेन हन्ति ।
 तमर्चिषा स्फूर्जयञ्जातवेदः समक्षमेनं गृणते नि वृद्धि ११
 तदग्ने चक्षुः प्रति धेहि रेभे शफारुजं येन पश्यसि यातुधानम् ।
 अथर्ववज्रचोतिषा दैव्येन सत्यं धूर्वन्तमचितं न्यौष १२
 यदग्ने अद्य मिथुना शपातो यद्वाचस्तृष्टं जनयन्त रेभाः ।
 मन्योर्मनसः शरव्याइ जायते या तया विध्य हृदये यातुधानान् १३
 परां शृणीहि तपसा यातुधानान् पराग्ने रक्षो हरसा शृणीहि ।
 परार्चिषा मूर्देवाञ्छृणीहि परासुतृपो अभि शोशुचानः १४
 पराद्य देवा वृजिनं शृणन्तु प्रत्यगेनं शपथा यन्तु तृष्टाः ।
 वाचास्तैनं शरव ऋच्छन्तु मर्मन् विश्वस्येतु प्रसितिं यातुधानः १५
 यः पौरुषेयेण क्रविषां समङ्क्ते यो अश्वयेन पशुनां यातुधानः ।
 यो अघ्नयाया भरति क्षीरमग्ने तेषां शीर्षाणि हरसापि वृश्च १६
 संवत्सरीणं पर्य उस्त्रियायास्तस्य माशीद्यातुधानो नृचक्षः ।
 पीयूषमग्ने यतमस्तिर्तृप्सात् तं प्रत्यञ्चमर्चिषा विध्य मर्मन् १७
 विषं गवां यातुधानाः पिबन्त्वा वृश्चयन्तामदितये दुरेवाः ।
 परैरान् देवः सेविता ददातु परां भागमोषधीनां जयन्ताम् १८
 सनादग्ने मृणसि यातुधानान् न त्वा रक्षासि पृतनासु जिग्युः ।
 अनु दह सहमूरान् क्रव्यादो मा ते हेत्या मुक्षत दैव्यायाः १९
 त्वं नो अग्ने अधरादुदक्तात् त्वं पश्चादुत रक्षा पुरस्तात् ।
 प्रति ते ते अजरास्तपिष्ठा अघशंसं शोशुचतो दहन्तु २०
 पश्चात् पुरस्तादधरादुदक्तात् कविः काव्येन परि पाहि राजन् ।
 सखे सखायमजरौ जरिष्णे ऽग्ने मर्ता अमर्त्यस्त्वं नः २१
 परि त्वाग्ने पुरं वयं विप्रं सहस्य धीमहि ।
 धृषद्वर्णां दिवेदिवे हन्तारं भङ्गुरावताम् २२
 विषेणं भङ्गुरावतः प्रति ष्म रक्षसो दह ।

अग्ने तिमनेन शोचिषा तपुरग्राभिर्ऋष्टिभिः २३
प्रत्यग्ने मिथुना देह यातुधाना किमीदिना ।
सं त्वा शिशामि जागृह्यदब्धं विप्र मन्मभिः २४
प्रत्यग्ने हरसा हरः शृणीहि विश्वतः प्रति ।
यातुधानस्य रक्षसो बलं वि रुज वीर्यम् २५

(८८) अष्टाशीतितमं सूक्तम्

(१-१६) एकोनविंशत्यृचस्यास्य सूक्तस्याङ्गिरसो वामदेव्यो वा मूर्धन्वानृषिः ।

सूर्यो वैश्वानरोऽग्निश्च देवते । त्रिष्टुप् छन्दः

हविष्पान्तमजरं स्वर्विदिं दिविस्पृश्याहृतं जुष्टमग्नौ ।
तस्य भर्मणे भुवनाय देवा धर्मणे कं स्वधर्या पप्रथन्त १
गीर्णं भुवनं तमसापगूळहमाविः स्वरभवज्जाते अग्नौ ।
तस्य देवाः पृथिवी द्यौरुतापो ऽरण्यन्नोषधीः सख्ये अस्य २
देवेभिर्निर्विषितो यज्ञियैभिरग्निं स्तोषाण्यजरं बृहन्तम् ।
यो भानुना पृथिवीं द्यामुतेमामाततान् रोदसी अन्तरिक्षम् ३
यो होतासीत् प्रथमो देवजुष्टो यं समाञ्जनाज्येना वृणानाः ।
स पतत्रीत्वरं स्था जगद्यच्छवात्रमग्निरकृणोञ्जातवेदाः ४
यजातवेदो भुवनस्य मूर्धन्नतिष्ठो अग्ने सह रौचनेन ।
तं त्वाहेम मतिभिर्गीर्भिरुक्थैः स यज्ञियो अभवो रोदसिप्राः ५
मूर्धा भुवो भवति नक्तमग्निस्ततः सूर्यो जायते प्रातरुद्यन् ।
मायामू तु यज्ञियानामेतामपो यत् तूर्णिश्वरति प्रजानन् ६
दृशेन्यो यो महिना समिद्धो ऽरौचत दिवियोनिर्विभावा ।
तस्मिन्नग्नौ सूक्तवाकेन देवा हविर्विश्व आजुहवुस्तनूपाः ७
सूक्तवाकं प्रथममादिदग्निमादिद्धविरजनयन्त देवाः ।
स एषां यज्ञो अभवत् तनूपास्तं द्यौर्वेदं तं पृथिवी तमार्षः ८
यं देवासोऽजनयन्ताग्निं यस्मिन्नाजुहवुर्भुवनानि विश्वा ।
सो अर्चिषा पृथिवीं द्यामुतेमामृज्यमानो अतपन्महित्वा ९
स्तोमैन् हि दिवि देवासो अग्निमजीजनञ्छक्तिभी रोदसिप्राम् ।
तमू अकृणवन् त्रेधा भुवे कं स ओषधीः पचति विश्वरूपाः १०
यदेदेनमदधुर्यज्ञियासो दिवि देवाः सूर्यमादितेयम् ।

यदा चरिष्णू मिथुनावभूतामादित् प्रापश्यन् भुवनानि विश्वा ११
 विश्वस्मा अग्निं भुवनाय देवा वैश्वानरं केतुमह्वामकृणवन् ।
 आ यस्ततानोषसौ विभातीरपो ऊर्णोति तमो अर्चिषा यन् १२
 वैश्वानरं कवयो यज्ञियासो ऽग्निं देवा अजनयन्नजुर्यम् ।
 नक्षत्रं प्रत्नममिनच्चरिष्णु यक्षस्याध्यक्षं तविषं बृहन्तम् १३
 वैश्वानरं विश्वहा दीदिवांसं मन्त्रैरग्निं कविमच्छा वदामः ।
 यो महिम्ना परिबभूवोर्वी उतावस्तादुत देवः पुरस्तात् १४
 द्वे स्तुती अशृणवन् पितृणामहं देवानामुत मर्त्यानाम् ।
 ताभ्यामिदं विश्वमेजत् समैति यदन्तरा पितरं मातरं च १५
 द्वे समीची बिभृतश्चरन्तं शीर्षतो जातं मनसा विमृष्टम् ।
 स प्रत्यङ् विश्वा भुवनानि तस्थावप्रयुच्छन् तरणिभ्राजमानः १६
 यत्रा वदैते अवरः परश्च यज्ञन्योः कतरो नौ वि वैद ।
 आ शैकुरित् सधमादुं सखीयो नक्षन्त यज्ञं क इदं वि वौचत् १७
 कत्यग्रयः कति सूर्यासः कत्युषासः कत्युं स्विदापः ।
 नोपस्विजं वः पितरो वदामि पृच्छामि वः कवयो विघने कम् १८
 यावन्मात्रमुषसो न प्रतीकं सुपर्योर्इ वसते मातरिश्चः ।
 तावद्दधात्युप यज्ञमायन् ब्राह्मणो होतुरवरो निषीदन् १९

(८६) एकोननवतितमं सूक्तम्

(१-१८) अष्टादशर्चस्यास्य सूक्तस्य वैश्वामित्रो रेणुर्ऋषिः । (१-४, ६-१८)
 प्रथमादिचतुर्ऋचां षष्ठ्यादित्रयोदशानाञ्चेन्द्रः, (५) पञ्चम्याञ्चेन्द्रासोमौ देवते ।

त्रिष्टुप् छन्दः

इन्द्रं स्तवा नृतमं यस्य मुहा विबबाधे रौचना वि ज्मो अन्तान् ।
 आ यः प्रप्रौ चर्षणीधृद्वरौभिः प्र सिन्धुभ्यो रिरिचानो महित्वा १
 स सूर्यः पर्युरू वरांस्येन्द्रौ ववृत्याद्रथ्यैव चक्रा ।
 अतिष्ठन्तमप्रस्यं न सर्गं कृष्णा तमांसि त्विष्या जघान २
 समानमस्मा अनेपावृदर्च क्षमया दिवो असमं ब्रह्म नव्यम् ।
 वि यः पृष्ठेव जनिमान्यर्य इन्द्रश्चिकाय न सखायमीषे ३
 इन्द्राय गिरो अनिशितसर्गा अपः प्रेरयं सर्गरस्य बुध्नात् ।
 यो अक्षणेव चक्रिया शचीभिर्विष्वक् तस्तम्भं पृथिवीमुत द्याम् ४

आपान्तमन्युस्तृपलप्रभर्मा धुनिः शिमीवाञ्छरुमाँ ऋजीषी ।
 सोमो विश्वान्यतसा वनानि नार्वगिन्द्रं प्रतिमानानि देभुः ५
 न यस्य द्यावापृथिवी न धन्व नान्तरिक्षं नाद्रयः सोमो अक्षाः ।
 यदस्य मन्युरधिनीयमानः शृणाति वीळु रुजति स्थिराणि ६
 जघान वृत्रं स्वधितिर्वनेव रुरोज पुरो अरदन्न सिन्धून् ।
 बिभेद गिरिं नवमिन्न कुम्भमा गा इन्द्रो अकृणुत स्वयुग्भिः ७
 त्वं ह त्यदृणया इन्द्र धीरो ऽसिर्न पर्व वृजिना शृणासि ।
 प्र ये मित्रस्य वरुणस्य धाम युजं न जनां मिनन्ति मित्रम् ८
 प्र ये मित्रं प्रार्यमणं दुरेवाः प्र संगिरः प्र वरुणं मिनन्ति ।
 न्यमित्रेषु वधमिन्द्र तुमं वृषन् वृषाणमरुषं शिशीहि ९
 इन्द्रो दिव इन्द्र ईशे पृथिव्या इन्द्रो अपामिन्द्र इत् पर्वतानाम् ।
 इन्द्रो वृधामिन्द्र इन्मेधिराणामिन्द्रः क्षेमे योगे हव्य इन्द्रः १०
 प्राक्तुभ्य इन्द्रः प्र वृधो अहभ्यः प्रान्तरिक्षात् प्र समुद्रस्य धासेः ।
 प्र वातस्य प्रथसः प्र ज्मो अन्तात् प्र सिन्धुभ्यो रिरिचे प्र क्षितिभ्यः ११
 प्र शोशुचत्या उषसो न केतुरसिन्वा तै वर्ततामिन्द्र हेतिः ।
 अश्मैव विध्य दिव आ सृजानस्तपिष्ठेन हेषसा द्रोघमित्रान् १२
 अन्वह मासा अन्विद्वनान्यन्वोषधीरनु पर्वतासः ।
 अन्विन्द्रं रोदसी वावशाने अन्वापो अजिहत जायमानम् १३
 कर्हि स्वित् सा त इन्द्र चेत्यासदघस्य यद्विनदो रक्ष एषत् ।
 मित्रक्रुवो यच्छसने न गावः पृथिव्या आपृगमुया शयन्ते १४
 शत्रून्तौ अभि ये नस्ततस्त्रे महि ब्राधन्त ओगुणास इन्द्र ।
 अन्धेनामित्रास्तमसा सचन्तां सुज्योतिषो अक्तवस्ताँ अभि ष्युः १५
 पुरूणि हि त्वा सर्वना जनानां ब्रह्माणि मन्दन् गृणतामृषीणाम् ।
 इमामाघोषन्नवसा सहृतिं तिरो विश्वाँ अर्चतो याह्यर्वाइ १६
 एवा तै वयमिन्द्र भुञ्जतीनां विद्याम सुमतीनां नवानाम् ।
 विद्याम् वस्तोरवसा गृणन्तौ विश्वामित्रा उत तै इन्द्र नूनम् १७
 शनं हुवेम मघवानमिन्द्रमस्मिन् भरे नृतमं वाजसातौ ।
 शृणवन्तमुग्रमृतये समत्सु घ्नन्त वृत्राणि संजितुं धनानाम् १८

(६०) नवतितमं सूक्तम्

(१-१६) षोडशर्चस्यास्य सूक्तस्य नारायण ऋषिः । पुरुषो देवता । (१-१५)

प्रथमादिपञ्चदशर्चामनुष्टुप्, (१६) षोडश्याश्च त्रिष्टुप् छन्दसी

सहस्रशीर्षा पुरुषः सहस्राक्षः सहस्रपात् ।
 स भूमिं विश्वतो वृत्वाऽत्यतिष्ठद्दशाङ्गुलम् १
 पुरुष एवेदं सर्वं यद्भूतं यच्च भव्यम् ।
 उतामृतत्वस्येशानो यदन्नैनातिरोहति २
 एतावानस्य महिमा ऽतो ज्यायांश्च पूरुषः ।
 पादोऽस्य विश्वा भूतानि त्रिपादस्यामृतं दिवि ३
 त्रिपादूर्ध्व उदैत् पुरुषः पादोऽस्येहाभवत् पुनः ।
 ततो विष्वङ् व्यक्रामत् साशनानशने अग्नि ४
 तस्माद्विराळजायत विराजो अग्नि पूरुषः ।
 स जातो अत्यरिच्यत पश्चाद्भूमिमथो पुरः ५
 यत् पुरुषेण हविषा देवा यज्ञमर्तन्वत ।
 वसन्तो अस्यासीदाज्यं ग्रीष्म इध्मः शरद्धविः ६
 तं यज्ञं बर्हिषि प्रौक्षन्पुरुषं जातमग्रतः ।
 तेन देवा अयजन्त साध्या ऋषयश्च ये ७
 तस्माद्यज्ञात् सर्वहुतः संभृतं पृषदाज्यम् ।
 पशून् ताँश्चक्रे वायुव्यानारुगयान् ग्राम्याश्च ये ८
 तस्माद्यज्ञात् सर्वहुत ऋचः सामानि जज्ञिरे ।
 छन्दांसि जज्ञिरे तस्माद्यजुस्तस्मादजायत ९
 तस्मादश्वा अजायन्त ये कै चोभयादतः ।
 गावो ह जज्ञिरे तस्मात् तस्माज्जाता अजावयः १०
 यत् पुरुषं व्यदधुः कतिधा व्यकल्पयन् ।
 मुखं किमस्य कौ बाहू का ऊरू पादा उच्येते ११
 ब्राह्मणोऽस्य मुखमासीद्बाहू राजन्यः कृतः ।
 ऊरू तदस्य यद्वैश्यः पद्भ्यां शूद्रो अजायत १२
 चन्द्रमा मनसो जातश्चक्षोः सूर्यो अजायत ।
 मुखादिन्द्रश्चाग्निश्च प्राणाद्वायुरजायत १३
 नाभ्या आसीदन्तरिक्षं शीष्णो द्यौः समवर्तत ।

पुद्ग्यां भूमिर्दिशः श्रोत्रात् तथा लोकाँ अकल्पयन् १४
सप्तास्यासन् परिधयस्त्रिः सप्त समिधः कृताः ।
देवा यद्यज्ञं तन्वाना अबध्नन् पुरुषं पशुम् १५
यज्ञेन यज्ञमयजन्त देवास्तानि धर्माणि प्रथमान्यासन् ।
ते ह नाकं महिमानः सचन्त यत्र पूर्वे साध्याः सन्ति देवाः १६

(६१) एकनवतितमं सूक्तम्

(१-१५) पञ्चदशर्चस्यास्य सूक्तस्य वैतहव्योऽरुण ऋषिः । अग्निर्देवता । (१-१४)
प्रथमादिचतुर्दशर्चा जगती, (१५) पञ्चदश्याश्च त्रिष्टुप् छन्दसी
सं जागृवद्भिर्जरमाण इध्यते दमे दमूना इषयन्निळस्पदे ।
विश्वस्य होता हविषो वरेणयो विभुर्विभावा सुषखा सखीयुते १
स दर्शतश्रीरतिथिर्गृहेगृहे वनेवने शिश्रिये तक्ववीरिव ।
जनंजनं जन्यो नाति मन्यते विश आ क्षेति विश्योर् विशविशम् २
सुदक्षो दक्षैः क्रतुनासि सुक्रतुरग्रे कविः काव्येनासि विश्ववित् ।
वसुर्वसूनां क्षयसि त्वमेक इद् द्यावा च यानि पृथिवी च पुष्यतः ३
प्रजानन्नग्रे तव योनिमृत्वियमिळायास्पदे घृतवन्तमासदः ।
आ तै चिकित्र उषसामिवेतयो ऽरेपसः सूर्यस्येव रश्मयः ४
तव श्रियो वृष्यस्येव विद्युतश्चित्राश्चिकित्र उषसां न केतवः ।
यदोषधीरभिसृष्टो वनानि च परि स्वयं चिनुषे अन्नमास्ये ५
तमोषधीर्दधिरे गर्भमृत्वियं तमापो अग्निं जनयन्त मातरः ।
तमित् समानं वनिर्नश्च वीरुधो ऽन्तर्वतीश्च सुवते च विश्वहा ६
वातौपधूत इषितो वशाँ अनु तृषु यदन्ना वेविषद्वितिष्ठसे ।
आ तै यतन्ते रथ्योर् यथा पृथक् शर्धास्यग्रे अजराणि धक्षतः ७
मेधाकारं विदथस्य प्रसाधनमग्निं होतारं परिभूतम मतिम् ।
तमिदभै हविष्या समानमित् तमिन्महे वृणते नान्यं त्वत् ८
त्वामिदत्र वृणते त्वायवो होतारमग्रे विदथेषु वेधसः ।
यदैवयन्तो दधति प्रयासि ते हविष्मन्तो मनवो वृक्तबर्हिषः ९
तवाग्रे होत्रं तव पोत्रमृत्वियं तव नेष्ट्रं त्वमग्निदृतायुतः ।
तव प्रशास्त्रं त्वमध्वरीयसि ब्रह्मा चासि गृहपतिश्च नो दमे १०
यस्तुभ्यमग्रे अमृतायु मर्त्यः समिधा दाशदुत वा हविष्कृति ।

तस्य होता भवसि यासि दूत्यश्मुप ब्रूषे यजस्यध्वरीयसि ११
 इमा अस्मै मृतयो वाचो अस्मदाँ ऋचो गिरः सुष्टुतयः समग्मत ।
 वसूयवो वसवे जातवेदसे वृद्धासु चिद्धर्धनो यासु चाकनत् १२
 इमां प्रत्नाय सुष्टुतिं नवीयसी वोचेयमस्मा उशते शृणोतु नः ।
 भूया अन्तरा हृद्यस्य निस्पृशे जायेव पत्य उशती सुवासाः १३
 यस्मिन्नश्वास ऋषभास उक्षणौ वशा मेषा अवसृष्टास आहुताः ।
 कीलालपे सोमपृष्ठाय वेधसे हृदा मतिं जनये चारुमग्रये १४
 अहाव्यग्रे हविरास्ये ते स्तुचीव घृतं चम्वीव सोमः ।
 वाजसनि रयिमस्मे सुवीरं प्रशस्तं धेहि यशसं बृहन्तम् १५

(६२) द्विनवतितमं सूक्तम्

(१-१५) पञ्चदशर्चस्यास्य सूक्तस्य मानवः शार्यात ऋषिः । विश्वे देवा देवताः ।

जगती छन्दः

यज्ञस्य वो रथ्यं विश्पतिं विशां होतारमुक्तोरतिथिं विभावंसुम् ।
 शोचञ्छुष्कासु हरिणीषु जर्भुरद् वृषां केतुर्यजतो द्यामशायत १
 इममञ्जस्पामुभये अकृणवत धर्माणामग्निं विदथस्य साधनम् ।
 अक्तुं न यद्बहुषसः पुरोहितं तनूनपातमरुषस्य निंसते २
 बळस्य नीथा वि पणेश्च मन्महे वया अस्य प्रहुता आसुरत्तवे ।
 यदा घोरासौ अमृतत्वमाशतादिजनस्य दैव्यस्य चर्किरन् ३
 ऋतस्य हि प्रसितिर्द्यौरुरु व्यचो नमो मह्यशर्मतिः पनीयसी ।
 इन्द्रो मित्रो वरुणः सं चिकित्रिरे ऽथो भर्गः सविता पूतदक्षसः ४
 प्र रुद्रेण यधिना यन्ति सिन्धवस्तिरो महीमरमतिं दधन्विरे ।
 येभिः परिज्मा परियन्नुरु जयो वि रोवुवञ्जठरे विश्वमुक्षतै ५
 क्राणा रुद्रा मरुतो विश्वकृष्टयो दिवः श्येनासो असुरस्य नीळयः ।
 तेभिश्चष्टे वरुणो मित्रो अर्यमेन्द्रो देवेभिरर्वशेभिरर्वशः ६
 इन्द्रे भुजं शशमानास आशत सूरु दृशीके वृषणश्च पौंस्यै ।
 प्र ये न्वस्यार्हणा ततक्षिरे युजं वज्रं नृषदनेषु कारवः ७
 सूरश्चिदा हरितो अस्य रीरमुदिन्द्रादा कश्चिद्धयते तवीयसः ।
 भीमस्य वृष्णो जठरादभिश्चसौ दिवेदिवे सहुरिः स्तन्नबाधितः ८
 स्तोमं वो अद्य रुद्राय शिक्वसे क्षयद्वीराय नमसा दिदिष्टन ।

येभिः शिवः स्ववाँ एवयावभिर्दिवः सिषक्ति स्वयशा निकामभिः ९
 ते हि प्रजाया अभरन्त वि श्रवो बृहस्पतिर्वृषभः सोमजामयः ।
 यज्ञैरथर्वा प्रथमो वि धारयद्देवा दक्षैर्भृगवः सं चिकित्रिरे १०
 ते हि द्यावापृथिवी भूरिरतसा नराशंसश्चतुरङ्गो यमोऽदितिः ।
 देवस्त्वष्टा द्रविणोदा ऋभुक्षणाः प्र रोदसी मरुतो विष्णुरर्हिरे ११
 उत स्य न उशिजामुर्विया कविरर्हिः शृणोतु बुध्योर्ह्वीमनि ।
 सूर्यामासा विचरन्ता दिविक्षिता धिया शमीनहृषी अस्य बोधतम् १२
 प्र नः पूषा चरथ विश्वदैव्यो ऽपां नपादवतु वायुरिष्टयै ।
 आत्मानं वस्यो अभि वातमर्चत तदश्विना सुहवा यामनि श्रुतम् १३
 विशामासामभयानामधिक्षितं गीर्भिरु स्वयशसं गृणीमसि ।
 ग्राभिर्विश्वाभिरदितिमनुर्वणमक्तोर्युवानं नृमणा अधा पतिम् १४
 रेभदत्रं जनुषा पूर्वो अङ्गिरा ग्रावाण ऊर्ध्वा अभि चक्षुरध्वरम् ।
 येभिर्विहाया अभवद्विचक्षणः पार्थः सुमेकं स्वधितिर्वनन्वति १५

(९३) त्रिनवतितमं सूक्तम्

(१-१५) पञ्चदशर्चस्यास्य सूक्तस्य पार्थस्तान्व ऋषिः । विश्वे देवा देवताः । (१,
 ४-८, १०, १२, १४) प्रथमर्चश्चतुर्थ्यादिपञ्चानां दशमीद्वादशीचतुर्दशीचतुर्दशीनाञ्च
 प्रस्तारपङ्क्तिः, (२, ३, १३) द्वितीयातृतीयात्रयोदशीनामनुष्टुप्, (९) नवम्या अक्षरैः
 पङ्क्तिः, (११) एकादश्या न्यङ्कुसारिणी, (१५) पञ्चदश्याश्च पुरस्ताद्बृहती छन्दांसि
 महि द्यावापृथिवी भूतमुर्वी नारी यही न रोदसी सदै नः ।
 तेभिर्नः पातं सह्यस एभिर्नः पातं शूषणि १
 यज्ञैर्यज्ञे स मर्त्यो देवान् त्संपर्यति ।
 यः सुमैर्दीर्घश्रुतम आविवासात्येनान् २
 विश्वेषामिरज्यवो देवानां वार्महः ।
 विश्वे हि विश्वमहसो विश्वे यज्ञेषु यज्ञियाः ३
 ते घा राजानो अमृतस्य मन्द्रा अर्यमा मित्रो वरुणः परिज्मा ।
 कद्रुद्रो नृणां स्तुतो मरुतः पूषणो भर्गः ४
 उत नो नक्तम्पां वृषणवसू सूर्यामासा सदैनाय सध्न्या ।
 सचा यत् साद्येषामहिर्बुध्नेषु बुध्यः ५
 उत नो देवावश्विना शभस्पती धामभिर्मित्रावरुणा उरुष्यताम् ।

म॒हः स रा॒य ए॒षुते ऽति॒ धन्वे॑व दु॒रिता ६
 उ॒त नो॑ रु॒द्रा चि॑न्मृ॒ळता॑म॒श्विना॑ विश्वे॑ दे॒वासो॑ रथ॒स्पति॑र्भगः ।
 ऋ॒भुर्वा॑र्ज ऋ॒भुर्क्ष॑णः परि॒ज्मा विश्व॑वेदसः ७
 ऋ॒भुर्भृ॑क्षु॒क्ता ऋ॒भुर्वि॑ध॒तो म॒द् आ ते॒ हरी॑ जू॒जुवा॑नस्य॒ वा॒जिना॑ ।
 दु॒ष्टरं॑ यस्य॒ सामं चि॑दृ॒ध॒ग्य॒ज्ञो न मानु॑षः ८
 कृ॒धी नो॒ अ॒ह॒यो दे॒व स॒वितुः॑ स च॑ स्तु॒षे म॒घोना॑म् ।
 स॒हो न॒ इन्द्रो॑ व॒ह्निभि॑न्यैषां च॒र्षणी॑नां च॒क्रं र॒श्मिं न यो॑युवे ९
 ए॒षु द्या॒वापृ॑थि॒वी धा॑तं म॒हद॒स्मे वी॑रेषु॒ विश्व॑च॒र्षणि॑ श्रवः ।
 पृ॒क्षं वा॑र्जस्य॒ सा॒तये॑ पृ॒क्षं रा॒योत॑ तु॒र्वणै॑ १०
 ए॒तं शंस॑मिन्द्रा॒स्मयु॑ष्टं कू॒चित् सन्त॑ सहसा॒वन्न॑भिष्ट॒ये सदा॑ पा॒ह्यभिष्ट॑ये ।
 मे॒दता॑ वे॒दता॑ वसो ११
 ए॒तं मे॒ स्तोमं॑ त॒ना न सूर्ये॑ द्यु॒तद्या॑मानं वा॒वृध॑न्त नृ॒णाम् ।
 सं॒व॒न॒नं ना॑श्व॒यं त॒ष्टेवा॑नप॒च्युतम् १२
 वा॒व॒र्त॒ येषां॑ रा॒या यु॒क्तैषां॑ हि॒र॒ण्ययी॑ ।
 ने॒म॒धि॒ता न पौ॑स्या॒ वृथै॑व वि॒ष्टान्ता॑ १३
 प्र तद्दुः॑शीमे॒ पृथ॑वाने वे॒ने प्र रा॒मे वो॑च॒मसुरे॑ म॒घव॑त्सु ।
 ये यु॒क्त्वाय॑ पञ्च॒ श॒ता॒स्मयु॑ प॒था वि॒श्राव्यै॑षाम् १४
 अ॒धी॒न्व॒त्र स॒प्ततिं॑ च॒ सप्त॑ च ।
 स॒द्यो दि॑दिष्ट॒ तान्वः॑ स॒द्यो दि॑दिष्ट॒ पा॒थ्यः स॒द्यो दि॑दिष्ट॒ मा॒यवः॑ १५

(९४) चतुर्नवतितमं सूक्तम्

(१-१४) चतुर्दशर्चस्यास्य सूक्तस्य काद्रवेयः सर्पोऽर्बुद ऋषिः । ग्रावाणो देवताः
 । (१-४, ६, ८-१३) प्रथमादिचतुर्त्रिंशत् षष्ठ्या अष्टम्यादिषण्णञ्च जगती, (५, ७,
 १४) पञ्चमीसप्तमीचतुर्दशीनाञ्च त्रिष्टुप् छन्दसी
 प्रै॒ते व॑दन्तु प्र व॒यं व॑दाम॒ ग्राव॑भ्यो वाचं वद॒ता वद॑द्भ्यः ।
 यद॑द्रयः पर्वताः सा॒कमा॑शवः श॒लोकं॑ घोषं॒ भर॑थेन्द्राय सो॒मिनः॑ १
 ए॒ते व॑दन्ति श॒तव॑त् स॒हस्र॑वद॒भि क्र॑न्दन्ति॒ हरि॑तेभि॒रास॑भिः ।
 वि॒ष्टी ग्रा॒वा॑णः सु॒कृतः॑ सु॒कृत्य॑या हो॒तुश्चित्॑ पूर्वे॒ ह॒विर॑द्यमाशत २
 ए॒ते व॑दन्त्यवि॒दन्न॑ना मधु॒ न्यू॑ङ्ख॒यन्ते॑ अ॒धि प॒क्व आ॑मिषि ।
 वृ॒क्षस्य॑ शा॒खा॒म॒रुण॑स्य॒ ब॒प्स॑त॒स्ते सू॑र्भवा॒ वृष॑भाः प्रेम॒रावि॑षुः ३

बृहद्वदन्ति मदिरेणं मन्दिनेन्द्रं क्रोशन्तोऽविदन्नना मधु ।
 संरभ्या धीराः स्वसृभिरनर्तिषुराघोषयन्तः पृथिवीमुपबिदिभिः ४
 सुपर्णा वाचमक्रतोपद्यव्याखरे कृष्णा इषिरा अनर्तिषुः ।
 न्यश्ङ्गिन यन्त्युपरस्य निष्कृतं पुरू रेतौ दधिरे सूर्यश्वितः ५
 उग्रा इव प्रवहन्तः समार्यमुः साकं युक्ता वृषणो बिभ्रतो धुरः ।
 यच्छ्वसन्तौ जग्रसाना अराविषुः शृणव एषां प्रोथथो अर्वतामिव ६
 दशावनिभ्यो दशकक्षयेभ्यो दशयोक्त्रेभ्यो दशयोजनेभ्यः ।
 दशाभीशुभ्यो अर्चताजरैभ्यो दश धुरो दश युक्ता वहङ्गः ७
 ते अद्रयो दशयन्त्रास आशवस्तेषामाधानं पर्येति हर्यतम् ।
 त ऊं सुतस्य सोम्यस्यान्धसोऽशोः पीयूषं प्रथमस्य भेजिरे ८
 ते सोमादो हरी इन्द्रस्य निसतेऽशं दुहन्तो अध्यासते गवि ।
 तेभिर्दुग्धं पिपिवान् त्सोम्यं मध्वन्द्रो वर्धते प्रथते वृषायते ९
 वृषा वो अंशुर्न किला रिषाथनेळावन्तः सदमित् स्थनाशिताः ।
 रैवत्येव महसा चारवः स्थन यस्य ग्रावाणो अर्जुषध्वमध्वरम् १०
 तृदिला अर्तृदिला सो अद्रयो ऽश्रमणा अर्शृथिता अर्मृत्यवः ।
 अनातुरा अजराः स्थामविष्णवः सुपीवसो अर्तृषिता अर्तृष्णजः ११
 ध्रुवा एव वः पितरौ युगेयुगे क्षेमकामासः सदसो न युञ्जते ।
 अजुर्यासौ हरिषाचौ हरिद्रव आ द्यां रवेण पृथिवीमशुश्रवुः १२
 तदिद्वदन्त्यद्रयो विमोचने यामन्नञ्जस्पा इव घेदुपबिदिभिः ।
 वपन्तो बीजमिव धान्याकृतः पृञ्चन्ति सोमं न मिनन्ति बर्षतः १३
 सुते अध्वरे अधि वाचमक्रता ऽऽ क्रीळयो न मातरं तुदन्तः ।
 वि षू मुञ्जा सुषुवुषो मनीषां वि वर्तन्तामद्रयश्चायमानाः १४

पञ्चमोऽध्यायः

। व० १-२६ ।

(६५) पञ्चनवतितमं सूक्तम्

(१-१८) अष्टादशर्चस्यास्य सूक्तस्य (१, ३, ६, ८-१०, १२, १४, १७)

प्रथमातृतीयाषष्ठीनामृचामष्टम्यादितृचस्य द्वादशीचतुर्दशीसप्तदशीनाञ्चैळः पुरुरवा

ऋषिः, (२, ४-५, ७, ११, १३, १५-१६, १८)

द्वितीयाचतुर्थीपञ्चमीसप्तम्येकादशीत्रयोदशीपञ्चदशीषोडश्यष्टादशीनाञ्चोर्वशी ऋषिका

। (१, ३, ६, ८-१०, १२, १४, १७) प्रथमातृतीयाषष्ठीनामृचामष्टम्यादितृचस्य
द्वादशीचतुर्दशीसप्तदशीनाञ्चोर्वशी, (२, ४-५, ७, ११, १३, १५-१६, १८)
द्वितीयाचतुर्थीपञ्चमीसप्तम्येकादशीत्रयोदशीपञ्चदशीषोडश्याष्टादशीनाञ्च पुरुरवा देवते

। त्रिष्टुप् छन्दः

हृये जाये म॒न॒सा तिष्ठ॑ घो॒रे वचा॑सि मि॒श्रा कृ॑णवावहै नु ।
न नौ॑ मन्त्रा अ॒नु॒दिता॑स ए॒ते म॒र्यस्कर॑न् पर॒तरे च॒नाह॑न् १
किमे॒ता वा॒चा कृ॑णवा॒ तवा॑हं प्रा॒क्रमि॑षमुषसा॒मग्रि॑येव ।
पुरुर॑वः पु॒न॒रस्तं॑ परे॒हि दुरा॑प॒ना वा॒त इवा॑हमस्मि २
इषु॑र्न श्रि॒य इषु॑धेर॒सना॑ गो॒षाः श॑त॒सा न रं॑हिः ।
अ॒वीरे॑ क्र॒तौ वि॑ द॒विद्यु॑त॒न्नोरा॑ न मा॒युं चि॑तयन्त॒ धुन॑यः ३
सा व॒सु द॑र्ध॒ती श्वशु॑राय॒ वय॑ उषो॒ यदि॑ वष्ट॒यन्ति॑गृहात् ।
अस्तं॑ न॒नक्षे॑ यस्मिञ्चा॒कन् दि॒वा नक्तं॑ श॒नथि॑ता वै॒तसे॑न ४
त्रिः स्म॒ माहं॑ श॒नथ॑यो वै॒तसे॑नो॒त स्म॒ मेऽव्य॑त्यै पृ॒णासि॑ ।
पुरुर॑वोऽनु॒ ते के॑त॒मायं॑ राजा॒ मे वी॑र त॒न्वश्स्त॑दासीः ५
या सु॑जू॒र्णिः श्रेणिः॑ सु॒म्रत्रा॑पि॒हृदे॑च॒क्षुर्न॑ गृ॒न्थिनी॑ च॒रण॑युः ।
ता अ॒ञ्जयो॑ऽरु॒णयो॑ न स॒स्रुः श्रि॒ये गा॒वो न धे॑नवोऽन॒वन्त॑ ६
सम॑स्मिञ्जा॒यमान॑ आ॒सत् ग्रा उ॒तेम॑वर्धन् नृ॒द्यश्ः स्व॑गूर्ताः ।
म॒हे यत् त्वा॑ पुरुर॒वो र॑णाया ऽव॒र्धय॑न् दस्यु॒हत्या॑य दे॒वाः ७
सचा॑ यदा॒सु ज॑ह॒तीष्व॑त्क॒ममा॑नुषीषु॒ मानु॑षो नि॒षेवे॑ ।
अप॑ स्म॒ मत् तर॑स॒न्ती न भु॑ज्यु॒स्ता अ॒त्रस॑न् रथ॒स्पृशो॑ नाश्वाः ८
यदा॑सु॒ मतो॑ अ॒मृता॑सु॒ निस्पृ॑क सं॒ क्षोणी॑भिः॒ क्रतु॑भिर्न पृ॒ङ्क्ते॑ ।
ता आ॒तयो॑ न त॒न्वः शु॑म्भ॒त् स्वा अ॒श्वा॑सो॒ न क्री॑ळ॒यो द॑न्द॒शानाः॑ ९
वि॒द्युन्न॑ या प॒तन्ती॑ द॒विद्यो॑द्भ॒रन्ती॑ मे॒ अप्या॑ काम्या॒नि ।
जनि॑ष्ठो अ॒पो न॒र्यः सु॑जा॒तः प्रो॑र्वशी॒ तिर॑त दी॒र्घमा॑युः १०
ज॒ज्ञिष॑ इ॒त्या गो॑पीथ्या॒य हि द॑धाथ॒ तत् पुरुर॑वो म॒ ओजः॑ ।
अशो॑सं॒ त्वा वि॒दुषी॑ सस्मिन्न॒हन् न म॑ आ॒शृणोः॑ कि॒मभु॑ग्व॒दासि॑ ११
क॒दा सू॑नुः पि॒तरं॑ जा॒त इ॒च्छाच्च॑क्र॒न्नाश्रु॑ वर्त॒यद्वि॒जान॑न् ।
को द॑र्प॒ती स॒मन॑सा॒ वि यू॒योद॑ध॒ यद्ग॑ग्निः श्वश॑रेषु दी॒दय॑त् १२
प्रति॑ ब्र॒वाणि॑ वर्त॒यते॑ अ॒श्रु च॑क्रन् न क्र॒न्ददा॑र्ध्वे शि॒वायै॑ ।
प्र॒ तत् तै॑ हिन॒वा यत् तै॑ अ॒स्मे परे॑ह्यस्तं न॒हि मूर॑ मापः १३

सुदेवो अद्य प्रपतेदनावृत् परावतं परमां गन्तवा उ ।
 अधा शयीतु निऋतेरुपस्थे ऽधैनं वृका रभसासौ अद्युः १४
 पुरुरवो मा मृथा मा प्र पप्नो मा त्वा वृकासो अशिवास उ चन् ।
 न वै स्त्रैणानि सुख्यानि सन्ति सालावृकाणां हृदयान्येता १५
 यद्विरूपाचरं मर्त्येष्ववसं रात्रीः शरदश्चतस्रः ।
 घृतस्य स्तोत्रं सकृदहं आशनां तादेवेदं तातृपाणा चरामि १६
 अन्तरिक्षप्रां रजसो विमानीमुप शिन्नाम्युर्वशीं वसिष्ठः ।
 उप त्वा रातिः सुकृतस्य तिष्ठान्नि वर्तस्व हृदयं तप्यते मे १७
 इति त्वा देवा इम आहुरैळ यथैमेतद्भवसि मृत्युबन्धुः ।
 प्रजा तै देवान् हविषा यजाति स्वर्ग उ त्वमपि मादयासे १८

(६६) षण्णवतितमं सूक्तम्

(१-१३) त्रयोदशर्चस्यास्य सूक्तस्याङ्गिरसो बरुरैन्द्रः सर्वहरिर्वा ऋषिः । हरिर्देवता

। (१-११) प्रथमाद्येकादशर्चा जगती,

(१२-१३) द्वादशीत्रयोदशयोश्च त्रिष्टुप् छन्दसी

प्र तै महे विदथै शंसिषं हरी प्र तै वन्वे वनुषो हर्यतं मदम् ।
 घृतं न यो हरिभिश्चारु सेचतु आ त्वा विशन्तु हरिवर्षसं गिरः १
 हरिं हि योनिमभि ये समस्वरन् हिन्वन्तो हरी दिव्यं यथा सदः ।
 आ यं पृणन्ति हरिभिर्न धेनव इन्द्राय शूषं हरिवन्तमर्चत २
 सो अस्य वज्रो हरितो य आयसो हरिर्निकामो हरिरा गर्भस्त्योः ।
 द्युम्नी सुशिप्रो हरिमन्युसायक इन्द्रे नि रूपा हरिता मिमिक्षिरे ३
 दिवि न केतुरधि धायि हर्यतो विव्यचद्वज्रो हरितो न रंह्या ।
 तुददहिं हरिशिप्रो य आयसः सहस्रशोका अभवद्धरिभ्रः ४
 त्वंत्वमहर्यथा उपस्तुतः पूर्वेभिरिन्द्र हरिकेश यज्वभिः ।
 त्वं हर्यसि तव विश्वमुक्थ्यश्मसामि राधौ हरिजात हर्यतम् ५
 ता वज्रिणं मन्दिनं स्तोम्यं मद इन्द्रं रथे वहतो हर्यता हरी ।
 पुरुरयस्मै सर्वनानि हर्यत इन्द्राय सोमा हरयो दधन्विरे ६
 अरं कामाय हरयो दधन्विरे स्थिराय हिन्वन् हरयो हरी तुरा ।
 अर्वाद्भिर्यो हरिभिर्जोषमीयते सो अस्य कामं हरिवन्तमानशे ७
 हरिश्मशारुर्हरिकेश आयसस्तुरस्पेये यो हरिपा अवर्धत ।

अर्वद्धिर्यो हरिर्भिर्वाजिनीवसुरति विश्वा दुरिता पारिषद्धरी ८
 स्तुवैव यस्य हरिणी विपेततुः शिप्रे वाजाय हरिणी दर्विध्वतः ।
 प्र यत् कृते चमसे मर्मजद्धरी पीत्वा मदस्य हर्यतस्यान्धसः ९
 उत स्म सद्य हर्यतस्य पस्त्योर्इरत्यो न वाजं हरिवाँ अचिक्रदत् ।
 मही चिद्धि धिषणाहर्यदोर्जसा बृहद्वयो दधिषे हर्यतश्चिदा १०
 आ रोदसी हर्यमाणो महित्वा नव्यनव्यं हर्यसि मन्म नु प्रियम् ।
 प्र पस्त्यमसुर हर्यतं गोराविष्कृधि हरये सूर्याय ११
 आ त्वा हर्यन्तं प्रयुजो जनानां रथे वहन्तु हरिशिप्रमिन्द्र ।
 पिबा यथा प्रतिभृतस्य मध्वो हर्यन् यज्ञं सधमादे दशौणिम् १२
 अपाः पूर्वेषां हरिवः सुतानामथो इदं सर्वनं केवलं ते ।
 म्मद्धि सोमं मधुमन्तमिन्द्र सत्रा वृषञ्जठर आ वृषस्व १३

(६७) सप्तनवतितमं सूक्तम्

(१-२३) त्रयोविंशत्यृचस्यास्य सूक्तस्याथर्वणो भिषगृषिः । ओषधयो देवताः ।

अनुष्टुप् छन्दः

या ओषधीः पूर्वा जाता देवेभ्यस्त्रियुगं पुरा ।
 मनै नु बभ्रूणामहं शतं धामानि सप्त च १
 शतं वो अम्ब्र धामानि सहस्रमुत वो रुहः ।
 अधा शतक्रत्वो यूयमिमं मे अगदं कृत २
 ओषधीः प्रति मोदध्वं पुष्पवतीः प्रसूर्वरीः ।
 अश्वा इव सजित्वरीर्वीरुधः पारयिष्णवः ३
 ओषधीरिति मातरस्तद्वौ देवीरुपं ब्रुवे ।
 सनेयमश्वं गां वास आत्मानं तव पूरुष ४
 अश्वत्थे वो निषदनं पूर्णे वो वसतिष्कृता ।
 गोभाज इत् किलासथ यत्सनवथ पूरुषम् ५
 यत्रौषधीः समगमत् राजानः समिताविव ।
 विप्रः स उच्यते भिषग् रक्षोहामीवचातनः ६
 अश्वावतीं सौमावतीमूर्जयन्तीमुदौजसम् ।
 आवित्सि सर्वा ओषधीरस्मा अरिष्टतातये ७

उच्छुष्मा ओषधीनां गावो गोष्ठादिवेरते ।
 धनं सनिष्यन्तीनामात्मानं तव पूरुष ८
 इष्कृतिर्नाम वो माता ऽथो यूयं स्थ निष्कृतीः ।
 सीराः पततृणीः स्थन यदामयति निष्कृथ ९
 अति विश्वाः परिष्ठाः स्तेन इव व्रजमक्रमुः ।
 ओषधीः प्राचुच्यवुर्यत् किं च तन्वोर्ऽर्षः १०
 यदिमा वाजयन्नहमोषधीर्हस्त आदधे ।
 आत्मा यद्धर्मस्य नश्यति पुरा जीवगृभो यथा ११
 यस्यौषधीः प्रसर्पथाङ्गमङ्गं परुष्परुः ।
 ततो यद्धमं वि बाधध्व उग्रो मध्यमशीरिव १२
 साकं यद्धमं प्र पत चाषेण किकिदीविना ।
 साकं वार्तस्य ध्राज्या साकं नश्य निहाकया १३
 अन्या वो अन्यामवत्वन्यान्यस्या उपावत ।
 ताः सर्वाः संविदाना इदं मे प्रावता वचः १४
 याः फलिनीर्या अफला अपुष्पा याश्च पुष्पिणीः ।
 बृहस्पतिप्रसूतास्ता नो मुञ्चन्त्वंहसः १५
 मुञ्चन्तु मा शपथ्यार्ऽदथो वरुणयादुत ।
 अथो यमस्य पड्बीशात् सर्वस्माद्देवकिल्बिषात् १६
 अवपतन्तीरवदन् दिव ओषधयस्परि ।
 यं जीवमृश्नवामहै न स रिष्याति पूरुषः १७
 या ओषधीः सोमराज्ञीर्बृहीः शतविचक्षणाः ।
 तासां त्वमस्युत्तमारं कामायु शं हृदे १८
 या ओषधीः सोमराज्ञीर्विष्टिताः पृथिवीमनु ।
 बृहस्पतिप्रसूता अस्यै सं दत्त वीर्यम् १९
 मा वो रिषत् खनिता यस्मै चाहं खनामि वः ।
 द्विपञ्चतुष्पदस्माकं सर्वमस्त्वनातुरम् २०
 याश्चेदमुपशृणवन्ति याश्च दूरं परगिताः ।
 सर्वाः संगत्य वीरुधो ऽस्यै सं दत्त वीर्यम् २१
 ओषधयः सं वदन्ते सोमैः सह राज्ञा ।
 यस्मै कृणोति ब्राह्मणस्तं राजन् पारयामसि २२

त्वमुत्तमास्यौषधे तव वृक्षा उपस्तयः ।
उपस्तिरस्तु सोऽस्माकं यो अस्माँ अभिदासति २३

(६८) अष्टनवतितमं सूक्तम्

(१-१२) द्वादशर्चस्यास्य सूक्तस्याष्टिषेणो देवापिर्ऋषिः । देवा देवताः ।

त्रिष्टुप् छन्दः

बृहस्पते प्रति मे देवतामिहि मित्रो वा यद्वरुणो वासि पूषा ।
आदित्यैर्वा यद्वसुभिर्मरुत्वान् त्स पर्जन्यं शतनवे वृषाय १
आ देवो दूतो अजिरश्चिकित्वान् त्वद्देवापे अभि मामगच्छत् ।
प्रतीचीनः प्रति मामा ववृत्स्व दधामि ते द्युमतीं वाचमासन् २
अस्मे धेहि द्युमतीं वाचमासन् बृहस्पते अनमीवामिषिराम् ।
यया वृष्टिं शतनवे वनाव दिवो द्रप्सो मधुमाँ आ विवेश ३
आ नो द्रप्सा मधुमन्तो विशन्त्विन्द्र देह्यधिरथं सहस्रम् ।
नि षीद होत्रमृतथा यजस्व देवान् देवापे हविषा सपर्य ४
आष्टिषेणो होत्रमृषिर्निषीदन् देवापिर्देवसुमतिं चिकित्वान् ।
स उत्तरस्मादधरं समुद्रमपो दिव्या असृजद्वृष्याँ अभि ५
अस्मिन् त्समुद्रे अद्युत्तरस्मिन्नापो देवेभिर्निर्वृता अतिष्ठन् ।
ता अद्रवन्नाष्टिषेणेन सृष्टा देवापिना प्रेषिता मृत्तिशीषु ६
यद्देवापिः शतनवे पुरोहितो होत्राय वृतः कृपयन्नदीधेत् ।
देवश्रुतं वृष्टिवनिं रराणो बृहस्पतिर्वाचमस्मा अयच्छत् ७
यं त्वा देवापिः शुशुचानो अग्र आष्टिषेणो मनुष्यः समीधे ।
विश्वेभिर्देवैरनुमद्यमानः प्र पर्जन्यमीरया वृष्टिमन्तम् ८
त्वां पूर्वं ऋषयो गीर्भिरायन् त्वामध्वरेषु पुरुहूत विश्वे ।
सहस्राण्यधिरथान्यस्मे आ नो यज्ञं रोहिदश्वोप याहि ९
एतान्यग्ने नवतिर्नव त्वे आहुतान्यधिरथा सहस्रा ।
तेभिर्वर्धस्व तन्वः शूर पूर्वीर्दिवो नो वृष्टिमिषितो रिरीहि १०
एतान्यग्ने नवतिं सहस्रा सं प्र यच्छ वृष्ण इन्द्राय भागम् ।
विद्वान् पथ ऋतुशो देवयानानप्यौलानं दिवि देवेषु धेहि ११
अग्ने बाधस्व वि मृधो वि दुर्गहा ऽपामीवामप रक्षांसि सेध ।
अस्मात् समुद्राद्बृहतो दिवो नो ऽपां भूमानमुप नः सृजेह १२

(६६) नवनवतितमं सूक्तम्

(१-१२) द्वादशर्चस्यास्य सूक्तस्य वैखानसो वम्र ऋषिः । इन्द्रो देवता ।

त्रिष्टुप् छन्दः

कं नश्चित्रमिषणयसि चिकित्वान् पृथुग्मानं वाश्रं वावृधध्वै ।
 कत् तस्य दातु शर्वसो व्युष्टौ तक्षद्वजं वृत्रतुरमपिन्वत् १
 स हि द्युता विद्युता वेति सामं पृथुं योनिमसुरत्वा संसाद ।
 स सनीळेभिः प्रसहानो अस्य भ्रातुर्न ऋते सप्तथस्य मायाः २
 स वाजं यातापदुष्पदा यन् त्वर्षाता परि षदत् सनिष्यन् ।
 अनर्वा यच्छतदुरस्य वेदो घञ्छिनदैवाँ अभि वर्षसा भूत् ३
 स यह्योऽवनीर्गोष्वर्वा ऽऽ जुहोति प्रधन्यासु सस्त्रिः ।
 अपादो यत्र युज्यासोऽरथा द्रोणयश्वास ईरते घृतं वाः ४
 स रुद्रेभिरशस्तवार ऋभ्वा हित्वी गयमारेऽवद्य आगात् ।
 वम्रस्य मन्ये मिथुना विव्वी अन्नमभीत्यारोदयन्मुषायन् ५
 स इद्दासं तुवीरवं पतिर्दन् षळक्षं त्रिशीर्षाणं दमन्यत् ।
 अस्य त्रितो न्वोजसा वृधानो विपा वराहमयोऽग्रया हन् ६
 स द्रुहणे मनुष ऊर्ध्वसान आ साविषदर्शसानाय शरुम् ।
 स नृतमो नहृषोऽस्मत् सुजातः पुरोऽभिनदहन् दस्युहत्यै ७
 सो अभ्रियो न यवस उद्वन्यन् क्षयाय गातुं विदन्नी अस्मे ।
 उप यत् सीददिन्दुं शरीरैः श्येनोऽयोपाष्टिर्हन्ति दस्यून् ८
 स ब्राधतः शवसानेभिरस्य कुत्साय शुष्णं कृपणे परादात् ।
 अयं कविमनयच्छस्यमानमत्कं यो अस्य सनितोत नृणाम् ९
 अयं दशस्यन् नर्येभिरस्य दस्मो देवेभिर्वरुणो न मायी ।
 अयं कनीनं ऋतुपा अवेद्यमिमीतारुं यश्चतुष्पात् १०
 अस्य स्तोमैभिरौशिज ऋजिश्वा वृजं दरयद्वृषभेण पिप्रौः ।
 सुत्वा यद्यजतो दीदयद्दीः पुरं इयानो अभि वर्षसा भूत् ११
 एवा महो असुर वक्षथाय वम्रकः पडिभरुपं सर्पदिन्द्रम् ।
 स इयानः करति स्वस्तिमस्मा इषमूर्जं सुक्षितिं विश्वमाभाः १२

नवमोऽनुवाकः

। सू० १००-११२ ।

(१००) शततमं सूक्तम्

(१-१२) द्वादशर्चस्यास्य सूक्तस्य वान्दनो दुवस्युर्ऋषिः । विश्वे देवा देवताः ।

(१-११) प्रथमाद्येकादशर्चा जगती, (१२) द्वादश्याश्च त्रिष्टुप् छन्दसी
 इन्द्र दृह्य मघवन् त्वावृदिद्भुज इह स्तुतः सुतपा बौधि नो वृधे ।
 देवेभिर्नः सविता प्रवतु श्रुतमा सर्वतातिमदिति वृणीमहे १
 भराय सु भरत भागमृत्वियं प्र वायवे शुचिपे क्रन्ददिष्टये ।
 गौरस्य यः पर्यसः पीतिमान्श आ सर्वतातिमदिति वृणीमहे २
 आ नो देवः सविता साविषद्वयं ऋजूयते यजमानाय सुन्वते ।
 यथा देवान् प्रतिभूषेम पाक्वदा सर्वतातिमदिति वृणीमहे ३
 इन्द्रो अस्मे सुमना अस्तु विश्वहा राजा सोमः सुवितस्याध्यैतु नः ।
 यथायथा मित्रधितानि संधुरा सर्वतातिमदिति वृणीमहे ४
 इन्द्र उक्थेन शर्वसा परुर्दधे बृहस्पते प्रतरीतास्यार्युषः ।
 यज्ञो मनुः प्रमतिर्नः पिता हि कमा सर्वतातिमदिति वृणीमहे ५
 इन्द्रस्य नु सुकृतं दैव्यं सहो ऽग्निर्गृहे जरिता मेधिरः कविः ।
 यज्ञश्च भूद्विदथे चारुरन्तम् आ सर्वतातिमदिति वृणीमहे ६
 न वो गुहा चकृम भूरि दुष्कृतं नाविष्टयं वसवो देवहेळनम् ।
 मार्किर्नो देवा अनृतस्य वर्षस आ सर्वतातिमदिति वृणीमहे ७
 अपामीवां सविता साविषन्नचश्वरीय इदप सेधन्त्वद्रयः ।
 ग्रावा यत्र मधुषुदुच्यते बृहदा सर्वतातिमदिति वृणीमहे ८
 ऊर्ध्वो ग्रावा वसवोऽस्तु सोतरि विश्वा द्वेषांसि सनुतर्युयोत ।
 स नो देवः सविता पायुरीड्य आ सर्वतातिमदिति वृणीमहे ९
 ऊर्जं गावो यवसे पीवो अत्तन ऋतस्य याः सदनै कोशे अइध्वे ।
 तनूरेव तन्वो अस्तु भेषजमा सर्वतातिमदिति वृणीमहे १०
 क्रतुप्रावा जरिता शश्वतामव इन्द्र इन्द्रा प्रमतिः सुतावताम् ।
 पूर्णमूर्धर्दिव्यं यस्य सित्तय आ सर्वतातिमदिति वृणीमहे ११
 चित्रस्तै भानुः क्रतुप्रा अभिष्टिः सन्ति स्पृधौ जरणिप्रा अधृष्टाः ।
 रजिष्ठया रज्या पृश्च आ गोस्तूर्षति पर्यग्रं दुवस्युः १२

(१०१) एकोत्तरशततमं सूक्तम्

(१-१२) द्वादशर्चस्यास्य सूक्तस्य सौम्यो बुध ऋषिः । विश्वे देवा ऋत्विजो वा
देवताः । (१-३, ७-८, १०-११) प्रथमादितृचस्य
सप्तम्यष्टमीदशम्येकादशीनामृचाञ्च त्रिष्टुप्, (४, ६) चतुर्थीषष्ठ्योर्गायत्री, (५)
पञ्चम्या बृहती, (६, १२) नवमीद्वादशयोश्च जगती छन्दांसि
उद्धुध्यध्वं समनसः सखायः समग्निमिन्ध्वं बृहवः सनीळाः ।
दधिक्रामग्निमुषसं च देवी मिन्द्रावतोऽवसे नि ह्वये वः १
मुन्द्रा कृणुध्वं धिय आ तनुध्वं नार्वमरित्रपरणीं कृणुध्वम् ।
इष्कृणुध्वमायुधारं कृणुध्वं प्राञ्च यज्ञं प्र णयता सखायः २
युनक्त सीरा वि युगा तनुध्वं कृते योनौ वपतेह बीजम् ।
गिरा च श्रुष्टिः सभरा असन्नो नदीय इत् सृणयः पक्वमेयात् ३
सीरा युञ्जन्ति कवयो युगा वि तन्वते पृथक् । धीरा देवेषु सुम्रया ४
निराहावान् कृणोतन् सं वरत्रा दधातन ।
सिञ्चामहा अवतमुद्रिणं वयं सुषेकमनुपक्षितम् ५
इष्कृताहावमवतं सुवरत्रं सुषेचनम् । उद्रिणं सिञ्चे अक्षितम् ६
प्रीणीताश्चान् हितं जयाथ स्वस्तिवाहं रथमित् कृणुध्वम् ।
द्रोणाहावमवतमश्मचक्र मंसत्रकोशं सिञ्चता नृपाणाम् ७
वृजं कृणुध्वं स हि वौ नृपाणो वर्म सीव्यध्वं बहुला पृथूनि ।
पुरः कृणुध्वमार्यसीरधृष्टा मा वः सुस्रोच्चमसो दृहेता तम् ८
आ वो धियं यज्ञियां वर्त ऊतये देवा देवीं यजतां यज्ञियामिह ।
सा नौ दुहीयद्यवसेव गृत्वी सहस्रधारा पर्यसा मही गौः ९
आ तू षिञ्च हरिमीं द्रोपस्थे वाशीभिस्तक्षताश्मन्मयीभिः ।
परिष्वजध्वं दशं कक्ष्याभि रुभे धुरौ प्रति वह्निं युनक्त १०
उभे धुरौ वह्निरापिब्दमानोऽन्तर्योनैव चरति द्विजानिः ।
वनस्पतिं वन आस्थापयध्वं नि षू दधिध्वमखनन्त उत्सम् ११
कपृन्नरः कपृथमुद्घातन चोदयत खुदत् वाजसातये ।
निष्टिग्रयः पुत्रमा च्यावयोतय इन्द्रं सबाध इह सोमपीतये १२

(१०२) द्व्युत्तरशततमं सूक्तम्

(१-१२) द्वादशर्चस्यास्य सूक्तस्य भार्ग्यश्चो मुद्गल ऋषिः । दुग्ण इन्द्रो वा देवता ।

(१, ३, १२) प्रथमातृतीयाद्वादशीनामृचां बृहती, (२, ४-११)

द्वितीयायाश्चतुर्थ्याद्यष्टानाञ्च त्रिष्टुप् छन्दसी

प्र ते रथं मिथूकृतु मिन्द्रोऽवतु धृष्णुया ।
 अस्मिन्नाजौ पुरुहूत श्रवाय्ये धनभक्षेषु नोऽव १
 उत् स्म वातौ वहति वासो अस्या अधिरथं यदजयत् सहस्रम् ।
 रथीरभून्मुद्गलानी गविष्टौ भरै कृतं व्यचेदिन्द्रसेना २
 अन्तर्यच्छ जिघासतो वज्रमिन्द्राभिदासतः ।
 दासस्य वा मघवन्नार्यस्य वा सनुतर्यवया वधम् ३
 उदनो हृदमपिबज्रहृषाणः कूटं स्म तृहदभिमातिमेति ।
 प्र मुष्कभारः श्रवं इच्छमानो ऽजिरं बाहू अभरत् सिषासन् ४
 न्यक्रन्दयन्नुपयन्त एन ममैहयन् वृषभं मध्यं आज्ञेः ।
 तेन सूभर्वं शतवत् सहस्रं गवां मुद्गलः प्रधने जिगाय ५
 ककदवे वृषभो युक्त आसी दवावचीत् सारथिरस्य केशी ।
 दुधैर्युक्तस्य द्रवतः सहानस ऋच्छन्ति ष्मा निष्पदौ मुद्गलानीम् ६
 उत प्रधिमुदहन्नस्य विद्वा नुपायुनग्वंसंगमत्र शिक्तन् ।
 इन्द्र उदावत् पतिमघ्र्याना मरहत पद्याभिः ककुद्यान् ७
 शूनमष्टचफद्वाव्यचरत् कपर्दी वरत्रायां दार्वानह्यमानः ।
 नृम्णानि कृण्वन् ब्रहवे जनाय गाः पस्पशानस्तविषीरधत् ८
 इमं तं पश्य वृषभस्य युञ्जं काष्ठाया मध्ये दुघृणं शयानम् ।
 येन जिगाय शतवत् सहस्रं गवां मुद्गलः पृतनाज्येषु ९
 आरे अघा को न्विश्त्था ददर्श यं युञ्जन्ति तम्वा स्थापयन्ति ।
 नास्मै तृणं नोदकमा भर न्त्युत्तरो धुरो वहति प्रदेदिशत् १०
 परिवृक्तेव पतिविद्यमानट् पीप्याना कूचक्रेणेव सिञ्चन् ।
 एषैष्या चिद्रथ्या जयेम सुमङ्गलं सिनवदस्तु सातम् ११
 त्वं विश्वस्य जगत् श्वक्षुरिन्द्रासि चक्षुषः ।
 वृषा यदाजिं वृषणा सिषाससि चोदयन् वधिणा युजा १२

(१०३) त्र्युत्तरशततमं सूक्तम्

(१-१३) त्रयोदशर्चस्यास्य सूक्तस्यैन्द्रोऽप्रतिरथ ऋषिः । (१-३, ५-११)
 प्रथमादितृचस्य पञ्चम्यादिसप्तर्चाञ्चिन्द्रः, (४) चतुर्थ्या बृहस्पतिः, (१२) द्वादश्या

अप्वा देवी, (१३) त्रयोदश्याश्चेन्द्रो मरुतो वा देवताः । (१-१२)

प्रथमादिद्वादशर्चा त्रिष्टुप्, (१३) त्रयोदश्याश्चानुष्टुप् छन्दसी

आशुः शिशानो वृषभो न भीमो घनाघ्नः क्षोभणश्चर्षणीनाम् ।
संक्रन्दनोऽनिमिष एकवीरः शतं सेना अजयत् साकमिन्द्रः १
संक्रन्दनेनानिमिषेण जिष्णुना युत्कारेण दुश्चयवनेन धृष्णुना ।
तदिन्द्रेण जयत् तत् संहध्वं युधौ नर इषुहस्तेन वृष्णा २
स इषुहस्तैः स निषङ्गिभिर्वशी संस्त्रष्टा स युध इन्द्रो गुणेन ।
संसृष्टजित् सौमपा बाहुशर्ध्युश्-ग्रधन्वा प्रतिहिताभिरस्ता ३
बृहस्पते परि दीया रथेन रक्षोहामित्राँ अपुबाधमानः ।
प्रभञ्जन्त्सेनाः प्रमृणो युधा जयन्न्स्माकमेध्यविता रथानाम् ४
बलविज्ञाय स्थवीरः प्रवीरः सहस्वान् वाजी सहमान उग्रः ।
अभिवीरो अभिसत्वा सहोजा जैत्रमिन्द्र रथमा तिष्ठ गोवित् ५
गोत्रभिर्दं गोविदं वज्रबाहुं जयन्तमज्म प्रमृणन्तमोजसा ।
इमं सजाता अनु वीरयध्वं मिन्द्रं सखायो अनु सं रभध्वम् ६
अभि गोत्राणि सहसा गार्हमानो ऽदयो वीरः शतमन्युरिन्द्रः ।
दुश्चयवनः पृतनाषाळयुध्योर्ऽस्माकं सेना अवतु प्र युत्सु ७
इन्द्र आसां नेता बृहस्पतिर्दक्षिणा यज्ञः पुर एतु सोमः ।
देवसेनानामभिभञ्जतीनां जयन्तीनां मरुतो यन्त्वग्रम् ८
इन्द्रस्य वृष्णो वरुणस्य राज्ञ आदित्यानां मरुतां शर्ध उग्रम् ।
महामनसां भुवनच्यवानां घोषो देवानां जयतामुदस्थात् ९
उद्धर्षय मघवन्नार्युधा न्युत् सत्वनां मामकानां मनांसि ।
उद्धृत्रहन् वाजिनां वाजिना न्युद्रथानां जयतां यन्तु घोषाः १०
अस्माकमिन्द्रः समृतेषु ध्वजेष्वस्माकं या इषवस्ता जयन्तु ।
अस्माकं वीरा उत्तरे भवन्त्वस्माँ उ देवा अवता हवेषु ११
अमीषां चित्तं प्रतिलोभयन्ती गृहाणाङ्गान्यप्वे परेहि ।
अभि प्रेहि निर्दह हत्सु शोकै रन्धेनामित्रास्तमसा सचन्ताम् १२
प्रेता जयता नर इन्द्रो वः शर्म यच्छतु ।
उग्रा वः सन्तु बाहवो ऽनाधृष्या यथासथ १३

(१०४) चतुरुत्तरशततमं सूक्तम्

(१-११) एकादशर्चस्यास्य सूक्तस्य वैश्वामित्रोऽष्टक ऋषिः । इन्द्रो देवता । त्रिष्टुप्
छन्दः असावि सोमः पुरुहूत तुभ्यं हरिभ्यां यज्ञमुप याहि तूर्यम् ।
तुभ्यं गिरो विप्रवीरा इयाना दधन्विर इन्द्र पिबा सुतस्य १
अप्सु धूतस्य हरिवः पिबेह नृभिः सुतस्य जठरं पृणस्व ।
मिमिन्नुर्यमद्रय इन्द्र तुभ्यं तेभिर्वर्धस्व मदमुक्थवाहः २
प्रोग्रां पीतिं वृष्णा इयर्मि सत्यां प्रये सुतस्य हर्यश्च तुभ्यम् ।
इन्द्र धेनाभिरिह मादयस्व धीभिर्विश्वाभिः शच्या गृणानः ३
ऊती शचीवस्तव वीर्येण वयो दधाना उशिज ऋतज्ञाः ।
प्रजावदिन्द्र मनुषो दुरोणे तस्थुर्गृणन्तः सधमाद्यासः ४
प्रणीतिभिष्टे हर्यश्च सुष्टोः सुषुम्नस्य पुरुचो जनासः ।
मंहिष्ठामूतिं वितिरे दधानाः स्तोतार इन्द्र तव सूनृताभिः ५
उप ब्रह्माणि हरिवो हरिभ्यां सोमस्य याहि पीतये सुतस्य ।
इन्द्र त्वा यज्ञः क्षममाणमानङ् दाश्वाँ अस्यध्वरस्य प्रकेतः ६
सहस्रवाजमभिमातिषाहं सुतेरणं मघवानं सुवृक्तिम् ।
उप भूषन्ति गिरो अप्रतीत मिन्द्रं नमस्या जरितुः पनन्त ७
सप्तापो देवीः सुरणा अमृक्ता याभिः सिन्धुमतर इन्द्र पूर्भित् ।
नवतिं स्रोत्या नव च स्रवन्ती देवेभ्यो गातुं मनुषे च विन्दः ८
अपो महीरभिर्शस्तेरमुञ्चो ऽजागरास्वधिं देव एकः ।
इन्द्र यास्त्वं वृत्रतूर्ये चकर्थ ताभिर्विश्वायुस्तन्वं पुपुष्याः ९
वीरेण्यः क्रतुरिन्द्रः सुशस्ति रुतापि धेना पुरुहूतमीदृ ।
आर्दयद्वत्रमर्कणोदु लोकं संसाहे शक्रः पृतना अभिष्टिः १०
शुनं हुवैम मघवानमिन्द्रं मस्मिन् भरे नृतमं वाजसातौ ।
शृणवन्तमुग्रमूतये समत्सु घन्तं वृत्राणि संजितं धनानाम् ११

(१०५) पञ्चोत्तरशततमं सूक्तम्

(१-११) एकादशर्चस्यास्य सूक्तस्य कौत्सो दुर्मित्रः सुमित्रो गुणतः, विपर्यस्तनामा
वा ऋषिः । इन्द्रो देवता । (१) प्रथमर्चो गायत्र्युष्णिग्वा, (२, ७)
द्वितीयासप्तम्योः पिपीलिकमध्या, (३-६, ८-१०)
तृतीयादिचतसृणामष्टम्यादितृचस्य चोष्णिक्, (११) एकादश्याश्च त्रिष्टुप् छन्दांसि

कदा वंसो स्तोत्रं हर्यत आव श्मशा रुधद्वाः । दीर्घं सुतं वाताप्याय १
हरी यस्य सुयुजा विव्रता वे र्वन्तानु शेपा । उभा र्जी न केशिना पतिर्दन्
२

अप योरिन्द्रः पापज आ मर्तो न शश्रमाणो बिभीवान् । शुभे यद्युजे
तविषीवान् ३

सचायोरिन्द्रश्चर्कृष आँ उपानसः सपर्यन् । नदयोर्विव्रतयोः शूर इन्द्रः ४
अधि यस्तस्थौ केशवन्ता व्यचस्वन्ता न पुष्ट्यै । वनोति शिप्राभ्यां
शिप्रिणीवान् ५

प्रास्तौदृष्वौजा ऋष्वेभि स्ततन्न शूरः शर्वसा । ऋभुर्न क्रतुभिर्मातरिश्वा ६
वज्रं यश्चक्रे सुहनाय दस्यवे हिरीमशो हिरीमान् । अरुतहनुरद्भुतं न रजः ७
अव नो वृजिना शिशी ह्युचा वनेमानृचः । नाब्रह्मा यज्ञ ऋधग्जोषति त्वे
८

ऊर्ध्वा यत् तै त्रेतिनी भू द्यज्ञस्य धूर्षु सघ्नन् । सजूर्नावं स्वयंसं सचायोः ९
श्रिये ते पृश्नरुपसेचनी भू च्छ्रिये दर्विररेपाः । यया स्वे पात्रे सिञ्चस उत
१०

शतं वा यदसुर्यं प्रति त्वा सुमित्र इत्थास्तौदुर्मित्र इत्थास्तौत् ।
आवो यदस्युहत्यै कुत्सपुत्रं प्रावो यदस्युहत्यै कुत्सवत्सम् ११

षष्ठोऽध्यायः । व० १-२७ ।

(१०६) षडुत्तरशततमं सूक्तम्

(१-११) एकादशर्चस्यास्य सूक्तस्य काश्यपो भूतांश ऋषिः । अश्विनौ देवते ।

त्रिष्टुप् छन्दः

उभा उ नूनं तदिदर्थयेथे वि तन्वाथे धियो वस्त्रापसैव ।
सध्रीचीना यातवे प्रेमजीगः सुदिनेव पृन्न आ तसयेथे १
उष्टारैव फर्वरेषु श्रयेथे प्रायोगेव श्वात्र्या शासुरेथः ।
दूतेव हि ष्ठो यशसा जनेषु मापं स्थातं महिषेवावपानात् २
साक्युजा शकुनस्यैव पन्ना पश्वेव चित्रा यजुरा गमिष्टम् ।
अग्निरिव देवयोर्दीदिवांसा परिज्मानेव यजथः पुरुत्रा ३
आपी वो अस्मे पितरैव पुत्रो ग्रेव रुचा नृपतीव तुर्यै ।
इयैव पुष्ट्यै किरणैव भुज्यै श्रुष्टीवानैव हवमा गमिष्टम् ४

वंसगेव पूष्या शिम्बाता मित्रेव ऋता शतरा शार्तपन्ता ।
 वाजैवोच्चा वयसा घर्म्येष्टा मेषैवेषा संपर्याइ पुरीषा ५
 सूर्यैव जर्भरी तुर्फरीतू नैतोशेव तुर्फरी पर्फरीका ।
 उदन्यजेव जेर्मना मदेरू ता मै जराख्वजरं मरायु ६
 पजेव चर्चरं जारं मरायु क्षद्येवार्थेषु तर्तरीथ उग्रा ।
 ऋभू नापत् खरमज्रा खरज्जु वार्युर्न पर्फरत् क्षयद्रयीणाम् ७
 घर्मेव मधु जठरै सनेरू भगैविता तुर्फरी फारिवारम् ।
 पतरेव चचरा चन्द्रनिर्णिङ्गनं ऋङ्गा मनन्याइ न जग्मी ८
 बृहन्तेव गुम्भरेषु प्रतिष्ठां पादैव गाधं तरते विदाथः ।
 कर्णैव शासुरनु हि स्मराथो ऽशैव नो भजतं चित्रमप्रः ९
 आरङ्गरेव मध्वेरयेथे सारधेव गवि नीचीनबारे ।
 कीनारैव स्वेदमासिष्विदाना क्षामैवोर्जा सूयवसात् संचेथे १०
 ऋध्याम् स्तोमं सनुयाम् वाजमा नो मन्त्रं सरथेहोप यातम् ।
 यशो न पक्वं मधु गोष्वन्त रा भूतांशौ अश्विनोः काममप्राः ११

(१०७) सप्तोत्तरशततमं सूक्तम्

(१-११) एकादशर्चस्यास्य सूक्तस्याङ्गिरसो दिव्य ऋषिः, प्राजापत्या दक्षिणा वा
 ऋषिका । दक्षिणा दक्षिणादातारो वा देवताः । (१-३, ५-११) प्रथमादितृचस्य
 पञ्चम्यादिसप्तर्चाञ्च त्रिष्टुप्, (४) चतुर्थ्याश्च जगती छन्दसी
 आविरभून्महि माघौनमेषां विश्वं जीवं तमसो निरमोचि ।
 महि ज्योतिः पितृभिर्दत्तमागा दुरुः पन्था दक्षिणाया अदर्शि १
 उच्चा दिवि दक्षिणावन्तो अस्थुर्ये अश्वदाः सह ते सूर्येण ।
 हिरण्यदा अमृतत्वं भजन्ते वासोदाः सोम प्र तिरन्त आयुः २
 दैवी पूर्तिर्दक्षिणा देवयुज्या न कवारिभ्यो नहि ते पृणन्ति ।
 अथा नरः प्रयतदक्षिणासो ऽवद्यभिया ब्रहर्वः पृणन्ति ३
 शतधारं वायुमर्कं स्वर्विदं नृचक्षस्ते अभि चक्षते हविः ।
 ये पृणन्ति प्र च यच्छन्ति संगमे ते दक्षिणां दुहते सप्तमातरम् ४
 दक्षिणावान् प्रथमो हूत एति दक्षिणावान् ग्राम्णीरग्रमेति ।
 तमेव मन्ये नृपतिं जनानां यः प्रथमो दक्षिणामाविवाय ५
 तमेव ऋषिं तमु ब्रह्माणमाहु र्यज्ञन्यं सामगामुक्थशासम् ।

स शक्रस्य तन्वो वेद तिस्रो यः प्रथमो दक्षिणया रार्ध ६
दक्षिणाश्वं दक्षिणा गां ददाति दक्षिणा चन्द्रमुत यद्विरणयम् ।
दक्षिणान्नं वनुते यो न आत्मा दक्षिणां वर्म कृणुते विजानन् ७
न भोजा ममूर्न न्यर्थमीयुर्न रिष्यन्ति न व्यथन्ते ह भोजाः ।
इदं यद्विश्वं भुवनं स्वश्चेत्तत् सर्वं दक्षिणैभ्यो ददाति ८
भोजा जिग्युः सुरभिं योनिमग्रे भोजा जिग्युर्वध्वंश् या सुवासाः ।
भोजा जिग्युरन्तःपेयं सुराया भोजा जिग्युर्ये अहूताः प्रयन्ति ९
भोजायाश्वं सं मृजन्त्याशुं भोजायास्ते कन्याः शुभमाना ।
भोजस्येदं पुष्करिणीव वेश्म परिष्कृतं देवमानेव चित्रम् १०
भोजमश्वाः सुष्ठुवाहो वहन्ति सुवृद्रथो वर्तते दक्षिणायाः ।
भोजं देवासोऽवता भरेषु भोजः शत्रून्समनीकेषु जेता ११

(१०८) अष्टोत्तरशततमं सूक्तम्

(१-११) एकादशर्चस्यास्य सूक्तस्य (१, ३, ५, ७, ९)

प्रथमातृतीयापञ्चमीसप्तमीनवमीनामृचां पणयोऽसुरा ऋषयः, (२, ४, ६, ८, १०-
११) द्वितीयाचतुर्थीषष्ठ्यष्टमीदशम्येकादशीनाञ्च सरमा ऋषिका । (१, ३, ५, ७,
९) प्रथमातृतीयापञ्चमीसप्तमीनवमीनामृचां सरमा, (२, ४, ६, ८, १०-११)

द्वितीयाचतुर्थीषष्ठ्यष्टमीदशम्येकादशीनाञ्च पणयो देवताः । त्रिष्टुप् छन्दः

किमिच्छन्ती सरमा प्रेदमानड् दूरे ह्यध्वा जगुरिः पराचैः ।
कास्मेहिंतिः का परितक्म्यासीत् कथं रसाया अतरः पर्यासि १
इन्द्रस्य दूतीरिषिता चरामि मह इच्छन्ती पणयो निधीन् वः ।
अतिष्कदो भियसा तन्न आवत् तथा रसाया अतरं पर्यासि २
कीदृङ्ङिन्द्रः सरमे का दृशीका यस्येदं दूतीरसरः पराकात् ।
आ च गच्छान्मित्रमेना दधामाऽथा गवां गोपतिर्नो भवाति ३
नाहं तं वैद दभ्यं दभत् स यस्येदं दूतीरसरं पराकात् ।
न तं गूहन्ति स्रवतो गभीरा हता इन्द्रेण पणयः शयध्वे ४
इमा गावः सरमे या ऐच्छः परि दिवो अन्तान् सुभगे पतन्ती ।
कस्त एना अवं सृजादयुध्व्यु तास्माकमायुधा सन्ति तिग्मा ५
असेन्या वः पणयो वचास्य निषव्यास्तन्वः सन्तु पापीः ।
अर्धृष्टो व एत्वा अस्तु पन्था बृहस्पतिर्व उभया न मृळात् ६

अयं निधिः संरमे अद्रिबुध्नो गोभिरश्वैर्भिर्वसुभिर्नृष्टः ।
 रक्षन्ति तं पणयो ये सुगोपा रेकु पदमलकमा जगन्थ ७
 एह गमन्नृषयः सोमशिता अयास्यो अङ्गिरसो नवग्वाः ।
 त एतमूर्ध्वं वि भजन्त गोना मथैतद्वचः पणयो वमन्नित् ८
 एवा च त्वं संरम आजगन्थ प्रबाधिता सहसा दैव्येन ।
 स्वसारं त्वा कृण्वै मा पुनर्गा अप ते गवां सुभगे भजाम ९
 नाहं वैद भ्रातृत्वं नो स्वसृत्व मिन्द्रो विदुरङ्गिरसश्च घोराः ।
 गोकामा मे अच्छदयन् यदाय मपात इत पणयो वरीयः १०
 दूरमित पणयो वरीय उद्गावो यन्तु मिनतीऋतेन ।
 बृहस्पतिर्या अविन्दन्निगूळहाः सोमो ग्रावाण ऋषयश्च विप्राः ११

(१०६) नवोत्तरशततमं सूक्तम्

(१-७) सप्तर्चस्यास्य सूक्तस्य जुहूर्नाम्नी ब्रह्मवादिनी ब्रह्मजाया ऋषिका, ब्राह्म ऊर्ध्वनाभा वा ऋषिः । विश्वे देवा देवताः । (१-५) प्रथमादिपञ्चर्चा त्रिष्टुप्,

(६-७) षष्ठीसप्तम्योश्चानुष्टुप् छन्दसी

तैऽवदन् प्रथमा ब्रह्मकिल्बिषे ऽकूपारः सलिलो मातरिश्वा ।
 वीळुहंरास्तप उग्रो मयोभू रापो देवीः प्रथमजा ऋतेन १
 सोमो राजा प्रथमो ब्रह्मजायां पुनः प्रायच्छदहणीयमानः ।
 अन्वर्तिता वरुणो मित्र आसी दग्निर्होता हस्तगृह्या निनाय २
 हस्तैर्नैव ग्राह्य आधिरस्या ब्रह्मजायेयमिति चेदवोचन् ।
 न दूतार्य प्रह्ये तस्थ एषा तथा राष्ट्रं गुपितं क्षत्रियस्य ३
 देवा एतस्यामवदन्त पूर्वे सप्तऋषयस्तपसे ये निषेदुः ।
 भीमा जाया ब्राह्मणस्योपनीता दुर्धा दधाति परमे व्योमन् ४
 ब्रह्मचारी चरति वेविषद्विषः स देवानां भवत्येकमङ्गम् ।
 तेन जायामन्वविन्दद्बृहस्पतिः सोमैर्न नीतां जुहंश् न देवाः ५
 पुनर्वै देवा अददुः पुनर्मनुष्या उत ।
 राजानः सत्यं कृण्वाना ब्रह्मजायां पुनर्ददुः ६
 पुनर्दाय ब्रह्मजायां कृत्वी देवैर्निकिल्बिषम् ।
 ऊर्जं पृथिव्या भक्त्वायौ रुगायमुपासते ७

(११०) दशोत्तरशततमं सूक्तम्

(१-११) एकादशर्चस्यास्य सूक्तस्य भार्गवो जमदग्निर्जामदग्र्यो रामो वा ऋषिः ।
(१) प्रथमर्च इध्मः समिद्धो वाग्निः, (२) द्वितीयायास्तनूनपात्, (३) तृतीयाया
इळः, (४) चतुर्थ्या बर्हिः, (५) पञ्चम्या देवीर्द्वारः, (६) षष्ठ्या उषासानक्ता,
(७) सप्तम्या दैव्यौ होतारौ प्रचेतसौ, (८) अष्टम्यास्तिस्त्रो देव्यः
सरस्वतीळाभारत्यः, (९) नवम्यास्त्वष्टा, (१०) दशम्या वनस्पतिः, (११)

एकादश्याश्च स्वाहाकृत्यो देवताः । त्रिष्टुप् छन्दः

समिद्धो अद्य मनुषो दुरोणे देवो देवान् यजसि जातवेदः ।
आ च वह मित्रमहश्चिकित्वान् त्वं दूतः क्विरसि प्रचेताः १
तनूनपात् पथ ऋतस्य यानान् मध्वा समञ्जन्त्स्वदया सुजिह्व ।
मन्मानि धीभिरुत यज्ञमृन्धन् दैवत्रा च कृणुह्यध्वरं नः २
आजुह्वान ईड्यो वन्द्यश्चा ऽऽ याह्यग्ने वसुभिः सजोषाः ।
त्वं देवानामसि यह्व होता स एनान् यक्षीषितो यजीयान् ३
प्राचीनं बर्हिः प्रदिशां पृथिव्या वस्तोरस्या वृज्यते अग्ने अह्वाम् ।
व्यु प्रथते वितरं वरीयो देवेभ्यो अदितये स्योनम् ४
व्यर्चस्वतीरुर्विया वि श्रयन्तां पतिभ्यो न जनयः शुम्भमानाः ।
देवीर्द्वारो बृहतीर्विश्वमिन्वा देवेभ्यो भवत सुप्रायणाः ५
आ सुष्वयन्ती यजते उपाके उषासानक्ता सदतां नि योनौ ।
दिव्ये योषणे बृहती सुरुक्मे अधि श्रियं शुक्रपिशं दधाने ६
दैव्या होतारा प्रथमा सुवाचा मिमाना यज्ञं मनुषो यजध्वै ।
प्रचोदयन्ता विदथेषु कारू प्राचीनं ज्योतिः प्रदिशां दिशन्तां ७
आ नो यज्ञं भारती तूर्यमे त्विळां मनुष्वदिह चेतयन्ती ।
तिस्त्रो देवीर्बर्हिरेदं स्योनं सरस्वती स्वपसः सदन्तु ८
य इमे द्यावापृथिवी जनित्री रूपैरपिशद्भुवनानि विश्वा ।
तमद्य होतरिषितो यजीयान् देवं त्वष्टारमिह यक्षि विद्वान् ९
उपावसृज त्मन्यां समञ्जन् देवानां पार्थ ऋतुथा हवींषि ।
वनस्पतिः शमिता देवो अग्निः स्वदन्तु हव्यं मधुना घृतेन १०
सद्यो जातो व्यमिमीत यज्ञं मग्निर्देवानामभवत् पुरोगाः ।
अस्य होतुः प्रदिश्यतस्य वाचि स्वाहाकृतं हविरदन्तु देवाः ११

(१११) एकादशोत्तरशततमं सूक्तम्

(१-१०) दशर्चस्यास्य सूक्तस्य वैरूपोऽष्टादंष्ट्र ऋषिः । इन्द्रो देवता ।

त्रिष्टुप् छन्दः

मनीषिणः प्र भरध्वं मनीषां यथायथा मृतयुः सन्ति नृणाम् ।
 इन्द्रं सत्यैरेरयामा कृतेभिः स हि वीरो गिर्वणस्युर्विदानः १
 ऋतस्य हि सदसो धीतिरद्यौत् सं गांष्ट्यो वृषभो गोभिरानट् ।
 उदतिष्ठत् तविषेणा रवेण महान्ति चित् सं विव्याचा रजांसि २
 इन्द्रः किल श्रुत्या अस्य वैद् स हि जिष्णुः पथिकृत् सूर्याय ।
 आन्मेना कृणवन्नच्युतो भुवद्भोः पतिर्दिवः संनजा अप्रतीतः ३
 इन्द्रो म्हा महतो अर्णवस्य वृतामिनादङ्गिरोभिर्गृणानः ।
 पुरुणिं चिन्नि तताना रजांसि दाधार यो धरुणं सत्यताता ४
 इन्द्रो दिवः प्रतिमानं पृथिव्या विश्वां वेद् सर्वना हन्ति शुष्णाम् ।
 महीं चिद् द्यामातनोत् सूर्येण चास्कम्भं चित् कम्भनेन स्कभीयान् ५
 वज्रेण हि वृत्रहा वृत्रमस्त रदैवस्य शूशुवानस्य मायाः ।
 वि धृष्णो अत्र धृषता जघन्थाऽथाभवो मघवन् ब्राह्मैजाः ६
 सचन्त यदुषसः सूर्येण चित्रामस्य केतवो रामविन्दन् ।
 आ यन्नक्षत्रं ददृशे दिवो न पुनर्यतो नकिरद्धा नु वैद ७
 दूरं किल प्रथमा जग्मुरासा मिन्द्रस्य याः प्रसवे सस्त्रुरापः ।
 क्वं स्विदग्रं क्वं बुध्न आसा मापो मध्यं क्वं वो नूनमन्तः ८
 सृजः सिन्धूरहिना जगसानां आदिदेताः प्र विविज्जे ज्वेन ।
 मुमुक्षमाणा उत या मुमुचे ऽधेदेता न रमन्ते नितित्ताः ९
 सध्रीचीः सिन्धुमुशतीरिवायन् त्सनाञ्जार आरितः पूर्भिदासाम् ।
 अस्तमा ते पार्थिवा वसू न्यस्मे जग्मुः सूनृता इन्द्र पूर्वीः १०

(११२) द्वादशोत्तरशततमं सूक्तम्

(१-१०) दशर्चस्यास्य सूक्तस्य वैरूपो नभःप्रभेदन ऋषिः । इन्द्रो देवता ।

त्रिष्टुप् छन्दः

इन्द्र पिबं प्रतिक्रामं सुतस्यं प्रातःसावस्तव हि पूर्वपीतिः ।
 हर्षस्व हन्तवे शूर शत्रू नुक्थेभिष्टे वीर्यां प्र ब्रवाम १

यस्ते रथो मनसो जवीया नेन्द्र तेन सोमपेयाय याहि ।
 तूयमा ते हरयः प्र द्रवन्तु येभिर्यासि वृषभिर्मन्दमानः २
 हरित्वता वर्चसा सूर्यस्य श्रेष्ठै रूपास्तन्व स्पर्शयस्व ।
 अस्माभिरिन्द्र सखिभिर्हुवानः संधीचीनो मादयस्वा निषद्य ३
 यस्य त्यत् तै महिमानं मदै ष्विमे मही रोदसी नाविविक्ताम् ।
 तदोक आ हरिभिरिन्द्र युक्तैः प्रियेभिर्याहि प्रियमन्नमच्छ ४
 यस्य शश्वत् पपिवाँ इन्द्र शत्रू ननानुकृत्या रणया चकर्थ ।
 स ते पुरंधिं तविषीमियति स ते मदाय सुत इन्द्र सोमः ५
 इदं ते पात्रं सनवित्तमिन्द्र पिबा सोममेना शतक्रतो ।
 पूर्ण आहावो मदिरस्य मध्वो यं विश्व इदभिर्हर्यन्ति देवाः ६
 वि हि त्वामिन्द्र पुरुधा जनासो हितप्रयसो वृषभ ह्यन्ते ।
 अस्माकं ते मधुमत्तमानी मा भुवन्त्सर्वना तेषु हर्य ७
 प्र त इन्द्र पूर्व्याणि प्र नूनं वीर्या वोचं प्रथमा कृतानि ।
 सतीनमन्युरश्रथायो अद्रि सुवेदनामकृणोर्ब्रह्मणे गाम् ८
 नि षु सीद गणपते गणेषु त्वामाहुर्विप्रतमं कवीनाम् ।
 न ऋते त्वत् क्रियते किं चनारे महामर्कं मघवञ्चित्रमर्च ९
 अभिरख्या नौ मघवन् नार्धमानान् त्सखै बोधि वसुपते सखीनाम् ।
 रणं कृधि रणकृत् सत्यशुष्मा ऽभक्ते चिदा भजा राये अस्मान् १०
 दशमोऽनुवाकः । सू० ११३-१२८ ।

(११३) त्रयोदशोत्तरशततमं सूक्तम्

(१-१०) दशरचस्यास्य सूक्तस्य वैरूपः शतप्रभेदन ऋषिः । इन्द्रो देवता । (१-

९) प्रथमादिनवर्चा जगती, (१०) दशमयाश्च त्रिष्टुप् छन्दसी

तमस्य द्यावापृथिवी सचैतसा विश्वेभिर्देवैरनु शुष्ममावताम् ।
 यदैत्कृणवानो महिमानमिन्द्रियं पीत्वी सोमस्य क्रतुमाँ अवर्धत १
 तमस्य विष्णुर्महिमानमोजसां ऽशं दधन्वान् मधुनो वि रपशते ।
 देवेभिरिन्द्रौ मघवा सयार्वभि वृत्रं जघन्वाँ अभवद्वरैणयः २
 वृत्रेण यदहिना बिभ्रदायुधा समस्थिथा युधये शंसमाविदे ।
 विश्वे ते अत्रं मरुतः सह त्मना ऽवर्धन्नुग्र महिमानमिन्द्रियम् ३
 जज्ञान एव व्यबाधत् स्पृधः प्रापश्यद्वीरो अभि पौंस्यं रणम् ।

अ॒वृ॒श्चद॒द्रिम॒व॒ स॒स्यदः॑ सृ॒ज द॒स्त॒भ्ना॒न्नाकं॑ स्व॒प॒स्यया॑ पृथु॒म् ४
 आदि॒न्द्रः॑ स॒त्रा त॒विषी॑रपत्यत् वरी॒यो द्यावा॑पृथि॒वी अ॒बा॒धत॑ ।
 अ॒वा॒भर॒द्धृषि॑तो व॒ज्रमा॑य॒सं शे॒वं मि॒त्राय॑ वरु॒णाय॑ दा॒शुषे॑ ५
 इन्द्र॒स्यात्र॑ त॒विषी॑भ्यो वि॒र॒प्शि॒नं ऋ॒घाय॑तो अ॒रं॒हय॑न्त म॒न्यवै॑ ।
 वृ॒त्रं यदु॒ग्रो व्य॑वृ॒श्चदो॑ज॒सा ऽपो॑ बिभ्र॒तं तम॑सा॒ परी॑वृ॒तम् ६
 या वी॒र्या॑णि प्रथ॒मानि॑ क॒र्त्वा महि॑त्वेभि॒र्यत॑मानौ॒ समी॑यतुः ।
 ध्वा॒न्तं तमो॑ऽव॒ दध्व॑से ह॒त इन्द्रो॑ म॒हा पूर्॒वहू॑तावपत्यत् ७
 विश्वे॑ दे॒वासो॑ अ॒ध वृ॒ष्या॑नि॒ ते ऽव॑र्धय॒न्त्सोम॑वत्या व॒च॒स्यया॑ ।
 र॒द्धं वृ॒त्रमहि॑मिन्द्र॒स्य ह॑न्म॒ना ऽग्नि॑र्न ज॒म्भैस्तृ॑ष्व॒न्नमा॑वयत् ८
 भूरि॑ द॒क्षैभि॑र्व॒चने॑भिर्ऋ॒क्वभिः॑ स॒ख्येभिः॑ स॒ख्यानि॑ प्र वौचत ।
 इन्द्रो॑ धुनिं च॒ चुमु॑रिं च द॒म्भय॑ञ्छ्रद्धाम॒न॒स्या शृ॑णुते द॒भीत॑ये ९
 त्वं पु॒रू॒रया॑ भ॒रा स्व॑श्च॒या येभि॑र्म॒सै नि॒व॒च॒नानि॑ शंसन् ।
 सु॒गेभि॑र्वि॒श्वी दुरि॑ता॒ तरे॑म वि॒दो षु॑ ण उ॒र्विया॑ गा॒धम॑द्य १०

(११४) चतुर्दशोत्तरशततमं सूक्तम्

(१-१०) दशर्चस्यास्य सूक्तस्य वैरूपः सध्रिस्तापसो घर्मो वा ऋषिः । विश्वे देवा देवताः । (१-३, ५-१०) प्रथमादितृचस्य पञ्चम्यादिषडृचाञ्च त्रिष्टुप्, (४)

चतुर्थ्याश्च जगती छन्दसी

घ॒र्मा सम॑न्ता त्रि॒वृ॒तं व्या॑पतु॒ स्तयो॑र्जुष्टि॒ मातरि॑श्वा॒ जगाम॑ ।
 दि॒वस्प॑यो दिधि॒षाणा॑ अ॒वेष॑न् वि॒दुर्दे॑वाः स॒हसा॑मानम॒र्कम् १
 ति॒स्रो दे॒ष्टाय॑ नि॒र्ऋती॑रुपा॒सते॑ दीर्घ॒श्रुतो॑ वि हि जा॒नन्ति॑ व॒ह्ययः॑ ।
 तासां॑ नि चि॒क्युः क॒वयो॑ नि॒दानं॑ परेषु॒ या गुह्यै॑षु वृ॒तेषु॑ २
 चतु॑ष्क॒पर्दा॑ युव॒तिः सु॒पेशा॑ घृ॒तप्र॑तीका व॒युना॑नि व॒स्ते ।
 तस्यां॑ सु॒पर्णा॑ वृष॒णा नि॑ षै॒दतु॑र्यत्र दे॒वा दधि॑रे भा॒ग॒धेय॑म् ३
 एकः॑ सु॒पर्णः॑ स स॒मुद्र॑मा वि॒वेश॑ स इ॒दं विश्वं॑ भु॒वन् वि॑ च॒ष्टे ।
 तं पा॒कै॒न॒ मन॑सापश्य॒मन्ति॑तस्तं मा॒ता रे॑ळिह स उ॒ रेळि॑ह मा॒तरम् ४
 सु॒पर्णं॑ वि॒प्राः क॒वयो॑ व॒चो॑भिरेकं सन्तं बहु॒धा क॑ल्पयन्ति ।
 छन्दा॑सि च॒ दध॑तो अ॒ध्वरे॑षु॒ ग्रहान्त्सो॑म॒स्य मि॑मते द्वाद॒श ५
 षट्त्रिंशांश्च॑ चतु॒रः क॑ल्पय॒न्त श॑छन्दा॑सि च॒ दध॑त आद्वाद॒शम् ।
 यज्ञं॑ वि॒माय॑ क॒वयो॑ मनी॒ष ऋ॑क्सामाभ्यां प्र रथं॑ वर्तयन्ति ६

चतुर्दशान्ये महिमानौ अस्य तं धीरा वाचा प्र णयन्ति सप्त ।
 आप्रानं तीर्थं क इह प्र वोच द्येनं पथा प्रपिबन्ते सुतस्य ७
 सहस्रधा पञ्चदशान्युक्त्वा यावद् द्यावापृथिवी तावदित् तत् ।
 सहस्रधा महिमानः सहस्रं यावद्ब्रह्म विष्टितं तावती वाक् ८
 कश्छन्दसां योगमा वेद् धीरः को धिष्याति प्रति वाचं पपाद ।
 कमृत्विजामष्टमं शूरमाहुर्हरी इन्द्रस्य नि चिकायु कः स्वित् ९
 भूम्या अन्तं पर्येकै चरन्ति रथस्य धूर्षु युक्तासौ अस्थुः ।
 श्रमस्य दायं वि भजन्त्येभ्यो यदा यमो भवति हर्म्ये हितः १०

(११५) पञ्चदशोत्तरशततमं सूक्तम्

(१-६) नवर्चस्यास्य सूक्तस्य वार्षिहव्य उपस्तुत ऋषिः । अग्निर्देवता । (१-७)
 प्रथमादिसप्तर्चा जगती, (८) अष्टम्यास्त्रिष्टुप्, (९) नवम्याश्च शक्वरी छन्दांसि
 चित्र इच्छिशोस्तरुणस्य वृक्षथो न यो मातरावप्येति धातवे ।
 अनूधा यदि जीर्जनदधा च नु ववक्ष सद्यो महि दूत्यंश् चरन् १
 अग्निर्ह नाम धायि दन्नपस्तमः सं यो वना युवते भस्मना दृता ।
 अभिप्रमुरा जुह्वा स्वध्वर इनो न प्रोथमानो यवसे वृषा २
 तं वो विं न द्रुषद देवमन्धेस इन्दुं प्रोथन्तं प्रवपन्तमर्णवम् ।
 आसा वह्निं न शोचिषा विरप्शिन् महिव्रतं न सरजन्तमध्वनः ३
 वि यस्य ते जयसानस्याजर धक्षोर्न वाताः परि सन्त्यच्युताः ।
 आ रणवासो युयुधयो न सत्वानं त्रितं नशन्त प्र शिषन्त इष्टयै ४
 स इदग्निः कण्वतमः कण्वसखा ऽर्यः परस्यान्तरस्य तरुषः ।
 अग्निः पातु गृणतो अग्निः सूरी नग्निर्ददातु तेषामवो नः ५
 वाजिन्तमाय सहस्रसे सुपित्र्य तृषु च्यवानो अनु जातवेदसे ।
 अनुद्रे चिद्यो धृषता वरं सते महिन्तमाय धन्वनेदविष्यते ६
 एवाग्निर्मतैः सह सूरिभिर्वसुः ष्टवे सहसः सूनरो नृभिः ।
 मित्रासो न ये सुधिता ऋतायवो द्यावो न द्युमैरभि सन्ति मानुषान् ७
 ऊर्जा नपात् सहसावन्निति त्वो पस्तुतस्य वन्दते वृषा वाक् ।
 त्वां स्तोषाम् त्वया सुवीरा द्राघीय आयुः प्रतरं दधानाः ८
 इति त्वाग्ने वृष्टिहव्यस्य पुत्रा उपस्तुतास ऋषयोऽवोचन् ।
 तांश्च पाहि गृणतश्च सूरीन् वषड्वषळित्यूध्वासौ अनक्षन् नमो नम्

इत्यूर्ध्वासौ अनक्षन् ६

(११६) षोडशोत्तरशततमं सूक्तम्

(१-६) नवर्चस्यास्य सूक्तस्य स्थौरोऽग्निपुतोऽग्निपुपो वा ऋषिः । इन्द्रो देवता ।

त्रिष्टुप् छन्दः

पिबा सोमं महत इन्द्रियायु पिबा वृत्रायु हन्तवे शविष्ठ ।
 पिब राये शर्वसे हूयमानः पिब मध्वस्तृपदिन्द्रा वृषस्व १
 अस्य पिब क्षुमतः प्रस्थितस्येन्द्र सोमस्य वरमा सुतस्य ।
 स्वस्तिदा मनेसा मादयस्वाऽर्वाचीनो रेवते सौभगाय २
 ममत्तु त्वा दिव्यः सोमं इन्द्र ममत्तु यः सूयते पार्थिवेषु ।
 ममत्तु येन वरिवश्चकथं ममत्तु येन निरिणासि शत्रून् ३
 आ द्विबर्हा अमिनो यात्विन्द्रो वृषा हरिभ्यां परिषिक्तमन्धः ।
 गव्या सुतस्य प्रभृतस्य मध्वः सत्रा खेदामरुशहा वृषस्व ४
 नि तिग्मानि भ्राशयन् भ्राश्या न्यव स्थिरा तनुहि यातुजूनाम् ।
 उग्राय ते सहो बलं ददामि प्रतीत्या शत्रून् विगृहेषु वृश्च ५
 व्यर्श्य इन्द्र तनुहि श्रवांस्यो जः स्थिरेव धन्वनोऽभिमातीः ।
 अस्मद्रयगवावृधानः सहोभि रनिभृष्टस्तन्वं वावृधस्व ६
 इदं हविर्मघवन् तुभ्यं रातं प्रति सम्राळहणानो गृभाय ।
 तुभ्यं सुतो मघवन् तुभ्यं पक्वोऽर्द्धीन्द्र पिब च प्रस्थितस्य ७
 अर्द्धीन्द्र प्रस्थितेमा हवींषि चनो दधिष्व पचतोत सोमम् ।
 प्रयस्वन्तः प्रति हर्यामसि त्वा सत्याः सन्तु यजमानस्य कामाः ८
 प्रेन्द्राग्निभ्यां सुवचस्यामियमि सिन्धाविव प्रेरयं नार्वमकैः ।
 अया इव परि चरन्ति देवा ये अस्मभ्यं धनुदा उद्भिदश्च ९

(११७) सप्तदशोत्तरशततमं सूक्तम्

(१-६) नवर्चस्यास्य सूक्तस्याङ्गिरसो भिक्षुर्ऋषिः । धनान्नदानं देवता । (१-२)

प्रथमाद्वितीययोर्ऋचोर्जगती, (३-६) तृतीयादिसप्तानाञ्च त्रिष्टुप् छन्दसी

न वा उ देवाः क्षुधमिद्धं ददु रूताशितमुप गच्छन्ति मृत्यवः ।
 उतो रयिः पूणतो नोप दस्य त्युतापूणन् मर्दितारं न विन्दते १
 य आध्राय चकमानाय पित्वोऽन्वान्तसन् रफितायोपजग्मुषे ।

स्थिरं मनः कृणुते सेवते पुरो तो चित् स मर्डितारं न विन्दते २
स इन्द्रो जो यो गृहवे ददात्यन्नकामाय चरते कृशाय ।
अरमस्मै भवति यामहूता उतापरीषु कृणुते सखायम् ३
न स सखा यो न ददाति सख्यै सचाभुवे सचमानाय पित्वः ।
अपास्मात् प्रेयान्न तदोकौ अस्ति पृणन्तमन्यमरणं चिदिच्छेत् ४
पृणीयादिन्नाधमानाय तव्यान् द्राघीयांसमनु पश्येत् पन्थाम् ।
ओ हि वर्तन्ते रथ्यैव चक्रा ऽन्यमन्यमुप तिष्ठन्त रायः ५
मोघमन्नं विन्दते अप्रचेताः सत्यं ब्रवीमि वध इत् स तस्य ।
नार्यमणं पुष्यति नो सखायं केवलाघो भवति केवलादी ६
कृषन्नित् फाल आशितं कृणोति यन्नध्वानमप वृङ्के चरित्रैः ।
वदन् ब्रह्मावदतो वनीयान् पृन्नापिरपृणन्तमभि ष्यात् ७
एकपाद्भूयो द्विपदो वि चक्रमे द्विपात् त्रिपादमभ्यैति पश्चात् ।
चतुष्पादेति द्विपदामभिस्वरे संपश्यन् पङ्कीरुपतिष्ठमानः ८
समौ चिद्धस्तौ न समं विविष्टः समातरा चिन्न समं दुहाते ।
यमयोश्चिन्न समा वीर्याणि ज्ञाती चित् सन्तौ न समं पृणीतः ९

(११८) अष्टादशोत्तरशततमं सूक्तम्

(१-९) नवर्चस्यास्य सूक्तस्यामहीयव उरुक्षय ऋषिः । रक्षोहाग्निर्देवता ।

गायत्री छन्दः

अग्ने हंसि न्यश्त्रिणं दीद्यन्मर्त्येष्व । स्वे क्षयै शुचिव्रत १
उत्तिष्ठसि स्वाहुतो घृतानि प्रति मोदसे । यत् त्वा स्नुचः समस्थिरन् २
स आहुतो वि रोचते ऽग्निरीळैन्यौ गिरा । स्नुचा प्रतीकमज्यते ३
घृतेनाग्निः समज्यते मधुप्रतीक आहुतः । रोचमानो विभावंसुः ४
जरमाणः समिध्यसे देवेभ्यो हव्यवाहन । तं त्वा हवन्त मर्त्याः ५
तं मर्ता अमर्त्यं घृतेनाग्निं संपर्यत । अदाभ्यं गृहपतिम् ६
अदाभ्येन शोचिषा ऽग्ने रक्षस्त्वं देह । गोपा ऋतस्य दीदिहि ७
स त्वमग्ने प्रतीकेन प्रत्यौष यातुधान्यः । उरुक्षयैषु दीद्यत् ८
तं त्वा गीर्भिरुरुक्षया हव्यवाहं समीधिरे । यजिष्ठं मानुषे जने ९

(११९) एकोनविंशत्युत्तरशततमं सूक्तम्

(१-१३) त्रयोदशर्चस्यास्य सूक्तस्यैन्द्रो लब ऋषिः । आत्मा देवता ।

गायत्री छन्दः

इति वा इति मे मनो गामश्च सनुयामिति । कुवित् सोमस्यापामिति १
प्र वाता इव दोधत् उन्मा पीता अयंसत । कुवित् सोमस्यापामिति २
उन्मा पीता अयंसत् रथमश्वा इवाशवः । कुवित् सोमस्यापामिति ३
उप मा मतिरस्थित वाश्रा पुत्रमिव प्रियम् । कुवित् सोमस्यापामिति ४
अहं तष्टैव वन्धुरं पर्यचामि हृदा मतिम् । कुवित् सोमस्यापामिति ५
नहि मे अक्षिपच्चना ऽच्छान्तसुः पञ्च कृष्टयः । कुवित् सोमस्यापामिति ६
नहि मे रोदसी उभे अन्यं पक्षं चन प्रति । कुवित् सोमस्यापामिति ७
अभि द्यां महिना भुव मभीरेमां पृथिवीं महीम् । कुवित् सोमस्यापामिति ८

हन्ताहं पृथिवीमिमां नि दधानीह वेह वा । कुवित् सोमस्यापामिति ९
ओषमित् पृथिवीमहं जङ्घनानीह वेह वा । कुवित् सोमस्यापामिति १०
दिवि मे अन्यः पक्षोरे ऽधो अन्यमचीकृषम् । कुवित् सोमस्यापामिति ११
अहमस्मि महामहो ऽभिनभ्यमुदीषितः । कुवित् सोमस्यापामिति १२
गृहो याम्यरकृतो देवेभ्यो हव्यवाहनः । कुवित् सोमस्यापामिति १३
सप्तमोऽध्यायः । व० १-३० ।

(१२०) विंशत्युत्तरशततमं सूक्तम्

(१-६) नवर्चस्यास्य सूक्तस्याथर्वणो बृहदिव ऋषिः । इन्द्रो देवता ।

त्रिष्टुप् छन्दः

तदिदास भुवनेषु ज्येष्ठं यतो जज्ञ उग्रस्त्वेषनृम्णः ।
सद्यो जज्ञानो नि रिणाति शत्रू ननु यं विश्वे मदन्त्यूमाः १
वावृधानः शवसा भूयोजाः शत्रुदासाय भियसं दधाति ।
अव्यनच्च व्यनच्च सस्त्रि सं ते नवन्त प्रभृता मदेषु २
त्वे क्रतुमपि वृञ्जन्ति विश्वे द्विर्यदेते त्रिर्भवन्त्यूमाः ।
स्वादोः स्वादीयः स्वादुना सृजा स मदः सु मधु मधुनाभि यौधीः ३
इति चिद्धि त्वा धना जयन्तं मदमदे अनुमदन्ति विप्राः ।
ओजीयो धृष्णो स्थिरमा तनुष्व मा त्वा दभन् यातुधाना दुरेवाः ४
त्वया वयं शाशद्यहे रणेषु प्रपश्यन्तो युधेन्यानि भूरि ।

चोदयामि त् आरुधा वचोभिः सं ते शिशामि ब्रह्मणा वयांसि ५
स्तुषेय्यं पुरुवर्षसमृभ्वं मिनतममाप्तयमाप्तयानाम् ।
आ दर्षते शर्वसा सप्त दानून् प्र साक्षते प्रतिमानानि भूरि ६
नि तद्दधिषेऽवरं परं च यस्मिन्नाविथावसा दुरोणे ।
आ मातरां स्थापयसे जिगूत् अत इनोषि कर्वरा पुरूणि ७
इमा ब्रह्म बृहदिवो विवृक्तीन्द्राय शूषमग्रियः स्वर्षाः ।
महो गोत्रस्य क्षयति स्वराजो दुरश्च विश्वा अवृणोदप स्वाः ८
एवा महान् बृहदिवो अथर्वा ऽवोचत् स्वां तन्वश्मिन्द्रमेव ।
स्वसारो मातरिभ्वरीररिप्रा हिन्वन्ति च शर्वसा वर्धयन्ति च ९

(१२१) एकविंशत्युत्तरशततमं सूक्तम्

(१-१०) दशर्चस्यास्य सूक्तस्य प्राजापत्यो हिरण्यगर्भ ऋषिः । कः (प्रजापतिः)

देवता । त्रिष्टुप् छन्दः

हिरण्यगर्भः समवर्तताग्रे भूतस्य जातः पतिरेक आसीत् ।
स दाधार पृथिवीं द्यामुतेमां कस्मै देवाय हविषा विधेम १
य आत्मदा बलदा यस्य विश्वं उपासते प्रशिषं यस्य देवाः ।
यस्य छायामृतं यस्य मृत्युः कस्मै देवाय हविषा विधेम २
यः प्राणतो निमिषतो मेहित्वै क इद्राजा जगतो बभूव ।
य ईशै अस्य द्विपदश्चतुष्पदः कस्मै देवाय हविषा विधेम ३
यस्येमे हिमवन्तो महित्वा यस्य समुद्रं रसया सहाहुः ।
यस्येमाः प्रदिशो यस्य ब्राहू कस्मै देवाय हविषा विधेम ४
येन द्यौरुग्रा पृथिवी च दृळहा येन स्वः स्तभितं येन नाकः ।
यो अन्तरिक्षे रजसो विमानः कस्मै देवाय हविषा विधेम ५
यं क्रन्दसी अवसा तस्तभाने अभ्यैक्षेतां मनसा रेजमाने ।
यत्राधि सूर उदितो विभाति कस्मै देवाय हविषा विधेम ६
आपो ह यद्ब्रह्मतीर्विश्वमायन् गर्भं दधाना जनयन्तीरग्निम् ।
ततो देवानां समवर्ततासुरेकः कस्मै देवाय हविषा विधेम ७
यश्चिदापो महिना पर्यपश्यद् दक्षं दधाना जनयन्तीर्यज्ञम् ।
यो देवेष्वधि देव एक आसीत् कस्मै देवाय हविषा विधेम ८
मा नो हिंसीञ्जनिता यः पृथिव्या यो वा दिवं सत्यधर्मा जजान ।

यश्चापञ्चन्द्रा बृहतीर्जजान् कस्मै देवाय हविषा विधेम ६
प्रजापते न त्वदेतान्यन्यो विश्वा जातानि परि ता बभूव ।
यत् कामास्ते जुहुमस्तन्नो अस्तु वयं स्याम पतयो रयीणाम् १०

(१२२) द्वाविंशत्युत्तरशततमं सूक्तम्

(१-८) अष्टर्चस्यास्य सूक्तस्य वासिष्ठश्चित्रमहा ऋषिः । अग्निर्देवता । (१, ५)
प्रथमापञ्चम्योर्ऋचोस्त्रिष्टुप्, (२-४, ६-८) द्वितीयादितृचस्य षष्ठ्यादितृचस्य च
जगती छन्दसी

वसुं न चित्रमहसं गृणीषे वामं शेवमतिथिमद्विषेणयम् ।
स रासते शरुधौ विश्वधायसो ऽग्निर्होता गृहपतिः सुवीर्यम् १
जुषाणो अग्ने प्रति हर्य मे वचो विश्वानि विद्वान् वयुनानि सुक्रतो ।
घृतनिर्णिग्ब्रह्मणे गातुमेरय तव देवा अजनयन्ननु व्रतम् २
सप्त धामानि परियन्नमत्यो दाशद्वाशुषे सुकृते मामहस्व ।
सुवीरेण रयीणाग्ने स्वाभुवा यस्त आनट् समिधा तं जुषस्व ३
यज्ञस्य केतुं प्रथमं पुरोहितं हविष्मन्त ईळते सप्त वाजिनम् ।
शृणवन्तमग्निं घृतपृष्ठमुक्षणं पृणन्तं देवं पृणते सुवीर्यम् ४
त्वं दूतः प्रथमो वरैरयः स ह्यमानो अमृताय मत्स्व ।
त्वां मर्जयन् मरुतो दाशुषौ गृहे त्वां स्तोमैर्भिर्भृगवो वि रुरुचुः ५
इषं दुहन्त्सुदुर्घा विश्वधायसं यज्ञप्रिये यज्ञमानाय सुक्रतो ।
अग्ने घृतस्नुस्त्रिर्ऋतानि दीद्यद्द्विर्तिर्यज्ञं परियन्त्सुक्रतूयसे ६
त्वामिदस्या उषसो व्युष्टिषु दूतं कृणवाना अयजन्त मानुषाः ।
त्वां देवा महयाय्याय वावृधु राज्यमग्ने निमृजन्तौ अध्वरे ७
नि त्वा वसिष्ठा अहन्त वाजिनं गृणन्तौ अग्ने विदथेषु वेधसः ।
रायस्पोषं यज्ञमानेषु धारय यूयं पात स्वस्तिभिः सदा नः ८

(१२३) त्रयोविंशत्युत्तरशततमं सूक्तम्

(१-८) अष्टर्चस्यास्य सूक्तस्य भार्गवो वेन ऋषिः । वेनो देवता । त्रिष्टुप् छन्दः
अयं वेनश्चौदयत् पृश्निगर्भा ज्योतिर्जरायू रजसो विमाने ।
इममपां संगमे सूर्यस्य शिशं न विप्रा मतिभी रिहन्ति १
समुद्रादूर्मिमुदियति वेनो नभोजाः पृष्ठं हर्यतस्य दर्शि ।

ऋतस्य सानावधिं विष्टपि भ्राट् समानं योनिमभ्यनूषतु वाः २
समानं पूर्वोरभि वावशाना स्तिष्ठन् वत्सस्य मातरः सनीळाः ।
ऋतस्य सानावधिं चक्रमाणा रिहन्ति मध्वो अमृतस्य वाणीः ३
जानन्तो रूपमकृपन्तु विप्रा मृगस्य घोषं महिषस्य हि गमन् ।
ऋतेन यन्तो अधि सिन्धुमस्थुर्विदद्मध्वो अमृतानि नाम ४
अप्सरा जारमुपसिष्मियाणा योषा बिभर्ति परमे व्योमन् ।
चरत् प्रियस्य योनिषु प्रियः सन् त्सीदत् पक्षे हिरण्यये स वेनः ५
नाकै सुपर्णमुप यत् पतन्तं हृदा वेनन्तो अभ्यचक्षत त्वा ।
हिरण्यपक्षं वरुणस्य दूतं यमस्य योनौ शकुनं भुरण्युम् ६
ऊर्ध्वो गन्धर्वो अधि नाकै अस्थात् प्रत्यङ् चित्रा बिभ्रदस्यायुधानि ।
वसानो अत्कं सुरभिं दृशे कं स्वर्णं नाम जनत प्रियाणि ७
द्रुप्सः समुद्रमभि यज्जिगाति पश्यन् गृध्रस्य चक्षसा विधर्मन् ।
भानुः शुक्रेण शोचिषा चकान स्तृतीयै चक्रे रजसि प्रियाणि ८

(१२४) चतुर्विंशत्युत्तरशततमं सूक्तम्

(१-६) नवर्चस्यास्य सूक्तस्य (१, ५-६) प्रथमर्चः

पञ्चम्यादिपञ्चानाञ्चाग्निवरुणसोमाः, (२-४) द्वितीयादितृचस्य चाग्निर्ऋषयः । (१)

प्रथमर्चोऽग्निः, (२-४) द्वितीयादितृचस्याग्नेरात्मा, (५, ७-८)

पञ्चमीसप्तम्यष्टमीनां वरुणः, (६) षष्ठ्याः सोमः, (६) नवम्याश्चेन्द्रो देवताः ।

(१-६, ८-९) प्रथमादिषड्चामष्टमीनवम्योश्च त्रिष्टुप्,

(७) सप्तम्याश्च जगती छन्दसी

इमं नो अग्र उप यज्ञमेहि पञ्चयामं त्रिवृतं सप्ततन्तुम् ।
असौ हव्यवाळुत नः पुरोगा ज्योगेव दीर्घं तम् आशयिष्ठाः १
अदेवाद्देवः प्रचता गुहा यन् प्रपश्यमानो अमृतत्वमैमि ।
शिवं यत् सन्तमशिवो जहामि स्वात् सख्यादरणीं नाभिमेमि २
पश्यन्नन्यस्या अतिथिं वयायां ऋतस्य धाम् वि मिमे पुरूणि ।
शंसामि पित्रे असुराय शेवं मयज्ञियाद्यज्ञियं भागमैमि ३
ब्रह्मीः समा अकरमन्तरस्मिन्निन्द्रं वृणानः पितरं जहामि ।
अग्निः सोमो वरुणस्ते च्यवन्ते पर्यावर्द्राष्टं तदेवाम्यायन् ४
निर्माया उ त्ये असुरा अभूवन् त्वं च मा वरुण कामयासे ।

ऋतेन राजन्नृतं विविञ्चन् मम राष्ट्रस्याधिपत्यमेहि ५
 इदं स्वरिदमिदास वाममयं प्रकाश उर्वशन्तरिक्षम् ।
 हनाव वृत्रं निरेहि सोम हविष्ठा सन्त हविषा यजाम ६
 कविः कवित्वा दिवि रूपमासज् दप्रभूती वरुणो निरपः सृजत् ।
 क्षेमं कृणवाना जनयो न सिन्धवस्ता अस्य वर्णं शुचयो भरिभ्रति ७
 ता अस्य ज्येष्ठमिन्द्रियं सचन्ते ता ईमा क्षेति स्वधया मदन्तीः ।
 ता ई विशो न राजानं वृणाना बीभत्सुवो अप वृत्रादतिष्ठन् ८
 बीभत्सूनां सयुजं हंसमाह रपां दिव्यानां सख्ये चरन्तम् ।
 अनुष्टुभमनु चर्चुर्यमाण मिन्द्रं नि चिक्युः क्वयौ मनीषा ९

(१२५) पञ्चविंशत्युत्तरशततमं सूक्तम्

(१-८) अष्टर्चस्यास्य सूक्तस्याम्भृणी वागृषिका । आत्मा देवता । (१, ३-८)

प्रथमर्चस्तृतीयादिषण्णाञ्च त्रिष्टुप्, (२) द्वितीयायाश्च जगती छन्दसी

अहं रुद्रेभिर्वसुभिश्चरा म्यहमादित्यैरुत विश्वदैवैः ।
 अहं मित्रावरुणोभा बिभर्म्यहमिन्द्राग्नी अहमश्विनोभा १
 अहं सोममाहनसं बिभर्म्यहं त्वष्टारमुत पूषणं भर्गम् ।
 अहं दधामि द्रविणं हविष्मते सुप्राव्येरे यजमानाय सुन्वते २
 अहं राष्ट्रीं संगमनी वसूनां चिकितुषीं प्रथमा यज्ञियानाम् ।
 तां मा देवा व्यदधुः पुरुत्रा भूरिस्थात्रां भूयावेशयन्तीम् ३
 मया सो अन्नमत्ति यो विपश्यति यः प्राणिति य ई शृणोत्युक्तम् ।
 अमन्तवो मां त उप क्षियन्ति श्रुधि श्रुत श्रद्धिवं तै वदामि ४
 अहमेव स्वयमिदं वदामि जुष्टं देवेभिरुत मानुषेभिः ।
 यं कामये तन्तमुग्रं कृणोमि तं ब्रह्माणं तमृषिं तं सुमेधाम् ५
 अहं रुद्राय धनुरा तनोमि ब्रह्मद्विषे शरवे हन्तवा उ ।
 अहं जनाय समदं कृणो म्यहं द्यावापृथिवी आ विवेश ६
 अहं सुवे पितरमस्य मूर्धन्मम् योनिरप्स्वशन्तः समुद्रे ।
 ततो वि तिष्ठे भुवनानु विश्वो तामूं द्यां वर्ष्मणोप स्पृशामि ७
 अहमेव वात इव प्र वाम्या रभमाणा भुवनानि विश्वा ।
 परो दिवा पर एना पृथिव्यै तावती महिना सं बभूव ८

(१२६) षड्विंशत्युत्तरशततमं सूक्तम्

(१-८) अष्टर्चस्यास्य सूक्तस्य शैलूषिः कुल्मलबर्हिषो वामदेव्योहोमुग्वा ऋषिः ।
विश्वे देवा देवताः । (१-७) प्रथमादिसप्तर्चामुपरिष्ठाद्बृहती, (८) अष्टम्याश्च
त्रिष्टुप् छन्दसी

न तमंहो न दुरितं देवासो अष्ट मर्त्यम् ।
सजोषसो यमर्त्यमा मित्रो नयन्ति वरुणो अति द्विषः १
तद्धि वयं वृणीमहे वरुण मित्रार्यमन् ।
येना निरंहसो यूयं पाथ नेथा च मर्त्यमति द्विषः २
ते नूनं नोऽयमूतये वरुणो मित्रो अर्त्यमा ।
नयिष्ठा उ नो नेषणि पर्षिष्ठा उ नः पर्षण्यति द्विषः ३
यूयं विश्वं परि पाथ वरुणो मित्रो अर्त्यमा ।
युष्माकं शर्मणि प्रिये स्याम सुप्रणीतयोऽति द्विषः ४
आदित्यासो अति स्त्रिधो वरुणो मित्रो अर्त्यमा ।
उग्रं मरुद्धी रुद्रं हुवेमे न्द्रमग्निं स्वस्तयेऽति द्विषः ५
नेतार ऊ षु णस्तिरो वरुणो मित्रो अर्त्यमा ।
अति विश्वानि दुरिता राजानश्चर्षणीनामति द्विषः ६
शूनमस्मभ्यमूतये वरुणो मित्रो अर्त्यमा ।
शर्म यच्छन्तु सप्रथं आदित्यासो यदीमहे अति द्विषः ७
यथा ह त्यद्वसवो गौर्यं चित् पदि षिताममुञ्चता यजत्राः ।
एवो ष्वश्स्मन्मुञ्चता व्यंहः प्र तार्यग्ने प्रतरं न आयुः ८

(१२७) सप्तविंशत्युत्तरशततमं सूक्तम्

(१-८) अष्टर्चस्यास्य सूक्तस्य सौभरः कुशिक ऋषिर्भारद्वाजी रात्रिर्वा ऋषिका ।
रात्रिर्देवता । गायत्री छन्दः

रात्री व्यख्यदायती पुरुत्रा देव्यश्क्षभिः । विश्वा अधि श्रियोऽधित १
ओर्वप्रा अमर्त्या निवतो देव्युश्द्वतः । ज्योतिषा बाधते तमः २
निरु स्वसारमस्कृतो षसं देव्यायती । अपेदु हासते तमः ३
सा नो अद्य यस्या वयं नि ते यामन्नविद्धमहि । वृद्धे न वसति वयः ४
नि ग्रामासो अविद्धत नि पद्वन्तो नि पद्धिणः । नि श्येनासश्चिदर्थिनः ५
यावया वृक्यं वृकं यवय स्तेनमूर्म्ये । अथा नः सुतरा भव ६

उप मा पेपिशत् तमः कृष्णं व्यक्तमस्थित । उष ऋणेव यातय ७
उप ते गा इवाकरं वृणीष्व दुहितर्दिवः । रात्रि स्तोमं न जिग्युषे ८

(१२८) अष्टाविंशत्युत्तरशततमं सूक्तम्

(१-६) नवर्चस्यास्य सूक्तस्याङ्गिरसो विहव्य ऋषिः । विश्वे देवा देवताः । (१-
८) प्रथमाद्यष्टर्चा त्रिष्टुप्, (६) नवम्याश्च जगती छन्दसी

ममाग्ने वर्चो विह्वेष्वस्तु वयं त्वेन्धानास्तन्वं पुषेम ।
मह्यं नमन्तां प्रदिशश्चतस्त्रस्त्वयाध्यक्षेण पृतना जयेम १
मम देवा विह्वे संन्तु सर्व इन्द्रवन्तो मरुतो विष्णुरग्निः ।
ममान्तरिक्षमुरुलोकमस्तु मह्यं वातः पवतां कामे अस्मिन् २
मयि देवा द्रविणमा यजन्तां मय्याशीरस्तु मयि देवहृतिः ।
दैव्या होतारो वनुषन्तु पूर्वे ऽरिष्टाः स्याम तन्वा सुवीराः ३
मह्यं यजन्तु मम यानि हव्या ऽऽकूतिः सत्या मर्नसो मे अस्तु ।
एनो मा नि गां कतमच्चनाहं विश्वे देवासो अधि वोचता नः ४
देवीः षळ्वीरुरु नः कृणोत विश्वे देवास इह वीरयध्वम् ।
मा हास्महि प्रजया मा तनूभिर्मा रंधाम द्विषते सौम राजन् ५
अग्ने मनुं प्रतिनुदन् परेषा मदब्धो गोपाः परि पाहि नस्त्वम् ।
प्रत्यञ्चो यन्तु निगुतः पुनस्ते ऽऽमैषां चित्तं प्रबुधां वि नेशत् ६
धाता धातृचफट्टणां भुवनस्य यस्पति देवं त्रातारमभिमातिषाहम् ।
इमं यज्ञमश्विनोभा बृहस्पति देवाः पान्तु यजमानं न्यथात् ७
उरुव्यचा नो महिषः शर्म यंस दुस्मिन् हवे पुरुहूतः पुरुक्षुः ।
स नः प्रजायै हर्यश्च मृळयेन्द्र मा नो रीरिषो मा परा दाः ८
ये नः सपत्ना अपु ते भवन्त्विन्द्राग्निभ्यामव बाधामहे तान् ।
वसवो रुद्रा आदित्या उपरिस्पृश मोग्रं चेतारमधिराजमक्रन् ९
एकादशोऽनुवाकः । सू० १२६-१५१ ।

(१२९) एकोनत्रिंशदुत्तरशततमं सूक्तम्

(१-७) सप्तर्चस्यास्य सूक्तस्य परमेष्ठी प्रजापतिर्ऋषिः । भाववृत्तं देवता ।

त्रिष्टुप् छन्दः

नासदासीन्नो सदासीत् तदानीं नासीद्रजो नो व्योमा पुरो यत् ।

किमावरीवः कुह कस्य शर्म नमः किमासीद्गहनं गभीरम् १
न मृत्युरासीदमृतं न तर्हि न रात्र्या अहं आसीत् प्रकेतः ।
आनीदवातं स्वधया तदेकं तस्माद्भ्रान्यन्न पुरः किं चनास २
तम आसीत् तमसा गूळहमग्रे ऽप्रकेतं संलिलं सर्वमा इदम् ।
तुच्छेनाभ्वपिहितं यदासीत् तपसस्तन्महिनाजायतैकम् ३
कामस्तदग्रे समवर्तताधि मनसो रेतः प्रथमं यदासीत् ।
सतो बन्धुमसति निरविन्दन् हृदि प्रतीष्या क्वयो मनीषा ४
तिरश्चीनो विततो रश्मिरेषा मधः स्वदासीद्दुपरि स्वदासीत् ।
रेतोधा आसन् महिमान आसन् त्वधा अवस्तात् प्रयतिः पुरस्तात् ५
को अद्वा वेद क इह प्र वोचत् कुत आजाता कुत इयं विसृष्टिः ।
अर्वादेवा अस्य विसर्जनेना ऽथा को वेद यत आबभूव ६
इयं विसृष्टिर्यत आबभूव यदि वा दधे यदि वा न ।
यो अस्याध्यक्षः परमे व्योमन् त्सो अङ्ग वेद यदि वा न वेद ७

(१३०) त्रिंशदुत्तरशततमं सूक्तम्

(१-७) सप्तर्चस्यास्य सूक्तस्य प्राजापत्यो यज्ञ ऋषिः । भाववृत्तं देवता । (१)

प्रथमर्चो जगती, (२-७) द्वितीयादिषण्णाञ्च त्रिष्टुप् छन्दसी

यो यज्ञो विश्वतस्तनुभिस्तत एकशतं देवकर्मभिरायतः ।
इमे वयन्ति पितरो य आययुः प्र व्याप वयेत्यासते तृते १
पुमाँ एनं तनुत् उत् कृणत्ति पुमान् वि तत्रे अधि नाकै अस्मिन् ।
इमे मयूखा उप सेदुरू सदः सामानि चक्रुस्तसराणयोतवे २
कासीत् प्रमा प्रतिमा किं निदान् माज्यं किमासीत् परिधिः क आसीत् ।
छन्दः किमासीत् प्रउगं किमुक्थं यद्देवा देवमयजन्त विश्वे ३
अग्नेर्गायत्र्यभवत् सयुग्वो ष्णिहया सविता सं बभूव ।
अनुष्टुभा सोम उक्थैर्महस्वान् बृहस्पतेर्बृहती वाचमावत् ४
विराणिमत्रावरुणयोरभिशी रिन्द्रस्य त्रिष्टुबिह भागो अहः ।
विश्वान् देवाञ्जगत्या विवेश तेन चाक्लृप् ऋषयो मनुष्याः ५
चाक्लृप्रे तेन ऋषयो मनुष्या यज्ञे जाते पितरो नः पुराणे ।
पश्यन् मन्ये मनसा चक्षसा तान् य इमं यज्ञमयजन्त पूर्वे ६
सहस्तौमाः सहछन्दस आवृतः सहप्रमा ऋषयः सप्त दैव्याः ।

पूर्वेषां पन्थामनुदृश्य धीरां अन्वालेभिरे रथ्योर्न न रश्मीन् ७

(१३१) एकत्रिंशदुत्तरशततमं सूक्तम्

(१-७) सप्तर्चस्यास्य सूक्तस्य काक्षीवतः सुकीर्तिर्ऋषिः । (१-३, ६-७)

प्रथमादितृचस्य षष्ठीसप्तम्योर्ऋचोश्चेन्द्रः, (४-५) चतुर्थीपञ्चम्योश्चाश्विनौ देवताः ।

(१-३, ५-७) प्रथमादितृचस्य पञ्चम्यादितृचस्य च त्रिष्टुप्, (४) चतुर्थ्या

ऋचश्चानुष्टुप् छन्दसी

अपु प्राचं इन्द्र विश्वाँ अमित्रा नपापाचो अभिभूते नुदस्व ।

अपोदीचो अपे शूराधराचं उरौ यथा तव शर्मन् मदम १

कुविदङ्ग यवमन्तो यवं चि द्यथा दान्त्यनुपूर्वं वियूय ।

इहेहैषां कृणुहि भोजनानि ये बर्हिषो नमोवृक्तिं न जग्मुः २

नहि स्थूर्युतथा यातमस्ति नोत श्रवो विविदे संगमेषु ।

गव्यन्त इन्द्रे सख्यायु विप्रा अश्वायन्तो वृषणं वाजयन्तः ३

युवं सुराममश्विना नमुचावासुरे सचा ।

विपिपाना शभस्पती इन्द्रं कर्मस्वावतम् ४

पुत्रमिव पितरावश्विनोभेन्द्रावथुः काव्यैर्दसनाभिः ।

यत् सुरामं व्यपिबः शचीभिः सरस्वती त्वा मघवन्नभिष्णाक् ५

इन्द्रः सुत्रामा स्ववाँ अवीभिः सुमृळीको भवतु विश्ववेदाः ।

बाधतां द्वेषो अभयं कृणोतु सुवीर्यस्य पतयः स्याम ६

तस्य वयं सुमतौ यज्ञियस्याऽपि भद्रे सौमनसे स्याम ।

स सुत्रामा स्ववाँ इन्द्रो अस्मे आराच्चिद् द्वेषः सनुतर्युयोतु ७

(१३२) द्वात्रिंशदुत्तरशततमं सूक्तम्

(१-७) सप्तर्चस्यास्य सूक्तस्य नार्मेधः शकपूत ऋषिः । (१) प्रथमर्चो

द्युभूम्यश्विनः, (२-७) द्वितीयादितृचद्वयस्य च मित्रावरुणौ देवताः । (१)

प्रथमर्चो न्यङ्कुसारिणी, (२, ६) द्वितीयाषष्ठ्योः प्रस्तारपङ्क्तिः, (३-५)

तृतीयादितृचस्य विराड्रूपा, (७) सप्तम्याश्च महासतोबृहती छन्दांसि

ईजानमिद् द्यौर्गूर्तावसु रीजानं भूमिरभि प्रभूषणि ।

ईजानं देवावश्विना वभि सुमैरवर्धताम् १

ता वा मित्रावरुणा धारयत्विती सुषुमेषित्वता यजामसि ।

युवोः क्राणाय सख्यै रभि ष्याम रक्षसः २
 अधा चिन्नु यद्विधिषामहे वा मभि प्रियं रेक्णः पत्यमानाः ।
 दद्वाँ वा यत् पुष्यति रेक्णः सम्वारन् नकिरस्य मघानि ३
 असावन्यो असुर सूयत् द्यौस्त्वं विश्वेषां वरुणासि राजा ।
 मूर्धा रथस्य चाकन् नैतावतैनसान्तकधुक ४
 अस्मिन्स्वेऽतच्छकपूत एनो हिते मित्रे निर्गतान् हन्ति वीरान् ।
 अवोर्वा यद्वात् तनूष्ववः प्रियासु यज्ञियास्वर्वा ५
 युवोर्हि मातादितिर्विचेतसा द्यौर्न भूमिः पर्यसा पुपूतनि ।
 अव प्रिया दिदिष्टन् सूरौ निनित्त रश्मिभिः ६
 युवं ह्यप्रराजावसीदतं तिष्ठद्रथं न धूर्षदं वनर्षदम् ।
 ता नः कणूकयन्ती नृमेधस्तत्रे अंहसः सुमेधस्तत्रे अंहसः ७

(१३३) त्रयस्त्रिंशदुत्तरशततमं सूक्तम्

(१-७) सप्तर्चस्यास्य सूक्तस्य पैजवनः सुदा ऋषिः । इन्द्रो देवता । (१-३)
 प्रथमादितृचस्य शक्वरी, (४-६) चतुर्थ्यादितृचस्य महापङ्क्तिः, (७) सप्तम्यृचश्च
 त्रिष्टुप् छन्दांसि

प्रो ष्वस्मै पुरोरथ मिन्द्राय शूषमर्चत ।
 अभीकै चिदु लोककृत् संगे समत्सु वृत्रहा ऽस्माकं बोधि
 चोदिता नभन्तामन्यकेषां ज्याका अधि धन्वसु १
 त्वं सिन्धूर्वासृजो ऽधराचो अहन्नहिम् ।
 अशत्रुरिन्द्र जज्ञिषे विश्वं पुष्यसि वार्यं तं त्वा परि ष्वजामहे
 नभन्तामन्यकेषां ज्याका अधि धन्वसु २
 वि षु विश्वा अरातयो ऽर्यो नशन्त नो धियः ।
 अस्तासि शत्रवे वधं यो न इन्द्र जिघासति या ते
 रातिर्दिर्वसु नभन्तामन्यकेषां ज्याका अधि धन्वसु ३
 यो न इन्द्राभितो जनो वृकायुरादिदेशति ।
 अधस्पदं तमीं कृधि विबाधो असि
 सासहि नभन्तामन्यकेषां ज्याका अधि धन्वसु ४
 यो न इन्द्राभिदासति सनाभिर्यश्च निष्टयः ।
 अव तस्य बलं तिर महीव द्यौरध त्मना नभन्तामन्यकेषां ज्याका अधि

धन्वसु ५

व्यमिन्द्र त्वायवः सखित्वमा रभामहे ।

ऋतस्य नः पृथा नया ऽति विश्वानि दुरिता नभन्तामन्यकेषां ज्याका अधि

धन्वसु ६

अस्मभ्यं सु त्वमिन्द्र तां शिञ्ज या दोहते प्रति वरं जरित्रे ।

अच्छिद्रोधी पीपयद्यथा नः सहस्रधारा पर्यसा मही गौः ७

(१३४) चतुस्त्रिंशदुत्तरशततमं सूक्तम्

(१-७) सप्तर्चस्यास्य सूक्तस्य (१-५, ६) प्रथमादिपञ्चर्चा षष्ठ्याः पूर्वार्धस्य च यौवनाश्वो मान्धाता ऋषिः, (६-७) षष्ठ्या उत्तरार्धस्य सप्तम्याश्च गोधा ऋषिका । इन्द्रो देवता । (१-६) प्रथमादिषडृचां महापङ्क्तिः, (७) सप्तम्याश्च पङ्क्तिश्चन्दसी उभे यदिन्द्र रोदसी आपप्राथोषा इव ।

महान्तं त्वा महीनां सम्राजं चर्षणीनां देवी जनित्र्यजीजनद्भद्रा

जनित्र्यजीजनत् १

अवं स्म दुर्हणायतो मर्तस्य तनुहि स्थिरम् ।

अधस्पदं तमीं कृधि यो अस्माँ आदिदेशति देवी जनित्र्यजीजनद्भद्रा

जनित्र्यजीजनत् २

अव त्या बृहतीरिषो विश्वश्चन्द्रा अमित्रहन् ।

शचीभिः शक्र धूनुही न्द्र विश्वाभिरूतिभिर्देवी जनित्र्यजीजनद्भद्रा

जनित्र्यजीजनत् ३

अव यत् त्वं शतक्रतु विन्द्र विश्वानि धूनुषे ।

रयिं न सुन्वते सचा सहस्रिणीभिरूतिभिर्देवी जनित्र्यजीजनद्भद्रा

जनित्र्यजीजनत् ४

अव स्वेदा इवाभितो विष्वक्पतन्तु दिद्यवः ।

दूर्वाया इव तन्तवो व्यश्मदैतु दुर्मति देवी जनित्र्यजीजनद्भद्रा

जनित्र्यजीजनत् ५

दीर्घं ह्यङ्कुशं यथा शक्तिं बिभर्षि मन्तुमः ।

पूर्वेण मघवन् पृदा ऽजो वयां यथा यमो देवी जनित्र्यजीजनद्भद्रा

जनित्र्यजीजनत् ६

नकिर्देवा मिनीमसि नकिरा योपयामसि मन्त्रश्रुत्यं चरामसि ।

प॒क्षेभिर॑पि॒क॒क्षेभि॑ र॒त्राभि॑ सं र॑भामहे ७

(१३५) पञ्चत्रिंशदुत्तरशततमं सूक्तम्

(१-७) सप्तर्चस्यास्य सूक्तस्य यामायनः कुमार ऋषिः । यमो देवता ।

अनुष्टुप् छन्दः

यस्मिन् वृ॒क्षे सु॑प॒ला॒शे दे॒वैः स॒ंपि॒ब॒ते य॒मः ।
अ॒त्रा॒ नो वि॒श॒प॒तिः पि॒ता पु॑रा॒णाँ अनु॑ वे॒नति १
पु॒रा॒णाँ अनु॑वे॒नन्तं च॑र॒न्तं पा॒पया॑मु॒या ।
अ॒सू॒यन्न॑भ्य॒चाक॑शं तस्मा॑ अ॒स्पृ॒हय॑पु॒नः २
यं कु॑मा॒र॒ नव॑ं रथं॒ म॒च॒क्रं म॒न॒सा॒कृ॒णोः ।
ए॒कैषं वि॒श्वतः॑ प्रा॒ञ्च म॑प॒श्यन्न॑धि॒ तिष्ठ॑सि ३
यं कु॑मा॒र॒ प्रा॒व॒र्त॒यो रथं॑ वि॒प्रेभ्य॑स्परि॒ ।
तं सा॒मानु॑ प्रा॒व॒र्त॒तु स॒मितो॑ ना॒व्याहि॑तम् ४
कः कु॑मा॒र॒म॒ज॒नय॑ द्रथं॒ को नि॑र॒व॒र्त॒यत् ।
कः स्वि॒त् तद॑द्य नो॒ ब्रू॒या द॒नु॒दे॒यी यथा॑भ॒वत् ५
यथा॑भ॒वद॒नु॒दे॒यी ततो॑ अ॒ग्रम॑जायत ।
पु॒रस्ता॑द्बुध्न॒ आ॒र्त॒तः प॒श्चान्नि॑र॒य॒णं कृ॒तम् ६
इ॒दं य॒मस्य॑ सा॒द॒नं दे॒वमा॑नं॒ यदु॑च्यते ।
इ॒यम॑स्य॒ धम्य॑ते ना॒ळी र॒यं गी॑र्भिः परि॒ष्कृतः ७

(१३६) षट्त्रिंशदुत्तरशततमं सूक्तम्

(१-७) सप्तर्चस्यास्य सूक्तस्य वातशनाः ((१) प्रथमर्चो जूतिः, (२) द्वितीयाया वातजूतिः, (३) तृतीयाया विप्रजूतिः, (४) चतुर्थ्या वृषाणकः, (५) पञ्चम्याः करिक्रतः, (६) षष्ठ्या एतशः, (७) सप्तम्याश्च ऋष्यशृङ्गः) ऋषयः । केशिनः

(अग्निवायुसूर्याः) देवताः । अनुष्टुप् छन्दः

के॒श्यश्चि॑न्नि॒ केशी॑ वि॒षं केशी॑ बि॒भर्ति॑ रो॒दसी॑ ।
केशी॑ वि॒श्वं स्व॑र्दृ॒शे केशी॑दं॒ ज्योति॑रुच्यते १
मु॒नयो॑ वा॒त॒र॒श॒नाः पि॑शङ्गा॒ वस॑ते॒ मला॑ ।
वा॒त॒स्यानु॑ ध्राजि॒ यन्ति॑ यद्दे॒वासो॑ अ॒वि॒क्षत॑ २
उ॒न्मदि॑ता॒ मौ॒नै॒येन॑ वा॒ताँ आ॑ त॒स्थि॒मा वृ॒यम् ।

शरीरेदुस्माकं यूयं मर्तासो अभि पश्यथ ३
 अन्तरिक्षेण पतति विश्वा रूपावचाकेशत् ।
 मुनिर्देवस्य देवस्य सौकृत्याय सखा हितः ४
 वातस्याश्वो वायोः सखा ऽथो देवेषितो मुनिः ।
 उभौ समुद्रावा जैति यश्च पूर्वं उतापरः ५
 अप्सरसां गन्धर्वाणां मृगाणां चरणे चरन् ।
 केशी केतस्य विद्वान् त्सखा स्वादुर्मदिन्तमः ६
 वायुरस्मा उपांन्थत् पिनष्टि स्मा कुनन्नमा ।
 केशी विषस्य पात्रेण यद्गुद्रेणापिबत् सह ७

(१३७) सप्तत्रिंशदुत्तरशततमं सूक्तम्

(१-७) सप्तर्चस्यास्य सूक्तस्य सप्तर्षयः ((१) प्रथमर्चो भरद्वाजः, (२)
 द्वितीयायाः कश्यपः, (३) तृतीयाया गोतमः, (४) चतुर्थ्या अत्रिः, (५)
 पञ्चम्या विश्वामित्रः, (६) षष्ठ्या जमदग्निः, (७) सप्तम्याश्च वसिष्ठः) ऋषयः ।

विश्वे देवा देवताः । अनुष्टुप् छन्दः

उत देवा अवहितं देवा उन्नयथा पुनः ।
 उतागश्चक्रुषं देवा देवा जीवयथा पुनः १
 द्वाविमौ वातौ वात आ सिन्धोरा परावतः ।
 दक्षं ते अन्य आ वातु परान्यो वातु यद्रपः २
 आ वात वाहि भेषजं वि वात वाहि यद्रपः ।
 त्वं हि विश्वभेषजो देवानां दूत ईर्यसे ३
 आ त्वागमं शंतातिभि रथो अरिष्टतातिभिः ।
 दक्षं ते भद्रमाभार्षं परा यद्धर्मं सुवामि ते ४
 त्रायन्तामिह देवा स्त्रायतां मरुतां गुणः ।
 त्रायन्तां विश्वा भूतानि यथायमरुपा असत् ५
 आप इद्वा उं भेषजी रापो अमीवचातनीः ।
 आपः सर्वस्य भेषजी स्तास्तै कृणवन्तु भेषजम् ६
 हस्ताभ्यां दशशाखाभ्यां जिह्वा वाचः पुरोगवी ।
 अनामयित्वाभ्यां त्वा ताभ्यां त्वोप स्पृशामसि ७

(१३८) अष्टात्रिंशदुत्तरशततमं सूक्तम्

(१-६) षड्चस्यास्य सूक्तस्यौरवोऽङ्ग ऋषिः । इन्द्रो देवता । जगती छन्दः
तव त्य इन्द्र सख्येषु वह्नय ऋतं मन्वाना व्यददिरुर्वलम् ।
यत्रा दशस्यनुषसौ रिन्नपः कुत्साय मन्मन्नह्यश्च दंसयः १
अवासृजः प्रस्वः श्वञ्चयो गिरी नुदाज उस्त्रा अपिबो मधु प्रियम् ।
अवर्धयो वनिनो अस्य दंससा शशोच सूर्य ऋतजातया गिरा २
वि सूर्यो मध्ये अमुचद्रथ दिवो विदद्दासाय प्रतिमानमार्यः ।
दृळ्हानि पिप्रोरसुरस्य मायिन इन्द्रो व्यास्यच्चकृवाँ ऋजिश्चना ३
अनाधृष्टानि धृषितो व्यास्य न्निधीरदैवाँ अमृणदयास्यः ।
मासेव सूर्यो वसु पुर्यमा ददे गृणानः शत्रूँशृणाद्विरुक्मता ४
अयुद्धसेनो विभ्वा विभिन्दता दाशद्वृत्रहा तुज्यानि तेजते ।
इन्द्रस्य वज्रादबिभेदभिश्नथः प्राक्रामच्छुन्ध्यूरजहादुषा अनः ५
एता त्या ते श्रुत्यानि केवला यदेक एकमकृणोरयज्ञम् ।
मासां विधानमदधा अधि द्यवि त्वया विभिन्नं भरति प्रधिं पिता ६

(१३९) एकोनचत्वारिंशदुत्तरशततमं सूक्तम्

(१-६) षड्चस्यास्य सूक्तस्य गन्धर्वो विश्वावसुऋषिः । (१-३) प्रथमादितृचस्य
सविता, (४-६) चतुर्थ्यादितृचस्य चात्मा देवते । त्रिष्टुप् छन्दः
सूर्यरश्मिर्हरिकेशः पुरस्तात् सविता ज्योतिरुदयाँ अजस्रम् ।
तस्य पूषा प्रसवे याति विद्वान् त्संपश्यन् विश्वा भुवनानि गोपाः १
नृचक्षा एष दिवो मध्य आस्त आपप्रिवान् रोदसी अन्तरिक्षम् ।
स विश्वाचीरभि चष्टे घृताची रन्तरा पूर्वमपरं च केतुम् २
रायो बुध्नः संगमनो वसूनां विश्वा रूपाभि चष्टे शचीभिः ।
देव इव सविता सत्यधर्मेन्द्रो न तस्थौ समरे धनानाम् ३
विश्वावसुं सोम गन्धर्वमापौ ददृशुषीस्तदृतेना व्यायन् ।
तदन्ववैदिन्द्रो रारहाण आसां परि सूर्यस्य परिधीरपश्यत् ४
विश्वावसुरभि तन्नो गृणातु दिव्यो गन्धर्वो रजसो विमानः ।
यद्वा घा सत्यमुत यन्न विद्य धियो हिन्वानो धियु इन्नो अव्याः ५
सस्त्रिमविन्दच्चरणे नदीना मपावृणोदुरो अश्मव्रजानाम् ।
प्रासां गन्धर्वो अमृतानि वोच दिन्द्रो दक्षं परि जानादहीनाम् ६

(१४०) चत्वारिंशदुत्तरशततमं सूक्तम्

(१-६) षडृचस्यास्य सूक्तस्य पावकोऽग्निर्ऋषिः । अग्निर्देवता । (१-२)
प्रथमाद्वितीययोर्ऋचोर्विष्टारपङ्क्तिः, (३-५) तृतीयादितृचस्य सतोबृहती, (६)
षष्ठ्याश्चोपरिष्ठाञ्ज्योतिश्छन्दांसि

अग्ने तव श्रवो वयो महि भ्राजन्ते अर्चयौ विभावसो ।
बृहद्भानो शर्वसा वाजमुक्थ्यं दधासि दाशुषे कवे १
पावकवर्चाः शक्रवर्चा अनूनवर्चा उदियर्षि भानुना ।
पुत्रो मातरा विचरन्नुपावसि पृणक्षि रोदसी उभे २
ऊर्जो नपाञ्जातवेदः सुशस्तिभिर्मन्दस्व धीतिभिर्हितः ।
त्वे इषः सं दधुर्भूरिवर्षसश्चित्रोतयो वामजाताः ३
इरज्यन्नग्ने प्रथयस्व जन्तुभिरस्मे रायो अमर्त्य ।
स दर्शतस्य वपुषो वि राजसि पृणक्षि सानसिं क्रतुम् ४
इष्कर्तारमध्वरस्य प्रचेतसं क्षयन्तं राधसो महः ।
रातिं वामस्य सुभगा महीमिषं दधासि सानसिं रयिम् ५
ऋतावानं महिषं विश्वदर्शत मग्निं सुम्राय दधिरे पुरो जनाः ।
श्रुर्कं सप्रथस्तमं त्वा गिरा दैव्यं मानुषा युगा ६

(१४१) एकचत्वारिंशदुत्तरशततमं सूक्तम्

(१-६) षडृचस्यास्य सूक्तस्य तापसोऽग्निर्ऋषिः । विश्वे देवा देवताः ।

अनुष्टुप् छन्दः

अग्ने अच्छा वदेह नः प्रत्यङ् नः सुमना भव ।
प्र नो यच्छ विशस्पते धनुदा असि नस्त्वम् १
प्र नो यच्छत्वयमा प्र भगः प्र बृहस्पतिः ।
प्र देवाः प्रोत सूनृता रायो देवी ददातु नः २
सोमं राजानमवसे ऽग्निं गीर्भिहवामहे ।
आदित्यान् विष्णुं सूर्यं ब्रह्माणं च बृहस्पतिम् ३
इन्द्रवायू बृहस्पतिं सुहवेह हवामहे ।
यथा नः सर्व इज्जनः संगत्यां सुमना असत् ४
अर्यमणं बृहस्पतिं मिन्द्रं दानाय चोदय ।

वातुं विष्णुं सरस्वतीं सवितारं च वाजिनम् ५
त्वं नो अग्ने अग्निभिर्ब्रह्म युजं च वर्धय ।
त्वं नो देवतातये रायो दानाय चोदय ६

(१४२) द्विचत्वारिंशदुत्तरशततमं सूक्तम्

(१-८) अष्टर्चस्यास्य सूक्तस्य शार्ङ्गाः ((१-२) प्रथमाद्वितीययोर्ऋचोर्जरिता, (३-४) तृतीयाचतुर्थयोर्द्रोणः, (५-६) पञ्चमीषष्ठयोः सारिसृक्तः, (७-८) सप्तम्यष्टम्योश्च स्तम्बमित्रः) ऋषयः । अग्निर्देवता । (१-२) प्रथमाद्वितीययोर्ऋचोर्जगती, (३-६) तृतीयादिचतसृणां त्रिष्टुप्, (७-८) सप्तम्यष्टम्योश्चानुष्टुप् छन्दांसि

अयमग्ने जरिता त्वे अभूदपि सहसः सूनो नृह्यश्न्यदस्त्याप्यम् ।
भद्रं हि शर्म त्रिवरूथमस्ति त आरे हिंसां नामपे दिद्युमा कृधि १
प्रवत् तै अग्ने जनिमा पितूयतः साचीव विश्वा भुवना न्यृञ्जसे ।
प्र सप्तयः प्र संनिषन्त नो धियः पुरश्चरन्ति पशुपा इव त्मना २
उत वा उ परि वृणक्षि बप्स इहोरग्र उलपस्य स्वधावः ।
उत खिल्या उर्वराणां भवन्ति मा तै हेतिं तविषीं चुक्रुधाम ३
यदुद्धतौ निवतो यासि बप्सत् पृथगेषि प्रगृधिनीव सेना ।
यदा ते वातौ अनुवाति शोचि र्वमैव शमश्रु वपसि प्र भूम ४
प्रत्यस्य श्रेणयो ददृश्र एकं नियानं बहवो रथासः ।
बाहू यदग्ने अनुमर्मृजानो न्यइडुत्तानामन्वेषि भूमिम् ५
उत् ते शुष्मा जिहतामुत् तै अर्चि रूत् तै अग्ने शशमानस्य वाजाः ।
उच्छ्वञ्चस्व नि नम् वर्धमान आ त्वाद्य विश्वे वसवः सदन्तु ६
अपामिदं न्ययनं समुद्रस्य निवेशनम् ।
अन्यं कृणुष्वेतः पन्थां तेन याहि वशां अनु ७
आयने ते परायणे दूर्वा रोहन्तु पुष्पिणीः ।
हृदाश्च पुण्डरीकाणि समुद्रस्य गृहा इमे ८
अष्टमोऽध्यायः । व० १-४६ ।

(१४३) त्रिचत्वारिंशदुत्तरशततमं सूक्तम्

(१-६) षडृचस्यास्य सूक्तस्य साङ्ख्योऽत्रिर्ऋषिः । अश्विनौ देवते । अनुष्टुप् छन्दः

त्यं चिदत्रिमृतजुर मर्थमश्वं न यातवे ।
 कक्षीर्वन्तं यदी पुना रथं न कृणुथो नवम् १
 त्यं चिदश्वं न वाजिनं मरेणवो यमवत ।
 दृळहं ग्रन्थिं न विष्यत् मत्रिं यविष्ठमा रजः २
 नरा दंसिष्ठावत्रये शुभ्रा सिषासतं धियः ।
 अथा हि वां दिवो नरा पुनः स्तोमो न विशसै ३
 चिते तद्वा सुराधसा रातिः सुमतिरश्विना ।
 आ यन्नः सदेने पृथौ समने पर्वथो नरा ४
 युवं भुज्युं समुद्र आ रजसः पार ईङ्घितम् ।
 यातमच्छा पत्रिभिर्नासत्या सातये कृतम् ५
 आ वां सुमैः शंयू इव मंहिष्ठा विश्ववेदसा ।
 समस्मे भूषतं नरो त्सं न पिप्युषीरिषः ६

(१४४) चतुश्चत्वारिंशदुत्तरशततमं सूक्तम्

(१-६) षड्चस्यास्य सूक्तस्य तादर्यः सुपर्णो यामायन ऊर्ध्वकुशनो वा ऋषिः ।
 इन्द्रो देवता । (१, ३-४) प्रथमर्चस्तृतीयाचतुर्थ्योश्च गायत्री, (२) द्वितीयाया
 बृहती, (५) पञ्चम्याः सतोबृहती, (६) षष्ठ्याश्च विष्टारपङ्क्तिश्छन्दांसि
 अयं हि ते अमर्त्य इन्दुरत्यो न पत्यते । दक्षो विश्वायुर्वेधसै १
 अयमस्मासु काव्यं ऋभुर्वज्रो दास्वते ।
 अयं बिभर्त्यूर्ध्वकृशनं मदं मृभुर्न कृत्व्यं मदम् २
 घृषुः श्येनाय कृत्वन आसु स्वासु वंसगः । अवं दीधेदहीशुवः ३
 यं सुपर्णः परावतः श्येनस्य पुत्र आभरत् ।
 शतचक्रं योऽह्यो वर्तनिः ४
 यं तै श्येनश्चारुमवृकं पदाभर दरुणं मानमन्धसः ।
 एना वयो वि तार्यायुर्जीवस एना जागार बन्धुता ५
 एवा तदिन्द्र इन्दुना देवेषु चिद्धारयाते महि त्यजः ।
 क्रत्वा वयो वि तार्यायुः सुक्रतो क्रत्वायमस्मदा सुतः ६

(१४५) पञ्चचत्वारिंशदुत्तरशततमं सूक्तम्

(१-६) षड्चस्यास्य सूक्तस्येन्द्राणी ऋषिका । सपत्नीबाधनरूपोऽर्थो देवता ।

(१-५) प्रथमादिपञ्चार्चामनुष्टुप्, (६) षष्ठ्याश्च पङ्क्तिश्छन्दसी
इमां खनाम्योषधिं वीरुधं बलवत्तमाम् ।
यया सपत्नीं बाधते यया संविन्दते पतिम् १
उत्तानपर्णे सुभगे देवजूते सहस्वति ।
सपत्नीं मे परा धम पतिं मे केवलं कुरु २
उत्तराहमुत्तर उत्तरेदुत्तराभ्यः ।
अथा सपत्नी या ममाऽधरा साधराभ्यः ३
नृह्यस्या नाम गृभ्णामि नो अस्मिन् रमते जनै ।
परामेव परावर्त सपत्नीं गमयामसि ४
अहमस्मि सहमानाऽथ त्वमसि सासहिः ।
उभे सहस्वती भूत्वी सपत्नीं मे सहावहै ५
उप ते ऽधां सहमाना मभि त्वाधां सहीयसा ।
मामनु प्र ते मनो वत्सं गौरिव धावतु पथा वारिव धावतु ६

(१४६) षट्चत्वारिंशदुत्तरशततमं सूक्तम्

(१-६) षट्चस्यास्य सूक्तस्यैरम्मदो देवमुनिर्ऋषिः । अरण्यानी देवता ।

अनुष्टुप् छन्दः

अरण्यान्यरण्या न्यसौ या प्रेव नश्यसि ।
कथा ग्रामं न पृच्छसि न त्वा भीरिव विन्दतीर् १
वृषारवायु वदते यदुपावति चिच्चिकः ।
आघाटिभिरिव धावयन्नरण्यानिर्महीयते २
उत गाव इवाद न्युत वेश्मैव दृश्यते ।
उतो अरण्यानिः सायं शकटीरिव सर्जति ३
गामुङ्गैष आ ह्यति दार्वुङ्गैषो अपावधीत् ।
वसन्नरण्यान्त्यां साय मक्रुद्धदिति मन्यते ४
न वा अरण्यानिर्ह न्यन्यश्चेन्नाभिगच्छति ।
स्वादोः फलस्य जग्ध्वाय यथाकामं नि पद्यते ५
आञ्जनगन्धिं सुरभिं बहन्नामकृषीवलाम् ।
प्राहं मृगाणां मातरं मरण्यानिर्मशंसिषम् ६

(१४७) सप्तचत्वारिंशदुत्तरशततमं सूक्तम्

(१-५) पञ्चर्चस्यास्य सूक्तस्य शैरीषिः सुवेदा ऋषिः । इन्द्रो देवता । (१-४)

प्रथमादिचतुर्ऋचां जगती, (५) पञ्चम्याश्च त्रिष्टुप् छन्दसी
 श्रुतै दधामि प्रथमार्यं मन्यवे ऽहन्यद्वत्रं नर्यं विवेरपः ।
 उभे यत्त्वा भवतो रोदसी अनु रेजते शुष्मात् पृथिवी चिदद्रिवः १
 त्वं मायाभिरनवद्य मायिनं श्रवस्यता मनसा वृत्रमर्दयः ।
 त्वामिन्नरौ वृणते गर्विष्टिषु त्वां विश्वासु हव्यास्विष्टिषु २
 ऐषु चाकन्धि पुरुहूत सूरिषु वृधासो ये मघवन्नानुशुर्मघम् ।
 अर्चन्ति तोके तनये परिष्टिषु मेधसाता वाजिनमहये धने ३
 स इन्द्र रायः सुभृतस्य चाकनु न्मदं यो अस्य रंह्यं चिकेतति ।
 त्वावृधो मघवन् दाश्वध्वरो मद्भू स वाजं भरते धना नृभिः ४
 त्वं शर्धाय महिना गृणान उरु कृधि मघवञ्छुग्धि रायः ।
 त्वं नो मित्रो वरुणो न मायी पित्वो न दस्म दयसे विभक्ता ५

(१४८) अष्टचत्वारिंशदुत्तरशततमं सूक्तम्

(१-५) पञ्चर्चस्यास्य सूक्तस्य वैन्यः पृथुर्ऋषिः । इन्द्रो देवता । त्रिष्टुप् छन्दः
 सुष्वाणासं इन्द्र स्तुमसिं त्वा ससवांसश्च तुविनृम्ण वाजम् ।
 आ नो भर सुवितं यस्य चाकन् त्मना तना सनुयाम् त्वोताः १
 ऋष्वस्त्वमिन्द्र शूर जातो दासीर्विशः सूर्येण सह्याः ।
 गुहा हितं गुह्यं गूळहमप्सु बिभृमसिं प्रस्त्रवणे न सोमम् २
 अर्यो वा गिरौ अभ्यर्च विद्वानृषीणां विप्रः सुमतिं चकानः ।
 ते स्याम ये रणयन्त सोमै रेनोत तुभ्यं रथोळह भुक्षैः ३
 इमा ब्रह्मैन्द्र तुभ्यं शंसि दा नृभ्यो नृणां शूर शर्वः ।
 तेभिर्भव सक्रतुर्येषु चाक न्नत त्रायस्व गृणत उत स्तीन् ४
 श्रुधी हवमिन्द्र शूर पृथ्या उत स्तवसे वेन्यस्याकैः ।
 आ यस्ते योनिं घृतवन्तमस्वारूर्मिर्न निमैर्द्रवयन्त वक्वाः ५

(१४९) एकोनपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य हैरण्यस्तूपोऽर्चर्ऋषिः । सविता देवता ।

त्रिष्टुप् छन्दः

सविता यन्नैः पृथिवीमरम्णा दस्कम्भने सविता द्यामदृंहत् ।
 अश्वमिवाधुक्षद्धुनिमन्तरिक्षं मृतूर्ते बद्धं सविता समुद्रम् १
 यत्रा समुद्रः स्कंभितो व्यौनदपां नपात् सविता तस्य वेद ।
 अतो भूरते आ उत्थितं रजो ऽतो द्यावापृथिवी अप्रथेताम् २
 पश्चेदमन्यदभवद्यजत्र ममर्त्यस्य भुवनस्य भूना ।
 सुपर्णो अङ्ग सवितुर्गुरुत्मान् पूर्वो जातः स उ अस्यानु धर्म ३
 गाव इव ग्रामं यूयुधिरिवाश्वान्वाश्रेव वत्सं सुमना दुहाना ।
 पतिरिव जायामभि नो न्येतु धर्ता दिवः सविता विश्ववारः ४
 हिरण्यस्तूपः सवितुर्यथा त्वा ऽऽङ्गिरसो जुहे वाजे अस्मिन् ।
 एवा त्वार्चन्नवसे वन्दमानः सोमस्येवांशुं प्रति जागराहम् ५

(१५०) पञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य वासिष्ठो मृळीक ऋषिः । अग्निर्देवता । (१-३)

प्रथमादितृचस्य बृहती, (४) चतुर्थ्या ऋच उपरिष्ठाञ्ज्योतिर्जगती वा, (५)

पञ्चम्याश्चोपरिष्ठाञ्ज्योतिश्छन्दांसि

समिद्धश्चित् समिध्यसे देवेभ्यो हव्यवाहन ।
 आदित्यै रुद्रैर्वसुभिर्न आ गंहि मृळीकार्यं न आ गंहि १
 इमं यज्ञमिदं वचो जुजुषाण उपागंहि ।
 मर्तासस्त्वा समिधान हवामहे मृळीकार्यं हवामहे २
 त्वामु जातवैदसं विश्ववारं गृणे धिया ।
 अग्रे देवाँ आ वह नः प्रियव्रतान् मृळीकार्यं प्रियव्रतान् ३
 अग्निर्देवो देवानामभवत् पुरोहितो ऽग्निं मनुष्याः ऋषयः समीधिरे ।
 अग्निं महो धनसातावहं हुवे मृळीकं धनसातये ४
 अग्निरत्रिं भरद्वाजं गविष्ठिरं प्रावन्नः कण्वं त्रसदस्युमाहुवे ।
 अग्निं वसिष्ठो हवते पुरोहितो मृळीकार्यं पुरोहितः ५

(१५१) एकपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य कामायनी श्रद्धा ऋषिका । श्रद्धा देवता ।

अनुष्टुप् छन्दः

श्रद्धयाग्निः समिध्यते श्रद्धया हूयते हविः ।

श्रद्धां भर्गस्य मूर्धनि वचसा वैदयामसि १
 प्रियं श्रद्धे ददतः प्रियं श्रद्धे दिदासतः ।
 प्रियं भोजेषु यज्वस्विदं म उदितं कृधि २
 यथा देवा असुरेषु श्रद्धामुग्रेषु चक्रिरे ।
 एवं भोजेषु यज्वस्व स्माकमुदितं कृधि ३
 श्रद्धां देवा यजमाना वायुगौपा उपासते ।
 श्रद्धां हृदय्यश्याकृत्या श्रद्धया विन्दते वसु ४
 श्रद्धां प्रातर्हवामहे श्रद्धां मध्यंदिनं परि ।
 श्रद्धां सूर्यस्य निमुचि श्रद्धे श्रद्धापयेह नः ५
 द्वादशोऽनुवाकः । सू० १५२-१६१ ।

(१५२) द्विपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य भारद्वाजः शास ऋषिः । इन्द्रो देवता ।

अनुष्टुप् छन्दः

शास इत्था म्हाँ अस्य मित्रखादो अद्भुतः ।
 न यस्य हृन्यते सखा न जीयते कदा चन १
 स्वस्तिदा विशस्पति वृत्रहा विमृधो वशी ।
 वृषेन्द्रः पुर एतु नः सोमपा अभयंकरः २
 वि रक्षो वि मृधौ जहि वि वृत्रस्य हनू रुज ।
 वि मन्युमिन्द्र वृत्रह नमित्रस्याभिदासतः ३
 वि न इन्द्र मृधौ जहि नीचा यच्छ पृतन्यतः ।
 यो अस्माँ अभिदास त्यधरं गमया तमः ४
 अपेन्द्र द्विषतो मनो ऽपु जिज्यासतो वधम् ।
 वि मन्योः शर्म यच्छ वरीयो यवया वधम् ५

(१५३) त्रिपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य देवजामय इन्द्रमातर ऋषिकाः । इन्द्रो देवता ।

गायत्री छन्दः

ईङ्घ्रयन्तीरपस्युव इन्द्रं जातमुपासते । भेजानासः सुवीर्यम् १
 त्वमिन्द्र बलादधि सहसो जात ओजसः । त्वं वृषन् वृषेदसि २

त्वमिन्द्रासि वृत्रहा व्यश्नतरिक्षमतिरः । उद् घामस्तभ्ना ओर्जसा ३
त्वमिन्द्र सजोषस मुर्कं बिभर्षि ब्राह्मोः । वज्रं शिशानु ओर्जसा ४
त्वमिन्द्राभिभूरसि विश्वा जातान्योर्जसा । स विश्वा भुव आर्भवः ५

(१५४) चतुष्पञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य वैवस्वती यमी ऋषिका । भाववृत्तं देवता ।

अनुष्टुप् छन्दः

सोम एकेभ्यः पवते घृतमेक उपासते ।
येभ्यो मधु प्रधावति ताँश्चिदेवापि गच्छतात् १
तपसा ये अनाधृष्या स्तपसा ये स्वर्ययुः ।
तपो ये चक्रिरे मह स्ताँश्चिदेवापि गच्छतात् २
ये युध्यन्ते प्रधनेषु शूरासो ये तनूत्यजः ।
ये वा सहस्रदक्षिणा स्ताँश्चिदेवापि गच्छतात् ३
ये चित् पूर्वं ऋतसाप ऋतावान ऋतावृधः ।
पितृन् तपस्वतो यम् ताँश्चिदेवापि गच्छतात् ४
सहस्रणीथाः कवयो ये गौपायन्ति सूर्यम् ।
ऋषीन् तपस्वतो यम तपोजाँ अपि गच्छतात् ५

(१५५) पञ्चपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य भारद्वाजः शिरिम्बिठ ऋषिः । (१, ४)

प्रथमाचतुर्थ्योर्ऋचोरलक्ष्मीघ्नोऽर्थः, (२-३) द्वितीयातृतीययोर्ब्रह्मणस्पतिः, (५)

पञ्चम्याश्च विश्वे देवा देवताः । अनुष्टुप् छन्दः

अरायि काणे विकटे गिरिं गच्छ सदान्वे ।
शिरिम्बिठस्य सत्वभि स्तेभिष्ठा चातयामसि १
चतो इतश्चत्तामुतः सर्वा भ्रूणान्यारुषी ।
अराय्यं ब्रह्मणस्पते तीक्ष्णशृङ्गोदृषन्निहि २
अदो यद्दारु प्लवते सिन्धोः पारे अपूरुषम् ।
तदा रभस्व दुर्हणो तेन गच्छ परस्तरम् ३
यद्गु प्राचीरजगन्तो रौ मण्डूरधाणिकीः ।
हता इन्द्रस्य शत्रवः सर्वे बुद्धुदयाशवः ४

परीमे गामनेषत् पर्यग्निर्महषत ।
देवेष्वक्रत् श्रवः क इमाँ आ दधर्षति ५

(१५६) षट्पञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्याग्नेयः केतुर्ऋषिः । अग्निर्देवता । गायत्री छन्दः
अग्निं हिन्वन्तु नो धियः सप्तिमाशुमिवाजिषु । तेन जेष्म धर्नधनम् १
यया गा आकरामहे सेनयाग्ने तवोत्या । तां नो हिन्व मघत्तये २
आग्ने स्थूरं रयिं भर पृथुं गोमन्तमश्विनम् । अङ्घ्रि खं वर्तया पणिम् ३
अग्ने नक्षत्रमजर मा सूर्य रोहयो दिवि । दधञ्जयोतिर्जनैभ्यः ४
अग्ने केतुर्विशामसि प्रेष्ठः श्रेष्ठ उपस्थसत् । बोधां स्तोत्रे वयो दधत् ५

(१५७) सप्तपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्याप्तयो भुवनः, भौवनः साधनो वा ऋषिः । विश्वे देवा
देवताः । द्विपदा त्रिष्टुप् छन्दः
इमा नु कं भुवना सीषधामेन्द्रश्च विश्वे च देवाः १
यज्ञं च नस्तन्वं च प्रजां चाऽऽदित्यैरिन्द्रः सह चीक्लृपाति १ २
आदित्यैरिन्द्रः सर्गणो मरुद्भि रस्माकं भूत्वविता तनूनाम् ३
हत्वाय देवा असुरान् यदायन् देवा देवत्वमभिरक्षमाणाः २ ४
प्रत्यञ्चमर्कमनयञ्छचीभि रादित् स्वधामिषिरां पर्यपश्यन् ३ ५

(१५८) अष्टपञ्चाशदुत्तरशततमं सूक्तम्

(१-५) पञ्चर्चस्यास्य सूक्तस्य सौर्यश्चक्षुर्ऋषिः । सूर्यो देवता । गायत्री छन्दः
सूर्यो नो दिवस्पातु वातो अन्तरिक्षात् । अग्निर्नः पार्थिवेभ्यः १
जोषां सवितर्यस्य ते हरः शतं सवाँ अर्हति । पाहि नो दिद्युतः पतन्त्याः २
चक्षुर्नो देवः सविता चक्षुर्न उत पर्वतः । चक्षुर्धाता दधातु नः ३
चक्षुर्नो धेहि चक्षुषे चक्षुर्विरुच्यै तनूभ्यः । सं चेदं वि च पश्येम ४
सुसंदृशं त्वा वयं प्रति पश्येम सूर्य । वि पश्येम नृचक्षसः ५

(१५९) एकोनषष्ट्युत्तरशततमं सूक्तम्

(१-६) षड्चस्यास्य सूक्तस्य पौलोमी शची ऋषिका । शची देवता ।
अनुष्टुप् छन्दः

उदसौ सूर्यो अगा दुदयं मामको भगः ।
अहं तद्विद्वला पतिं मुभ्यसाक्षि विषासहिः १
अहं केतुरहं मूर्धा ऽहमुग्रा विवाचनी ।
ममेदनु क्रतुं पतिः सेहानाया उपाचरेत् २
मम पुत्राः शत्रुहणो ऽथो मे दुहिता विराट् ।
उताहमस्मि संजया पत्यौ मे श्लोक उत्तमः ३
येनेन्द्रो हविषा कृत्व्य भवद्द्द्युम्नयुत्तमः ।
इदं तदक्रि देवा असपत्ना किलाभिवम् ४
असपत्ना सपत्नी जयन्त्यभिभूवरी ।
आवृक्षमन्यासां वर्चो राधो अस्थैयसामिव ५
समजैषमिमा अहं सपत्नीरभिभूवरी ।
यथाहमस्य वीरस्य विराजानि जनस्य च ६

(१६०) षष्ट्युत्तरशततमं सूक्तम्

(१-५) पञ्चर्चस्यास्य सूक्तस्य वैश्वामित्रः पूरण ऋषिः । इन्द्रो देवता ।

त्रिष्टुप् छन्दः

तीव्रस्याभिर्वयसो अस्य पाहि सर्वरथा वि हरी इह मुञ्च ।
इन्द्र मा त्वा यजमानासो अन्ये नि रीरमन् तुभ्यमिमे सुतासः १
तुभ्यं सुतास्तुभ्यमु सोत्वास स्त्वां गिरः श्वात्र्या आ ह्वयन्ति ।
इन्द्रेदमद्य सर्वनं जुषाणो विश्वस्य विद्वाँ इह पाहि सोमम् २
य उशता मनसा सोममस्मै सर्वहदा देवकामः सुनोति ।
न गा इन्द्रस्तस्य परा ददाति प्रशस्तमिच्चारुमस्मै कृणोति ३
अनुस्पष्टो भवत्येषो अस्य यो अस्मै रेवान् न सुनोति सोमम् ।
निररत्नौ मघवा तं दधाति ब्रह्मद्विषो हन्त्यनानुदिष्टः ४
अश्वायन्तो गव्यन्तो वाजयन्तो हवामहे त्वोपगन्तवा उ ।
आभूषन्तस्ते सुमतौ नवायां वयमिन्द्र त्वा शनं हुवेम ५

(१६१) एकषष्ट्युत्तरशततमं सूक्तम्

(१-५) पञ्चर्चस्यास्य सूक्तस्य प्राजापत्यो यक्ष्मनाशन ऋषिः । इन्द्राग्नी
राजयक्ष्मघ्नरूपोऽथो वा देवता । (१-४) प्रथमादिचतुर्त्रिंशत्वां त्रिष्टुप्, (५)

पञ्चम्याश्चानुष्टुप् छन्दसी

मुञ्चामि त्वा हविषा जीवनाय क मञ्जातयुद्धमादुत राजयुद्धमात् ।
 ग्राहिर्जग्राह यदि वैतदेनं तस्या इन्द्राग्नी प्र मुमुक्तमेनम् १
 यदि क्षितायुर्यदि वा परेतो यदि मृत्योरन्तिकं नीत एव ।
 तमा हरामि निर्ऋतेरुपस्था दस्पर्षमेनं शतशारदाय २
 सहस्राक्षेण शतशारदेन शतायुषा हविषाहर्षमेनम् ।
 शतं यथेमं शरदो नयातीन्द्रो विश्वस्य दुरितस्य पारम् ३
 शतं जीव शरदो वर्धमानः शतं हेमन्ताञ्छतमु वसन्तान् ।
 शतमिन्द्राग्नी संविता बृहस्पतिः शतायुषा हविषेमं पुनर्दुः ४
 आहर्षि त्वाविदं त्वा पुनरागाः पुनर्नव ।
 सर्वाङ्घ्र्य सर्वं ते चक्षुः सर्वमायुश्च तेऽविदम् ५

(१६२) द्विषष्ट्युत्तरशततमं सूक्तम्

(१-६) षड्चस्यास्य सूक्तस्य ब्राह्मो रक्षोहा ऋषिः । गर्भसमाधानरूपोऽर्थो देवता
 । अनुष्टुप् छन्दः

ब्रह्मणाग्निः संविदानो रक्षोहा बाधतामितः ।
 अमीवा यस्ते गर्भं दुर्णामा योनिमाशयै १
 यस्ते गर्भममीवा दुर्णामा योनिमाशयै ।
 अग्निष्टं ब्रह्मणा सह निष्क्रव्यादमनीनशत् २
 यस्ते हन्ति पतर्यन्तं निषत्सुं यः संरीसृपम् ।
 जातं यस्ते जिघांसति तमितो नाशयामसि ३
 यस्त ऊरू विहरं त्यन्तरा दंपती शयै ।
 योनिं यो अन्तरारेळिह तमितो नाशयामसि ४
 यस्त्वा भ्राता पतिर्भूत्वा जारो भूत्वा निपद्यते ।
 प्रजां यस्ते जिघांसति तमितो नाशयामसि ५
 यस्त्वा स्वप्नेन तमसा मोहयित्वा निपद्यते ।
 प्रजां यस्ते जिघांसति तमितो नाशयामसि ६

(१६३) त्रिषष्ट्युत्तरशततमं सूक्तम्

(१-६) षड्चस्यास्य सूक्तस्य काश्यपो विवृहा ऋषिः । यद्धमनाशनरूपोऽर्थो

देवता । अनुष्टुप् छन्दः
 अक्षीभ्यां ते नासिकाभ्यां कर्णाभ्यां छुबुकादधि ।
 यद्धमं शीर्षण्यं मुस्तिष्कां जिह्वाया वि वृहामि ते १
 ग्रीवाभ्यस्त उष्णिहाभ्यः कीकसाभ्यो अनूक्यात् ।
 यद्धमं दोषण्यं मंसाभ्यां बाहुभ्यां वि वृहामि ते २
 आन्त्रेभ्यस्ते गुदाभ्यो वनिष्ठोर्हदयादधि ।
 यद्धमं मर्तस्त्राभ्यां यक्नः प्लाशिभ्यो वि वृहामि ते ३
 ऊरुभ्यां ते अष्टीवद्भ्यां पाष्णिभ्यां प्रपदाभ्याम् ।
 यद्धमं श्रोणिभ्यां भासदा ब्रंससो वि वृहामि ते ४
 मेहनाद्वनंकरणा ल्लोमभ्यस्ते नखेभ्यः ।
 यद्धमं सर्वस्मादात्मन स्तमिदं वि वृहामि ते ५
 अङ्गादङ्गाल्लोमोलोमो जातं पर्वणिपर्वणि ।
 यद्धमं सर्वस्मादात्मन स्तमिदं वि वृहामि ते ६

(१६४) चतुःषष्ट्युत्तरशततमं सूक्तम्

(१-५) पञ्चर्चस्यास्य सूक्तस्याङ्गिरसः प्रचेता ऋषिः । दुःस्वप्ननाशनरूपोऽर्थो देवता
 । (१-२, ४) प्रथमाद्वितीयाचतुर्थीनामृचामनुष्टुप्, (३) तृतीयायास्त्रिष्टुप्, (५)
 पञ्चम्याश्च पङ्क्तिश्छन्दांसि

अपैहि मनसस्पते ऽपं क्राम पुरश्चर ।
 पुरो निर्ऋत्या आ चक्ष्व बहुधा जीवतो मनः १
 भद्रं वै वरं वृणते भद्रं युञ्जन्ति दक्षिणम् ।
 भद्रं वैवस्वते चक्षुर्बहुत्रा जीवतो मनः २
 यदाशसा निःशसाभिशसौ पारिम जाग्रतो यत् स्वपन्तः ।
 अग्निर्विश्वान्यप दुष्कृता न्यजुष्टान्यारे अस्मद् दधातु ३
 यदिन्द्र ब्रह्मणस्पते ऽभिद्रोहं चरामसि ।
 प्रचेता न आङ्गिरसो द्विषतां पात्वंहसः ४
 अजैष्माद्यासनाम् चा ऽभूमानागसो वयम् ।
 जाग्रत्स्वप्नः संङ्कल्पः पापो यं द्विष्मस्तं स ऋच्छतु यो नो द्वेष्टि तमृच्छतु ५

(१६५) पञ्चषष्ट्युत्तरशततमं सूक्तम्

(१-५) पञ्चर्चस्यास्य सूक्तस्य नैर्ऋतः कपोत ऋषिः । विश्वे देवा देवताः ।

त्रिष्टुप् छन्दः

देवाः कपोत इषितो यदिच्छन् दूतो निर्ऋत्या इदमाज्जगाम ।
तस्मा अर्चाम कृण्वाम निष्कृतिं शं नो अस्तु द्विपदे शं चतुष्पदे १
शिवः कपोत इषितो नो अस्त्वनागा देवाः शकुनो गृहेषु ।
अग्निर्हि विप्रो जुषतां हविर्नः परि हेतिः पक्षिणी नो वृणक्तु २
हेतिः पक्षिणी न दभात्यस्मानाष्ट्यां पदं कृणुते अग्निधानै ।
शं नो गोर्भ्यश्च पुरुषेभ्यश्चास्तु मा नो हिंसीद्विह देवाः कपोतः ३
यदुलूको वर्दति मोषमेत द्यत् कपोतः पदमग्रौ कृणोति ।
यस्य दूतः प्रहित एष एतत् तस्मै यमाय नमो अस्तु मृत्यवे ४
ऋचा कपोत नुदत प्रणोद मिषं मदन्तः परि गां नयध्वम् ।
संयोपर्यन्तो दुरितानि विश्वा हित्वा न ऊर्जं प्र पतात्पतिष्ठः ५

(१६६) षट्षष्ट्युत्तरशततमं सूक्तम्

(१-५) पञ्चर्चस्यास्य सूक्तस्य वैराजः शाक्वरो वा ऋषभ ऋषिः । सपत्नरूपोऽर्थो
देवता । (१-४) प्रथमादिचतुर्ऋचामनुष्टुप्, (५) पञ्चम्याश्च महापङ्क्तिश्छन्दसी
ऋषभं मां समानानां सपत्नानां विषासहिम् ।
हन्तारं शत्रूणां कृधि विराजं गोपतिं गवाम् १
अहर्मस्मि सपत्नहेन्द्र इवारिष्टो अक्षतः ।
अधः सपत्ना मे पदो रिमे सर्वे अभिष्टिताः २
अत्रैव वोऽपि नह्याम्युभे आर्त्नी इव ज्यया ।
वाचस्पते नि षेधेमान् यथा मदधरं वदान् ३
अभिभूरहमार्गमं विश्वकर्मेण धाम्ना ।
आ वञ्चित्तमा वो वृत मा वोऽहं समितिं ददे ४
योगक्षेमं व आदायाऽहं भूयासमुत्तम आ वो मूर्धानमक्रमीम् ।
अधस्पदान्म उद्वदत मण्डूका इवोदका न्मण्डूका उदकादिव ५

(१६७) सप्तषष्ट्युत्तरशततमं सूक्तम्

(१-४) चतुर्ऋचस्यास्य सूक्तस्य विश्वामित्रजमदग्नी ऋषी । (१-२, ४)
प्रथमाद्वितीयाचतुर्थीनामृचामिन्द्रः, (३) तृतीयायाश्च

सोमवरुणबृहस्पत्यनुमतिमघवद्भ्रातृविधातारो देवताः । जगती छन्दः
तुभ्येदमिन्द्र परि षिच्यते मधु त्वं सुतस्य कलशस्य राजसि ।
त्वं रयिं पुरुवीरामु नस्कृधि त्वं तर्पः परितप्याजयः स्वः १
स्वर्जितं महि मन्दानमन्धसो हवामहे परि शक्रं सुताँ उपे ।
इमं नो यज्ञमिह बोध्या गहि स्पृधो जयन्तं मघवानमीमहे २
सोमस्य राज्ञो वरुणस्य धर्मणि बृहस्पतेरनुमत्या उ शर्मणि ।
तवाहमद्य मघवन्नपस्तुतौ धातुर्विधातः कलशाँ अभक्षयम् ३
प्रसूतो भक्षमकरं चरावपि स्तोमं चेमं प्रथमः सूरिरुन्मृजे ।
सुते सातेन यद्यागमं वां प्रति विश्वामित्रजमदग्नी दमै ४

(१६८) अष्टषष्ट्युत्तरशततमं सूक्तम्

(१-४) चतुर्ऋचस्यास्य सूक्तस्य वातायनोऽनिल ऋषिः । वायुर्देवता ।

त्रिष्टुप् छन्दः

वातस्य नु महिमानं रथस्य रुजन्नैति स्तनयन्नस्य घोषः ।
दिविस्पृग्यात्यरुणानि कृणवन्नतो एति पृथिव्या रेणुमस्यन् १
सं प्रेरते अनु वातस्य विष्ठा ऐर्न गच्छन्ति समनं न योषाः ।
ताभिः सयुक् सरथं देव ईयते ऽस्य विश्वस्य भुवनस्य राजा २
अन्तरिक्षे पृथिभिरीयमानो न नि विशते कतमच्चनाहः ।
अपां सर्वा प्रथमजा ऋतावा क्वं स्विज्जातः कुत आ बभूव ३
आत्मा देवानां भुवनस्य गर्भो यथावृशं चरति देव एषः ।
घोषा इदस्य शृणिवरे न रूपं तस्मै वाताय हविषा विधेम ४

(१६९) एकोनसप्तत्युत्तरशततमं सूक्तम्

(१-४) चतुर्ऋचस्यास्य सूक्तस्य काक्षीवतः शबर ऋषिः । गावो देवताः ।

त्रिष्टुप् छन्दः

मयोभूर्वातो अभि वातूस्त्रा ऊर्जस्वतीरोषधीरा रिशन्ताम् ।
पीवस्वतीर्जीवधन्याः पिबन्त्ववसायं पद्वतै रुद्र मृळ १
याः सरूपा विरूपा एकरूपा यासामग्निरिष्ट्या नामानि वेद ।
या अङ्गिरसस्तपसेह चक्रुस्ताभ्यः पर्जन्य महि शर्म यच्छ २
या देवेषु तन्वश्मैरयन्त यासां सोमो विश्वा रूपाणि वेद ।

ता अस्मभ्यं पर्यसा पिन्वमानाः प्रजावतीरिन्द्र गोष्ठे रिरीहि ३
 प्रजापतिर्मह्यमेता रराणो विश्वेदेवैः पितृभिः संविदानः ।
 शिवाः सतीरुप नो गोष्ठमाकस्तासां वयं प्रजया सं संदेम ४

(१७०) सप्तत्युत्तरशततमं सूक्तम्

(१-४) चतुर्ऋचस्यास्य सूक्तस्य सूर्यो विभ्राडृषिः । सूर्यो देवता । (१-३)

प्रथमादितृचस्य जगती, (४) चतुर्थ्या ऋचश्चास्तारपङ्क्तिश्छन्दसी

विभ्राड् बृहत् पिबतु सोम्यं मध्वायुर्दधद्यज्ञपतावविहुतम् ।
 वातजूतो यो अभिरक्षति त्मना प्रजाः पुपोष पुरुधा वि राजति १
 विभ्राड् बृहत् सुभृतं वाजसातमं धर्मन् दिवो धरुणैः सत्यमर्पितम् ।
 अमित्रहा वृत्रहा दस्युहंतमं ज्योतिर्जज्ञे असुरहा संपत्रहा २
 इदं श्रेष्ठं ज्योतिषां ज्योतिरुत्तमं विश्वजिद्धं न जिदुच्यते बृहत् ।
 विश्वभ्राड् भ्राजो महि सूर्यो दृश उरु पंप्रथे सह ओजो अच्युतम् ३
 विभ्राजञ्ज्योतिषा स्वर्गच्छो रोचनं दिवः ।
 येनेमा विश्वा भुर्वनान्याभृता विश्वकर्मणा विश्वदेव्यावता ४

(१७१) एकसप्तत्युत्तरशततमं सूक्तम्

(१-४) चतुर्ऋचस्यास्य सूक्तस्य भार्गव इट ऋषिः । इन्द्रो देवता । गायत्री छन्दः
 त्वं त्यमिटतो रथ मिन्द्र प्रावः सुतावतः । अशृणोः सोमिनो हवम् १
 त्वं मुखस्य दोर्धतुः शिरोऽव त्वचो भरः । अगच्छः सोमिनो गृहम् २
 त्वं त्यमिन्द्र मर्त्यमास्त्रबुधाय वेन्यम् । मुहुः श्रथ्ना मनस्यवै ३
 त्वं त्यमिन्द्र सूर्यं पश्चा सन्तं पुरस्कृधि । देवानां चित्तिरो वशम् ४

(१७२) द्विसप्तत्युत्तरशततमं सूक्तम्

(१-४) चतुर्ऋचस्यास्य सूक्तस्याङ्गिरसः संवर्त ऋषिः । उषा देवता । द्विपदा
 विराट् छन्दः

आ याहि वनसा सह गावः सचन्त वर्तनिं यदूर्धभिः १
 आ याहि वस्व्या धिया मंहिष्ठो जारयन्मखः सुदानुभिः १ २
 पितृभृतो न तन्तुमित् सुदानवः प्रति दध्मो यजामसि ३
 उषा अप स्वसुस्तमः सं वर्तयति वर्तनिं सुजातता २ ४

(१७३) त्रिसप्तत्युत्तरशततमं सूक्तम्

(१-६) षडृचस्यास्य सूक्तस्याङ्गिरसो ध्रुव ऋषिः । राजस्तुतिर्देवता ।

अनुष्टुप् छन्दः

आ त्वा॑हा॒र्षम॒न्तरै॑धि ध्रु॒वस्ति॒ष्ठावि॑चाचलिः ।
वि॒श॑स्त्वा॒ सर्वा॑ वाञ्छन्तु॒ मा त्वद्रा॑ष्ट्रमधि॒ भ्रशत् १
इ॒हैवै॑धि॒ मापं॑ च्योष्टाः॒ पर्व॑त इवावि॒चाचलिः॑ ।
इन्द्र॑ इ॒वेह॑ ध्रु॒वस्ति॒ष्ठे ह॒ राष्ट्र॑मु॒ धारय॑ २
इ॒ममिन्द्रो॑ अ॒दीध॑रद् ध्रु॒वं ध्रु॒वेण॑ ह॒विषा॑ ।
तस्मै॑ सोमो॒ अधि॑ ब्रव॒त् तस्मा॑ उ॒ ब्रह्म॑ण॒स्पतिः॑ ३
ध्रु॒वा द्यौर्ध्रु॒वा पृ॑थि॒वी ध्रु॒वासः॑ पर्व॒ता इमे॑ ।
ध्रु॒वं विश्व॑मि॒दं जग॑द् ध्रु॒वो राजा॑ वि॒शाम॑यम् ४
ध्रु॒वं ते॒ राजा॑ वरु॒णो ध्रु॒वं दे॒वो बृ॒हस्प॑तिः ।
ध्रु॒वं त॒ इन्द्र॑श्चाग्निश्च॒ राष्ट्रं॑ धार॒यतां॑ ध्रु॒वम् ५
ध्रु॒वं ध्रु॒वेण॑ ह॒विषा॑ ऽभि सोमं॒ मृशा॑मसि ।
अथो॑ त॒ इन्द्रः॑ के॒वली॑ वि॒शो ब॑लि॒हर्त॑स्करत् ६

(१७४) चतुःसप्तत्युत्तरशततमं सूक्तम्

(१-५) पञ्चर्चस्यास्य सूक्तस्याङ्गिरसोऽभीवर्त ऋषिः । राजस्तुतिर्देवता ।

अनुष्टुप् छन्दः

अ॒भीव॑र्तेन॒ ह॒विषा॑ येनेन्द्रो॒ अभि॑वावृ॒ते ।
तेना॒स्मान् ब्र॑ह्मण॒स्पते॑ ऽभि॒ राष्ट्रा॑य॒ वर्तय॑ १
अ॒भिवृ॑त्य॒ सप॑त्ना॒ न॒भि या॒ नो अ॑रा॒तयः॑ ।
अ॒भि पृ॑त॒न्यन्तं॑ ति॒ष्ठा ऽभि॑ यो न॒ इ॒रस्य॑ति २
अ॒भि त्वा॑ दे॒वः सं॒वि॒ता ऽभि॑ सोमो॒ अवी॑वृ॒तत् ।
अ॒भि त्वा॑ वि॒श्वा भू॒ता न्य॑भीव॒र्तो यथा॑स॒सि ३
येनेन्द्रो॑ ह॒विषा॑ कृ॒त्व्यभ॑वद् द्यु॒म्र्यु॑त्तमः ।
इ॒दं तद॑क्रि॒ देवा॑ अस॒प॒तः किला॑भु॒वम् ४
अ॒स॒प॒तः स॑प॒त॒हा ऽभि॑रा॒ष्ट्रो वि॑षा॒सहिः॑ ।
यथा॑हमे॒षां भू॑तानां॒ वि॒राजा॑नि॒ जन॑स्य च ५

(१७५) पञ्चसप्तत्युत्तरशततमं सूक्तम्

(१-४) चतुर्ऋचस्यास्य सूक्तस्यार्बुदिः सार्प ऊर्ध्वग्रावा ऋषिः । ग्रावाणो देवताः
। गायत्री छन्दः

प्र वो॑ ग्रावाणः सवि॒ता दे॒वः सु॒वतु॑ धर्म॒णा । धूर्षु॑ यु॒ज्यध्वं॑ सु॒नुत १
ग्रावा॑णो अप॒ दु॒च्छुना॑ म॒प॒ सेधत॑ दु॒र्मति॑म् । उ॒स्त्राः क॑र्त॒न भेष॑जम् २
ग्रावा॑ण उ॒परि॑ष्वा म॒हीय॑न्ते स॒जोष॑सः । वृ॒ष्णे द॑र्ध॒तो वृ॒ष्णय॑म् ३
ग्रावा॑णः सवि॒ता नु वो॑ दे॒वः सु॒वतु॑ धर्म॒णा । यज॑मानाय सु॒न्वते ४

(१७६) षट्सप्तत्युत्तरशततमं सूक्तम्

(१-४) चतुर्ऋचस्यास्य सूक्तस्यार्भवः सूनृऋषिः । (१) प्रथमर्च ऋभवः, (२-४)
द्वितीयादितृचस्य चाग्निर्देवता । (१, ३-४) प्रथमर्चस्तृतीयाचतुर्थ्योरनुष्टुप्, (२)
द्वितीयायाश्च गायत्री छन्दसी

प्र सू॒नव॑ ऋ॒भूणां॑ बृ॒हन्न॑वन्त वृ॒जना॑ ।
क्षा॒मा ये वि॒श्वधा॑य॒सो ऽश्न॑न् धे॒नुं न मा॑तरम् १
प्र दे॒वं दे॒व्या धि॒या भर॑ता जा॒तवै॑दसम् ।
ह॒व्या नो॑ व॒क्षदा॑नुषक् २
अ॒यमु॑ ष्य प्र दे॒वयु॑ ही॒ता य॒ज्ञाय॑ नीयते ।
रथो॑ न यो॒रभी॑र्वृ॒तो घृ॑णी॒वाञ्चे॑तति॒ त्मना॑ ३
अ॒यम॑ग्नि॒रुरु॑ष्य॒त्य मृ॑ता॒दिव॑ जन्म॒नः ।
सह॑सश्चित् सही॒यान् दे॒वो जी॑वा॒तवे॑ कृतः ४

(१७७) सप्तसप्तत्युत्तरशततमं सूक्तम्

(१-३) तृचस्यास्य सूक्तस्य प्राजापत्यः पतङ्ग ऋषिः । मायाभेदो देवता । (१)
प्रथमर्चो जगती, (२-३) द्वितीयातृतीययोश्च त्रिष्टुप् छन्दसी

प॒त॒ङ्गम॒क्तम॑सुरस्य मा॒यया॑ ह॒दा प॑श्यन्ति॒ मन॑सा वि॒पश्चितः॑ ।
स॒मुद्रे॑ अ॒न्तः क॒वयो॑ वि च॒क्षते॑ मरी॒चीनां॑ प॒दमि॑च्छन्ति॒ वेध॑सः १
प॒त॒ङ्गो वा॒चं मन॑सा बि॒भर्ति॑ तां ग॒न्धर्वो॑ऽवदु॒द्गर्भे॑ अ॒न्तः ।
तां द्यो॑त॒मानां॑ स्व॒र्यं मनी॑षा मृ॒तस्य॑ प॒दे क॒वयो॑ नि पा॒न्ति २
अ॒पश्यं॑ गो॒पाम॑नि॒पद्य॑मान॒मा च॑ परा॒ च प॒थिभि॑श्चर॒न्तम् ।

स स॒धीचीः स वि॒षूचीर्व॒सान् आ व॑रीव॒र्ति भुव॑नेष्व॒न्तः ३

(१७८) अष्टसप्तत्युत्तरशततमं सूक्तम्

(१-३) तृचस्यास्य सूक्तस्य तादर्योऽरिष्टनेमिऋषिः । तादर्यो देवता ।

त्रिष्टुप् छन्दः

त्यमू षु वा॒जिनं दे॒वजू॑तं स॒हावा॑नं त॒रु॒तारं॑ रथानाम् ।
अ॒रि॒ष्टने॑मिं पृ॒तना॑र्ज॒माशुं स्व॒स्तये॑ ता॒दर्य॑मिहा हु॒वेम १
इन्द्र॑स्येव रा॒तिमा॑जोहु॒वानाः स्व॒स्तये॑ ना॒वमि॑वा रु॒हेम ।
उ॒र्वी न पृ॑थ्वी ब॒हु॒ले ग॑र्भीरे॒ मा वा॑मे॒तौ मा परे॑तौ रिषाम २
स॒द्यश्चि॒द्यः श॑वसा॒ पञ्च॑ कृ॒ष्टीः सूर्य॑ इव॒ ज्योति॑षा॒पस्त॑तान् ।
स॒हस्र॑साः श॒तसा॑ अ॒स्य रं॒हिर्न॑ स्मा॒ वर॑न्ते यु॒वतिं॑ न श॒र्याम् ३

(१७९) एकोनाशीत्युत्तरशततमं सूक्तम्

(१-३) तृचस्यास्य सूक्तस्य (१) प्रथमर्च औशीनरः शिबिः, (२) द्वितीयायाः काशिराजः प्रतर्दनः, ३ तृतीयायाश्च रौहिदश्वो वसुमना ऋषयः । इन्द्रो देवता ।

(१) प्रथमर्चोऽनुष्टुप्, (२-३) द्वितीयातृतीययोश्च त्रिष्टुप् छन्दसी

उत्तिष्ठ॑ताव॒ पश्य॑ते न्द्र॒स्य भा॑गमृ॒त्विय॑म् ।
यदि॑ श्रा॒तो जु॒होत॑न् यद्यश्रा॒तो म॑म॒त्तनं॑ १
श्रा॒तं ह॒विरो॑ ष्विन्द्र॒ प्र या॑हि ज॒गाम॑ स॒रो अ॒ध्वनो॑ विम॒ध्यम् ।
परि॑ त्वा॒सते॑ नि॒धिभिः॑ सखा॒यः कु॒लपा॑ न ब्रा॒जप॑तिं चर॒न्तम् २
श्रा॒तं म॑न्य ऊ॒र्धनि॑ श्रा॒तम॑ग्नौ सुश्रा॒तं म॑न्ये तदृ॒तं न॑वीयः ।
मा॒र्ध्य॑न्दि॒नस्य॑ स॒र्वन॑स्य द॒ध्नः पि॒बैन्द्र॑ वज्रिन् पुरु॒कृञ्जु॑षा॒णः ३

(१८०) अशीत्युत्तरशततमं सूक्तम्

(१-३) तृचस्यास्य सूक्तस्यैन्द्रो जय ऋषिः । इन्द्रो देवता । त्रिष्टुप् छन्दः

प्र स॑साहिषे पुरु॒हूत॑ शत्रू॒ञ्ज्येष्ठे॑स्ते शु॒ष्मं इ॒ह रा॒तिर॑स्तु ।
इन्द्रा॑ भ॒र द॑क्षिणे॒ना व॑सू॒नि प॑तिः सिन्धू॒नाम॑सि रे॒वती॑नाम् १
मृ॒गो न भी॑मः कु॒चरो॑ गि॒रि॒ष्ठाः प॑रा॒वत॑ आ ज॒गन्था॑ पर॒स्याः ।
सृ॒कं स॑शा॒यं प॒विमि॑न्द्र ति॒ग्मं वि॑ शत्रू॒न् ताळि॑ह॒ वि मृ॑धो॒ नुद॑स्व २
इन्द्र॑ द॒क्षत्र॑म॒भि वा॑ममोजो ऽजा॒यथा॑ वृषभ च॒र्षणी॑नाम् ।

अपानुदो जनममित्रयन्तं मुरुं देवेभ्यो अकृणोरु लोकम् ३

(१८१) एकाशीत्युत्तरशततमं सूक्तम्

(१-३) तृचस्यास्य सूक्तस्य (१) प्रथमर्चो वासिष्ठः प्रथः, (२) द्वितीयाया भारद्वाजः सप्रथः, (३) तृतीयायाश्च सौर्यो घर्म ऋषयः । विश्वे देवा देवताः ।

त्रिष्टुप् छन्दः

प्रथश्च यस्य सप्रथश्च नामा ऽऽनुष्टुभस्य हविषो हविर्यत् ।
धातुर्द्युतानात् सवितुश्च विष्णो रथन्तरमा जभारा वसिष्ठः १
अविन्दन्ते अतिहितं यदासी द्यज्ञस्य धाम परमं गुहा यत् ।
धातुर्द्युतानात् सवितुश्च विष्णो भ्रद्वाजो बृहदा चक्रे अग्नेः २
तैऽविन्दन् मनसा दीध्याना यजुः ष्कन्नं प्रथमं देवयानम् ।
धातुर्द्युतानात् सवितुश्च विष्णो रा सूर्यादभरन् घर्ममेते ३

(१८२) द्व्यशीत्युत्तरशततमं सूक्तम्

(१-३) तृचस्यास्य सूक्तस्य बार्हस्पत्यस्तपुर्मूर्धा ऋषिः । बृहस्पतिर्देवता ।

त्रिष्टुप् छन्दः

बृहस्पतिर्नयतु दुर्गहा तिरः पुनर्नेषदुघशसाय मन्म ।
क्षिपदशस्तिमप दुर्मतिं ह न्नथा करद्यजमानाय शं योः १
नराशंसो नोऽवतु प्रयाजे शं नो अस्त्वनुयाजो हवेषु ।
क्षिपदशस्तिमप दुर्मतिं ह न्नथा करद्यजमानाय शं योः २
तपुर्मूर्धा तपतु रक्षसो ये ब्रह्मद्विषः शरवे हन्तवा उ ।
क्षिपदशस्तिमप दुर्मतिं ह न्नथा करद्यजमानाय शं योः ३

(१८३) त्र्यशीत्युत्तरशततमं सूक्तम्

(१-३) तृचस्यास्य सूक्तस्य प्राजापत्यः प्रजावानृषिः । (१) प्रथमर्चो यजमानः,
(२) द्वितीयाया यजमानपत्नी, (३) तृतीयायाश्च होत्राशिषो देवताः । त्रिष्टुप् छन्दः
अपश्यं त्वा मनसा चेकितानं तपसो जातं तपसो विभूतम् ।
इह प्रजामिह रयिं रराणः प्र जायस्व प्रजया पुत्रकाम १
अपश्यं त्वा मनसा दीध्यानां स्वारां तनू ऋत्वये नार्धमानाम् ।
उप मामुच्चा युवतिर्बभूयाः प्र जायस्व प्रजया पुत्रकामे २

अ॒हं ग॒र्भ॑म॒दधा॑मोष॒धी ष्व॒हं वि॒श्वेषु॑ भुव॒नेष्व॒न्तः ।
अ॒हं प्र॒जा अ॒ज॒न॒यं पृथि॒व्या म॒हं ज॒नि॒भ्यो अ॒प॒रीषु॑ पु॒त्रान् ३

(१८४) चतुरशीत्युत्तरशततमं सूक्तम्

(१-३) तृचस्यास्य सूक्तस्य गर्भकर्ता त्वष्टा प्राजापत्यो विष्णुर्वा ऋषिः । (१)
प्रथमर्चो विष्णुत्वष्टृप्राजापतिधातारः, (२) द्वितीयायाः सिनीवालीसरस्वत्यश्विनः,
(३) तृतीयायाश्चाश्विनौ देवताः । अनुष्टुप् छन्दः

विष्णु॒र्योनिं॑ कल्पयतु॒ त्वष्टा॑ रू॒पाणिं॑ पिंशतु ।
आ सिञ्च॑तु प्र॒जाप॑ति॒र्धाता॑ गर्भं दधातु ते १
गर्भं॑ धेहि सिनीवालि॒ गर्भं॑ धेहि सरस्वति ।
गर्भं॑ ते अ॒श्विनौ॑ दे॒वा वा ध॑त्तां पुष्कर॒स्त्रजा॑ २
हि॒र॒ण्य॒यी अ॒र॒णी यं निर्म॑न्थतो अ॒श्विना॑ ।
तं ते॒ गर्भं॑ हवामहे द॒श॒मे मा॒सि सू॒त॒वे ३

(१८५) पञ्चाशीत्युत्तरशततमं सूक्तम्

(१-३) तृचस्यास्य सूक्तस्य वारुणिः सत्यधृतिर्ऋषिः । आदित्यो देवता ।
गायत्री छन्दः

महिं॑ त्रीणामवोऽस्तु द्यु॒क्षं मि॒त्र॒स्यार्य॑म्णः । दुरा॒ध॒र्षं वरु॑णस्य १
न॒हि तेषा॑म॒मा च॒न नाध्व॑सु वार॒णेषु॑ । ईशे॑ रि॒पुर॒घशंसः॑ २
यस्मै॑ पु॒त्रासो॑ अ॒दितेः॑ प्र जी॒वसे॑ म॒र्त्याय॑ । ज्योति॒र्यच्छ॑न्त्यज॒स्त्रम् ३

(१८६) षडशीत्युत्तरशततमं सूक्तम्

(१-३) तृचस्यास्य सूक्तस्य वातायन उल ऋषिः । वायुर्देवता । गायत्री छन्दः
वा॒त आ वा॑तु भेष॒जं श॑भु म॒योभु॑ नो ह॒दे । प्र ण॑ आ॒र्यूषि॑ तारिषत् १
उ॒त वा॑त पि॒तासि॑ न उ॒त भ्रा॑तो॒त नः॑ सखा । स नो जी॒वात॑वे कृधि २
यद॒दो वा॑त ते गृ॒हेऽ॒मृत॑स्य नि॒धिर्हितः॑ । ततो॑ नो देहि जी॒वसे॑ ३

(१८७) सप्ताशीत्युत्तरशततमं सूक्तम्

(१-५) पञ्चर्चस्यास्य सूक्तस्याग्नेयो वत्स ऋषिः । अग्निर्देवता । गायत्री छन्दः

प्राग्रये वाचमीरय वृषभाय क्षितीनाम् । स नः पर्षदति द्विषः १
 यः परस्याः परावत स्तिरो धन्वातिरोचते । स नः पर्षदति द्विषः २
 यो रक्षांसि निजूर्वति वृषा शक्रेण शोचिषा । स नः पर्षदति द्विषः ३
 यो विश्वाभि विपश्यति भुवना सं च पश्यति । स नः पर्षदति द्विषः ४
 यो अस्य पारे रजसः शक्रो अग्निरजायत । स नः पर्षदति द्विषः ५

(१८८) अष्टाशीत्युत्तरशततमं सूक्तम्

(१-३) तृचस्यास्य सूक्तस्याग्नेयः श्येन ऋषिः । जातवेदा अग्निर्देवता ।
 गायत्री छन्दः

प्र नूनं जातवेदस मश्वं हिनोत वाजिनम् । इदं नो बर्हिरासदे १
 अस्य प्र जातवेदसो विप्रवीरस्य मीळहुषः । महीर्मियर्मि सुष्टुतिम् २
 या रुचो जातवेदसो देवत्रा हव्यवाहनीः । ताभिर्नो यज्ञमिन्वतु ३

(१८९) एकोनवत्युत्तरशततमं सूक्तम्

(१-३) तृचस्यास्य सूक्तस्य सारपराज्ञी ऋषिका । आत्मा सूर्यो वा देवता ।
 गायत्री छन्दः

आयं गौः पृश्निरक्रमी दसदन्मातरं पुरः । पितरं च प्रयन्त्स्वः १
 अन्तश्चरति रोचना ऽस्य प्राणादपानती । व्यख्यन्महिषो दिवम् २
 त्रिंशद्धाम वि राजति वाक् पतङ्गाय धीयते । प्रति वस्तोरह द्युभिः ३

(१९०) नवत्युत्तरशततमं सूक्तम्

(१-३) तृचस्यास्य सूक्तस्य माधुच्छन्दसोऽघमर्षण ऋषिः । भाववृत्तं देवता ।
 अनुष्टुप् छन्दः

ऋतं च सत्यं चाभीद्धात् तपसोऽर्ध्याजायत । ततो रात्र्यजायत ततः समुद्रो
 अर्णवः १
 समुद्रार्णवादधि संवत्सरो अजायत । अहोरात्राणि विदध द्विश्वस्य मिषुतो
 वशी २
 सूर्याचन्द्रमसौ धाता यथापूर्वमकल्पयत् । दिवं च पृथिवीं चान्तरिक्षमथो

स्वः ३

(१६१) एकनवत्युत्तरशततमं सूक्तम्

(१-४) चतुर्ऋचस्यास्य सूक्तस्याङ्गिरसः संवनन ऋषिः । (१) प्रथमर्चोऽग्निः,

(२-४) द्वितीयादितृचस्य च सञ्ज्ञानं देवते । (१-२, ४)

प्रथमाद्वितीयाचतुर्थीनामृचामनुष्टुप्, (३) तृतीयायाश्च त्रिष्टुप् छन्दसी

संसमिद्युवसे वृषन्नग्ने विश्वान्यर्य आ ।

इळस्पदे समिध्यसे स नो वसून्या भर १

सं गच्छध्वं सं वदध्वं सं वो मनांसि जानताम् ।

देवा भागं यथा पूर्वे संजानाना उपासते २

समानो मन्त्रः समितिः समानी समानं मनः सह चित्तमेषाम् ।

समानं मन्त्रमभि मन्त्रये वः समानेन वो हविषा जुहोमि ३

समानी व आकूतिः समाना हृदयानि वः ।

समानमस्तु वो मनो यथा वः सुसहासति ४

इति दशमं मण्डलं समाप्तम्

ऋग्वेदसंहिता समाप्ता

मन्त्रसङ्ख्या

नवममण्डलस्यान्तपर्यन्तं ८७६२

दशममण्डलस्य १७५४

वालखिल्यसहितः सर्वयोगः १०५५२

वालखिल्यमन्त्राः ८०

वालखिल्यरहितः सर्वयोगः १०४७२